

Holy Bible

Aionian **Edition®**

Библия пы сэрвицко ромско чиб

Servi Romani Bible

Holy Bible Aionian Edition ®
Библия пы сэрвицко ромско чиб
Servi Romani Bible
Language: Romani Vlax, Servi
Balkans

Creative Commons Attribution ShareAlike 4.0 International, 2018-2026

Source text: eBible.org

Source version: 8/8/2026

Source copyright: Creative Commons Attribution ShareAlike 4.0

Pioneers.org, 2021

Formatted by Speedata Publisher 5.9.2 (Pro) on 8/31/2026

100% Free to Copy and Print

TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language

Translator resources at <https://AionianBible.org/Third-Party-Publisher-Resources>

Volunteer help and comments are welcome and appreciated!

Celebrate Jesus Christ's victory of grace!

Preface

Servi Romani at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Servi Romani at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.
08/31/26 - 539 translations in 291 languages with 9,609,899 verses.

Table of Contents

OLD TESTAMENT

Англунимо 1
Руфь 40
Иона 43

NEW TESTAMENT

Лукастар 47
Рындоря 75

APPENDIX
Reader's Guide
Glossary
Maps
Destiny
Illustrations, Doré

OLD TESTAMENT



Вов вытрадыня манушэ тай тховда пэ востоко садостар Эдэм херувимонэн и бари
чюри, сави пхаболас и марэлас дэ всаворэ рига, соб тэ фирисарэ дром,
саво лиджял рандятэ, сави дэл джювимо.

Англунимо 3:24

Англунимо

1 Май англэ Дэвэл стерда болыбэн тай пхув. **2** Пхув сля бинисохкири тай шуци, калимо сля упрэ барэн панен, тай Фано Дэвлэхкиро урылас упрал панэстар. **3** Дэвэл пхэнда: — Мэк авэла душлимо. Тай стердапэ душлимо. **4** Дэвэл удыххля, со душлимо сля мишто, тай вылила лэ калиматар. **5** Дэвэл акхарда душлимо «диво», а калимо — «рат». Сля бельвель, тай сля дэнзор — пэрво диво. **6** Тай пхэнда Дэвэл: — Мэк авэла сводо помашкар панэстэ, соб тэ отлэ пани панестар. **7** Дэвэл стерда сводо тай отлила пани тала сводо панестар, саво сля понад лэ. Тай ачила кади. **8** Дэвэл акхарда сводо «болыбэн». Сля бельвель, тай сля дэнзор — дуйто диво. **9** Дэвэл пхэнда: — Пани тала болыбэн мэк стидэлпэ екхтанэ, тай мэк стерэлапэ суша. Тай ачила кади. **10** Дэвэл акхарда суша «пхув», а пани, саво стидыняпэ екхтанэ, — «море». Тай удыххля Дэвэл, со када мишто. **11** — Мэк барярэл пхув всаворэ чяря: чяря, савэ анэн самбуря, тай бут породы ранден пэ пхув, савэ анэн плодуря кокаленца, — пхэнда Дэвэл. Тай ачила кади. **12** Пхув барярда бут породы чярен: чяря, дэ савэн исин самбуря, тай бут породы ранден, савэ анэн плодуря кокалицэнца. Тай удыххля Дэвэл, со када мишто. **13** Сля бельвель, тай сля дэнзор — трито диво. **14** Тай пхэнда Дэвэл: — Мэк авэна яга пэ болыбнахкиро сводо, соб отлэ диво ратятар. Мэк вонэ авэна знакэнэца, соб тэ сикавэн вряма, дивэ тай бэрша. **15** Тай мэк вонэ тэ дэн яг пэ болыбнахкиро сводо, соб тэ душол пхув. Тай ачила кади. **16** Дэвэл стерда дуй барэ яга: бари яг, соб тэ авэл хулаега дивэсэга, тай цыкныдэр яг, соб тэ авэл хулаега ратяга, а кади ж Вов стерда чергэня. **17** Дэвэл тховда лэн пэ болыбнахкиро сводо, соб вонэ тэ дэн душлимо пэ пхув, **18** тэ авэн хулаенца дивэсэга тай ратяга и тэ отлэн душлимо калиматар. Тай удыххля Дэвэл, со када мишто. **19** Сля бельвель, тай сля дэнзор — штарто диво. **20** Дэвэл пхэнда: — Мэк пхэрдёла пани джювимага, тай мэк урян понад пхув дэ сводо болыбэн чирикля. **21** Дэвэл стерда барэн морендирэн животнонэн и бут породы джювима, савэ тирёнас дэ пани, тай бут породы чириклен пхакэнца. Тай удыххля Дэвэл, со када мишто. **22** Дэвэл бахталисарда лэн тай пхэнда: — Мэк тумэндэ авэна чяворэ тай мэк лэн авэла бут, пхэрдён пани дэ море. Тай мэк чириклен авэла будэр пэ пхув. **23** Сля бельвель, тай сля дэнзор — панчто диво. **24** И пхэнда Дэвэл:

— Мэк барярэл пхув бут породы джювима: бут породы барэн тай цыкнэн животнонэн. Тай ачила кади. **25** Дэвэл стерда бут породы животнонэн, барэн тай цыкнэн зверен пэ пхув. Тай удыххля Дэвэл, со када мишто. **26** Тунчи Дэвэл пхэнда: — Стерага манушэ, Амаро образо, и тэ авэл вов поджило пэ Амэн. Мэк вов тэ авэл хулай понад морендирэн мачен, и чириклен, савэ дэ болыбэн, понад хулаимо, понад всавори пхув тай понад всаворэн животнонэн, савэ пхирэн пав пхув. **27** Кади Дэвэл стерда манушэ пав образо Пэхкиро, пав образо Дэвлэхкиро Вов стерда лэ, муршэга тай джювляга Вов стерда лэн. **28** Дэвэл бахталисарда лэн и пхэнда: — Мэк тумэндэ авэна чяворэ тай мэк лэн авэла бут. Пхэрдён пхув и заачявэн ла тэ тирэ бути важ тумэн. Авэн хулаенца понад мачен, савэ дэ морё, и чириклен, савэ дэ болыбэн, тай понад всаворя джювима, сави пхирэл пав пхув. **29** Тунчи Дэвэл пхэнда: — Мэ дав тумэнди всаворэ чяря самбуренца пав всавори пхув тай всаворэ рандя, савэ дэн плодуря кокалицэнца. Вонэ авэна тумэнди хамага. **30** Тай всаворэнди джювима пав пхув, и всаворэнди чирикленди дэ болыбэн, тай всаворэнди животнонэн, савэ пхирэн пав пхув, — всаворэнди, дэ кастэ пхурдэл джювимо, Мэ дав дэ хама всавори зэлэнь. Тай ачила кади. **31** Дэвэл подыххля пэ вса, со Вов стерда, тай вса сля фартэ мишто. Сля бельвель, тай сля дэнзор — шовто диво.

2 Кади сля стердо болыбэн тай пхув тай вса, со джювэл котэ. **2** Дэ ефтиро диво Дэвэл стерда всавори бути, сави Вов терэлас, тай дэ ефтиро диво Вов пэрэачила тэ терэ рындуря, саво Вов терэлас дыколэ. **3** Дэвэл бахталисарда ефтиро диво и терда лэ свэнто, пала када со дэ кадыва диво Вов пэрэачила тэ тирэ Пэхкирэ рындуря. **4** Акэ распхэнэлпэ пала болыбэн тай пхув, кала вонэ сле стердэ. Кала РАЙ Дэвэл терэлас пхув тай болыбэн, **5** пэ пхув инте нисо на сля: ни малятиро кустарнико, ни чяр малятири, пала када со РАЙ Дэвэл на бичялэлас пэ пхув брышынд и на сля манушэ, соб тэ терэ бути пэ пхув. **6** Кацик лэнь ваздэласпэ пхуятар и тиндярэлас всавори пхув. **7** Тунчи РАЙ Дэвэл стерда манушэ прахостар пхуятирэстар тай пхурдыня лэсти дэ ратуя джювимо, и мануш ачила джювдо. **8** РАЙ Дэвэл выбарярда садо пэ востоко, дэ Эдэмо, тай тховда котэ манушэ, савэ Вов стерда. **9** РАЙ Дэвэл выбарярда пхуятар всаворэ рандя, пэ савэн сля мишто тэ дыкхэ и савэ сле лаче дэ хама. Помашкар

дэ садо барёнас рандь, сави дэл джювимо, тай
рандь, сави дэл тэ уджянэ лачимо тай врытимо. 10
Эдмостар чюлёлас лэнь, сави тиндярэлас садо, а
дурыдэр вой розджяласпэ пэ штар лэня. 11 Перво
акхарэлпэ Пишоно: вов обчюлёл всавори пхув
Хавила, тев исин сувнак. 12 Сувнак дэ кодыя пхув
лачё. Тай инте котэ исин смола, савятэ лачё фано,
и кучотно бар шохамо. 13 Дуйто лэнь акхарэлпэ
Гихоно, вой обчюлёл всавори пхув Кушо. 14 Трито
лэнь акхарэлпэ Тигро, вой чюлёл дэ востоко
Ашшуростар. А штарто лэнь — када Евфрато. 15
РАЙ Дэвэл тховда манушэ дэ Эдэмско садо, соб
вов тэ терэл бути дэ садо тай тэ дыкхэл пала
лэстэ. 16 РАЙ Дэвэл прыпхэнда манушэсти: — Ту
галювэх тэ ха плодуря всаворэндар рандятар дэ
садо. 17 Кацик на ха рандятар, сави дэл тэ уджянэ
лачимо тай врытимо, пала када со дэ дивэ, кала ту
схага плодо латар, ту мэрэга. 18 РАЙ Дэвэл пхэнда:
— Намишто манушэсти тэ авэ екджинэсти. Мэ
терава лэсти амалэ, сар вов, саво дэла лэсти зор.
19 РАЙ Дэвэл стерда пхютар всаворэн малятирэн
зверёнэн тай всаворэн чириклен болыбнэндирэн.
Тунчи Вов анда лэн манушэстэ, соб тэ удыххэ, сар
кодэва лэн акхарэла. И сар акхарда мануш кожнонэ
животнонэ, кади и ачиля лэсти лав. 20 Кади
мануш дэня лава всаворэсти цэрутности скотости,
всаворэнди чирикленди, савэ дэ болыбэн, тай
всаворэнди зверёнэнди. Но Адамости на аракхпэ
амалэ, сар вов, саво дэла лэсти зор. 21 Тунчи РАЙ
Дэвэл засовлярда манушэ, и покы вов сута, лиля
екх лэхкиро рёбро тай затерда кодэва тхан масэга.
22 Ребростар, саво Вов вылиля манушэстар, РАЙ
Дэвэл стерда джювля и анда ла лэстэ. 23 Мануш
пхэнда: — Када кокали муэрэндар кокалендар тай
мас муэрестар масэстар. Вой авэла тэ акхарэпэ
«ромни», пала када со сля лити ромэстар. 24 Пала
када ачявэла мануш дадэ и да тай авэна екхтанэ
пэхкиряга ромняга, тай дуй ачена екх трупо. 25
Адамо и лэхкири ромни дуйджинэ сле нангэ, но на
ладжянас.

3 Всапорэндар дыконэндар зверёнэндар, савэн
стерда РАЙ Дэвэл, хронтэдэр всаворэндар сля
сап. Вов пхучля джювля: — Чяче ли пхэнда Дэвэл:
«На хан всаворэндар рандендар дэ садо»? 2
Джювли пхэнда сапэсти: — Амэ галювах тэ ха
плодуря рандэндар дэ садо. 3 Нэ Дэвэл пхэнда:
«На хан плодуря рандятар, саво помашкар дэ
садо. Тай на лэмпэ лэндэ, соб тэ на мэрэ тумэнди».
4 — Нат, тумэ на мэрэна, — пхэнда сап джювляти.
5 — Дэвэл джянэл, со кала тумэ схана лэн, тумарэ

якха оттерэнапэ тай тумэ ачена, сар дэвла, савэ
джянэн лачимо тай врытимо. 6 Тунчи джювли
удыххля, со плодо рандятар сля лачё дэ хама тай
мишто тэ дыкхэ пэ лэстэ. Джювли кади ж закамля
плодо рандятар, пала када со вов дэлас годи. Вой
лиля екх плодо тай схаля. Тунчи дэня плодо и
ромэсти, саво сля лага, и вов халас лэ. 7 Лэндэ
дуендэ якха оттердэпэ, тай вонэ полиле, со нангэ.
Тунчи вонэ ссуюдэ листонэндар инжыростар їда
тай ушаравдэ пэхкиро нангимо. 8 Бельвеляга, кала
ачиля шылалэдэр тай пхурда балвалёры, вонэ
ушундэ, сар РАЙ Дэвэл пхирэл пав садо. Адамо
и лэхкири ромни гаравдэлэ РАЕСТАР Дэвлэстар
машкар ранден дэ садо. 9 Нэ РАЙ Дэвэл акхарда
Адамо: — Тев ту? 10 Адамо пхэнда: — Мэ шундом
Тут дэ садо тай пэрэдарынём, пала када со мэ
нанго. Акэ мэ и гаравдомпэ. 11 РАЙ Дэвэл пхучля:
— Ко пхэнда тути, со ту нанго? Ту халян плодуря
рандятар, савэстар Мэ пхэндом тути тэ на ха? 12
Адамо пхэнда: — Джювли, савя Ту дэнян манди,
соб вой тэ авэл манца, — када вой дэня манди
плодо колатар рандятар, тай мэ схалём лэ. 13
Тунчи РАЙ Дэвэл пхэнда джювляти: — Со жэ ту
стердан? Джювли пхэнда: — Сап хохавда ман, акэ
мэ и халём. 14 Тунчи РАЙ Дэвэл пхэнда сапэсти:
— Пала кода, со ту стердан када, дав мрая тут
будэр всаворэстар скотостар тай всаворэн диконэн
зверёнэн! Ту авэга тэ пхирэ пэ води, ту авэга тэ ха
прахо дэ всаворэ дивэса тирэ джювима. 15 Мэ
тховава холи помашкар тут и джювля и помашкар
тирэ чяворэн и латирэн чяворэн: вов авэла тэ марэ
тут дэ шэрэ, а ту авэга тэ дандавэ лэ дэ талпа. 16
А джювляти Вов пхэнда: — Мэ терава, со тут
авэла грыжа, кала ту авэга пхари тай кала авэга
тэ бэянэ чяворэн. Ту закамэга тэ рицарэ ромэ дэ
вастэн, ай вов авэла хулай понад тут. 17 Адамости
жэ Вов пхэнда: — Кади сар ту шундан джювля тай
схалян плодо рандятар, пала савя Мэ прыпхэндом
тут: «На ха лэстар», дав мрая пала тут пхув: дэ
пхари бути ту авэга тэ ха латар дэ всаворэ дивэ
тирэ джювима. 18 Вой выбарярэла тути всаворэ
пусанэ чяря, ту авэга тэ ха малятири чярь. 19 Дэ
пытя авэла тиро муй, кала ту авэга тэ затерэ тиро
мандро, дыколэ сар на рисявэга дэ пхув, савятар
тут лиле. Ту — прахо, и дэ прахо ту рисявэга. 20
Адамо акхарда пэхкиря ромня Ева, пала када со
вой ачиля дэй важ всаворэ, ко джювэлас. 21 РАЙ
Дэвэл стерда лэнди їда г равлестар тай урявда дэ
лэн Адамо и лэхкиря ромня. 22 Тунчи РАЙ Дэвэл
пхэнда: — Мануш уджянгла лачимо тай врытимо
тай кана ачиля, сар екх Амэндар. Нащи, соб вов

процырдыня васт тай тэ чинэл плодо рандятар, сави анэл джювимо, тэ схал лэ тай ачиля тэ джовэ вечно. 23 РАЙ Дэвэл вытрадыня лэ садостар Эдэм, соб вов тэ терэл бути пэ пхув, савятар лэ лиле. 24 Вов вытрадыня манушэ тай тховда пэ востоко садостар Эдэм херувимонэн и бари чюри, сави пхаболас и марэлас дэ всаворэ рига, соб тэ фирисарэ дром, саво лиджял рандятэ, сави дэл джювимо.

4 Адамо сута Евага, пэхкиряга ромняга, тай вой ачиля пхари и бэянда Каино. Вой пхэнда: «Мэ стердом манушэ, сар када стерда РАЙ». 2 Тунчи вой бэянда лэхкирэ пхралэ Авелё. Авелё чяравэлас бакрэн тай бузнен, а Каино терэлас бути пхуяга. 3 Проджила вряма, тай Каино анда пхуятирэ плодуря дэ даро РАЕСТИ, 4 а Авелё анда дэ даро само фэдэр пэрвонэндар бакрорэндар. Авелё и лэхкиро даро чялиле РАЕСТИ, 5 нэ Каино тай лэхкиро даро на чялиле Лэсти. Каино фартэ холиля, тай лэхкоро муй покалиля холятар. 6 Тунчи РАЙ пхэнда Каиности: — Сости ту холявэ? Сости тиро муй покалиля? 7 Сар ту авэга тэ терэ лаче рындоря, ту на авэга прылито? Нэ, сар ту терэх налаче рындоря, дэ терэн ударэн гаравдапэ бээх: вов камэл тэ лэл зор понад тут, кацик ту ав лэсти хулаега. 8 Каино пхэнда Авелёсти, пэхкирэ пхралэсти: — Джам дэ маля. Кала вонэ сле дэ маля, Каино чютапэ пэ пэхкирэ пхралэ Авелё тай умарда лэ. 9 Тунчи РАЙ пхэнда Каиности: — Тев тиро пхрал Авелё? — На джянав, — пхэнда кодэва. — Мэ со, сторожо мурэсти пхралэсти? 10 РАЙ пхэнда: — Со ж ту тердан? Рат тирэ пхралэхкоро типисявэл Мандэ пхуятар. 11 Кана мряя пэ тутэ, вытрадино пхуятар, сави оттерда лэхкоро муй, соб тэ прылэ рат тирэ пхралэ, саво ту прочютан пэхкирэ вастэга. 12 Кала ту авэга тэ терэ бути пэ пхув, вой на авэла будэр тэ анэ плодуря важ тути. Ту авэга тэ пхирэ пав пхув пордэ тай павпалэ, сар бицэрэхкоро. 13 Каино пхэнда РАЕСТИ: — Ман фартэ пхаро марэх, мэ на вылиджява када. 14 Екхатар Ту вытрадэх ман пхуятар, мэ авава тэ гаравэлэ Тирэ муестар: мэ авава тэ пхирэ пордэ тай павпалэ, сар бицэрэхкоро, тай пэрво, ко ман удыхкэла, умарэла ман. 15 Нэ РАЙ пхэнда лэсти: — Нат. Ко умарэла Каино, лэсти када рисявэла ефта молуря. И РАЙ стерда Каиности знако, соб нико, ко лэга удыхкэлапэ, тэ на умарэл лэ. 16 Каино уджила РАЕСТАР тай джюда дэ пхув Нод, дэ востоко Эдэмсконэ садостар. 17 Каино сута пэхкиря ромняга, тай вой ачиля пхари тай бэянда Енохо.

18 Енохостэ бэяндапэ Ирадо, Ирадостэ бэяндапэ Мехиаэлё, Мехиаэлёстэ бэяндапэ Метушаэлё, тай Метушаэлёстэ бэяндапэ Ламехо. 19 Ламехо лиля пэсти дуен ромнен: екха акхарэнас Ада, авря — Цылла. 20 Ада бэянда Явало: вов ачиля дадэга колэн, ко джювэл дэ катунэн и розлиджял ското. 21 Лэхкирэ пхралэ акхарэнас Ювало: вов ачиля дадэга всаворэн, ко цэлэл пэ лира и свирель. 22 Цыллатэ сля чяво, Тувал-Каино, саво терэлас промати бронзатар и састрестар. Тувал-Каиностэ сля пхэнь Наама. 23 Ламехо пхэнда пэхкирэнди ромненди: Ада и Цылла, шунэн ман, ромня Ламехохкирэ, полэн, со мэ дэдумав. Мэ умардом муршэ пала кода, со вов чинда ман, тэрнэ манушэ пала кода, со вов малавда ман. 24 Пала Каино авэна мардэ ефта разуя, пала Ламехо — ефта дэша ефта. 25 Адамо инте сута пэхкиря ромняга, тай вой бэянда чявэ тай акхарда лэ Сифо. Вой пхэнэлас: «Дэвэл дэня манди авэр чяворэ пэ Авелёхкиро тхан, савэ умарда Каино». 26 Сифостэ сля чяво, тай вов акхарда лэ Еносо. Дэ кодыя вряма мануша ачиле тэ прыакхарэ лав РАЕХКИРО.

5 Акэ роспхэндимо пала Адамо тай пала лэхкирэ чяворэн. Кала Дэвэл стерда манушэ, стерда лэ, соб вов тэ авэл поджило пэ Дэвлэ. 2 Вов стерда муршэ тай джювля тай бахталисарда лэн. Кала вонэ сле стердэ, Вов акхарда лэн «мануш». 3 Кала Адамо проджюда 130 бэрш, лэстэ бэяндапэ чяво, саво сля поджило пэ лэстэ, лэхкоро образо, тай вов акхарда лэ Сифо. 4 Тунчи, сар бэяндапэ Сифо, Адамо джюда 800 бэрш, тай лэстэ сле инте чявэ тай чя. 5 Всаворо джювимо Адамохкиро сля 930 бэрш, и вов муля. 6 Кала Сифо проджюда 105 бэрш, лэстэ бэяндапэ Еносо. 7 Тунчи, сар бэяндапэ Еносо, Сифо джюда 807 бэрш, тай лэстэ сле инте чявэ тай чя. 8 Всаворо джювимо Сифохкиро сля 912 бэрш, тай вов муля. 9 Кала Еносо проджюда 90 бэрш, лэстэ бэяндапэ Каинано. 10 Тунчи, сар бэяндапэ Каинано, Еносо джюда 815 бэрш, тай лэстэ сле инте чявэ тай чя. 11 Всаворо джювимо Еносотиро сля 905 бэрш, тай вов муля. 12 Кала Каинано проджюда 70 бэрш, лэстэ бэяндапэ Малелеило. 13 Тунчи, сар бэяндапэ Малелеило, Каинано джюда 840 бэрш, тай лэстэ сле инте чявэ тай чя. 14 Всаворо джювимо Каинанохкиро сля 910 бэрш, тай вов муля. 15 Кала Малелеило проджюда 65 бэрш, лэстэ бэяндапэ Яредо. 16 Тунчи, сар бэяндапэ Яредо, Малелеило джюда 830 бэрш, тай лэстэ сле инте чявэ тай чя. 17 Всаворо джювимо Малелеилохкиро сля 895 бэрш тай муля

вов. 18 Кала Яредо проджюда 162 бэрш, лэстэ бэяндалэ Енохо. 19 Тунчи, сар бэяндалэ Енохо, Яредо джюда 800 бэрш, тай лэстэ сле инте чывэ тай чея. 20 Всаворо джовимо Яредохкиро сля 962 бэрш, тай вов муля. 21 Кала Енохо проджюда 65 бэрш, лэстэ бэяндалэ Мафусало. 22 Тунчи, сар бэяндалэ Мафусало, Енохо пхирэлас Дэвлэга 300 бэрш, тай лэстэ сле инте чывэ тай чея. 23 Енохо доджюда дэ 365 бэрш. 24 Енохо пхирэлас Дэвлэга, тунчи лэ на ачиля, пала када со Дэвэл залиля лэ. 25 Кала Мафусало проджюда 187 бэрш, лэстэ бэяндалэ Ламехо. 26 Тунчи, сар бэяндалэ Ламехо, Мафусало джюда 782 бэрш, тай лэстэ сле инте чывэ тай чея. 27 Всаворо джовимо Мафусалохкиро сля 969 бэрш, тай вов муля. 28 Кала Ламехо проджюда 182 бэрш, лэстэ бэяндалэ чыво. 29 Вов акхарда лэ Ноё тай пхэнда: «Вов дэла амэнди тэ отцынявэ амарятар пхарятар бутятар пэ пхув, сави прэдэня мрая РАЙ». 30 Тунчи, сар бэяндалэ Ноё, Ламехо джюда 595 бэрш, тай лэстэ сле инте чывэ тай чея. 31 Всаворо джовимо Ламехохкиро сля 777 бэрш, тай вов муля. 32 Кала Ноёсти ачиля 500 бэрш, лэстэ бэяндалэ Симо, Хамо тай Яфето.

6 Манушэн ачиля будэр пэ пхув, тай лэндэ бэяндэнаспэ чея. 2 Чывэ Дэвлэхкирэ удыхкле, со манушэндирэ чея фартэ шукарнэ, тай ачиле тэ лэ лэн пэсти дэ ромнен, сави касти чялэла. 3 РАЙ пхэнда: — На авэла Фано Муро вечно дэ манушэ, пала када со мануш бэзэхало. Мэк авэла лэндирэ дивэса шэл биш бэрша. 4 Дэ колэ дивэса тай пала лэн, кала чывэ Дэвлэхкирэ лэнас дэ ромнен манушэндирэн чеен, лэндэ бэяндэнаспэ чяворэ, сле пэ пхув нефилимы. Вонэ сле фартэ зоралэ, тай пала лэн шундэласпэ пураня вряматар. 5 РАЙ удыхкля, со мануша пэ пхув фартэ бут терэн бэзэх тай лэндири годи цырделпэ тэ тирэ холи. 6 РАЕСТИ ачиля дор, со Вов стерда пэ пхув манушэ. Лэхкоро йло пхэрдила дукхага. 7 И пхэнда РАЙ: — Мэ скхосава пхуятар манушэндиро родо, саво Мэ стердом. Мэ умарава и манушэн, и барэн тай цыкнэн животнэнэн, и чириклен болыбнэндирэн, пала када со Манди дор, со стердом лэн. 8 Нэ Ноё аракхля мила дэ РАЕХКИРЭН яххэн. 9 Акэ роспхэндимо пала Ноё тай пала лэхкирэ чяворэн. Машкар манушэн кодыла вряматири кацик Ноё терэлас чячюнэ рындуря тай сля би дошатири. Вов пхирэлас Дэвлэга. 10 Ноёстэ сле трин чывэ: Симо, Хамо тай Яфето. 11 Дэ Дэвлэхкирэн яххэн пхув мусардалэ тай пхэрдила глабага. 12 Дэвэл удыхкля, сар пхув мусардалэ пала када, со всаворэ мануша

пэ пхув пэрэболдыне пэхкирэ дрома. 13 Тунчи Дэвэл пхэнда Ноёсти: — Мэ терава, со всаворэ, ко исин джювдэ, хасявэна, пала лэн пхув пхэрдыня глабага. Мэ умарава и лэн, тай всавори пхув. 14 Стер пэсти ковчегё рандятар гоферо. Стер дэ лэ цэрора тай махх лэ смолага гасатар тай андрал. 15 Акэ сар ту лэ стерэга: ковчегё 300 куя дэ лунгима, 50 куя дэ буглима тай 30 куя дэ вучима. 16 Стер понад лэ штрэха, соб вой тэ ваздэлпэ англа лэ пэ екх куё. Тхов ригатар удара тай стер тэлуно, машкаруно тай упруно этажо. 17 Мэ налиджява пэ пхув баро пани, соб тэ умарэ вса, со джювэл тала болыбэн, дэ кастэ пхурдэл джовимо. Вса, со исин пэ пхув, мэрэла. 18 Нэ туга Мэ терава завето, тай ту заджяга дэ ковчегё: ту тай тирэ чывэ, тай тири ромни, тай ромня тирэн чывэн. 19 Залидзя дэ ковчегё всаворэн животнэнэн по дуй, лэ тай ла, соб вонэ тэ аченпэ джювдэнца ектханэ туга. 20 Тутэ авэна, соб тэ ачепе джювдэнца, пав дуй всаворэндар породэндар чириклен, всаворэндар породэндар животнэнэн, савэ пхирэн пав пхув тай всаворэ сапа. 21 Лэ пэга всаворо хамо тай стидэ лэ пэстэ, соб тэ ха и тути, и лэнди. 22 Ноё терда вса кади, сар пхэнда лэсти Дэвэл.

7 РАЙ пхэнда Ноёсти: Заджя дэ ковчегё пэхкирэга йрега. Мэ дыкхав, со помашкар всаворэн, ко джювэл екхатар, кацик ту чячютно англа Ман. 2 Лэ пэга по ефта пара всаворэндар жужэндар животнэнэн, ла тай лэ, тай пав екх пара всаворэндар нажужэндар, ла тай лэ, 3 тай пав ефта пара всаворэндар чириклендар, соб тэ авэл и вов, и вой, соб тэ фирисарэ лэн всаворэн пэ пхув. 4 Проджяна ефта дивэса, Мэ бичялава брышынд пэ пхув пэ саранда дивэн, тай саранда рятен; тай Мэ скхосава пхуятар всаворэн джюдэн, савэн Мэ стердом. 5 Ноё стерда вса, сар прыпхэнда лэсти РАЙ. 6 Кала баро пани авиля пэ пхув, Ноёсти сля шов шэла бэрш. 7 Ноё, лэхкирэ чывэ, лэхкири ромни тай ромня лэхкирэн чывэн заджиле дэ ковчегё, соб тэ фирисарэлэ потопостар. 8 Жужэ тай нажужэ животные, чирикля и всаворо джовимо 9 авиле Ноёстэ дэ ковчегё пав дуй: вов и вой, сар прыпхэнда Ноёсти Дэвэл. 10 Проджиля ефта дивэ, и пэ пхув джиля баро пани. 11 Кала Ноёсти сля шов шэла бэрша, дэ дэшуефтато диво дэ дуйто чён, прочиндэлэ всаворэ ханинга барэ панехкирэ, тай оттердэлэ фылястры болыбэндирэ, 12 тай джялас пэ пхув брышынд саранда дивэса тай саранда ратен. 13 Дэ кодэва жэ диво заджиле дэ ковчегё Ноё, лэхкирэ чывэ Симо, Хамо тай

Яфето, ромни Ноёхкири тай ромня тринэн чявэн. 14 Лэнца заджиле всаворэ породы животнонэн: всаворэ породы дыконэн зерёнэн тай цэрутнонэ скотос, всаворэ породы джовима, савэ пхирэн пав пхув, всаворэ породы чириклен, тай всаворэ, кастэ исин пхака. 15 Всаворэ, дэ кастэ пхурдэл джовимо, авиле Ноёстэ тай заджиле дэ ковчегё по дуй, 16 вов и вой всаворэндар породонэн, сар прыпхэнда Ноёсти Дэвэл. Тай тунчи РАЙ затерда пала лэн удара. 17 Потопо сля пэ пхув саранда дивэса, тай пани, саво авэлас, подлиле ковчегё, тай вов джила пав пани. 18 Пани вса авэлас тай авэлас, ай ковчегё пхирэлас пав пани. 19 Пани кади вучес подлилапэ пэ пхув, со ушаравда всаворэ вуче пляя тала болыбэн. 20 Пани подлилапэ тай ушаравда всаворэ пляя вучедэр, сар пэ дэшупанч куя. 21 Вса, со сля джовдо пэ пхув, мурдиле: чирикля, ското, дыки зверура, всаворо джовдо, со пхирэл пав пхув, тай всаворэ мануша. 22 Всаворэ пэ пхув, кастэ дэ ратуен сля джовимо, муля. 23 Вса, со сля джовдо пэ пхув, вса сля скхосло пхуятар: мануша тай джовимо, саво пхирэл пав пхув, тай чирикля болыбнэндирэ. Кацик ачилапэ Ноё тай кодыла, ко сле лэ'га дэ ковчегё. 24 Потопо лэлас зор пэ пхув шэл пандэша дивэ.

8 Дэвэл рапирда пала Ноё тай пала всаворэн дыких зверёнэн, тай пала ското, савэ сле лэ'га дэ ковчегё, тай Вов бичялда балвал пэ пхув, тай пани ачила тэ уджа. 2 Ханинга барэ панехкирэ тай фылястры болыбнахкирэ затердэпэ, тай брышынд пэрэачила тэ джа болыбнастар. 3 Пани на сиво ачила тэ уджа пхуятар, тай дэ шэл панчдэшатиро диво вов фартэ уджила. 4 Пэ дэшуефтатиро диво ефтатиро чёнэхкиро ковчегё ачила пэ Арагатски пляя. 5 Пани уджялас дэ дэшто чён, тай дэ пэрво диво дэ дэшто чён ачиле тэ душол вэрхо плаендиго. 6 Проджила саранда дивэса, тай Ноё оттерда фылястра, саво вов стерда дэ ковчегё. 7 Вов вымукля воронос, тай кодэва выурыля тай прыурыля павпалэ дэ колэ, кала пани пэ пхув на вышутила. 8 Тунчи Ноё вымукля гурунгэ, соб тэ удыхкэ, сджила ли пани упрал пхуятар, 9 нэ гурунго на арахла шуко тхан, соб тэ бэшэ тэлэ, пала када со пани ушаравэлас всавори пхув, тай рисардалэ Ноёстэ дэ ковчегё. Ноё процырэдэна васт тай лиля гурунгэ павпалэ пэстэ дэ ковчегё. 10 Проджила ефта дивэн, тай вов упалэ вымукля гурунго ковчегёстар. 11 Кала бэльвэля'га гурунго рисардалэ, дэ муй лэстэ сля ївант счиндо оливково листо. Тунчи Ноё полиля,

со пани сджила пхуятар. 12 Вов дожутярда инте ефта дивэса тай упалэ вымукля гурунго, тай пэ кадыва моло гурунго на рисардалэ. 13 Дэ пэрво диво пэрвонэ чёнэхкиро, кала Ноёсти сля шов шэла екх бэрш, пхув вышутила панестар. Ноё подлила стрэха дэ ковчегё, тай удыххла, со пхув шуки. 14 Дэ биш ефтандиро диво дуйтонэ чёнэхкиро пхув ачила всавори шуки. 15 Тунчи Дэвэл пхэнда Ноёсти: 16 — Выдья ковчегёстар ту тай тири ромни, тай тирэ чявэ, тай лэндирэ ромня. 17 Вылидья пэ гаса со исин туга джовдо, — чириклен, зверёнэн тай всаворо джовимо, саво пхирэл пав пхув. Мэк вонэ терэн чяворэн пэсти, тай мэк лэн авэла бут. 18 Тунчи Ноё выджила ковчегёстар екхтанэ пэхкирэнца чявэнца, ромня'га тай ромненца пэхкирэн чявэн. 19 Всаворэ барэ тай цыкнэ животные, савэ пхирэн пав пхув, тай всаворэ чирикля — всаворэ выджиле ковчегёстар, екх порода пала авря. 20 Ноё стерда РАЕСТИ жертвенико, лиля жужэн животнонэн тай чириклен кожнэстар родостар, зачинда лэн тай спхабарда лэн пэ яг. 21 РАЙ ашунда лачё фано тай пхэнда дэ їло Пэстэ: — Колатар вряматар, сар мануш цыкно, їло тай годи лэхкири цырэдэлпэ тэ терэ врытимо. Мэ будэр на авава тэ дэ мрая пхув пала лэ тай никала будэр на умарава всаворэн джовдэн, сар екхатар. 22 Покы исин джовимо пэ пхув, на пэрэачела вряма, кала мануша авэна тэ росчювэ тай тэ стидэ ворзо, на пэрэачела шылалимо тай татимо, милай тай ївэнт, диво тай рат.

9 Дэвэл бахтисарда Ноё тай лэхкирэн чявэн и пхэнда лэнди: — Мэк тумэндэ авэна чяворэ, тай мэк лэн авэла бут, тай пхэрдэн пхув. 2 Мэк всаворэ зверура тай всаворэ чирикля болыбнахкирэ, всаворо джовимо пэ пхув тай всаворэ морендирэ маче даранпэ тумэн тай тинисявэн. Всаворэн лэн Мэ отдав тумэнди дэ вастэн. 3 Вса, со джовэл тай пхирэл, авэла тумэнди дэ хама. Сар дэ калэ Мэ дэнём тумэнди зэлэнь, кади и екхатар Мэ отдав тумэнди вса. 4 Кацик на хан мас, дэ савэ исин инте рат. 5 Тай пала тумаро рат Мэ мангава тэ дэн цымин. Мэ спхучява кожнэстар животнэстар, соб вонэ тэ дэн цымин. Тай манушэстар Мэ пхучява пала джовимо лэхкирэ пхралэ. 6 Ко бы на прочюта рат манушэхкиро, вастэ'га аврэ манушэ прочювэлалэ и лэхкиро рат. Пала када со мануш стердо, сар образо Дэвлэхкоро. 7 Мэк тумэндэ авэна чяворэ, тай мэк лэн авэла бут. Роздьянпэ пав пхув тай пхэрдэн ла. 8 Тунчи Дэвэл пхэнда Ноёсти тай лэхкирэнди чявэнди: 9 — Екхатар Мэ

дав завето тумэнди тай тумарэнди чяворэнди, 10 тай всаворяти джювимати, сави сля тумэнца: чирикленди, скотости, дыконэнди зверёнэнди — всаворэнди, ко выджиля тумэнца ковчег’остар, кожнонэсти животнонэсти пэ пхув. 11 Мэ дав тумэнди завето: никала будэр вса, со джювэл, на авэла умардо баряга панег’а; никала будэр на авэла потопо тэ умарэ пхув. 12 Дэвэл пхэнда: — Акэ знако заветохоро, саво Мэ дав тумэнди тай всаворяти джювимати, саво тумэнца, пэ всаворо родуря, савэ авэна. 13 Мэ тховав дэ Мурэ тучи радуг’а, тай вой авэла знако заветохоро, саво Мэ дав пхуяти. 14 Кала Мэ бичялава тучи пэ пхув, дэ тучи авэла радуг’а, 15 тай Мэ взрапирава Муро завето, саво Мэ дав тумэнди тай кожнонэсти, дэ кастэ исин джювимом. Никала будэр баро пани на умарэла вса джювдо. 16 Всако моло, кала радуг’а авэла дэ тучен, Мэ удыхава ла тай взрапирава вечно завето, саво дав всаворяти джювимати, сави исин пэ пхув. 17 Кади пхэнда Дэвэл Ноёсти: — Акэ знако заветохоро, саво Мэ дав всаворэсти, дэ кастэ исин джювимом пэ пхув. 18 Чявэ Ноёхкирэ, савэ выджиле ковчег’остар, сле Симо, Хамо тай Яфето (Хамо сля дад Ханааности). 19 Кала трин сле чявэ Ноёхкирэ, тай лэндар выджиле народуря, савэ розджилепэ пав пхув. 20 Ноё ачиля тэ терэ бути пхуяга тай барярэл виноградо. 21 Ехвар вов выпиля мол тай матиля, тай пашлелас нанго дэ пэхкири катуна. 22 Хамо, дад Ханаанохкиро, удыхля нангимо пэхкирэ дадэхкирэ, выджиля тай роспхэнда пала када пхралэнди. 23 Нэ Симо тай Яфето лиле їда, тховдэ ла пэсти пэ пхикэн, заджиле павпалэ думэга тай ушаравдэ нангимо дадэхкиро. Лэндирэ муя сле отрисардэ дэ авэр риг, соб тэ на удыхкэ нангимо дадэхкиро. 24 Кала Ноё просутапэ матиматар, вов уджянгла, со терда лэга цыкнэдэр чяво, 25 тай пхэнда: — Прыдав мрая Ханаано! Вов авэла майпалуно копылендар пэхкирэнди пхралэнди. 26 Инте вов пхэнда: — Бахтисардо РАЙ, Дэвэл Симохоро! Мэк Ханаано авэла лэсти копыли. 27 Мэк Дэвэл дэла Яфетости бугли пхув! Мэк джювэл Яфето дэ катунэн Симохкирэн, тай мэк авэла Ханаано лэхкирэга копылега. 28 Сар проджиля потопо, Ноё джювда трин шэл панчдэша бэрш. 29 Всаворо джювимом Ноёхкиро сля иня шэла панчдэша бэрш, тай вов муля.

10 Акэ роспхэндимо пала Ноёхкирэн чявэн, пала Симо, Хамо, Яфето, тай пала лэндирэн чяворэн, савэ бзяндэлэ, кала проджиля потопо. 2

Яфетохкирэ чявэ: Гомеро, Магого, Мадаё, Явано, Тувало, Мешэхо тай Тирасо. 3 Гомерохкирэ чявэ: Ашкеназо, Рифато тай Тогарма. 4 Яванохкирэ чявэ: Элиша, Таршышо, Киттимо тай Роданимо. 5 Лэндар выджиле народуря, савэ ачиле тэ джювэ пэ брэго морёхкиро, вонэ розджилепэ пав пэхкирэн народонэн, родонэн тай чибэн. 6 Хамохкирэ чявэ: Кушо, Мицраимо, Путо тай Ханаано. 7 Кушохкирэ чявэ: Сева, Хавила, Савта, Раама тай Савтеха. Раамахкирэ чявэ: Шэва тай Дедано. 8 Кушо сля дадэга кади ж Нимродости, саво ачиля англуну зорало мануш пэ пхув. 9 Вов мишто астарэлас животнонэн англа РАЙ, пала када и пхэнэлпэ: «Баро астаримари англа РАЙ, сар Нимродо». 10 Англунэ фороря дэ лэхкиро тхагаримо сле Вавилоно, Эрехо, Аккадо тай Халне дэ Шынаро. 11 Кадэла пхуятар вов пэрэджиля дэ Ассирия, тев стерда Ниневия, Реховот-Иро, Калахо 12 тай Ресено помашкар Ниневия тай Калахо — баро форо. 13 Мицраимостар джиле: лудея, анамея, легевея, нафтухей, 14 патрусей, каслухей (савэндар джиле филистимлянуря) тай кафторей. 15 Ханаано сля дадэга Сидоности, када лэстэ сля пхуридэр чяво, Хето, 16 кади ж евусея, аморея, гергесея, 17 хивея, аркея, синей, 18 арвадэя, цэмарей тай хаматей. Проджиля вряма, тай всаворэ мануша розджилепэ пав пхув. 19 Брэги Ханаанохкирэ процырденаспэ Сидоностар дэ риг Герарохкири ды Газа, тай дэ риг Содомохкири тай Гомморохкири, Адмахкири тай Цэвоимохкири ды Лаша. 20 Када чяворэ Хамохкирэ, лэндирэ їря тай народуря, кожно дэ пэхкири пхув тай пэхкиряга чибэга. 21 Бзяндэлэ чявэ кади ж Симостэ, пхурэдэр пхралэстэ Яфетохкирэ. Всаворэ чявэ Эверохкирэ джиле Симостар. 22 Симохкирэ чявэ: Эламо, Ашшуоро, Арпахшадо, Лудо тай Арамо. 23 Арамохкирэ чявэ: Уцо, Хуло, Гетеро тай Машо. 24 Арпахшадостэ бзяндапэ Шэлахо, Шэлахостэ бзяндапэ Эверо. 25 Эверостэ бзяндэлэ дуй чявэ: екхэ акхарэнас Пелего (пала када со дэ лэхкири вряма пхув розчиндапэ), лэхкирэ пхралэ — Йоктано. 26 Йоктаностэ бзяндэлэ Алмодадо, Шалесфо, Хацармавето, Ярахо, 27 Хадорамо, Узало, Дикла, 28 Овало, Авимайло, Шэва, 29 Офиро, Хавила тай Йоваво. Всаворэ вонэ сле чявэнца Йоктанохкирэ. 30 Тхан, тев вонэ джюдэ, процырделаспэ Мешастар ды Сефаро, дэ восточно риг плаендар. 31 Када чявэ Симохкирэ, лэндирэ їря, народуря, кожно дэ пэхкири пхув тай пэхкиряга чибэга Кала мануша бзяндэлэ Симостэ пав пэхкири порода, пэхкиряга чибэга. 32 Кацавэ їря Ноёхкирэн чявэн, пав лэндирэ родуря тай

народура. Сар проджила потопо, лэндар джиле
всаворэ народура пэ пхув.

11 Пэ всавори люмля сля екх чиб тай екх дума.
2 Мануша ачиле тэ джя пэ востоко, арахкли
дэ пхув Шынаро маля тай джювэнас котэ. 3
Вонэ пхэндэ екх екхэсти: — Стерага глинатар
бара тай выпхабарага лэн мишто. Кола вряматар
вонэ ачиле тэ тховэ бара глинатар, тай смола
сля сар састимос машкара бара. 4 Вонэ пхэндэ:
— Терага амэнди форо башняга ды болыбэн,
соб тэ ашарэлпэ амаро лав тай тэ на роздзяпэ
пав всавори пхув. 5 РАЙ сджила тэ дыкхэ форо
башняга, савэ терэнас мануша, 6 тай пхэнда:
— Всаворэ мануша — екх народо, лэндэ екх
чиб. Тай катар каси кацик ихатар. Кана вонэ со
скамэна, кода вонэ стерэна. 7 Сджяга тэлэ тай
парувага лэндири чиб, соб вонэ тэ на полэн екх
екхэ. 8 Тай РАЙ розчюта лэн пав всавори пхув, и
вонэ пэрэчиле тэ терэ кодэва форо. 9 Акэ сости
прыпхэндэ фороستي Вавилоно — РАЙ парувда
котэ чиб всаворя люмляти. Котар РАЙ розчюта лэн
пав всаворо муй пхуятиро. 10 Акэ распхэндимо
пала Симо тай пала лэхкирэн чяворэн. Проджила
дуй бэрш сар сля потопо. Кала Симости сля шэл
бэрш, лэстэ бзяндапэ Арпахшадэ. 11 Тунчи, сар
бзяндапэ Арпахшадэ, Симо джюда 500 бэрш, тай
лэстэ сле инте чявэ тай чя. 12 Кала Арпахшадэ
проджюда 35 бэрш, лэстэ бзяндапэ Шэлахо. 13
Тунчи, сар бзяндапэ Шэлахо, Арпахшадэ джюда
403 бэрш, тай лэстэ сле инте чявэ тай чя. 14
Кала Шэлахо проджюда 30 бэрш, лэстэ бзяндапэ
Эверо. 15 Тунчи, сар бзяндапэ Эверо, Шэлахо
джюда 403 бэрш, тай лэстэ сле инте чявэ тай чя.
16 Кала Эверо проджюда 34 бэрш, лэстэ бзяндапэ
Пелего. 17 Тунчи, сар бзяндапэ Пелего, Эверо
джюда 430 бэрш, тай лэстэ сле инте чявэ тай чя.
18 Кала Пелего проджюда 30 бэрш, лэстэ бзяндапэ
Реу. 19 Тунчи, сар бзяндапэ Реу, Пелего джюда 209
бэрш, тай лэстэ сле инте чявэ тай чя. 20 Кала
Реу проджюда 32 бэрш, лэстэ бзяндапэ Серуго. 21
Тунчи, сар бзяндапэ Серуго, Реу джюда 207 бэрш,
тай лэстэ сле инте чявэ тай чя. 22 Кала Серуго
проджюда 30 бэрш, лэстэ бзяндапэ Нахоро. 23
Тунчи, сар бзяндапэ Нахоро, Серуго джюда 200
бэрш, тай лэстэ сле инте чявэ тай чя. 24 Кала
Нахоро проджюда 29 бэрш, лэстэ бзяндапэ Терахо.
25 Тунчи, сар бзяндапэ Терахо, Нахоро джюда 119
бэрш, тай лэстэ сле инте чявэ тай чя. 26 Тунчи,
сар Терахо проджюда 70 бэрш, лэстэ бзяндэлэ
Аврамо, Нахоро тай Арано. 27 Акэ распхэндимо

пала Терахо тай пала лэхкирэн чяворэн. Терахостэ
бзяндэлэ Аврамо, Нахоро тай Арано. Араностэ
бзяндэлэ Лото. 28 Кала лэхкиро дад Терахо сля
инте джювдо, Арано муля дэ Уро халдееنديро,
дэ кодья пхув, тев вов бзяндапэ. 29 Аврамо тай
Нахоро лиле пэсти ромнен. Аврамохкира ромня
акхарэнас Сара, ай Нахорохкира ромня — Милка.
Милка тай латири пхэнь Иска сле чя Аранохкирэ.
30 Сара на бзянэлас нисар чяворэн, латэ на сля
чяворэн. 31 Терахо лиля пэхкирэ чявэ Аврамо,
пэхкирэ внуко Лотос, Аранохкирэ чявэ, тай пэхкира
бора Сара, ромня Аврамохкира, тай екхханэ вонэ
выджили Уростар халдееنديрэстар дэ Ханаано.
Нэ кала доджиле дэ Харано, вонэ ачилепэ котэ. 32
Терахо джюда 205 бэрш тай муля дэ Харано.

12 РАЙ пхэнда Аврамости: — Ачяв пэхкири
пхув, пэхкиро форо, пэхкирэн манушэн тай
дадэхкиро цэр тай джя дэ пхув, сави Мэ тути
сикавава. 2 Мэ терава тутар баро народо тай
бахталисарава тут; Мэ терава, со тиро лав авэла
баро, тай ту авэга бахтага важ аврэн манушэн. 3
Мэ бахталисарава колэн, ко бахталисарэл тут, тай
прэдава мрая кодылэ, ко дэл мрая тут; тай пала
тут авэна бахталисардэ всаворэ народура пэ пхув.
4 Тай Аврамо джила дэ дром, сар пхэнда лэсти
РАЙ, тай Лото джила екхтханэ лэга. Аврамости сля
75 бэрш, кала вов уджила Хараностар. 5 Вов лиля
пэга пэхкира ромня Сара, племянико Лото, всаворо
пэхкиро барвалимо, саво сля лэндэ, тай манушэн,
савэн вонэ тиндэ дэ Харано. Вонэ джиле дэ пхув
Ханаано тай авиле пордэ. 6 Аврамо проджила
пав кадья пхув дэ колэ тханэ дэ Шэхемо, тев
ачелас дубо Морэ; дэ кодья вряма котэ джюдэ
ханаанея. 7 РАЙ авили Аврамостэ тай пхэнда:
— Мэ дава кадья пхув тирэ чяворэнди. Аврамо
стерда котэ жэртвенико РАЕСТИ, Саво авили лэстэ.
8 Котар вов джила дэ плаендирэ тхана дэ восточно
риг Вефилэстар тай тховда катуна помашкар
Вефилэ пэ западо тай Гаё пэ востоко. Котэ вов
стерда жэртвенико РАЕСТИ тай прыахарда лав
РАЕХКИРО. 9 Тунчи Аврамо слиляпэ тханэстар
тай джила пэ юго, дэ Негево. 10 Пэ пхув сля бокх,
тай бокх сля фартэ зорало. Пала кода Аврамо
джила тэ джювэ дэ Египто. 11 Кала вонэ поджянас
дэ Египто, вов пхэнда пэхкира ромняти Сарати: —
Всаворэ дыкхэн, со ту шукарни джювли. 12 Кала
египтянуря удыххэна тут, вонэ думисарэна, со ту
мури ромни, тай умарэна манман, ай тут ачявэна
тэ джювэх. 13 Пхэн, со ту мури пхэнь, соб пала тут
ман тэ прылэн мишто тай тэ наисарэ тут мэ тэ

ачявпэ джювдо. 14 Кала Аврамо авиля дэ Египто, египтянуря удыххле, со Сара фартэ шукарни. 15 Ай кала ла удыххле барэ рая фараонохкирэ, вонэ розашардэ ла фараоности, тай лиле Сара лэстэ дэ дворцо. 16 Фараоно мишто прылиля Аврамо пала Сара, тай Аврамо тинда хурдо тай баро хулаимо, магарен тай магарицен, верблюдонэн, копылен тай копыльницэн. 17 Нэ РАЙ бичылда пэ фараоно тай пэ всаворо лэхкиро цэр пхарэ насвалима пала Аврамохкиря ромня Сара. 18 Тунчи фараоно прыахарда Аврамо тай пхучля: — Со ту тердан манца? Сости ту на пхэндан манди, со вой тири ромни? 19 Пэ со ту пхэндан, со вой тири пхэнь? Кацик пала када мэ лилём ла ромняга. Акэ тири ромни. Залэ ла тай уджя! 20 Фараоно прыпхэнда, тай лэхкирэ мануша отбичылдэ Аврамо дэ дром екхтанэ лэхкиряга ромняга тай всаворэга, со сля лэстэ.

13 Аврамо ромняга тай всаворэга барвалимага рисиля Египтостар дэ Негево, тай Лото джиля лэга. 2 Аврамостэ кана сля бут ското, रुपь тай сувнак. 3 Негевостар вов джялас дурыдэр дромэга, покы на авиля дэ Вефилё, колэстэ тханэстэ, тев калась ачелас лэхкири катуна, помашкар Вефилё тай Гаё, 4 колэстэ тханэстэ, тев Аврамо дэ колэ стерда жэртвенико. Котэ Аврамо прыахарда лав РАЕХКИРО. 5 Лотостэ, саво пхирэлас Аврамога, кади ж сля фартэ бут хурдо тай баро ското тай катуны, 6 тай пхув на галёлас тэ пропарварэ лэн дуен: лэндэ сля кади бут барвалимо, со вонэ на галёнас тэ проджювэ екхтанэ. 7 Машкар Аврамохкирэ чябануря тай Лотохкирэ чябануря заджиля холи. Тунчи дэ кодья пхув джювэнас ханаанея тай периззея. 8 Тунчи Аврамо пхэнда Лотости: — Мэк на авэла холи на машкар тут тай ман, на машкар тирэн чябануря тай мурэн. Амэ ж пэхкирэ. 9 Подыхк, всавори пхув англа тутэ! Фэдэр розджямпэ: сар ту джяга пэ зэрво, тунчи мэ порисявава пэ чячи риг, ай сар ту джяга пэ чячи риг, тунчи мэ порисявава пэ зэрво. 10 Лото подыххля тай удыххля, со всавори маля Иордано дэ Цоаро мишто протиндёлас, сар садо РАЕХКИРО, сар пхув Египто. Када сля инте дэ колэ, сар РАЙ спхабарда Содомо тай Гомора. 11 Лото вылиля пэсти всавори маля Иордано тай джиля пэ востоко. Вонэ розджилепе: 12 Аврамо джюда дэ пхув Ханаано, ай Лото джювэлас машкар форурия пэ маля, тховда катуны надур Содомостар. 13 Мануша дэ Содомо сле налаче тай фартэ терэнас бут пхарэ бэзэха англа РАЙ. 14 Тунчи, сар

Лото оджиля Аврамостар, РАЙ пхэнда Аврамости: — Обдыхкпэ колэстар тханэстар, тев ту екхатар. Подыхк пэ северо, тай пэ юго, пэ востоко тай пэ западо. 15 Всавори пхув, сави ту дыкхэх, Мэ дава тути тай тирэнди чяворэнди пэ всаворэ вако. 16 Мэ терава, со терэн чяворэн авэла пхэрдо, сар тишай пэ пхув. Акэ со сар ко галёла тэ пэрэбинэ тишай, тунчи тай тирэ чяворэ авэна побиндэ. 17 Джя, проджяпэ пэ кадья пхув дэ лунгима тай дэ буглима. Мэ дава ла тути. 18 Аврамо стидыня катуны тай джиля тэ джювэ надур вэшэстар Мамре дэ Хевроно. Вов стерда котэ жэртвенико РАЕСТИ.

14 Дэ кодья вряма Амрафело, тхагари Шынарохкиро, Ариохо, тхагари Элласарохкиро, Кедорлаомеро, тхагари Эламохкиро, тай Тидало, тхагари Гоимохкиро, 2 екхтанэ джиле маримага пэ Бера, пэ тхагари Содомохкиро, пэ Бирша, пэ тхагари Гоморахкиро, пэ Шынаво, пэ тхагари Адмахкиро, пэ Шэмеверо, пэ тхагари Цэвоимохкиро, тай пэ тхагари Бела (када и исин Цоаро). 3 Кадыла тхагаря стидынепэ зорэнца дэ маля Сиддиммо (тев екхатар Лондо мори). 4 Дэшудуй бэрш вонэ слэ тала зор Кедорлаомерохкиро, нэ пэ дэшутрито бэрш вонэ подлилепэ пэ лэстэ. 5 Дэ дэшутшарто бэрш Кедорлаомеро тай лэхкирэ тхагаря амала выджиле тай розмардэ рефаимеен дэ Аштерото-Карнаимо, зузимеен дэ Хамо, эзимеен дэ Шавек-Кирьятаимо. 6 тай хореен пэ пляя Сеиро, пэ дром дэ Эл-Парано, пэ брэга дэ шуки пхув. 7 Котар вонэ порисиле павпалэ тай авиле дэ Эн-Мишпато (када и исин Кадешо) тай лиле всавори пхув амалекитянэндири, тай кадиж амореен, савэ джювэнас дэ Хацацона-Тамаро. 8 Пэ лэндэ выджиля тхагари Содомохкиро, тхагари Гоморахкиро, тхагари Адмахкиро, тхагари Цэвоимохкиро тай тхагари Белахкиро (када и исин Цоарохкиро). Дэ маля Сиддиммо вонэ ачиле тэ марэпэ. 9 Кедорлаомерога, тхагарега Эламохкиро, Тидалога, тхагарега Гоимохкиро, Амрафелога, тхагарега Шынарохкиро, тай Ариохога, тхагарега Элласарохкиро, — штар тхагарен джиле пэ панч. 10 Пэ маля Сиддиммо сля бут смоляно хывья; кала тхагари Содомохкирэ тай Гоморахкирэ ачиле тэ нашэ котар, бут военонэн тэлэдыне дэ хывья, ай ко ачиляпэ, понашле дэ пляя. 11 Штар тхагарен залиле всаворо барвалимо Содомохкиро тай Гоморахкиро тай вса, со лэндэ сля, тай уджиле. 12 Вонэ залиле кадиж Аврамохкирэ племяннико Лото, саво джюда дэ Содомо, тай всаворо лэхкиро

барвалимо. 13 Екх кодылэндар, ко фирисардапэ, авиля тай роспхэнда пала када евреести Аврамости. Аврамо джюда надур дубонэндар, савэ сле аморехкирэ Мамрехкирэ. Лэхкирэ пхрала Эшколо тай Анеро сле Аврамохкирэ амала. 14 Кала Аврамо ушунда, со лэхкирэ племянико залиле дэ плено, Аврамо акхарда трин шэл душоухто муршэн, савэ джянэнас тэ марэпэ, савэ бзяндэпэ лэстэ цэрэ, попрастыня пала штарэн тхагарен тай джялас пав лэндири шпэра дэ Дано. 15 Ратяг'а Аврамо ростховда пэхкирэн манушэн пэ дуен тай джиля маримаг'а пэ врыжымашэн. Вонэ ачиле тэ нашэ, ай Аврамо традэлас лэн дэ Хова, северостэ Дамаскостар. 16 Вов рисарда всаворо лачимо тай пэхкирэ племянико Лото всаворяг'а барвалимаг'а, тай джювлен, тай манушэн. 17 Кала Аврамо рисарэласпэ тунчи, сар помарда Кедорлаомеро тай тхагарен, савэ сле лэхкирэ амала, тхагари Содомохкиро выджия тэ дыкхэл лэ дэ маля Шаве (када исин Тхагарендири маля). 18 Мелхиседеко, тхагари Салимохкиро, вылиджялда мандро тай мол. Вов сля рашаи Дэвлэхкиро Майвучехкиро. 19 Вов бахталисарда Аврамо, пхэнда: — Бахталисардо ав Аврамо Дэвлэстар Майвучестар, Саво стерда болыбэн тай пхув. 20 Тай ашардо ав Дэвэл Майвучэ, Саво одзэня тирэн врыжымашонэн дэ тирэ васта. Аврамо одыня лэсти всаворэстар дэшто котор. 21 Тхагари Содомохкиро пхэнда Аврамости: — Оздэ манди мурэн манушэн, ай лачимо ачяв пэсти. 22 Нэ Аврамо пхэнда тхагарести Содомохкирэсти: — Мэ подлав васт РАЕСТИ, Дэвлэсти Майвучести, Саво стерда болыбэн тай пхув, тай дав солах, 23 со на прылава тутар ни тхав, ни куцки сандалёнэндар, на лава нисо тиро, соб ту тэ на пхэнэх: «Мэ барвалисардом Аврамо». 24 Мэ лава кацик кода, со схале мурэ мануша. Ай ко джиля манца — Анеро, Эшколо тай Мамре — мэк лэна пэхкиро котор.

15 Тунчи РАЙ сикавдапэ Аврамости тай пхэнда: — На дар, Аврамо. Мэ — тиро щито. Тири бахт авэла фартэ бари. 2 Аврамо пхэнда: — О Хулай, РАЙ, со Ту г'алуэвз'а манди тэ дэ, кала мэ ачявпэ бичяворэндиро, тай муро барвалимо ачелапэ Элиезерости Дамаскостар? 3 Аврамо допхэнда: — Ту на дынян манди чяворэн, тай копылы мурэ цэрэхкиро авэла хулаега муря барвалиматэ. 4 Пэ када сля лэсти лав РАЕХКИРО: — Вов на авэла хулаега тиря барвалиматэ. Пэ вса хулай авэла тутар. 5 РАЙ вылиджялда лэ

пэ гаса тай пхэнда: — Подыкх пэ болыбэн тай побин чергэня, сар с'галювз'а лэн пэрэбинэ. Тай пхэнда лэсти: — Акэ скачик авэна тутэ чяворэн. 6 Аврамо патиня РАЕСТИ, тай Вов заискрисарда када лэсти дэ чачимо. 7 Инте Вов пхэнда Аврамости: — Мэ — РАЙ, Саво вылиджялда тут Уростар халдеендирэстар, соб тэ дэ кадья пхув тути дэ хулаимастэ. 8 Нэ Аврамо пхучля: — О Хулай, РАЕ, сар мэ уджянава, со мэ авава хуляега лати? 9 РАЙ пхэнда лэсти: — Ан Манди тринбэршэхкиря гурувня, тринбэршэхкиря бузня тай тринбэршэхкирэ бакрэ, а кадж ан гурунгэ тай тэрнэ гурунгэ. 10 Аврамо кади и стерда. Вов росчинда лэн по 'паш тай ростховда 'паша екх англа екхатэ; ай чириклен вов на росчинда по 'паш. 11 Прыурянас орлуря, соб тэ хан мулэн, ай Аврамо отдаравэлас лэн. 12 Сар кхам ачиля тэ бэшэ, Аврамо схутилда фартэ зорало совлимо; тай смукляпэ баро калимо, тай дар лиля лэ. 13 РАЙ пхэнда лэсти: — Джян, со тирэ чяворэ авэна тэ джювэ на дэ пэхкири пхув; вонэ авэна копыленца тай авэна дэ пхарима шар шэла бэрш. 14 Нэ Мэ марава колэн манушэн, савэ тердэ лэн копыленца. Тунчи тирэ потомкуря выджяна котар баряг'а барвалимаг'а. 15 Ту одтдж'а дадэндэ пэхкирэндэ дэ пачя тай авэга загаравдо дэ баро пхуранимо. 16 Бэзэх амореендиро инте на допхэрдиля, пала када кордэ рисавэла кацик штартэ родо тирэн потомконэн. 17 Кала кхам бэшля тай ачиля калимо, сикавдапэ тхув и яг, тай вонэ проджили машкар розчиндэ которэндэ. 18 Дэ кодэва диво РАЙ стерда Аврамог'а завето тай пхэнда: — Мэ отдав тирэнди потомконэнди кадья пхув, египетсконатар лэнятар дэ баря лэнь Евфрато: 19 пхув кенеендири, кениззеендири, кадмонеендири, 20 хеттеендири, периззеендири, рефаимеендири, 21 амореендири, ханаанеендири, гергесеендири тай евусеендири.

16 Сара, ромни Аврамохкири, на бзяндэлас лэсти чяворэн. Латэ сля копыльница Египтостар, ла акхарэнас Агарь. 2 Сара пхэнда Аврамости: — РАЙ на дыня манди чяворэн. Джя, пэр копыльницаг'а: сар на авэна латар мандэ чяворэ? Аврамости чялиля када. 3 Тай акэ, кала Аврамо проджюда дэ Ханаано дэш бэрш, Сара, лэхкири ромни, лиля пэхкиря копыльница, Агарь, сави сля Египтостар, тай одыня дэ ромнен пэхкирэсти ромэсти. 4 Вов пыля Агарьяг'а, тай вой ачиля пхари. Кала вой уджянгля, со пхари, Агарь ачиля тэ подасапэ пэхкирятар хуляятар. 5 Тунчи Сара пхэнда Аврамости: — Ту вуджило

дэ када, со мэ дэ холи. Мэ отдынём копыльница тути дэ пато, ай кана вой джянэл, со пхари, тай подасалпэ мандар. Мэк РАЙ сундисарэл амэн туға. 6 — Тири копыльница дэ тирэн вастэн, — пхэнда Аврамо. — Тер лаға вса, со камэх. Тунчи Сара ачия кади врыто пэ тэ лиджя Агарьға, со кодыя унашля латар. 7 Ангело РАЕХКИРО аракхля Агарь дэ шуки пхув, надур лэнэратар; кадыя лэнэри сля пашэ дромэстэ дэ Шуро. 8 Вов пхучля: — Агарь, копыльница Саратири, катар ту авиян тай тев джях? — Мэ нашав мурятар хуланятар Саратар, — пхэнда вой. 9 Тунчи Ангело РАЕХКИРО пхэнда лати: — Рисяв пэхкиратэ хуланятэ тай тэллов лати. 10 Инте Ангело РАЕХКИРО пхэнда лати: — Мэ кади терава бут тирэн потомконэн, со лэн наши авэла тэ побинэ. 11 Инте Ангело РАЕХКИРО пхэнда лати: — Ту кана пхари тай бэянэға чявэ. Акхар лэ Измаило, пала када со РАЙ ушунда пала тири дукх. 12 Вов авэла, сар дыко магары: Вов авэла всаворэнди врыжымашы, тай лэсти всаворэ авэна врыжымашы. Вов авэла тэ джювэ дэ холя всаворэнца пэхкирэнца пхралэнца. 13 РАЕСТИ, Саво дэдуманя лаға, Агарь дэня лав «Эл-Рои», пала кода со вой пхэнда: — Екхатар мэ дыкхлём Колэ, Ко дыкхэл ман. 14 (Акэ сости кодэва ханинг сля акхардо Бээр-Лайх-Рои, вов и екхатар котэ, машкар Кадешоға и Бередоға.) 15 Агарь бэянда Аврамоности чявэ, тай Аврамо дэня чявэсти, савэ вой бэянда, лав Измаило. 16 Кала Агарь бэянда Аврамоности Измаило, лэсти сля 86 бэрш.

17 Кала Аврамоности сля 99 бэрш, РАЙ сикавдалэ лэсти тай пхэнда: — Мэ— Дэвэл Всазороко; пхир англа Ман тай ав би бэзэхахкиро. 2 Мэ стерава Муро завето машкар Ман тай туға тай дава тути фартэ бут потомкуря. 3 Аврамо тэлэдыня муга тэлэ, тай Дэвэл пхэнда лэсти: 4 — Муря ригатар, акэ Муро завето туға: ту авэға дадэға бутэнди народэнди. 5 Ту будэр на авэға тэ акхарэпэ Аврамоға: тиро лав авэла Аврамо, пала када со Мэ стерава тут дадэға бутэнди народэнди. 6 Тутэ авэла фартэ бут чяворэ; тутар Мэ вылиджява народуря тай тутар вылиджява тхагарен. 7 Мэ стерава Муро завето машкар Ман тай туға, и чяворэнца тирэнца пэ всаворэ бэрша, сар вечно завето: Мэ авава тирэға Дэвлэға тай Дэвлэға тирэнди чяворэнди. 8 Всавори пхув Ханаано, тев ту екхатар авиян, Мэ терава тут хулаеға пэ всаворэ бэрша, тут и тирэ чяворэн; тай авава Мэ лэнди Дэвлэға. 9 Дэвэл пхэнда Аврамоности: — Тирятар ригатар, ту авэға тэ терэ кади, сар дэ

Муро завето, ту, тай чяворэ тирэ, тай всаворэ лэндирэ родуря. 10 Акэ Муро завето туға тай тирэнца чяворэнца дэ всаворэ родуря. Ту авэға тэ терэ кади: кожно чяворо мэк авэла обчиндо. 11 Кожнонэсти трэбуни тэ терэ обчиндимо, када авэла заветохкирэға знакоға машкар Ман тай тумэнца. 12 Кожно тумаро чяворо дэ всаворэ родуря трэбуни тэ авэл обчиндо, кала лэсти авэла охто дивэ: тай кодэва, ко бэяндалэ дэ тиро цэр, тай кодэва, саво на тирэндар чяворэндар, ай савэн тиндэ пала ловэ манушэстар аврятар пхуятар. 13 Тай саво бэяндалэ дэ тиро цэр, тай савэн тиндэ пала ловэ, трэбуни тэ авэл обчиндо. Тай Муро завето пэ тумаро трупэ авэла вечно. 14 Наобчиндо чяворо, савэстэ на сля обчиндимо, авэла вычюто пэхкирэндар манушэндар: вов розчинда Муро завето. 15 Инте Дэвэл пхэнда Аврамоности: — А Сара, ромня тиря, ту будэр на авэға тэ акхарэ ла Сара, латино лав авэла Сарра. 16 Мэ бахталисарава ла тай дава тути латар чявэ. Мэ бахталисарава ла кади, со вой авэла дэй важ бут народуря, тай латар джяна тхагаря манушэндирэ. 17 Аврамо тэлила ды пхув, ай дэ лэстэ розасаняпэ тай подумисарда: «Бэяндэлапэ чяво манушэстэ, савэсти шэл бэрш? Бэяндэла ли чяворэ Сарра, савяти инядэша бэрш?» 18 Вов пхэнда Дэвлэсти: — Мишто Измаило сля б джювдо тай бахталисардо Тутар! 19 Дэвэл пхэнда: — Тири ромни Сарра бэянэла тути чявэ, тай ту акхарэға лэ Исаако. Мэ стерава Муро завето лэға сар вечно завето важ лэхкирэ чяворэндэ дэ всаворэ родуря. 20 Тай пала Измаило Мэ ушундом тут. Мэ и лэ бахталисарава, тай лэстэ авэна фартэ бут чяворэ. Вов авэла дадэға дэшудуэнди барэдэрэнди тай Мэ терава лэстар бари порода. 21 Нэ Муро завето авэла Исаакоға, савэ Сарра бэянэла тути пэ авэр бэрш дэ кадыя вряма. 22 Кала Дэвэл пэрэачия тэ дэдумэ Аврамоға, Вов подлияпэ лэстар. 23 Дэ кодэва жэ диво Аврамо лия пэхкирэ чявэ Измаило тай всаворэн, ко сля бэяндо дэ лэхкиро цэр, ко сля тиндо пала ловэ, тай всаворэн муршэн дэ цэр, тай обчинда лэн, сар пхэнда лэсти Дэвэл. 24 Аврамоности сля инядэша иня бэрша, кала вов сля обчиндо, 25 ай лэхкирэ чявэсти Измаилоности сля душутрин. 26 Аврамо тай лэхкиро чяво Измаило дуйджинэ сле обчиндэ дэ кодэва жэ диво. 27 Тай всаворэ мурша дэ Аврамохкиро цэр: тай кола, ко сля бэяндо дэ лэхкиро цэр, тай ко сля тиндо пала ловэ манушэстар аврятар пхуятар, — вса сле обчиндэ екхтанэ лэға.

18 РАЙ авиля Авраамостэ пашэ вэша Мамре, кала вов бэшла англа пэхкири катуна, дэ вряма, кала кхам фартэ татарэлас. 2 Авраамо подлиля якха тай удыххля, со надур ачен трин мануша. Кала удыххля лэн, вов прастыня катуна тар лэндэ тай тэлиля лэнди дэ пхутэ. 3 Вов пхэнда: — Хулай, сар мэ араклём мила дэ тирэн якхэн, на проджа ман, тирэ копыле. 4 Мэк анэна набут пани, соб тумэнди тэ выхалавэ пурэ. Отцынявэн тала кадья рандь, 5 нэ мэ анава тумэнди сось тэ пэрэхаха. Тумэ лэна зор тай джяна дурэдэр — кала тумэ екхатар авиле тумарэстэ копылестэ. — Мишто, — пхэндэ вонэ. — Тер, сар пхэнэх. 6 Авраамо прастэня дэ катуна Сарратэ тай пхэнда: — Сигидэр, дорос трин чярэ варо, саво фэдэр, стер хумэр тай спэк мандро. 7 Вов прастэня гуртостэ, вылиля райканэ лачэрэ гуруворэ тай отдэня копылести, саво фартэ сиво тавда лэ. 8 Тунчи Авраамо анда тирял, тхуд тай тавдо гурувано мас тай тховда англа лэн. Сар вонэ хале, вов ачелас паша лэн тала рандь. 9 — Тев тири ромни Сарра? — пхучле вонэ. — Котэ, дэ катуна, — пхэнда вов. 10 Тунчи мурш пхэнда: — Мэ чяче рисявава тутэ пэ авэр бэршэ, дэ кадья жэ вряма, тай Сарратэ, тирятэ ромнятэ, авэла чяво. Сарра шунэлас, кала ачелас лэстэ пала думэ, дэ катуна пашэ удара. 11 Авраамо тай Сарра сле пуранэ дэ бэршэн, тай када со исин джювлэндэ, Сарратэ пэрэачили. 12 Пала када Сарра розасаняпэ дэ пэ, подумисарда: «Мэ пурани, тай хулай муро пурано. Мандэ авэла кацави лош?» 13 Тунчи РАЙ пхэнда Авраамости: — Сости Сарра асаллэ тай пхэнэл: «Чи чяче мандэ авэла чяворо? Мэ жэ пхури!» 14 Исин со фартэ пхаро важ РАЕСТИ? Мэ рисявава тутэ пэ авэр бэрш дэ кадья жэ вряма, тай Сарратэ авэла чяво. 15 Сарра пэрэдарыняпэ тай ачили тэ отпхэнэпэ: — Мэ на асанёмпэ. Ай Вов пхэнда: — Нат, ту асаняпэ. 16 Мурша ваздынепэ тай джиле дэ риг Содомохкири. Авраамо жэ джиля лэнца, соб тэ пролиджэ лэн. 17 РАЙ подумисарда: «Гаравава ли Мэ Авраамостар кода, со камав тэ терэ? 18 Авраамостар чяче джяна баро тай зорало народо, тай всаворэ мануша пэ пхув авэна бахталисардэ лэстар. 19 Мэ жэ вытидэнём лэ, соб вов тэ прыпхэнэл пэхкирэнди чяворэнди тай всаворэсти пэхкирэ родости тэ пхирэ пав РАЕХКИРЭН дромэн чячимаяа тай пативаяа. Тунчи Мэ, РАЙ, стерова кода, со Мэ пхэнда Авраамости». 20 РАЙ пхэнда: — Дэ Содомо тай Гомора шунэллэ баро типисявимо, мануша котэ терэн бут бээзэх. 21 Мэ сджява тай подыххава, чячюно ли типисявимо, саво доджия

Мандэ, кади ли намишто вонэ терэн. Мэ уджянава, када кади чи нат. 22 Мурша порисиле тай джиле Содомостэ, ай РАЙ ачилипэ тэ аче англа Авраамо. 23 Авраамо поджиля пашэдэр Лэстэ тай пхэнда: — Со, чяче, Ту умарэга чячюнэ манушэ екхтанэ бээзэхалэга? 24 Со, сар дэ форо исин панчдэша чячютнэ? Ту всаекх умарэга тай на дэга Тири мила калэсти тханэсти важ панчдэша чячютнэ? 25 На авэга Ту тэ терэ кацаво — тэ умарэ чячюнэ екхтанэ бээзэхалэга кади ж. На авэга Ту кади тэ терэ! Со ж Сундисари всаворя люмлятиро авэла ли тэ терэ хохавимо? 26 РАЙ пхэнда: — Сар Мэ аракхава дэ Содомо панчдэша чячютнэн, то пала лэн сикавава Мури мила пэ всаворо кодэва тхан. 27 Тунчи Авраамо пхэнда инте: — Акэ, мэ исин прахо тай пепло, ай мэ би даратири ачилём тэ дэдумэ Хулаега. 28 Со, сар дэ панчдэша чячютнэн на хутилэла панч? Умарэга Ту всаворо форо пала када, со на хутилэл панч манушэн? — Сар Мэ аракхава котэ саранда панч, — пхэнда Вов, — на умарава лэ. 29 Авраамо пхэнда Лэсти инте екхвар: — Со, сар котэ аракхэнапэ кацик саранда? Вов пхэнда: — Пала саранда Мэ на терава када. 30 Тунчи Авраамо пхэнда: — На холявэл, Хулай, ай дэла манди тэ пхэнэ. Со, сар аракхэнапэ котэ кацик трянда? Вов пхэнда: — Мэ на терава када, сар аракхава котэ трянда. 31 Авраамо пхэнда: — Акэ, мэ инте камав тэ пхучяв Тутар, Хулай. Со, сар аракхэнапэ котэ кацик биш? Вов пхэнда: — Пала биш Мэ на умарава лэ. 32 Тунчи Авраамо пхэнда: — Тэ на холявэл Хулай, ай дэла манди тэ пхэнэ инте екхвар. Со, сар аракхэнапэ котэ кацик дэш? Вов пхэнда: — Пала дэш Мэ на умарава лэ. 33 РАЙ пэрэачили тэ дэдумэ Авраамога тай уджиля, ай Авраамо рисили цэрэ.

19 Дуй ангелуря авиле дэ Содомо бельвеляга, тай Лото бэшэлас пашэ удара форохкирэ. Кала удыххля лэн, вов вчиля тай тэлиля дэ пхув. 2 — Хулая мурэ, — пхэнда вов, — мангав тумэн, заджян дэ цэр тумарэстэ копылестэ. Тумэ халавэна пурэ тай ратярэна мандэ, ай дэнзор джяна дурэдэр. — Нат, — пхэндэ вонэ, — амэ ратярага пэ гаса. 3 Нэ вов кади мангэлас, со вонэ джиле пала лэ тай заджиле дэ цэр. Вов тавда важ лэн хамо, пэклэ присно мандро, тай вонэ хале. 4 Ай дыкалэ, сар вонэ пыле, всаворэ мурша Содомостар, тэрнэ тай пхурэ, лиле цэр дэ бэлычюго. 5 Вонэ типисиле Лотости: — Тев мануша, савэ авиле тутэ бэльвеляга? Вылиджэ лэн амэндэ, амэ камах тэ пэрэсовах лэнцар. 6

Лото выджила лэндэ тай затерда пала пэ удара. 7 Вов пхэнда: — Нат, амала мурэ, на терэн кацаво налачимо. 8 Пошунэн, мандэ исин дуй чея, савэ инте на сле муршэга. Камэн, мэ вылиджява лэн тумэндэ, терэн лэнца, со камэн. Ай на терэн нисо кадэлэнди манушэнди, савэ авиле дэ муро цэр. 9 Вонэ пхэндэ: — Наш дромэстар! Тай пхэндэ: — Кадыва мануш, авила амэндэ авря пхуятар, ай кана камэл тэ авэ амэнди сундимарега! Амэ терага туга инте врытэдэр! Вонэ ачиле тэ вытрадэ Лото тай поджиле, соб тэ выпхагэ удара. 10 Нэ мурша, савэ аченаслэ дэ цэр, процырдэне васта, зацырдэне Лото дэ цэр тай затердэ удара. 11 А колэн, ко сле пашэ цэр, тэрэнэн тай пхурэн, вонэ тердэ корэнца, кади со вонэ на аракхэнас удара. 12 Кала мурша пхэндэ Лотости: — Ко инте тутэ катэ исин — джямутрэ, чявэ, чея, ко исин инте дэ форо? Вылиджя лэн катар, 13 пала када со амэ стидахпэ тэ умарэ кадыва тхан. Типисявимо РАЕСТЭ пэ кала мануша кацаво зорало, со Вов бичялда амэн тэ умарэ лэ. 14 Лото выджила тай пхэнда дуенди манушэнди, савэ камле тэ лэ пала пэстэ лэхкирэн чеен: — Сигидэр, уджян катар! РАЙ стидэлпэ тэ спхабарэ форо! Ай кодэла думисардэ, со вов терэл пхиряс. 15 Англа када, сар кхам ущиля, ангелуря ачиле тэ подтрадэ Лото, пхэнэнас: — Сигидэра! Улиджя катар пэхкиря ромня тай дуен чеен, ай нат, ту мэрэга, кала мэrimo пэрэла пэ форо. 16 Вов стидэласпэ насиго, ай кодыла дуй лиле лэ пала васт, тай лэхкиря ромня, тай дуен чеен, пала када со РАЙ сикавда лэнди мила, тай вылиджялдэ лэн пала форо. 17 Кала вонэ сле пала форо, екх лэндэр пхэнда: — Наш катар! На дыкх павпалэ тай на ачэ ни тев дэ маля! Наш дэ плая, ай сар на кади — ту мэрэга! 18 Ай Лото пхэнда лэнди: — Нат, Хулай! 19 Копыли тиро аракхля дэ Тирэн якхэн лачимо. Ту сикавдан манди бари мила, кала фирисарэгас муро джювимо. Ай дэ плая мэ на допрастэва: глаба доросэла ман, тай мэ мэрава. 20 Акэ кодэва форицы надур, пордэ мэ допрастэва, тай вов на баро. Дэ манди тэ нашэ пордэ— вов фартэ цыкно, на кади? — тай муро джювимо авэла фирисардо. 21 Вов пхэнда: — Мишто, Мэ терава и када, со мангэх: Мэ на спхабарава форо, пала савэ ту пхэнэх. 22 Наш пордэ сигидэр, пала када со Мэ нисо на авава тэ терэ, тунчи сар ту на допрастэга дэ лэ. (Акэ сости кодэва форо сля акхардо Цоаро). 23 Кала Лото допрастэня дэ Цоаро, кхам ужэ вщиля. 24 Тунчи РАЙ прочюта брышындэга пэ Содомо тай Гомора пхабарди сера. Вой авила болыбнастар РАЕСТАР.

25 Вов спхабарда форурия тай всавори маля, тай всаворэн, ко джюда дэ форурия, тай вса, со барéлас пэ пхув. 26 Ай ромни Лотохкири обрисардапэ павпалэ тай тердапэ лондэга столбога. 27 Пэ авэр дэнзор Авраамо подлиляпэ фартэ дэнзор тай рисардапэ колэстэ тханэстэ, тев вов ачелас англа РАЙ. 28 Вов подыкхля пэ Содомо, Гомора тай пэ всавори маля тай удыхкля: зорало тхув ваздэлпэ пхуятар, сар тхув боватар. 29 Кади, кала Дэвэл спхабарда форурия малендирэ, дэ савэн джюда Лото, Вов взрапирда Авраамо тай фирисарда Лото глабатар. 30 Лото даларас тэ ачелэ дэ Цоаро. Вов тай дуй лэхкирэ чея уджиле Цоаростар дэ плая. Пэхкирэнца дуенца чеенца вов ачилэ тэ джювэ дэ пищера. 31 Пхурэдэр чей пхэнда цыкняти: — Амаро дад пурано, тай катэ нитев нинай муршэ, соб тэ пэрэл амэнца, сар терэлпэ пэ всавори пхув. 32 Матярага дадэ, дага лэсти мол тай пэрага лэга. Мэк и амарэстар дадэстар, нэ амэндэ авэна чяворэ. 33 Дэ кодыя рат вонэ дэне дадэсти мол тай матярдэ лэ, тай пхурэдэр чей заджиля тай пэля лэга. Вов и на джянгля, кала вой пэля и кала вщиля. 34 Пэ авэр диво пхурэдэр чей пхэнда цыкняти: — Дэ рат, сави проджиля, мэ пэлём дадэга. Упалэ дага лэсти мол тай матеряга авдивэ бельвеляга, тай ту заджяга тай пэрэга лэга. Мэк и амарэстар дадэстар, нэ амэндэ авэна чяворэ 35 Вонэ дэне мол тай матярдэ дадэ дэ кадыя рат, тай цыкнэдэр чей заджиля тай пэля лэга. Вов и на джянгля, кала вой пэля и кала вщиля. 36 Кади дуй чея Лотохкирэ ачелэ пхарэ дадэстар. 37 Пхурэдэр чей бэянда чявэ тай акхарда лэ Моаво; вов дад моавитянэн. 38 Цыкнэдэр чей кади ж бэянда чявэ тай акхарда лэ — Бен-Амми; вов дад аммонитянэн.

20 Котар Авраамо пэрэджиля дэ пхув Негево тай джювэлас машкар Кадешо тай Шуро. Вов савись вряма джювэлас дэ Гераро. 2 Котэ вов пхэнэлас всаворэнди, со Сарра сля лэхкири пхэнь. Авимелехо, тхагари Герарохкиро, бичялда пала Сарра тай лиля ла пэстэ. 3 Ай ратяга дэ сунэ Авимелехостэ авила Дэвэл тай пхэнда лэсти: — Тутэ авэла мэrimo пала джювли, савля ту лилян пэстэ: вой пала ром. 4 Нэ Авимелехо на лэласпэ латэ, тай пала када вов пхэнда: — Хулай, Ту жэ на умарэга навуджило народо? 5 Вов жэ пхэнда манди, со вой лэхкири пхэнь, тай вой пхэнда, со вов латино пхрал. Катэ мэ на тердом бэзэх на ды годи, на ды рындурия. 6 Дэвэл пхэнда лэсти дэ сунэ: — Чяче, Мэ джянав, со годи тири жужи:

када Мэ урицардом тут бээхатар англа Мандэ, тай на дэнём тути тэ лэпэ латэ. 7 Кана рисар ромня ромэсти, пала када со вов — англунари. Вов помангэлэпэ пала тут, тай ту ачегэлэ джовдо. Ай сар ту на рисарэга ла, джан, со тути тай тирэсти родости тэ на унашэ мэриматар. 8 Пэ авэр диво дэнзор Авимелехо стидэня всаворэн пэхкирэн пашутнэн тай роспхэнда лэнди, со тердапэ, тай вонэ фартэ дарэне. 9 Тунчи Авимелехо акхарда Авраамо тай пхэнда: — Со ту амэнца тердан? Саво врытимо мэ тути тердом, со ту андан кацави пхари дош пэ ман тай пэ муро тхагаримо? Ту тердан манца кади, сар наши тэ терэ. 10 Тай Авимелехо пхучля Авраамостар: — Со сля тутэ пэ годи, кала ту тердан кацаво? 11 Авраамо пхэнда: — Мэ подумисардом: «Дэ кадыва тхан, чяче, нинай дар Дэвлэхкиро, тай мануша умарэна ман пала муря ромня». 12 Ай инте, вой чяче мури пхэнь, чей мурэ дадэсти, ай на муря датар. Вой ачиля муряга ромняга. 13 Кала Дэвэл бичялда ман мурэ дадэхкирэ цэрэстар тэ пхирэ пав пхув, мэ пхэндом лати: «Стер манди кацаво лачё рындо: тев бы амэ на авиле, пхэн пала ман, со мэ тиро пхрал. 14 Тунчи Авимелехо анда цыкно тай баро ското, копылен тай копыльницэн тай дэня лэн Авраамости. Вов инте рисарда лэсти лэхкиря ромня Сарра. 15 Авимелехо пхэнда: — Мури пхув англа тутэ: джов, тев камэх. 16 Саррати вов пхэнда: — Мэ дэнём тирэсти пхралэсти пхангли шэкели рупь, соб тэ ушаравэ тири холи дэ яхэн всаворэн, ко дэ тиро цэр. Тири патив кана упалэ жужи. 17 Авраамо помангялэ Дэвлэсти, тай Дэвэл састярда Авимелехо, лэхкиря ромня тай копыльницэн, тай вонэ упалэ ачиле тэ бэянэ чяворэн. 18 Ай дыкалэ РАЙ на дэлэс ни екх джовляти дэ Авимелехохкиро цэр тэ бэянэ, пала када со Авимелехо лиля пэсти Сарра, Авраамохкиря ромня.

21 Сар Вов и пхэнда, РАЙ сикавда мила Саррати тай срицарда Пэхкиро лав. 2 Кала Авраамо ужэ ачиля пурано, Сарра ачиля пхари тай бэянда лэсти чявэ, дэ кодья вряма, сар пхэнда Дэвэл. 3 Авраамо дэня чяворэсти, савэ бэянда лэсти Сарра, лав Исаако. 4 Кала лэхкирэсти чявэсти Исаакости ачиля охто дивэ, Авраамо обчинда лэ, сар прыпхэнда лэсти Дэвэл. 5 Авраамости сля шэл бэрш, кала лэстэ бэяндапэ чяво Исаако. 6 Сарра пхэнда: — Дэвэл заачявда ман тэ асэлэ. Кожно, ко ушунэла пала када, розасалалэ екхтханэ манца. 7 — Тай допхэнда: — Ко б пхэнда Авраамости, со Сарра авэла тэ парварэ колинага? Ай мэ бэяндом

лэсти чявэ дэ лэхкиро пхуранимо. 8 Чяворо выбарила тай сля отлито колинатар. Дэ кадыва диво, кала Исаако сля отлито колинатар, Авраамо стерда баро сэрибатори. 9 Сарра удыхля, со чяво, савэ бэянда Авраамости Агарь Египтостар, подасалпэ Исаакостар, 10 тай пхэнда Авраамости: — Вытрадэ кадыла копыльница тай латирэ чявэ, пала када со чяво кадылатиро копыльницатиро на лэла амаро хулаемо екхтханэ мурэга чявэга Исаакога. 11 Авраамо сля фартэ холямо, пала кода со и кадыва сля лэхкиро чяво. 12 Ай Дэвэл пхэнда лэсти: — На холяв пала чяворэ тай копыльницатэ. Пошунпэ Сарра тай стер вса, сар вой пхэнэл, пала када со порода тутэ джяла Исаакостар. 13 Ай чявэстар копыльницатирэстар Мэ стерава инте народо, пала када со вов тиро чяво. 14 Пэ аврэ дивэ фартэ дэнзор Авраамо лиля хамо, пани дэ бурдюко тай дэня Агаряти: тховда лати пэ пхикэн тай отбичялда котар ла тай чяворэ. Вой джиля тай пхирэлэс пав шуки пхув Вирсавия. 15 Кала пани дэ бурдюко на ачиля, вой ачявда чяворэ тала рандёры, 16 отджиля надур тай прэбэшла пэ дром, сар урэл стрела лукостар. Вой думисарэлэс: «На авава тэ дыкхэ, сар чяворо мэрэл». Кала вой бэшэлэс котэ, розровиняпэ фартэ. 17 Дэвэл ушунда чяворэхкиро ровимо, тай Дэвлэхкиро ангело ачиля тэ дэдумэ болыбнатар Агарятэ: — Со туга, Агарь? На дар, Дэвэл ушунда, сар ровэл чяворо котэ, тев вов пашлёл. 18 Вщи, ваздэ лэ, лэ чяворэ пала вастэ. Мэ вылиджява лэстар баро народо. 19 Дэвэл оттерда лати якха, тай вой удыхля ханинг панега. Вой джиля, пхэрдиля бурдюко панега тай дэня тэ пэ чяворэсти. 20 Дэвэл сля чяворэга. Измаило выбарила тай ачиля тэ джовэ дэ шуки пхув. Вов фартэ мишто марэлэс лукостар. 21 Вов джюда дэ шуки пхув Парано, тай дэй лиля важ лэсти ромня Египтостар. 22 Дэ кодья вряма Авимелехо тай Фихоло, барэдэр рай дэ лэхкирэ войско, пхэндэ Авраамости: — Дэвэл туга дэ вса, со ту терэх. 23 Дэ солах манди катэ англа Дэвлэ, со ту на хохавэга ни ман, ни мурэн чяворэн, ни мурэн потомконэн. Стер манди тай пхуяти, дэ сави ту екхатар джовэх, кодья жэ мила, сави мэ стердом тути. 24 Авраамо пхэнда: — Дав солах. 25 Тунчи Авраамо выпхэнда Авимелехости пала ханинг панега, саво копыли Авимелехохкирэ лиле зорага. 26 Ай Авимелехо пхэнда: — Мэ на джянав, ко када стерда. Ту на дэдуманян, и дыкалэ мэ на шундом пала када. 27 Авраамо анда цыкно тай баро ското, дэня лэн Авимелехости, тай вонэ стердэ екх екхэга допхэнимо. 28 Авраамо отлиля гуртостар

ефта тэрнэн бакрорэн, 29 тай Авимелехо пхучля Авраамостар: — Со када за ефта тэрнэ бакрорэн, савэн ту отлилан? 30 Авраамо пхэнда: — Прылз мандар ефта кадылэн тэрнэн бакрорэн дэ знако, со мэ выганавам кадыва ханинг тай со вов муро. 31 Авраамо акхарда кодэва тхан Вирсавия, пала кода со вонэ дуйджинэ дэне котэ солах. 32 Тунчи сар вонэ допхэндэпэ дэ Вирсавия, Авимелехо тай Фихоло, барэдэр рай дэ лэхкирэ войско, рисардэлэ дэ пхув филистимлянэндири. 33 Дэ Вирсавия Авраамо чюта дэ пхув рандь-тамариско тай прыаххарда котэ лав РАЕХКИРО, Дэвлэхкиро Вечнонэ. 34 Авраамо джюда пэ филистимско пхув бут вряма.

22 Проджиля савись вряма, тай Дэвэл закамля тэ уджянь чачюно патямо Авраамохкиро. Вов пхэнда лэсти: — Авраамо. — Мэ катэ, — пхэнда Авраамо. 2 Дэвэл пхэнда: — Лэ чявэ, ехкорэ пэхкирэ чявэ Исаако, савэ ту камэх, джя дэ пхув Мория тай ан лэ котэ дэ жэртва тай спхабар ла дэ яг пэ плай, сави Мэ сикавава тути. 3 Пэ авэр диво дэнзор Авраамо вщиля, зальтыярда магаре, лиля пэга дуен копылен тай чявэ Исаако, починда кашта важ жэртва тай джиля дэ дром дэ кодэва тхан, пала савэ пхэнда лэсти Дэвэл. 4 Пэ трито диво Авраамо ваздэня якха тай удыхля дурал кодэва тхан. 5 Вов пхэнда копыленди: — Аченпэ катэ магарега, ай амэ чяворэга джяга пордэ стерага тэлисаримо, ай тунчи рисявага тумэндэ. 6 Авраамо лиля кашта важ жэртва тай тховда лэн пэ думо Исаакости, ай екджино лиджялда яг тай чюри, тай вонэ дуйджинэ джиле дэ дром. 7 Исаако пхэнда пэхкирэсти дадэсти Авраамости: — Дадэ! — Нэ, муро чяво? — пхэнда Авраамо. — Амэндэ исин яг тай кашта, — пхэнда Исаако, — ай тев жэ бакроро важ жэртва? 8 Авраамо пхэнда: — Дэвэл Екджино удыххэла бакрорэ важ жэртва, чяво муро. Тай вонэ дуйджинэ джиле дурэдэр. 9 Кала вонэ доджиле дэ тхан, пала савэ пхэнда лэсти Дэвэл, Авраамо стерда котэ жэртвенико тай стховда пэ лэстэ кашта, спхангя пэхкирэ чявэ Исаако тай тховда лэ пэ жэртвенико пэ кашта. 10 Вов процюрдэня васт тай лиля чюри, соб тэ умарэ чявэ. 11 Ай Ангело РАЕХКИРО прохлэнда лэсти болыбнастар: — Авраамо! Авраамо! — Мэ катэ, — пхэнда вов. 12 — На ваздэ васт пэ чяворэ, — пхэнда Вов, — на тер лэга нисо. Кана Мэ джянав, со ту дарахпэ Дэвлэ, пала када со тути на дор важ Манди чявэ, ехкорэ пэхкирэ чявэ. 13 Авраамо ваздэня якха тай удыхля бакрэ, саво

шынгэнца амгладэлас пала ранден. Вов джиля, лиля бакрэ, анда лэ дэ жэртва тай спхабарда пэ яг пала чявэ. 14 Авраамо акхарда кодэва тхан «Яхве-Ирэ», тай пала кода и екхатар пхэнэлпэ: «Пэ РАЕХКИРО плай удыххэлапэ». 15 Ангело РАЕХКИРО прохлэнда Авраамостэ болыбнастар дэ дуйто моло 16 тай пхэнда: — Мэ, РАЙ, солохав Екджинэга Пэга: сар ту стердан када тай тути на сля дор важ Манди пэхкирэ ехкорэ чявэ, 17 чяче Мэ бахталисарава тут тай стерава, со тирэн чяворэн авэла фартэ бут, сар чергэня дэ болыбэн, сар тишай пэ морско брэга. Тирэ чяворэ залэна форурия пэхкирэн врыжымашэн, 18 тай тутар авэна бахталисардэ всаворэ народурия пэ пхув, пала када со ту покангялн Ман. 19 Авраамо рисардапэ копылендэ, тай вонэ ектханэ джиле дэ Вирсавия. Авраамо ачиляпэ дэ Вирсавия. 20 Проджиля вряма, тай Авраамости пхэндэ: — Кана и Милка— дэй, вой бэянда чявэн тирэсти пхралэсти Нахорости: 21 Уцо, первонэ, Бузо, лэхкирэ пхралэ, Кемуило (Арамохкирэ дадэ), 22 Кеседо, Хазо, Пилдашо, Идлафо тай Бетуило. 23 Бетуило ачиля дадэга Ревекатиряти. Милка бэянда охто кадэлэн чявэн Нахорости, Авраамохкирэ пхралэсти. 24 Лэхкири наложница, савя акхарэнас Реума, кади ж бэянда лэсти чявэн: Тевахо, Гахамо, Тахашо тай Мааха.

23 Сарра проджюда 127 бэрш — када скацик всаворо джювимо Сарратиро. 2 Вой муля дэ Кирьят-Арба (када исин Хевроно), дэ пхув Ханаано, тай Авраамо авиля тэ ровэ пала Сарра. 3 Тунчи Авраамо отджиля ромнятар, сави муля, тай пхэнда хеттеендэ: 4 — Мэ авилём кордэ авря пхуютар тэ джювэ машкар тумэн авря пхуютар. Битинэнти манди котор пхув, соб мэ тэ гаравав муля. 5 Хеттея пхэнэн Авраамости: 6 — Рай, ашун, ту — зорало баро мануш помашкар амэн. Гарав муля дэ амаро само фэдэр тхан важ када. Нико амэндар на отпхэнэла тути кацавэга тханэга, соб тэ гаравэ тиря муля. 7 Тунчи Авраамо вщиля тай тэлиля хеттеенди, манушэнди кодылатар пхуютар. 8 Вов пхэнда лэнди: — Сар тумэ камэн када, соб мэ тэ гаравав муля, пошунэн ман тай помангэн пала ман Эфроно, Цохарохкирэ чявэ, 9 соб вов тэ битинэл манди пицера Махпела, сави исин лэхкири тай ачел пэ бряго пэ лэхкири маля. Мэк битинэла ла манди пала бари цымин рупь, сар тхан важ соб тэ гарава помашкар тумэн. 10 Хеттеё Эфроно бэшла помашкар пэхкирэ мануша тай пхэнэл Авраамости англа всаворэ хеттеен, савэ авиле форохкиронэндирэ удара. 11 Вов пхэнда:

— Нат, муро рай, пошун ман. Мэ отдав тути маля тай отдав тути пищера, сави пэ кая маля. Мэ отдав тути када англа мурэ мануша. Гарав пэхкиря муля. 12 Авраамо упалэ тэлила манушэнди кодылатар пхуятар 13 тай пхэнда Эфроности англа лэн: — Вышун жэ ту ман. Мэ дава рупь пала маля. Прылэ ла мандар, соб манди тэ гаравэ котэ муля. 14 Эфроно пхэнда Авраамости: 15 — Пошун ман, рай муро: пхув кодыя ачел штар шэла шкеля рупь. Када со бут важ тути чи важ манди? Гарав пэхкиря муля. 16 Авраамо допхэндалэ Эфронога тай дэня лэсти малятири цымин, сави вов пхэнда англа хеттея: штар шэла шкеля рупь, сар бинэн битинимари. 17 Кади маля Эфронохкири дэ Махпела пашэ Мамрега, маля тай пищера, тай всаворэ рандя пав бэрги малятирэ ачиле 18 Авраамохкирэ англа всаворэн хеттеен, савэ авиле дэ форохкирэн ударэн. 19 Пала када Авраамо гаравда пэхкиря ромня Сарра дэ пищера пэ маля Махпела пашэ Мамрега (со дэ Хевроно), дэ пхув Ханаано. 20 Маля тай пищера пэ лэстэ пэрэджиле хеттеендар Авраамости, сар тхан, тев тэ гаравэ мулэн.

24 Авраамо ачиля пурано, лэсти сля бут бэрш, тай РАЙ бахтисарда лэ дэ вса. 2 Авраамо пхэнда пхурэдэрэсти копылести дэ пэхкоро цэр, саво дыкхэлэс пала вса, со лэстэ сля: — Тхов васт манди тала пашварэ 3 тай солаха манди РАЕГА, Саво исин Дэвэл болыбнахкиро тай Дэвэл пхуятиро, со ту на лэга мурэсти чявэсти ромня чеендар ханаанеендирэн, машкар савэн мэ джював, 4 ай джяга дэ пхув, тев мэ бэяндомпэ, мурэндэ родонэндэ, тай котэ лэга ромня мурэсти чявэсти Исаакости. 5 Копыли пхучля лэстар: — Со, сар кодыя джювли на закамэла тэ джя манца кордэ, дэ кадыя пхув? Со манди тунчи тэ терэ, тэ рисарэ тирэ чявэ дэ кодыя пхув, савятар ту авилян? 6 Авраамо пхэнэл: — Нисар тай никала на рисар пордэ мурэ чявэ. 7 РАЙ, Дэвэл болыбнахкиро, Саво вылидджалда ман дадэхкирэ цэрэстар тай мурятар пхуятар, Саво дэдуманя манца тай дэня солах манди, кала пхэнда: «Мэ отдава кадыя пхув тирэнди чяворэнди», Вов бичялэла Пэхкирэ ангело англа тут, соб ту тэ лэх котар ромня мурэсти чявэсти. 8 Сар джювли на закамэла тэ джя туга, ту авэга викалавдо калатар солахатар. Кацки на рисар пордэ мурэ чявэ. 9 Копыли тховда васт тала паршавэ Авраамости, пэхкирэсти раести, тай дэня солах лэсти. 10 Тунчи копыли лиля деш верблюдонэн пэхкирэ раехкирэн,

пхэрдила лэн фэдэрэнца подарконэнца лэстар тай джиле дэ дром. Вов джиле дэ Арамо-Нахараимо, рицарда дром форостэ, тев джюда Нахоро. 11 Вов тэлисарда верблюдонэн пэ чянгэн паша ханинг пала форо; када сля тала бельвель, кала джювля авэн пала пани. 12 Вов пхэнда: — РАЕ, Дэвэл мурэ раехкиро Авраамо! Дэ манди авдивэ бахтисаримо тай сикав мила мурэсти раести Авраамости. 13 Акэ, мэ ачяв пашэ ханинг, тай чея форохкирэ джян пала пани. 14 Мэк авэла кади. Сар мэ пхэнава чяти: «Мангав тут, обмук кхоро пхикэстар, соб манди тэ пэ пани», ай вой пхэнэла: «Пи, тай мэ дава пани тирэнди верблюдонэнди», када вой авэла, саяя Ту вылилян важ тирэсти копылэсти Исаакости. Кади мэ уджянава, со Ту дэх мила мурэсти раести. 15 Инте вов на пэрэачиле тэ мангэпэ, сар ханингэстэ выджиле Ревека кхорэга пэ пхико, чей Бетуилохкири, саво сля чявэга Милкатири, сави сля ромняга Нахорости, Авраамохкирэ пхралэ. 16 Вой сля фартэ шукарни чей, чеёры, сави на сля инте муршэга. Вой смукляпэ ханингастэ, пхэрдила кхоро тай джиле павпалэ. 17 Копыли подпрастэня латэ тай пхэнэл: — Мангав тут, дэ манди набут пани тирэстар кхорэстар. 18 — Пи, муро рай, — пхэнда вой, сиво смукхля кхоро пэ вастэн, дэня лэсти тэ пэ. 19 Кала вов пиля скацки лэсти трэбуни, вой пхэнда: — Мэ доросава пани и тирэнди верблюдонэнди, скацки вонэ авэна тэ пэ. 20 Вой сиво вычюта пани кхорэстар дэ балани, прастэня упалэ ханингастэ тэ лэ инте пани тай доросля пани всаворэнди лэхкирэнди верблюдонэнди. 21 Копыли ачелас мулком тай дыкхля пэ ла, вов камэлэс тэ полэ, дэня ли РАЙ лэсти бахт. 22 Кала верблюдуря пэрэачиле тэ пэ, вов вылиля сувнакуни чень важ нахк, пхаримага дэ бека, тай дуй сувнакунэ ланчюги пэ васта, пхаримага дэ дэш шкеля, 23 тай пхучля: — Пхэн манди, кахкири ту чей? Исин тирэстэ дадэстэ дэ цэр тхан, соб амэнди тэ ратярэ? 24 Вой пхэнда лэсти: — Мэ чей Бетуилохкири, вов исин чяво Милкатири, савэ вой бэянда Нахорости. 25 Тай инте допхэнда: — Амэндэ исин бут сулум тай ворзо, тай исин тхан, тев тэ ратярэ. 26 Тунчи Авраамохкиро копыли тэлила тай ашарда РАЕ, 27 пхэнда: — Ашарав РАЕ, Дэвлэ мурэ раехкиро Авраамохкирэ, Саво на ачявда би Пэхкири мила тай чячима мурэ рае, пала када со РАЙ анда ман дэ цэр родостэ мурэ раехкирэ. 28 Чей прастэня дэ цэр тай роспхэнда пала вса пэхкиряти дати. 29 Ревекатэ сля пхрал, лэ ахарэнас Лавано, тай вов сиво джиле колэстэ манушэстэ, саво сля пашэ ханинг. 30 Кацки вов

удыкхля чень важ нахх тай ланчюги пэ вастэн пхэнэтэ тай ушунда роспхэндимо Ревекати́ро пала кода, со пхэнда лати кодэва мануш, вов джи́ля лэстэ, ай кодэва кади и ачелас верблюдонэнца пашэ ханинг. 31 — Джям амэндэ, бахталисардо РАЕҒА, — пхэнда Лавано. — Сости ту ачех пэ гаса? Мэ чютом цэр важ тути тай тхан верблюдонэнди. 32 Копыли заджи́ля дэ цэр, тай верблюдонэндар слиле пхаримо. Лэнди андэ сулум тай ворзо, ай лэсти и лэхкирэ́нди манушэнди андэ пани, соб тэ выхалавэ пурэ. 33 Англа лэстэ тховдэ хамо, нэ вов пхэнда: — Мэ на авава тэ ха, кала на роспхэнава пала муро рындо. — Роспхэн, — пхэнда Лавано. 34 Вов пхэнда: — Мэ — Авраамохкиро копыли. 35 РАЙ фартэ мишто бахталисарда мурэ рае, вов ачи́ля барвало. Вов дэ́ня лэсти бузнен, бакрэн тай гурувнен, рупь тай сувнак, копылен тай копыльни́цен, верблюдонэн тай магарен. 36 Мурэ раехкири ромни Сарра бзянда лэсти чявэ дэ пхурима, тай вов отдэ́ня чявэсти вса, со лэстэ сля. 37 Муро рай прэпхэнда манди тэ дэ солах тай пхэнда: «На лэ ромня мурэ́сти чявэ́сти чеендар ханаанеенди́рен, дэ кахи́ри пхув мэ джю́вав, 38 ай джя і́рятэ мурэ да́дэхкирэ, мурэ́стэ родостэ, тай котар лэ ромня мурэ́сти чявэ́сти». 39 Мэ пхучлём мурэ раестар: «Со, сар коды́я джю́вли на джя́ла манца?» 40 Вов пхэнда: «РАЙ, англа Кастэ мэ пхи́рав, бичя́лэла ту́ґа Пэхкоро ангело тай дэ́ла тути бахт пала со ту и джя́х, соб ту тэ лэх ромня мурэ́сти чявэ́сти мурэ́стар родостар тай да́дэхки́рятар і́рятар. 41 Ка́чик тунчи ту авэ́ґа ви́калавдо кады́латар солахатар, кала поавэ́ґа дэ цэр мурэ да́дэхкирэ, тай сар вонэ отпхэ́нна тути тэ отдэ́ ла, тунчи ту авэ́ґа ви́калавдо солахатар». 42 Кала мэ авди́вэ ави́лём ханингатэ, мэ пхэндо́м: «О, РАЕ, Дэвэл мурэ раехкиро Авраамохкиро, ка́чик бы Ту тэ дэх бахт ко́лэсти, пала со мэ бичя́лдо кордэ́! 43 Акэ, мэ а́чяв па́ша ханинг: сар чей вы́джяла тэ до́росэ пани, тай мэ пхэ́нава лати: «Мангав тут, дэ манди тэ пэ пани тирэ́стар кхорэ́стар», 44 тай сар вой пхэ́нэла манди: «Пи, тай мэ до́росава пани и тирэ́нди верблюдонэ́нди», акэ, қа́да вой, савя РАЙ вы́ли́ля чявэ́сти мурэ раести». 45 Инте мэ на пэрэ́ачилём тэ мангэ́пэ дэ пэхкоро і́ло, сар вы́джи́ля Реве́ка кхорэ́ґа пэ пхи́ко. Вой смукля́пэ ханингатэ тай до́росля пани, тай мэ пхэндо́м лати: «Мангав тут, дэ манди тэ пэ пани». 46 Вой сико́ обмукля́ кхоро пхи́кэстар тай пхэнда: «Пи, ай мэ да́ва пани и тирэ́нди верблюдонэ́нди». Мэ пи́лём пани, тай вой дэ́ня тэ пэ верблюдонэ́нди. 47 Мэ пхучлём латар: «Ка́хкири ту чей?» Вой

пхэнда: «Мэ чей Бетуилохкири, вов исин чяво Милкати́ро, савэ вой бзя́нда Нахорости. Тунчи мэ дэ́нём лати чень важ нахх тай ланчюги пэ вастэн, 48 тэ́лилём тай аша́рдом РАЕ. Мэ аша́рдом РАЕ, Дэвлэ Авраамохкирэ, мурэ раехкирэ, Саво анда ман чя́чютнэ дро́мэґа, соб тэ лав мурэ раехкирэ пхралэ́стеря вну́чка пала лэхкоро чяво. 49 Кана, сар тумэ терэ́на ми́ла тай чя́чимо мурэ́сти раести, пхэ́нэн манди, ай сар нат, кади ж пхэ́нэн манди, соб мэ тэ джя́нав, со манди тэ терэ. 50 Лавано тай Бетуило пхэнда: — Кады́ва ры́ндо РАЕ́СТАР, на амэ́нди тэ пхэ́нэ тути нэ чи нат. 51 Акэ Реве́ка англа тут; залэ ла тай джя, тай мэк вой а́чела ромня́ґа тирэ раехкирэ чя́вэсти, сар вы́ли́ля РАЙ. 52 Кала Авраамохкиро копыли ушунда кады́ла лава, вов тэ́ли́ля РАЕ́СТИ ды́ пхув. 53 Тунчи вов вы́ли́ля лачи і́да, ка́ди́ж сувна́куно тай ру́пуно шука́римо, тай отдэ́ня Реве́кати; лати́рэсти пхралэ́сти тай дати вов ка́ди́ж дэ́ня кучю́тнэ подарку́ря. 54 Тунчи вов тай ману́ша, савэ сле лэ́ґа, хале, пи́ле тай а́челепэ́ тэ ратя́рэ. Кала пэ авэ́р дэ́нзор вонэ вщи́ле, вов пхэнда: — Отму́кэн ман, мэ ка́мав тэ джя́ дэ дро́м мурэ́стэ раестэ. 55 Ай пхрал тай дэ́й Ревекати́рэ пхэнда: — Мэк чей а́челапэ́ амэ́нца инте пэ дэ́ш дивэ́, тунчи джя́ґа. 56 Нэ вов пхэнда: — На ри́царэн ман, сар РАЙ дэ́ня бахт ко́лэсти, пала со мэ бичя́лдо кордэ́. Отму́кэн ман дэ дро́м, соб ма́й тэ рися́вав мурэ́стэ раестэ. 57 Вонэ пхэ́ндэ: — Акха́раґа чя тай пхучя́ґа ла. 58 Вонэ акха́рдэ Реве́ка тай пхучле: — Ту джя́ґа ка́дэлэ́ґа манушэ́ґа? — Джя́ва, — пхэнда вой. 59 Тай вонэ отбичя́лдэ́ дэ дро́м пэхки́рия пхэ́ня Реве́ка екхтанэ́ ко́дэлэ́ґа, ко ла парва́рэлас, Авраамохкирэ́ґа ко́пэлэ́ґа тай манушэ́нца, савэ лэ́ґа сле. 60 Вонэ бахталисардэ́ Реве́ка тай пхэ́ндэ: — Ама́ри пхэ́нь, мэк тирэ́н чяво́рэн авэ́ла пханги́ тай дэ́швар будэ́р латар мэк вонэ лэ́на зора́ґа цэ́ра тай фо́руря пэхки́рэн вры́жымашэ́н. 61 Реве́ка тай лати́рэ копыльни́цы стидэ́непэ́, бэ́шле пэ верблюдонэ́н тай джи́ле пала Авраамохкиро копыли. Ка́ди копыли́ ли́ля Реве́ка тай джи́ля дэ дро́м. 62 Иса́ако ка́чик со риси́ля Бэ́эр-Ла́хай-Рои́естар — вов джю́да дэ Не́гево. 63 Акэ, бе́льве́ляґа вов вы́джи́ля дэ ма́ля, подли́ля якха тай уды́кхля, со джа́н верблюдора́. 64 Реве́ка ка́ди́ж подли́ля якха тай уды́кхля Иса́ако. Вой смукля́пэ верблюдоста́р 65 тай пхучя́ копылеста́р: — Ко ка́ва мануш дэ́ ма́ля, со джя́л амэ́ндэ пэ дро́м? — Қа́да муро рай, — пхэнда копыли. Тунчи вой ли́ля уша́рдо тай чю́та пэ пэ́стэ. 66 Копыли роспхэ́нда Иса́ако́сти пала вса, со терда. 67 Иса́ако зали́дджя́лда Реве́ка дэ кату́на пэхки́ря да́тэ

Сарратэ тай лиля ла дэ ромнен. Вой ачиля лэсти ромняга, тай вов покамля ла. Кади Исаако аракхля пачя, тунчи сар муля лэхкири дэй.

25 Авраамо лиля пэсти авэр ромня, савя акхарэнас Кетура. **2** Вой бэянда лэсти Зимрано, Йокшано, Медано, Мидьяно, Ишбако тай Шуахо. **3** Йокшано сля дадэга Шэвасти тай Деданости. Потомкуря Деданохкирэ сле Ашшурино, Летушимо тай Леуммиме. **4** Чявэ Мидьянохкирэ: Эфа, Эфери, Енохо, Авида тай Элдаа — всаворэ вонэ потомкуря Кетуратирэ. **5** Авраамо ачявда са, со лэстэ сля, Исаакости. **6** Ай чявэнди наложницэндэр вон инте сар сля джудо, Авраамо дэня подаркуря тай отбичялда лэн пэхкорэстар чявэстар Исаакостар пэ востоко, дэ восточно пхув. **7** Всаворо джювимо Авраамохкиро сля 175 бэрш. **8** Авраамо муля дэ баря пхурима, пхуро тай чяло джювимага, тай отджия пэхкорэндэ дадэндэ. **9** Лэхкирэ чявэ Исаако тай Измаило гаравдэ лэ дэ пицера Махпела пашэ Мамрега, пэ маля хеттеёхкири Эфронохкири, чявэ Цохарохкирэ. **10** Кадыя маля, сави Авраамо тинда хеттеендэ. Котэ Авраамо сля гаравдо пашэ лэхкиряга ромняга Саррага. **11** Тунчи, сар муля Авраамо, Дэвэл бахталисарда лэхкорэ чявэ Исаако, саво тунчи джюда пашэ Бээр-Лахай-Рои. **12** Акэ роспхэндимо пала Измаило, Авраамохкирэ чявэ, савэ Сарратири копыльница Агарь египтостар, бэянда Авраамоности, тай пала лэхкирэн чяворэн. **13** Акэ лава Измаилохкирэн чявэн, бинэнпэ пхурэдэстар чявэстар: Неваёто (барэдэр чяво Измаилохкиро), Кедаро, Адбээло, Мивсамо, **14** Мишма, Дума, Масса, **15** Хададо, Тема, Етуро, Нафишо тай Кедма. **16** Када лава чявэн Измаилохкирэн, лава дэшудуен барэдэрэн. Кадж сле акхардэ и лэндирэ тхана, тев вонэ джювэнас тай пхирэнас. **17** Всаворо джювимо Измаилохкиро сля 137 бэрш. Вов муля тай отджия пэхкорэндэ дадэндэ. **18** Лэхкоро потомкуря джюдэ дэ пхув Хавилатар ды Шуру, пашэ Египто, сар тэ джэ дэ Ашшуру. Вонэ джюдэ дэ холя всаворэнца пэхкирэнца пхралэнца. **19** Акэ роспхэндимо пала Исаако, Авраамохкирэ чявэ, тай пала лэхкирэн чяворэн. Авраамоствэ бэяндапэ Исаако. **20** Исаакости сля саранда бэрш, кала вов лиля пэсти ромня Ревека. Вой сля чей арамеёхкири Бетуилохкири, саво джюда дэ Паддано-Арамо. Вой сля пхэнь арамеёсти Лаваности. **21** Исаако мангэлэс РАЕ пала пэхкиря ромня, пала када со латэ на сля чяворэн. РАЙ дэня, со вов мангэлэс,

тай лэхкири ромни Ревека ачиля пхари. **22** Чяворэ ачилэ тэ марэпэ дэ латири води, тай вой пхэнда: — Пала со манди када? Тай вой джиля тэ пхуче РАЕСТАР. **23** РАЙ пхэнда лати: — Дуй родуря дэ води тири, тай дуй народуря джяна тутар. Екх авэла зоралэдэр аврэ, тай пхурэдэр авэла дэ копылен цыкнэстэ. **24** Кала авиля вряма лати тэ бэянэ, латэ дэ води чяче сле чяворэ блезняшкуря. **25** Англуно бэяндапэ лоло, тай вов всаворо сля дэ балэн, сар ворсисто їда. Лэ акхардэ Исаво. **26** Тунчи сикавдапэ лэхкоро пхрал, саво рицарэлэспэ вастэга пала талпа Исавохкири. Вов сля акхардо Иаково. Кала Ревека бэянда лэн, Исаакости сля 60 бэрш. **27** Чяворэ выбариле. Исаво сля лачё астаримари, малендири мануш, ай Иаково сля мануш пачяло, вов джюда машкар катуны. **28** Исаакости фартэ чялёлэс тэ ха тавдо дыконэндэр зверёнэндэр, тай вов будэр камэлэс Исаво, нэ Ревека будэр камэлэс Иаково. **29** Екхвар, кала Иаково тавэлэс зюми, Исаво рисиля малятар тай фартэ циниля. **30** Вов пхэнда Иаковости: — Дэ манди тэ ха набут кова лоло, со ту тавэ! Мандэ будэр на ачиляпэ зор! (Акэ сости лэсти дэне кадж лав Эдомо.) **31** Иаково пхэнда: — Мэ дава тути зюми, какич дэ лав со пала када мэ авава тэ бинэпэ пхурэдэрэга чявэга. **32** — Мэ мэрав бокхатар, — пхэнда Исаво. — Со манди кодэлэстар, со мэ пхурэдэр чяво? **33** Иаково пхэнда: — Дэ солах. Вов дэня солах, тай кади битинда пэхкоро англуно тхан Иаковости. **34** Тунчи Иаково дэня Исаовости мандро тай чечевично зюми. Исаво халэ, вщиля тай уджиля. Кади Исаво чюнгарда пэ кода, со вов сля пхурэдэр чяво.

26 Пэ пхув сля бокх, — сар бокх, сави сля, кала джювэлэс Авраамо, — тай Исаако джиля дэ Гераро Авимелехостэ, тхагарестэ филистимлянонэн. **2** РАЙ сикавдапэ Исаакости тай пхэнда: — На джэ дэ Египто. Джюв дэ кодэя пхув, тев Мэ пхэнава. **3** Джюв пэ кадэя пхув, тай Мэ авава туга тай бахталисарава тут, стерава кода, пала со солаханём тирэсти дадэсти Авраамоности: Мэ дава всавори кадэя пхув тути тай тирэнди чяворэнди. **4** Мэ стерава, со тирэн чяворэн авэла бут, сар чергэнен дэ болыбэн, тай дава лэнди всавори кадэя пхув. Тирэндэр чяворэндэр бахталисарэнапэ всаворэ народуря пэ пхув, **5** пала када со Авраамо кандэлэс Ман тай фирисарэлэс Мурэ лава, со Мэ прыпхэнава, Мурэ прыпхэндимо тай законуря. **6** Исаако ачиля тэ джювэ дэ Гераро. **7** Кала мануша, савэ джюдэ дэ кодэва тхан пхучле

лэстар пала лэхкиря ромня, вов пхэнда: «Када мури пхэнь». Вов дарэня тэ пхэнэ: «Када мури ромни», пала када со думисарэлас: «Мануша, савэ джювэн дэ кадэва тхан, умарэна ман пала Ревекатэ, пала када со вой шукарни». 8 Кала Исаако проджюда котэ бут вряма, Авимелехо, тхагари филистимлянонэн, подыкхля дэ фылястра тай удыкхля, сар Исаако облэлас Ревека, пэхкиря ромня. 9 Авимелехо акхарда Исаако пэстэ тай пхэнда: — Вой тири ромни! Сости ту пхэндан: «Вой мури пхэнь»? Исаако пхэнда лэсти: — Пала када, со мэ думисаравас, со пала латэ ман умарэна. 10 Тунчи Авимелехо пхэнда: — Со ж ту стердан амэнца? Екх муршэндэр пэрэлас бы тиряга ромняга, тай ту андан бы пэ амэн дош. 11 Авимелехо прыпхэнда всаворэнди манушэнди: — Всяко, ко гулела кадэлэстэ манушэстэ чи лэхкирятэ ромнятэ, чяче авэла умардо. 12 Исаако чюта ворзо пэ маля дэ кодэя пхув тай дэ кодэва жэ бэрш стидэня шэлвар будэр. РАЙ бахталисарда лэ, 13 тай Исаако ачия барвало. Лэхкоро барвалимо барелас, вов ачия фартэ баро мануш. 14 Лэстэ сле кацавэ барэ гуртуря бакрэн, бузнен тай гурувнен тай скачик копылен, со филистимлянуря рицарэнас холи дэ пэхкоро їло пэ лэстэ. 15 Вонэ зачютэ пхуяга всаворэ ханинга, савэ инте сар сля джюдо дад лэхкоро Авраамо, вығанавдэ лэхкирэ копыли. 16 Авимелехо пхэнда Исаакости: — Уджя амэндэр. Ту ачилян фартэ зорало важ амэнди. 17 Исаако уджиля котар, ачия тэ джювэ дэ герарско маля. 18 Исаако выжужарда ханинга, савэ вығанавдэ копыли лэхкирэ дадэ Авраамо, тай сар вов муля, кадэлэ ханинга сле зачютэ филистимлянонэнца. Вов дэня лэнди кодэла жэ лава, савэ дыкалэ дэня лэхкоро дад. 19 Копыли Исаакохкирэ ачиле тэ ғанавэ дэ маля тай оттердэ котэ ханинг, пани савэстар марэлас пхуятар. 20 Ай герарски чябануря ачиле тэ кошэпэ чябанонэнца Исаакохкирэнца. Вонэ пхэнэнас: «Када амаро пани!» Вов акхарда ханинг Эсеко, пала када со вонэ кошэнаспэ лэга. 21 Тунчи вонэ вығанавдэ авэр ханинг, ай и пала лэстэ ачиле тэ кошэпэ, пала када вов акхарда лэ Ситна. 22 Исаако уджиля котар тай вығанавда инте екх ханинг, пала савэстэ кошэмэ на сля, тай вов акхарда лэ Реховото. Вов пхэнда: «Кана РАЙ дэня амэнди оттердо тхан, тай амэн авэла бут дэ кадэя пхув». 23 Вов джиля котар дэ Вирсавия. 24 Дэ кодэя рат РАЙ сикавдапэ лэсти тай пхэнда: — Мэ — Дэвэл Авраамохкиро, тирэ дадэхкиро. На дар, Мэ туга. Мэ бахталисарава тут тай стеравэ, со тирэн чяворэн авэла бут, важ Муро

копыли Авраамо. 25 Исаако стерда жэртвенико тай прыакхарда РАЕХКОРО лав, тай тховда котэ катуна, ай лэхкирэ копыли вығанавдэ ханинг. 26 Авимелехо авила лэстэ Гераростар екхтханэ Ахузатога, саво сля лэхкоро подпхэндимарё, тай Фихолога, барэдэр рай дэ лэхкирэ войско. 27 Исаако пхучля лэн: — Пэ со тумэ авиле? Тумэ жэ холиле пэ ман тай вытрадэне ман! 28 Вонэ пхэндэ: — Амэ кана полах, со туга РАЙ, тай амэ камах, соб ту и амэ тэ солахах тай тэ допхэнахпэ. Терага допхэнимо, 29 со ту на терэга амэнди врытимо, сар и амэ на лилэпэ тутэ, обджягаспэ туга мишто тай отмукле тут пачяга. Ай кана ту бахталисардо РАЕГА. 30 Исаако тховда лэнди лачё скаминд, вонэ хале тай пиле. 31 Пэ авэр диво, дэнзор вонэ дэне екх екхэсти солах. Исаако отмукля лэн, тай вонэ уджиле лэстар пачяга. 32 Дэ кодэва диво копыли Исаакохкирэ авиле тай роспхэндэ лэсти пала ханинг, саво вонэ вығанавдэ. Вонэ пхэндэ: — Амэ аракхле пани! 33 Вов акхарда лэ Шыва, тай ды авдивэ, кадыва форо акхарэлпэ — Вирсавия. 34 Кала Исавости сля саранда бэрш, вов лиля пэсти дэ ромнен Ехудита, хеттеёхкиря Бээрехкиря чя; тай инте лиля Басемата, хеттеёхкиря Элонохкиря чя. 35 Лэндар сля бут врытимо Исаакости тай Ревекати.

27 Кала Исаако ачия пурано тай лэхкирэ якха хасардэ зор, вов акхарда Исаво, пэхкирэ пхурэдэрэ чявэ, тай пхэнда лэсти: — Чяво муро! — Мэ катэ, — пхэнэл Исаво. 2 Исаако пхэнда: — Мэ пхуро, тай на джянав мэ диво, кала мэрава. 3 Лэ тиро колчяно тай луко, джя дэ маля тай дорос манди дыко мас. 4 Тав манди камлимахи́ро хамо муро тай ан манди тэ ха, соб мэ бахталисардом тут англа муро мэри́мо. 5 Ревека шунда, сар Исаако дэдуманя пэхкирэга чявэга Исавога, тай кала Исаво уджиля дэ маля, соб тэ умарэ тай тэ анэ дыко мас, 6 Ревека пхэнда пэхкирэсти чявэсти Иаковости: — Мэ шундом, сар тиро дад пхэнда тирэсти пхралэсти Исавости: 7 «Ан дыко мас тай тав лачё хамо, соб мэ бахталисардом тут англа РАЙ, покы на мулём». 8 Шун ман мишто кана, чяво муро, тай тер, сар мэ пхэнава тут. 9 Джя гуртостэ тай ан манди дуен лачен бузнорэн, соб манди тэ тавэ лачё хамо важ тиро дад, кацаво хамо, сар лэсти чялёл. 10 Тунчи отлиджя лэ дадэсти, вов хала тай бахталисарэла тут, покы на муля. 11 Иаково пхэнда Ревекати, пэхкиряти дати: — Нэ муро пхрал Исаво всаворо дэ балэн, ай мандэ морци жу́жи. 12 Со, сар дад лэлапэ

мандэ? Мэ авава англа лэстэ хохавимари, тай вов — Дадэ, ваздэпэ, бэш тай ха муро хамо, ай сигидэр дэла ман мрая, ай на бахталисарэла. 13 тунчи бахталисар ман. 32 Лэхкиро дад Исаако Дэй пхэнда лэсти: — Мрая мэк авэла пэ мандэ, пхучля: — Ко ту? — Мэ тиро чяво, — пхэнда чяво муро, ай ту тер, сар мэ пхэнав: джя тай вов, — тиро барэдэр, Исаво. 33 Исаако всаворо ан бузнорэн. 14 Вов джиля, лиля бузнорэн тай тэ затинисиля тай пхэнда: — Ко сля кодэва анда лэн дати, тай вой тавда лачё хамо, кацаво, авэр, саво анда дыко мас манди? Мэ халём лэ сар чялёл лэхкирэсти дадэсти. 15 Тунчи Ревека англа кода, сар ту тэ авэх тай бахталисардом лиля фэдэдэр їда Исавохкири, пэхкирэ пхурэдэрэ лэ. Вов кана авэла бахталисардо! 34 Кала Исаво чявэхкири, сави сля латэ дэ цэр, тай урявда пэ ушунда дадэхкирэ лава, вов зоралэ тай кырко цыкнэдэр чявэ Иаково, 16 ай лэхкирэ васта тай затиписиля тай пхэнда дадэсти: — Бахталисар жуки кор ушаравда бузнорэхкиряга морцяга. 17 кадиж и ман, дадэ! 35 Нэ кодэва пхэнда: — Тунчи вой дэня пэхкирэсти чявэсти Иаковости Тиро пхрал авиля хрантимага тай отлиля тутар лачё хамо тай мандро, савэ тавда. 18 Вов авиля бахталисаримо. 36 Исаво пхэнда: — Чячимага, лэ дадэстэ тай пхэнда: — Муро дад. — Акэ мэ, — и акхарэн Иаковога? Дувар вов обджиля ман: лиля пхэнда кодэва. — Ту саво мурэндэр чявэндэр? муро барэдэримо, а кана муро бахталисаримо! 19 Иаково пхэнда дадэсти: — Мэ — Исаво, тиро Тай пхучля: — На ачиялэпэ тут э бахталисаримо и барэдэр чяво. Мэ тердом, сар ту пхэндан. Мангав, важ манди? 37 Исаако пхэнэл Исавости: — Мэ ваздэпэ, бэш тай ха муро хамо, соб тунчи ту тэ тердом лэ хулаега понад тутэ, тай всаворо лэхкиро бахталисарэх ман. 20 Исаако пхучля Иаковостар: родо отдэнём лэсти дэ копылен, бахталисардом — Сар ту кади сико арахлаян ла, муро чяво? лэ мандрэга тай дэнём лэсти тэрно мол. Со жэ — РАЙ, тиро Дэвэл, дэня манди бахт, — пхэнда кана тэ тере важ тути, муро чяво? 38 Исаво пхэнда кодэва. 21 Исаако пхэнда Иаковости: — Поджя дадэсти: — Тутэ со, кацик екх бахталисаримо, пашэдэр, соб манди тэ лэлэ тутэ, муро чяво, чяче дадэ? Бахталисар и ман, дад муро! Тай фартэ ту муро чяво Исаво чи нат. 22 Иаково поджиля зоралэ заровиня. 39 Дад лэхкиро Исаако пхэнда пашэдэр пэхкирэстэ дадэстэ Исаакоствэ, саво лэсти: — Тиро джювимо авэла дур барвалиматар, лиляпэ лэстэ тай пхэнда: — Гласо — сар гласо сави дэл пхув, дур болыбнастирятар росынатар, Иаковохкиро, ай васта — сар васта Исавохкирэ. сави упрэ. 40 Ту авэга тэ джювэ баря чюрятар 23 Вов на уджянгла лэ, пала када со васта лэстэ тай авэга тэ терэ бути пэ тиро пхрал. Нэ авэла слэ дэ балэн, сар Исавостэ, и вов бахталисарда вряма, кала ту ваздэгапэ тай счювэга пэхкирятар лэ. 24 — Чяче ту муро чяво Исаво? — пхучля коратар лэхкиро гамо. 41 Исаво рицарэлас холи Исаако, тай вов пхэнда лэсти: — Нэ, када мэ. 25 пэ Иаково пала бахталисаримо, саво дэня лэсти Исаако пхэнда: — Чяво муро, подлиджя манди дад, тай пхэнда пэсти: «Сико дад мэрэла, тай тиро дыко мас пашэдэр, тай мэ хава, ай тунчи проджяна ровимахкирэ дивэ пала муро дад. Тунчи мэ умарава мурэ пхралэ Иаково». 42 Ревекати мэрэдэне, со пхэнда пхурэдэр чяво Исаво, тай вой бахталисарава тут. Иаково дэня лэсти хамо, тай бичялда пала цыкнэдэр чяво, пала Иаково, тай вов халэ, анда мол, тай вов пиля. 26 Тунчи лэхкиро пхэнда лэсти: — Подджя, чяво муро, пхэнда лэсти: — Тиро пхрал Исаво думисарэл тэ тай чюминдэ ман. 27 Вов поджиля тай чюминда умарэ тут. 43 Муро чяво, стер, сар мэ пхэнава: лэ. Исаако ушунда фано лэхкиря їдатиро тай екхатар жэ прастэ дэ Харано мурэстэ пхралэстэ бахталисарда лэ: — Када фано мурэ чявэхкиро, лаваностэ. 44 Джюв лэстэ савись вряма, покы сар малятиро фано, сави бахталисарда РАЙ. 45 Кала жэ на уджяла холи тирэстэ пхралэстэ. 45 Кала жэ холи тирэ пхралэстэ проджяла тай вов бистарэла тай барвалиматар пхуятирятар, бут ворзо тай кодэ, со ту тердан лэсти, тунчи мэ бичялава тэ тэрно мол. 29 Тэ терэн пэ тутэ породы, тай пхэнэ тути, со авиля вряма тэ рисявэ тути. Пэ тэлён тути народуря. Раега ав тирэнди пхралэнди, со манди тэ хасарэ тумэн дуен дэ екх диво? 46 тай тэ тэлён англа тутэ чявэ тиря датирэ. Тэ тунчи Ревека пхэнда Исаакоствэ: — Мэ на лошали авэл дэно мрая кодэва, ко дэл тут мрая, ай ко джювимати пала кадэла хеттейсконэн чеен. Сар бахталисарэл тут, тэ авэл бахталисардо. 30 Кацик и Иаково лэла пэсти дэ ромнен джювля калатар кацик пхуятар, кацава акэ хеттеянка, сар кадэла, тунчи Иаково выджиля дадэстар, сар авиля лэхкиро пала со манди тэ джювэ? пхрал Исаво астариматар. 31 Вов кадиж тавда лачё хамо тай анда дадэсти. Вов пхэнда лэсти:

28 Исаако акхарда Иаково, бахталисарда лэ тай прыпхэнда лэсти: — На лэ пала пэстэ ханаанеянка. 2 Екхатар жэ джя дэ Паддано-Арамо, дэ Бетуилохкиро цэр, дадэстэ тиря дати́ро, тай лэ пэсти котар ромня Лаванохкирэндар чеендар, тирэстар какостар пав дэй. 3 Тэ бахталисарэл тут Дэвэл Всазорако тай терэла тутар бут чяворэ, соб тутар тэ джян бут народуря. 4 Тэ дэл Вов тути и тирэнди чяворэнди Авраамохкиро бахталисаримо, соб тэ авэз ту хулай пхуятиро, пэ сави ту екхатар джювэх, пхуятиро, сави Дэвэл дэня Авраамоости. 5 Тунчи Исаако отму́кля Иаково, тай кодэва джи́ля дэ Паддано-Арамо, Лаваностэ, арамеёхкирэ Бетуилохкирэ чявэстэ, пхралэстэ Ревекатирэ, сави сля дэй Иаковости тай Исавохи́ри. 6 Исаво уджя́нгля, со Исаако бахталисарда Иаково тай бичялда лэ дэ Паддано-Арамо, соб тэ лэл котар ромня, и со вов кала бахталисарэлас, прыпхэнда лэсти: «На лэ дэ ромнен ханаанеянка», 7 тай со Иаково кангля пэхкирэ дадэ́ и дэёра и джи́ля дэ Паддано-Арамо. 8 Тунчи Исаво поли́ля, со лэхкирэсти дадэ́сти Исаакости на чялёнас ханаанеянку́ря. 9 Вов джи́ля Измаило́стэ тай лэл пэсти инте екха ромня, Махалат, сави сля пхэнь Неваётохи́ри, чей Измаилохи́ри, чяво Авраамохкиро. 10 Иаково ачя́вда Вирсавия тай джи́ля дэ Харано. 11 Кала доджи́ля савэсэ тханэстэ, вов ачеляпэ́ тэ ратарэ́, пала када со кхам бэ́шля. Вов ли́ля котэ́ екх барэ́ндар, тховда лэ пэсти тала шэ́ро тай пэ́ля тэ совэ́. 12 Лэ́сти ави́ля суно. Вов уды́кхля лестни́ца, сави ачелас пэ́ пхув, ай латиро упра́лимо доросэ́лас ды́ болы́бэн, тай пав латэ́ ваздэ́наспэ́ тай зму́кзэнаспэ́ ангелу́ря Дэвлэ́хкирэ. 13 Упрэ́ понад латэ́ ачелас РАЙ и пхэ́нэлас: — Мэ́ — РАЙ, Дэвэл тирэ́ дадэ́ Авраа́мо и Дэвэл Исаакохкиро. Пхув, пэ́ сави ту екхатар пашлэ́х, Мэ́ да́ва тути и тирэ́нди чяворэ́нди. 14 Тирэ́н чяворэ́н авэ́ла кади́ бут, сар ти́шай пэ́ пхув, тай ту розд́жя́гпэ́ пэ́ западо́ тай пэ́ восто́ко, пэ́ северо́ тай пэ́ ю́го. Вса́ворэ́ ману́ша пэ́ пхув бахталисарэ́напэ́ тутар тай тирэ́ндар чяворэ́ндар. 15 Мэ́ ту́га́ тай ава́ва тэ́ фириса́рэ тут, те́в бы́ ту тэ́ на джя́х, тай риса́рава тут дэ́ кадэ́я пхув. Мэ́ на а́чява́ва тут тай сте́рава́ вса, со пхэ́на́вас ту́ти. 16 Кала Иаково джю́нга́вдапэ́, вов думи́сарда: «Чя́че, пэ́ кадэ́ва тхан РАЙ, ай мэ́ на джя́на́вас». 17 Лэ́сти сля́ дару́но, тай вов пхэ́нда: — Ка́дэва́ тхан сар дара́вэл! Чя́чима́га, катэ́ цэр Дэвлэ́хкиро, тай када́ — болы́бнахкирэ́ уда́ра. 18 Иаково вщи́ля дэ́нзор, ли́ля бар, саво́ вов тховэ́лас пэ́сти тала шэ́ро, тховда́ ворта́ лэ́ знако́га, тай чу́та пэ́ лэ́стэ

оли́вково́ цил. 19 Вов акхарда́ кадэ́ва тхан Ве́филе́, ай ды́калэ́ кодэ́ва́ форо́ акхарэ́ласпэ́ Лузо. 20 Тунчи Иаково́ дэ́ня со́лах: — Сар Дэвэл авэ́ла ма́нца тай фириса́рэла́ ман дэ́ кадэ́ва́ дро́м, дэ́ла ма́нди ма́ндро дэ́ ха́ма тай́ йда́ пэ́ пхи́кэ, 21 кади́, со мэ́ рися́вава́ тай ава́ва тэ́ джю́вэ́ дэ́ па́чя дэ́ да́дэ́хкиро́ цэр, тунчи РАЙ авэ́ла му́рэга́ Дэвлэ́га́. 22 Ка́дэва́ бар, саво́ мэ́ тховдо́м ворта́, соб тэ́ рапи́рэ, авэ́ла Дэвлэ́хкирэ́га́ цэ́рэга́. Тай вса́ворэ́стар, со Ту́ дэ́га́ ма́нди, мэ́ да́ва Ту́ти дэ́што́ кото́ро.

29 Иаково джя́лас дүрэ́дэр тай́ ави́ля пэ́ пхув восто́чнонэ́ндирэ́н ману́шэн. 2 Котэ́ вов уды́кхля хани́нг дэ́ ма́ля тай́ па́ша лэ́ трин гурту́ря бакрэ́н; ко́лэ́стар хани́нгатар дэ́нас па́ни ското́сти. Хани́нг сля́ уша́равдо́ барэ́ барэ́га. 3 Кала вса́ворэ́ гурту́ря сти́дэнаспэ́, чя́бану́ря злэ́нас хани́нгатар бар тай́ дэ́нас бакрэ́нди па́ни, ай тунчи́ тховэ́нас бар упалэ́ пэ́ тхан. 4 Иаково́ пхуч́ля чя́банонэ́н: — Пх́рала, катар́ тумэ́? — Амэ́ Харано́стар, — пхэ́ндэ́ вонэ́. 5 Вов пхэ́нда́ лэ́нди: — Тумэ́ джя́нэ́н Лавано́, Нахоро́хкирэ́ вну́ко? — Нэ́, джя́нах, — пхэ́ндэ́ вонэ́. 6 Иаково́ пхуч́ля: — Лэ́стэ́ вса́ ми́што? — Ми́што, — пхэ́ндэ́ вонэ́. — Акэ́ Рахи́ль, лэхки́ри чей́, джя́л бакрэ́нца. 7 — Кхам инте́ фа́ртэ́ вуче́, — пхэ́нда́ вов. — Инте́ на ави́ля вря́ма тэ́ сти́дэ́ гурту́ря. Дэ́н па́ни бакрэ́нди тай́ дара́вэ́н лэ́н пэ́ ма́ля. 8 — Амэ́нди́ на́щи, — пхэ́ндэ́ вонэ́. — Трэ́буни́ тэ́ сти́дэ́нпэ́ вса́ворэ́ гурту́ря тай́ тэ́ улэ́н бар хани́нгатар. Тунчи́ амэ́ да́га́ бакрэ́нди па́ни. 9 Вов инте́ дэ́думана́ лэ́нца, сар подд́жи́ля Рахи́ль да́дэ́хкирэ́нца бакрэ́нца: вой́ чя́равэ́лас бакрэ́н. 10 Кала Иаково́ уды́кхля Рахи́ля, пэхкирэ́ како́хкирэ́ Лавано́хкиря́ чя́ тай́ лэхки́рэ́н бакрэ́н, вов подд́жи́ля, ули́ля бар хани́нгатар тай́ дэ́ня па́ни Лавано́хкирэ́нди бакрэ́нди. 11 Тунчи́ Иаково́ чю́минда́ Рахи́ля тай́ зора́лэ́ зарови́ня. 12 Вов пхэ́нда́ Рахи́ляти, со́ вов — ро́до латирэ́ да́дэ́сти и Ревекати́ро чя́во. Вой́ пра́стэ́ня тай́ роспхэ́нда́ пала́ када́ да́дэ́сти. 13 Кала́ Лавано́ ушунда́, со ави́ля лэхки́ро пле́мяни́ко Иаково́, вов пра́стэ́ня лэ́стэ́ пэ́ дро́м, обли́ля лэ́, чю́минда́ тай́ акхарда́ пэ́стэ́ дэ́ цэр. Иаково́ роспхэ́нда́ лэ́сти пала́ вса. 14 Лавано́ пхэ́нда́ лэ́сти: — Ту́ исин му́ро чя́чэ́ рат. Иаково́ прод́жю́да́ лэ́стэ́ чэ́н. 15 Лавано́ пхэ́нда́ Иаковости́: — Ту́ исин ро́до ма́нди, ай́ сости́ ту́ авэ́га́ тэ́ терэ́ бу́ти пэ́ ма́н йвэ́я? Пхэ́н ма́нди, со́га́ ту́ти тэ́ поти́нэ. 16 Лавано́стэ́ сле́ дуй́ чя́е: барэ́дэ́ра акха́рэнас́ Ли́я, ай́ цы́кня́ — Рахи́ль. 17 Ли́ятэ́ сле́ ко́вле́ якха́, ай́ Рахи́лятэ́ сля́ шу́карно́ тай́ му́й, тай́ тру́по. 18 Иаково́ пока́мля́ Рахи́ля и

пхэнда Лаваности: — Мэ авава тэ терэ бути пэ тутэ ефта бэрша пала тиря цыкнэдэр чей Рахиль. 19 Лавано пхэнда: — Фэдэр мэ отдава ла тути, ай на кастись аврэсти. Ачпэ мандэ. 20 Иаково терэлас бути ефта бэрша, соб тэ лэл Рахилья, нэ вонэ сикавдэпэ лэсти, сар набут дивэ, пала када со вов камэлас ла. 21 Тунчи Иаково пхэнда Лаваности: — Дэ манди ромня муря, соб манди тэ джовэ лага, сар ромняга: мури вряма авиля. 22 Лавано акхарда всаворэн, ко джовэл пашэ лэстэ, тай тховда лачё скаминд. 23 Нэ сар авиля бельвель, вов лиля пэхкиря чя Лия тай дэня ла Иаковости, тай Иаково сута лага. 24 Пэхкиря чяти Лавано дэня копильница Зелфа. 25 Кала авиля дэнзор, Иаково додыкхля, со када сля Лия! Вов пхэнда Лаваности: — Со ту тердан манца? Мэ теравас бути пэ тутэ пала Рахилятэ. Сости ту хохавдан ман? 26 Лавано пхэнда: — Амэндэ на отдэн пала ром цыкня чя майанглал барэдэрятар. 27 Стер бъяв курко кадэла чяга, ай тунчи амэ дага тути и цыкнэдэря, пала авэр ефта бэрша бутя. 28 Иаково кади и стерда: пролиджялда курко Лияга, ай тунчи Лавано отдэня лэсти пэхкиря чя Рахилья. 29 Лавано дэня Рахилияти пэхкиря копильница Валла. 30 Иаково ачиля тэ джовэ Рахильяга тай камэлас Рахилья будэр, сар Лия. Вов терэлас бути пэ Лавано инте ефта бэрша. 31 Кала РАЙ удыххля, со Лия накамли, Вов терда, со латэ авэна чяворэ, ай Рахилятэ нат. 32 Лия ачиля пхари тай бзянда чяворэ. Вой пхэнда: «Када пала када, со РАЙ удыххля муро бибахт. Кана муро ром чячэ авэла ман тэ камэ», тай акхарда лэ Рувимо. 33 Вой упалэ ачиля пхари тай, кала бзянда чяворэ, пхэнда: «Кади сар РАЙ ушунда, со мэ накамли, Вов дэня манди инте кадэлэ». И вой акхарда лэ Симеоно. 34 Вой инте упалэ ачиля пхари тай, кала бзянда чяворэ, пхэнда: «Кана муро ром прэпхандэлапэ мандэ, пала када со мэ бзяндом лэсти тринэн чявэн». Пала када лэ акхардэ Левиё. 35 Вой упалэ ачиля пхари тай, кала бзянда чяворэ, пхэнда: «Кана мэ наисарава РАЕ». Пала када вой акхарда лэ Иуда. Тунчи вой пэрэачиля тэ бзянэ.

30 Рахиль дыкхэлас, со вой на бзянэл Иаковости чяворэн, тай рицарэлас холи пэ пэхкири пхэнь Лия. Вой пхэнда Иаковости: — Дэ манди чяворэн, чи мэ мэрава! 2 Иаково холяга пхэнда лати: — Мэ со, Дэвэл, Саво на дэл тути чяворэн? 3 Вой пхэнда: — Акэ Валла, мури копильница. Пэр лага, соб вой тэ бзянэл пала ман чяворэ, тай кади мандэ авэна чяворэ латар. 4 Кади вой дэня лэсти

дэ ромнен пэхкиря копильница Валла. Иаково сута лага, 5 вой ачиля пхари тай бзянда лэсти чявэ. 6 Тунчи Рахиль пхэнда: «Дэвэл фирисарда мури патив. Вов ушунда муро мангимо тай дэня манди чявэ». Пала када вой акхарда лэ Дано. 7 Валла, копильница Рахилиятири, упалэ ачиля пхари тай бзянда Иаковости дуйтонэ чявэ. 8 Тунчи Рахиль пхэнда: «Баря маримага мэ мараваспэ муряга пхэняга тай выцэлдом». И вой акхарда лэ Неффалимо. 9 Кала Лия удыххля, со вой пэрэачиля тэ бзянэ чяворэн, вой лиля Зелфа, пэхкиря копильница, и дэня ла Иаковости дэ ромнен. 10 Лиятири копильница Зелфа бзянда Иаковости чявэ. 11 Лия пхэнда: «Сави бахт!» И вой акхарда лэ Гадо. 12 Лиятири копильница Зелфа бзянда Иаковости дуйтонэ чявэ. 13 Тунчи Лия пхэнда: «Сави мэ бахтали! Джовля авэна тэ пхэнэ пэ мандэ «бахтали». И вой акхарда лэ Асиро. 14 Дэ кодэя вряма, сар мануша стидэн див, Рувимо джиля дэ маля, араххля мандрагорура тай анда лэн дати. Рахиль пхэнда Лияти: — Мангав тут, дэ манди набут тирэ чявэхкирэн мандрагорурен. 15 Нэ кодэя пхэнда лати: — Ту и кади залилян мандар ромэ. Камэх кана тэ залэ мурэ чявэхкирэ мандрагорура? — Мишто, — пхэнда Рахиль. — Мэк вов пэрэла туга авдивэ ратяга, ай ту отдэ манди тирэ чявэхкирэ мандрагорура. 16 Кала бельвеляга Иаково авиля малендар, Лия выджиля англа лэ и пхэнда: — Ту пэрэга манца. Мэ потиндом пала тут чявэхкирэ мандрагонэнца. Тай вов сута лага дэ кодэя рат. 17 Дэвэл ушунда Лия, вой ачиля пхари тай бзянда Иаковости панчёнэ чявэ. 18 Тунчи Лия пхэнда: «Дэвэл дэня манди награда пала кода, со мэ дэнём мурэ ромэсти копильница». Тай вой акхарда лэ Иссахаро. 19 Лия упалэ ачиля пхари тай бзянда Иаковости шовтонэ чявэ. 20 Тунчи вой пхэнда: «Дэвэл дэня манди кучютно подарко. Кана ром дэла манди патив, пала када со мэ бзяндом лэсти шов чявэн». Тай вой акхарда лэ Завулоно. 21 Проджиля савись вряма и вой бзянда чеёра тай акхарда ла Дина. 22 Тунчи Дэвэл взрапирда Рахилья. Вов ушунда ла тай терда кади, соб вой тэ бзянэл чяворэн. 23 Вой ачиля пхари тай бзянда чявэ. Вой пхэнда: «Дэвэл злиля муро ладжявимо». 24 Вой инте пхэнда: «Тэ дэл манди РАЙ инте екхэ чявэ», тай акхарда лэ Иосифо. 25 Тунчи сар Рахиль бзянда Иосифо, Иаково пхэнда Лаваности: — Отмук ман, соб мэ тэ рисявав пэ пхув, тев бзяндомпэ. 26 Дэ манди мурэн ромнен тай чяворэн, пала савэн мэ теравас бути пэ тутэ. Тунчи мэ уджява. Ту екхджино джанэх, сар бут мэ

теракас пэ тутэ. 27 Нэ Лавано пхэнда лэсти: — Сар мэ араклём мила дэ тирэн якхэн, мангав тут, ачлэ. Мэ уджянглём пав врэжымо, со РАЙ бахталисарэл ман пала тутэ. 28 Тай допхэнда: — Пхэн пэхкири цымин, мэ потинава тути. 29 Иаково пхэнда лэсти: — Ту джянэх, сар мэ теракас бути пэ тутэ и савэ тирэ гуртурия ачиле тэ наисарэх ман. 30 Лэн на сля бут, сар мэ тэ авав, ай кана лэн пэ бүтэстэ будэр, тай РАЙ бахталисарэл тут пала ман. Всаекх, кала жэ мэ стидава сось важ муро цэр? 31 Лавано пхучля: — Со тути тэ дэ? — Манди нисо на трэбуни, — пхэнда Иаково. — Стер важ манди кацки екх, тай мэ авав и дурэдэр тэ чяравэ тай фирисарэ тирэ гуртурия. 32 Мук ман тэ обджав всаворэ гуртурия тай тэ тховав дэ рига всаворэ пятнистонэн и крапчятонэн бакрэн и бузнэн тай всаворэ калэ бакрорэн. Вонэ авэна муро потинимо. 33 Чячимо муро душола англэ, кала закамэга тэ дыкхэ потинимо, саво дэнян манди. Сар араклэпэ мандэ накрапчято тай напятнисто бузни чи накало бакроро, вонэ авэна тэ бинэлэ сар чёрданэ. 34 — Допхэндэпэ, — пхэнда Лавано. — Мэк авэла кади, сар ту пхэндан. 35 Нэ дэ кодэва жэ диво вов отлила всаворэн крапчятонэн тай пятнистонэн бузнэн, тай всаворэн крапчятонэн тай пятнистонэн бузнэн, колэн, пэ кастэ сля парнимо, тай всаворэн калэн бакрорэн тай отдэня лэн тэ дыкхэн пала лэндэ лэхкирэ чявэ. 36 Тай вов терда, соб тэ авэл машкар лэндэ и Иаково тринэ дивэнго дром. Ай Иаково чяравэлэс Лаванохкирэ гуртурия, савэ аченепэ. 37 Иаково вычинда йвант рандя тополестар, миндалестар тай чинарестар, злия морци лэндар тай стерда пэ лэндэ парнэ тханора, соб тэ душол парнимо андрал. 38 Вов тховда кацавэ рандора дэ всаворэн балаен, соб вонэ тэ авэн скотостэ пэ якхэн, кала авэна тэ пэ пани. Дэ кодэя вряма, сар бакря ачен пхарэ, кала авэнас вонэ тэ пэ, 39 вонэ теранас кода англа рандёра, тай бакрорэ бэанэнаспэ лэндэ пёстри, крапчяти тай пятнисти. 40 Иаково порисывэлэс бакрэн пёстронэндэ и калэндэ, савэ сле Лаванохкирэ, ай тэрнэн тховэлэс дэ рига. Кади лэстэ сле гуртурия, тай вов рицарэлэс лэн ригатар Лаванохкирэндар бакрэндар. 41 Кала састэ бакрэ тай бузня авэнас тэ пэ, Иаково тховэлэс англа лэндэ дэ балаен рандёра, соб вонэ тэ терэн бакрорэн англа рандя. 42 А кала авэнас насастэ бакрэ тай бузня, то вов на тховэлэс рандя. Кади насасто ското доросэлэспэ Лаваности, ай састо — Иаковости. 43 Иаково ачия тэ барвалёл, лэстэ кана сле барэ гуртурия, а кадиж копыли тай копыльницы, верблюдурия тай магаря.

31 Иаково ушунда, сар Лаванохкири чявэ пхэнэнас: «Иаково залиля вса, со сля амарэстэ дадэстэ, тай стидэня барвалимо амарэстар дадэстар». 2 Тай Иаково додыкхля, со Лавано на кацаво лэстэ, сар дыкалэ. 3 РАЙ пхэнда Иаковости: — Рисяв павпалэ дэ дадэндир пхув, тирэстэ родостэ. Мэ авав туга. 4 Иаково бичялда тэ пхэнэ Рахилии тай Лияи, соб вонэ тэ выджан дэ маля, тев сле лэхкирэ бакрэ тай бузня. 5 Вов пхэнда лэнди: — Мэ дыкхав, со тумаро дад на кацаво мандэ, сар сля дыкалэ. Нэ Дэвэл мурэ дадэхкиро манца. 6 Тумэ джянэн, со мэ теракас бути пэ тумаро дад всаворэндар зорэндар, 7 ай вов хохавэлэс ман, дэшвар парувэлэс муро потинимо. Нэ Дэвэл на дэня лэсти тэ терэ манди врыто. 8 Сар вов пхэнэлэс: «Потинимо тиро авэла крапчято ското», всаворо ското бэанэлэс крапчятонэн, ай сар вов пхэнэлэс: «Потинимо тиро авэла пёстро ското», то всаворо ското бэанэлэс пёстронэн. 9 Кади Дэвэл залиля ското тумарэстар дадэстар и дэня манди. 10 Еххвар, сар ското ушаравэл екх екхэ, мандэ авилия сунэ: мэ подлилём якха тай удыхклём, со бузнэ, савэ ушаравэн бузнян, сле пёстри, крапчяти тай пятнисти. 11 Ангело Дэвлэхкиро пхэнда манди дэ сунэ: «Иаково». Мэ пхэндом: «Мэ катэ». 12 Вов пхэнда: «Подыкх тай ту удыхкэга: всаворэ бузнэ, савэ ушаравэн бузнян, — пёстри, крапчяти тай пятнисти. Мэ удыхклём, сар обджиялэпэ туга Лавано. 13 Мэ — Дэвэл Вефилэхкиро, тев ту чювэгас дзэто пэ бар тай солоханян Манди. Ачяв сигидир кадэя пхув и рисяв дэ пхув, тев ту бэянданпэ». 14 Рахиль тай Лия пхэндэ: — Исин ли амэндэ котор дэ амарэ дадэхкиро барвалимо? 15 Чи на душол, со вов бинэн амэн, сар на пала пэхкирэн? Вов битинда амэн тай хасарда кода, со лия важ амэндэ. 16 Чяче, всаворо барвалимо, саво Дэвэл залиля дадэстар, исин амаро тай амарэ чяворэндиро. Тер кади, сар пхэнэл тути Дэвэл. 17 Иаково тховда чяворэн тай ромнен пэ верблюдурия, 18 залиля всаворо ското, всаворо пэхкиро барвалимо, саво вов затерда дэ Паддано-Арамо, тай джия дэ дром пэхкирэстэ дадэстэ Исаакостэ дэ пхув Ханаано. 19 Кала Лавано уджиялэ тэ подчинэ бакрэндирэ бала, Рахиль чёрда лэхкирэн дэвлэн. 20 Ай Иаково хохавда арамеё Лавано, на пхэнда лэсти, со уджял. 21 Вов унашла всаворяга барвалимага, пэрэджиялэ лэнь тай джия дэ плаендиро риг Галаадо. 22 Пэ трито диво Лаваности пхэндэ, со Иаково нашля. 23 Вов лиялэ пэгэ родонэн, прастэня пала Иаково тай пэ ефгато диво доросля лэ дэ

плаенди́ро риг Галаадско. 24 Нэ ратяга́ Дэвэл ави́ля арамеёстэ Лаваностэ дэ сунэ тай пхэнда лэсти: «Фирисарпэ, на пхэн Иаковости ни лачё, ни врыто». 25 Лавано доросля Иаково. Иаково тховда катуна дэ плаенди́ро риг Галаадско, тай Лавано родога́ кади́ж тховдэ пэхкирэ катуны. 26 Лавано пхэнда Иаковости: — Со ту тердан? Ту хохавдан ман тай улиджялдан мурэн чеен, сар копылен пэ мэри́ма. 27 Сости ту нашлян чёраханэс? Сости ту на пхэндан манди, соб мэ тэ отмукав тут лошага́ тай диленца, тала бубно тай арфа? 28 Ту на дэнян манди тэ чюминдав пэ дром внуконэн тай чеен. Ту тердан би годяко. 29 Дэ му́рэн зорэн тэ терав тути вры́тимо, нэ ратяга́, сави сля, тирэ дадэхкиро Дэвэл пхэнда манди: «Фирисарпэ, на пхэн Иаковости ни лачё, ни врыто». 30 Мишто, ту уджи́лян, пала када со ту фартэ́ камэлас тэ рисявэ́ дэ дадэхкиро цэр. Нэ пэ со ту чёрдан му́рэн дэвлэн? 31 Иаково пхэнда Лаваности: — Мэ подарэ́нём, пала када со думисаравас, со ту зорага́ отлэ́га мандар тирэн чеен. 32 Нэ сар ту ара́ххэга катэ́ кастэ́сь пэхки́рэн дэвлэн, кодэ́ва на джовэ́ла. Англа́ тирэ́ роду́ря ды́хх е́кджино, исин ли мандэ́ сось тиро, тай сар исин, залэ́ павпалэ́. Иаково на джян́гля, со дэвлэн чёрда́ Рахиль. 33 Лавано заджи́ля дэ Иаково́хкири катуна, дэ Ли́ятири катуна тай дэ катуна дуен копы́льницэн тай нисо на ара́ххля. Ли́ятирятар катуна́тар вов заджи́ля дэ Рахилья́тири катуна. 34 Рахиль́ ли́ля цэру́тнонэн дэвлэн, тховда́ лэн тала верб́людонэнди́ри зэнь тай бэ́шля пэ лэ́ндэ. Лавано обро́дэнян вса́вори катуна́ тай нисо на ара́ххля. 35 Рахиль́ пхэнда́ дадэ́сти: — На хо́ляв, му́ро рай, мэ на в́щява англа́ тутэ́, пала када со мандэ́ е́кхатар со исин джю́влендэ́. Сар вов на родэ́ня, вов на ара́ххля дэвлэн. 36 Иаково́ фартэ́ сля хо́лятиро тай а́чиля тэ выпхэ́нэ Лаваности: — Дэ со му́ри дош? — пхучля́ вов. — Саво бэ́зэх мэ тердо́м, со ту пона́шлян пала мандэ́? 37 Ту обро́дэнян вса́воро му́ро лачи́мо — со ту ара́ххлян тиря́тар барва́лиматар? Тхов, со ара́ххлян, англа́ тиро тай му́ро родо, тай мэ́к вонэ́ тэ сунди́сарэн амэн. 38 Мэ би́ш бэрш́ джю́дом тутэ́; тирэ́ бакря́ тай бу́зня на вы́чювэ́нас, мэ на халё́м бакрэ́н тирэ́ндар гурто́нэндар. 39 Мэ на ана́вас тутэ́ бакро́рэн, савэ́н чинэ́лас ды́ко зверё́, пала лэн мэ е́кджино чу́ювас му́рэндар гурто́нэндар. Ту мангэ́сас мандар ро́спотини́мо пала́ вса, со чёрдо́ сля, ратя́га када́ сля чи́ дивэ́сэ́га. 40 Дивэ́сэ́га кхам́ пха́барэ́лас ман, ратя́га шы́лали́мо мразя́кирэ́лас ман, суно́ нашэ́лас му́рэндар я́хэ́ндар. 41 Ка́цавэ́нца сле́ кола́ би́ш

бэрш, кала́ мэ джю́дом дэ тиро́ цэр. Мэ тера́вас бу́ти пэ́ тутэ́ дэ́шуштар бэрш́ пала́ дуен тирэ́н чеен тай́ шов бэрш́ пала́ ското, тай́ ту дэ́швар па́рувэ́гас му́ро поти́мо. 42 Сар тэ́ на авэ́л бы́ манца́ Дэвэл му́рэ дадэх́киро, Дэвэл́ Авраа́мохки́ро, Кодэ́ва, Кастар́ даралас́ Исаа́ко, тунчи́ ту б отби́чялдан ман́ шушэ́ вастэ́нца. Дэвэл́ ды́ххля му́ри гла́ба тай́ бу́ти му́рэ вастэ́нди́ро тай́ сунди́сарда́ амэн ратя́га, сави́ проджи́ля. 43 Лавано́ пхэнда́ Иаковости: — Кала́ че́я — му́рэ че́я, чя́ворэ́ — му́рэ чя́ворэ́, тай́ гурту́ря — му́рэ гурту́ря. Вса, со ту ды́ххэх, вса́ му́ро. Со жэ́ кана́ мэ́ тэ́ тера́в му́рэнца́ че́енца тай́ чя́ворэ́нца, савэ́н вонэ́ бэ́я́ндэ? 44 Стера́га до́пхэ́нимо, ту́ тай́ мэ, и тэ́ авэ́л вов машка́р амэ́ндэ. 45 Иаково́ ли́ля бар тай́ тховда́ лэ, соб тэ́ рапи́рэн вонэ́. 46 Вов пхэнда́ пэхки́рэсти́ родости: — Сти́дэн бара́. Вонэ́ стидэ́не бара́, тховдэ́ лэн плае́га́ тай́ бэ́шле па́шэ тэ́ ха. 47 Лавано́ акхарда́ ла́ Ега́р-Са́хадута́, ай́ Иаково́ — Га́л-Эд. 48 Лавано́ пхэнда́: — Ка́дэ́ва плаё́ро ды́ххэл тай́ шунэ́л ама́ри со́лах е́ххэ́сти. Акэ́ сости́ акхардэ́ ла́ Га́л-Эд. 49 Тай́ инте́ ла́ акхардэ́ Ми́цпа, пала́ када со́ Лавано́ пхэнда́: — Тэ́ ды́ххэл РА́Й пала́ тут тай́ пала́ ман, кала́ амэ́ ава́га́ ду́р е́хх е́ххэ́стар. 50 Сар ту́ авэ́га́ тэ́ лиджя́ пэ́ нами́што му́рэнца́ че́енца тай́ лэ́га пэ́сти аврэ́н ромне́н, тай́ сар ни́ка амэ́нца́ нина́й, рапи́р, со Дэвэл́ ды́ххэл тай́ шунэ́л ман и тут. 51 Инте́ Лавано́ пхэнда́ Иаковости: — Акэ́ плаё́ро ба́рэндар тай́ столбо́, саво́ мэ́ тховдо́м машка́р тутэ́ и мандэ́. 52 Кала́ бара́ ды́ххэн тай́ шунэ́н ама́ри со́лах, со́ мэ́ на пэрэ́джява́ пала́ ка́дэ́ва плаё́ро ба́рэндар пэ́ тире́ риг, соб тэ́ а́нэ тути́ вры́тимо, тай́ ту на пэрэ́джяга́ пала́ ка́дэ́ва бару́но столбо́ и плаё́ро ба́рэндар пэ́ му́ри риг, соб тэ́ а́нэ манди́ вры́тимо. 53 Мэ́к Дэвэл́ Авраа́мохки́ро тай́ Дэвэл́ На́хоро́хкиро, Дэвэл́ лэ́ндирэ́ дадэх́киро, сунди́сарэл́ амэн. Тай́ Иаково́ со́лаханя́ Кодэ́лэ́га, Савэ́ даралас́ лэх́киро́ да́д Исаа́ко. 54 Вов а́нда жэ́ртва́ котэ́ дэ́ пляя́ тай́ акхарда́ родо́ тэ́ хан. Вонэ́ хале́ тай́ ратя́рдэ́ котэ́, 55 тай́ дэ́нзор Лавано́ чю́минда́ внуко́нэн и че́ен, ба́хталиса́рда лэн тай́ джи́ля цэрэ́.

32 Иаково́ джя́лас ду́рэдэр, тай́ анге́лу́ря Дэ́влэхки́рэ вы́джиле́ лэ́сти пэ́ дром. 2 Кала́ Иаково́ уды́ххля лэн, вов пхэнда́: — Ка́да Дэ́влэхки́ро тхан! — тай́ акхарда́ ко́ва тхан Ма́хана́имо. 3 Иаково́ бичя́лда англа́ пэ́ ману́шэн пэхки́рэстэ́ пхралэ́стэ́ Иса́востэ́ дэ́ пхув́ Се́иро, дэ́ пхув́ Э́домо. 4 Вов прэ́пхэ́нда лэ́нди: — Пхэ́нэн му́рэсти́ раэ́сти Иса́вости́ кади́: «Тиро́ копы́ли

Иаково пхэнэн: Мэ джюдом Лаваностэ тай слём котэ ды кадэлэ дивэстэ. 5 Мандэ исин гурува, магаря, бакрэ тай бузнэ, копыли тай копыльницы. Мэ бичялав кадэя дума мурэсти раести, соб тэ аракхэ мила дэ тирэн якхэн». 6 Мануша, ка вов бичялда, рисиле тай пхэндэ Иаковости: — Амэ сле тирэстэ пхралэстэ Исавостэ, тай кана вов екджино джял тутэ пэ дром тай лэга штар шэла манушэн. 7 Дэ бари дар тай би пачяско дэ їло Иаково розтховда пэ дуй табороря манушэн, савэ сле лэга, тай кадиж гуртура баро тай цыкно ското тай верблюдонэн. 8 Вов думисарэлас: «Сар Исаво помарэла екх таборо, тунчи авэр таборо ачелалэ тэ джювэ тай фирисарэлапэ». 9 Иаково ачиля тэ мангэпэ: — Дэвэл мурэ дадэхкиро Авраамохкиро, Дэвэл мурэ дадэхкиро Исаакохкиро, РАЙ, Саво пхэнда манди: «Рисяв дэ тири пхув, тирэстэ родостэ, тай Мэ дава тути мищимо!» 10 Мэ на ачяв кодэя мила тай чячимо, савэ Ту дэнян Тирэсти копылэсти. Кала мэ пэрэджилём Иордано, мандэ нисо на сля, екх дэсто, тай кана мэ рисявав павпалэ дуенца таборонэнца. 11 Мангав Тут, фирисар ман вастэстар Исаво, пхралэ мурэ, пала када со мэ дарав, со вов авэла тай помарэла ман тай дэен чяворэнца. 12 Ту жэ пхэндан: «Мэ чячэ дава тути мищимо тай стеравэ, со тутэ авэла фартэ бут чяворэн, сар тишай морёско, саво на пэрэбинэга». 13 Вов пролиджялда котэ рат тай кодэлэстар, со лэстэ сля, вылиля подарко пэхкирэсти пхралэсти Исавости: 14 дуйшэла бузнян тай биш бузнэн, дуйшэла бакрян тай биш бакрэн, 15 трянда верблюдицэн верблюжокоэнца, саранда гурувнен тай дэш гурувен, биш магаричэн тай дэш магарен. 16 Вов дэня лэн копыленди, кажно гурто вылило, тай пхэнда лэнди: — Джян англа ман тай рицарэн машкар гуртура савось дуримос. 17 Вов прыпхэнда кодэлэ, ко джялас англал: — Кала муро пхрал Исаво поджяла тутэ тай пхучела: «Какхири ту? Тев джях? Какхири ското даравэх?» — 18 тунчи ту пхэн: «Ското тирэ копылэхкиро Иаовохкиро. Када подарко лэстар мурэсти раести Исавости, тай вов екджино джял пала амэн». 19 Вов прыпхэнда и дуйтонэ, и тритонэ, и всаворэн аврэн, савэ джянас пала гуртонэн: — Тай тумэ кадиж пхэнэна Исавости, кала вов тумэндэ поджяла. 20 Тай инте пхэнэнти: «Тиро копыли Иаково джял павпалэ амэндар». Иаково думисарэлас: «Мэ ковлярава лэ кадэлэнца даронэнца, савэ бичялав англа пэ, тай тунчи, кала амэ дыкхагапэ, вов прылэла ман». 21 Кади дарурия Иаовохкирэ сле отбичялдэ англэ, ай вов екджино ратярэлас дэ таборо. 22 Кодэла

ратяга Иаково вщиля, лиля дуен пэхкирэн ромнен, дуен копыльницэн тай дэшукх чявэн тай дэ бродо пэрэджия лэнь Яббок. 23 Вов пэрэлиджялда пэ авэр лэнятиро бэрэго лэн тай всаворо пэхкиро мищимо. 24 Иаково ачиляпэ екджино, тай Кось бироласпэ лэга ды дэнзор. 25 Кадэва удыххля со ни сар на выцэлэл, Вов лиляпэ Иаовохкирэ шолдостэ, кади со шолдо слиляпэ тханэстар. 26 Вов пхэнда: — Отмук Ман, пала када со авэл дэнзор. Нэ Иаково пхэнда: — На отмукава, сар на бахталисарэга ман. 27 Вов пхучля: — Сар тиро лав? — Иаково, — пхэнда вов. 28 Тунчи Вов пхэнда: — Кадылэ дивэстар тиро лав авэла на Иаково, ай Израилё, пала када со ту бироласпэ Дэвлэга тай манушэнца тай выцэлдан. 29 Иаково пхэнда: — Мангав Тут, пхэн манди Тиро лав. Нэ Вов пхэнда: — Важ со ту пхучех муро лав? Тай Вов бахталисарда лэ. 30 Иаково пхэнда вов: «Мэ дыкхлём Дэвлэ муй муестэ тай ачилёмпэ джюдо», тай акхарда кодыва тхан Пенуэло. 31 Кала кхам вщиля понад лэстэ, вов проджялас Пенуэло тай лангалас пала пэхкиро шолдо. 32 Акхэ сости ды кадэва диво израильтянуря на хан шуки жыла пэ шолдо: Вов жэ малавада Иаково пав мышца пэ шолдо.

33 Иаково ваздэня якха тай удыххля, со джял Исаво и лэга штаршэла манушэн. Вов ростховда чяворэн машкар Лиятэ, Рахилиятэ тай дуендэ копыльницэндэ. 2 Вов тховда копыльницэн тай лэндирэн чяворэн англэ, Лия тай латирэн чяворэн пала лэндэ, ай Рахиль Иосифога павпалэ всаворэндар. 3 Екджино вов джиля англэ тай, кала поджялас пхралэстэ, тэлиля ды пхув ефта молура. 4 Ай Исаво прастэня Иаковостэ пэ дром, облиля лэ, чютапэ лэсти пэ кор тай росчюминда лэ, тай вонэ заровине. 5 Исаво додыкхля джювлен тай чяворэн и пхучля: — Ко када туга? Иаково пхэнда: — Када чяворэ, савэн пав мила Дэвэл дэня тирэсти копылэсти. 6 Копыльницы пэхкирэнца чяворэнца поджиле тай тэлиле. 7 Тунчи поджиле тай тэлиле Лия тай латирэ чяворэ. Пала всаворэндэ поджиле Иосифо тай Рахиль тай кадиж тэлиле. 8 Исаво пхучля Иаковостар: — Сости ту бичялдан всаворэ кала гуртура манди пэ дром? — Мэ камлём тэ аракхэ лачимо дэ тирэн якхэн, рай муро, — пхэнда вов. 9 Исаво пхэнда: — Мандэ вса хутилэл, пхрал. Ачяв пэхкиро пэсти. 10 — Нат, мангав тут! — пхэнда Иаково. — Сар мэ аракхлём лачимо дэ тирэн якхэн, то прылэ мандар кадэва даро. Важ манди тэ дыкхэ тиро муй — када сар тэ удыххэ Дэвлэхкиро

муй, ту жэ прылилян ман кади пав мила. 11 Мангав тут, прылэ мандар кала даруры, пала када со Дэвэл терда мила манди, тай мандэ исин вса, со трэбуни манди. Иаково фартэ мангэлас, тай Исаво прылиля даруры. 12 Тунчи Исаво пхэнда: — Джам, вряма тэ джэ дэ дром. Мэ авава тэ рицарэпэ пашэ туга. 13 Нэ Иаково пхэнда: — Муро рай джянэл, со чяворэндэ на бут зора. Тай бакря и гурувня дэн тхуд; сар лэн фартэ тэ даравэ сиво дэ екх диво, то ското хасявэла. 14 Мэк муро рай джял англал пэхкирэстар копылэстар, тай мэ джява насиг, кади сар джяна англа ман гуртурия тай чяворэ, поки на авава мурэстэ раестэ дэ Сеиро. 15 Исаво пхэнда: — Дэ мэ ачявава туга набут мурэн манушэн. — Пэ со? — пхучля Иаково. — Хутилэла и када, со мэ аракхлём лачимо дэ якхэн мурэ раехкирэ. 16 Кади, Исаво дэ кодэва диво джиля павпалэ пэстэ дэ Сеиро. 17 Ай Иаково джиля дэ Суккото, тев вов стерда пэсти цэр, ай скотости шалашурия. Акэ сости кодэва тхан акхарэлпэ Суккото. 18 Иаково мищимага авиля Паддано-Арамостар дэ форо Шэхемо дэ Ханаано тай ачиля тэ джювэ англа форо. 19 Пала шэл кеситурия рупь вов тинда Хаморохкирэндэ чявэндэ, дадэ Шэхемохкирэндэ, котор маля, пэ саво тховда пэхкири катуна. 20 Котэ вов стерда жертвеннико тай акхарда лэ «Эл-Элохей-Йисраэл».

34 Дина, Лиятири чей Иаковостар, джиля тэ удыкхэпэ катутнэнца джювленца. 2 Кала Шэхемо, чяво хивеёхкиро Хаморохкиро, саво сля барэдэрэга дэ кодэя пхув, удыкхля ла, вов схутилда ла, пыла лага тай асаныпэ латар. 3 Лэхкиро їло прыачиля Динатэ, Иаковохкиря чятэ, вов покамля ла тай дэдуманя лага камлимага. 4 Шэхемо пхэнда пэхкирэ дадэсти Хаморости: — Лэ манди кадэла чя дэ ромнен. 5 Кала Иаково ушунда, со лэхкирятар чятар асанепэ, лэхкирэ чявэ сле дэ маля гуртонэнца, тай вов ачелас мулком пала када ды вряма, кала вонэ рисиле цэрэ. 6 Хаморо, Шэхемохкиро дад, авиля тэ дэдумэ Иаковога. 7 Сар кацик Иаковохкирэ чявэ ушундэ, со тердалэ, вонэ рисиле малендар. Вонэ сле фартэ мижэ тай холятирэ, пала када со Шэхемо терда ладжяво рындо дэ Израилё, кола пыля Иаковохкиря чяга; када нащи сля тэ терэл. 8 Хаморо пхэнда лэнди: — Муро чяво Шэхемо всаворэга їлэга прыпхангяпэ тумарятэ чятэ. Мангав тумэн, одэн ла лэсти дэ ромнен. 9 Терэн амэнцар бъява: одэн амэнди пэхкирэн чеен тай лэн пала пэстэ амарэн. 10 Джювэн тумэ

машкар амэндэ. Пхув англа тумэн: джювэн дэ ла, битинэн тай пхирэн пав ла тай авэн латирэнца хулаэнца. 11 Шэхемо пхэнда Динатирэсти дадэсти тай пхралэнди: — Мэ дава тумэнди вса, со тумэ пхэнэна, тэ аракхав мэ лачимо дэ тумарэ якха! 12 Мангэн важ тэрнятэ цымин тай подаркурия, тай мэ потинава, кацик одэн ла манди дэ ромнен. 13 Тунчи Иаковохкирэ чявэ пхэндэ Шэхемости тай лэхкирэ дадэсти Хаморости хохавимага, пала када со вов асаныпэ лэндиря пхэня Дина. 14 Вонэ пхэндэ лэнди: — Амэнди нащи тэ терэ када, нащи тэ одтэ амаря пхэня наобчиндэсти муршэсти. Када авэла амэнди ландявимага. 15 Амэ одтага тумэнди ла кацик, сар тумэ ачена, сар амэ, тай терэна обчиндимо всаворэнди пэхкирэнди муршэнди. 16 Тунчи амэ авага тэ одтэ тумэнди амарэн чеен тай тэ лэ пала пэстэ тумарэн. Амэ авага тэ джювэ машкар тумэн тай авага тумэнца екхэ народога. 17 Ай сар тумэ на закамэна тэ терэ обчиндимо, амэ залага пхэня тай уджяга. 18 Лэндирэ лава пыля дэ їло Хаморости тай лэхкирэсти чявэсти Шэхемости. 19 Тэрно мануш сиво терда кода, со вонэ пхэндэ, пала када со вов фартэ камэлас Иаковохкиря чя. Шэхемо сля фартэ пативало дэ пэхкиро дадэхкиро родо. 20 Хаморо тай лэхкиро чяво Шэхемо авиле форохкирэндэ ударэндэ тай пхэндэ манушэнди: 21 — Кала мануша лачимага амэндэ, — пхэндэ вонэ. — Мэк джювэн дэ амари пхув тай пхирэн пав латэ: пэ кадэя пхув хутилэла и лэнди тхан. Амэ авага тэ лэ лэндирэн чеен, тай вонэ мэк лэн амарэн. 22 Кацик кади ала мануша камэн тэ джювэ амэнца, сар екх народо: сар амарэ мурша, сар и вонэ, авэна обчиндэ. 23 На авэна ли тунчи лэндирэ гуртурия, барвалимо тай всаворо ското амарэнца? Терага кода, со вонэ пхэндэ, тай вонэ джювэна машкар амэн. 24 Всаворэ, ко стидэласпэ форохкирэндэ ударэндэ, допхэндэпэ Хаморога тай лэхкирэ чявэга Шэхемога, тай всаворэ мурша дэ форо сле обчиндэ. 25 Проджиле трин дивэ, кала вонэ сле дукхадэ насвалиматар, дуй Иаковохкирэ чявэ Симеоно тай Левиё, Динатирэ пхрала, лиле чюря, чютэпэ пэ форо тай умардэ всаворэн муршэн. 26 Вонэ умардэ чюряга Хаморо тай лэхкирэ чявэ Шэхемо, залиле Дина Шэхемохкирэстар цэрэстар тай уджиле. 27 Иаковохкирэ чявэ заджиле умардэндэ тай обчёрдэ форо, тев асанепэ лэндирятар пхэнятар. 28 Вонэ залиле гуртурия баро тай хурдо ското, магарянэн — вса, со сля дэ форо и дэ мален, 29 и всаворо лэндиро барвалимо, и чяворэн, и джювлен. И вса, со сля дэ цэрэн, вонэ залиле пэсти. 30 Тунчи

Иаково пхэнда Симеоности тай Левиёсти: — Тумэ цырдэне пэ ман глаба, тердэ ман врыжыматорэга важ кодэла, ко джювэл дэ кодэя пхув, ханаанеенди тай периззеенди. Амэн на кади бут, тай сар вонэ стидэна зора тай джяна пэ ман, тай мэ и муро цэр авага умардэ. 31 Ай вонэ пхэндэ: — Хиба трэбуни сля кади тэ лиджял пэ амаряга пхэняга, сар лубняга?

35 Дэвэл пхэнда Иаковости: — Ваздэпэ тай джя дэ Вефилё, джюв котэ тай стер котэ жэртвеннико Дэвлэсти, Саво сикавдапэ тути, кала ту нашлян тирэстар пхралэстар Исавостар. 2 Иаково пхэнда пэхкирэнди цэрутнэнди тай всаворэнди, ко сля лэга: — Вычовэн аврэн дэвлэн, савэ тумэндэ пэга, выжужарэнпэ тай парувэн пэхкири йда. 3 Тунчи стидэнпэ дэ дром, тай амэ джяга дэ Вефилё, тев мэ стерав жэртвеннико Дэвлэсти, Саво дэня манди зор, кала мандэ сля глаба, и сля манца, тев бы мэ тэ на джяв. 4 Вонэ отдэне Иаковости всаворэн аврэн дэвлэн, савэ сле лэндэ, тай ченя канэндар, тай Иаково заганавда лэн тала дубо дэ Шэхемо. 5 Тунчи вонэ джиле дэ дром, тай дар Дэвлэстар сля пэ всаворэ форуря, савэ сле пашэ лэн, кади со нико на нашэлэс пала Иаковохкирэн чяворэн. 6 Иаково тай всаворэ, ко сля лэга, авиле дэ Лузо (када исин Вефилё) дэ Ханаанско пхув. 7 Котэ вов стерда жэртвеннико тай акхарда кодэва тхан «Эл Бет-Эл», пала када со котэ Дэвэл оттердапэ лэсти, кала вов нашла пэхкирэстар пхралэстар. 8 Девора, сави выправарда Ревека, муля, тай сля гаравди тала дубо пашэ Вефилёстар. Пала када вов сля акхардо «Аллон Бахут». 9 Кала Иаково рисиля Паддано-Арамостар, Дэвэл упалэ сикавдапэ лэсти тай бахталисарда лэ. 10 Дэвэл пхэнда лэсти: — Тиро лав Иаково, нэ екхатар ту на авэга тэ акхарэлэ Иаковога. Лав тиро авэла «Израилё». Кади Вов акхарда лэ Израилё. 11 Дэвэл пхэнда лэсти: — Мэ — Дэвэл Всазорока. Терэн чяворэн, тай мэк тумэн авэла бут. Народо тай бут народуря, тхагаря джяна тутар. 12 Пхув, сави Мэ дэнём Авраамости тай Исаакости, Мэ отдава тути тай тирэнди чяворэнди. 13 Тунчи Дэвэл ваздэняпэ лэстар. 14 Иаково тховда баруно столбо пэ кова тхан, тев Дэвэл дэдуманя лэга, тай чюта пэ лэстэ мол тай дзэто. 15 Иаково акхарда тхан, тев Дэвэл дэдуманя лэга, Вефилё. 16 Вонэ ачявдэ Вефилё тай сле надур Эфрататар, кала Рахиль ачиль тэ бэянэ, тай сля лати фартэ пхаро. 17 Вой фартэ пхаро сля тэ бэянэ чяворэ, тай джювли, сави дэлэс лати зор дэ када пхэнда

лати: — На дар, тутэ авэла инте екх чяво. 18 Кала Рахиль мэрэлэс, вой акхарда чявэ Бен-Они, нэ дад акхарда лэ Вениамино. 19 Рахиль муля тай сля гаравди, пэ дром, сар тэ джя дэ Эфрата (када и исин Вифлеемо). 20 Упрал, тев вой сля гаравди, Иаково тховда баруно столбо; кодэва бар ачел котэ и авдивэ. 21 Израилё джялас дурэдэр тай тховда катуна пала Мигдало-Эдеро. 22 Кала Израилё джювэлэс дэ кодэя пхув, Рувимо сута пэхкирэ дадэхкиря наложницага Валлагэ, тай Израилё уджянгля пала када. Иаковостэ сля дэшудуй чявэн: 23 Лиятар: Рувимо (Иаковохкиро барэдэр чяво), Симеон, Левилё, Иуда, Иссахаро тай Завулоно. 24 Рахиятар: Иосифо тай Вениамино. 25 Рахиятирятар копыльницатар Валлатар: Дано тай Неффалимо. 26 Лиятирятар копыльницатар Зелфатар: Гадо тай Асиро. Акэ чявэ Иаковохкирэ, савэ бэяндэпэ лэстэ дэ Паддано-Арамо. 27 Иаково авиль пэхкирэ дадэстэ Исаакостэ дэ Мамре, када пашэ Кирьят-Арбага (када и исин Хевронога), тев калась джюдэ Авраамо тай Исаако. 28 Всаворо джювимо Исаакохкиро сля 180 бэрша. 29 Исаако муля дэ баря пхурима, пхуро тай чяло джювимага, тай отджилья пэхкорэндэ дадэндэ. Лэхкирэ чявэ Исаво тай Иаково гаравдэ лэ.

36 Акэ роспхэндимо пала Исаво (вов жэ Эдомо) тай пала лэхкирэн чяворэн. 2 Исаво лиля пэсти ромнен Ханааностар: Ада, хеттеёхкиря Элонохкиря чя, Охоливама, Анахкиря чя и внучка хиввеёхкиря Цывеонохкиря, 3 ай кадиж Басемата, Измаилохкиря чя, пхэня Неваётохкиря. 4 Ада бэянда Исавости Элифазо, Басемат бэянда Реуэло, 5 Охоливама бэянда Еушо, Яламо тай Корахо. Када чявэ Исавохкирэ, савэ бэяндэпэ лэсти дэ Ханаано. 6 Исаво лиля пэхкирэн ромнен, чявэн, чеен тай всаворэн цэрутнэн, лиля гуртуря, ското тай всаворо барвалимо, саво вов стидэня дэ Ханаано, тай пэрэджилья дэ авэр пхув пэ савось дуримос пэхкирэстар пхралэстар Иаковостар, 7 пала када со лэндэ сля фартэ бут барвалимо, соб лэнди тэ авэ екхтанэ. Лэндэ сля скачик бут ското, со пхув, тев вонэ джювэнас, на выправарэлэс лэн дуен. 8 Кади Исаво (вов жэ Эдомо) ачиль тэ джювэ дэ Сеиро паша пляя. 9 Акэ роспхэндимо пала Исаво, дадэ эдомеендирэ, саво джювэлэс дэ Сеиро паша пляя, тай пала лэхкирэн чяворэн. 10 Акэ Исавохкирэ чявэндирэ лава: Элифазо, Исавохкиро чяво лэхкирятар ромнятар Адатар, тай Реуэло, Исавохкиро чяво лэхкирятар ромнятар Басемататар. 11 Элифазохкирэ чявэ: Темано,

Омаро, Цэфо, Гатамо тай Кеназо. 12 Исавохкирэтэ чявэстэ Элифазостэ сля наложница, ла акхарэнас Тимна, сави бзянда лэсти Амалико. Када чявэ Исавохкиря ромнятэ Адатэ. 13 Реуэлохкирэ чявэ: Нахато, Зерахо, Шамма тай Мизза. Када чявэ Исавохкиря ромнятэ Басемататэ. 14 Исавохкирэ ромня Охоливама, Анахкири чей и внучка Цывеонохкири, бзянда Исавости Еушо, Яламо тай Корахо. 15 Акэ барэдэра машкар Исавохкирэндар чяворэндар. Акэ Элифазохкирэ чявэ, саво сля Исавохкиро англуну: барэдэр Темано, барэдэр Омаро, барэдэр Цэфо, барэдэр Кеназо, 16 барэдэр Корахо, барэдэр Гатамо тай барэдэр Амалико. Када барэдэра Элифазохкирэ дэ Эдомо, када чявэ Адатирэ. 17 Чявэ Реуэлохкирэ, саво сля Исавохкиро чяво: барэдэр Нахато, барэдэр Зерахо, барэдэр Шамма тай барэдэр Мизза. Када барэдэра Реуэлохкирэ дэ Эдомо, када чявэ Басемататирэ. 18 Исавохкирэ чявэ лэхкирятар ромнятар Охоливаматар: барэдэр Еушо, барэдэр Яламо тай барэдэр Корахо. Када барэдэра, савэ бзяндэлэ Исавохкирятар ромнятар Охоливаматар, Анахкирятар чятар. 19 Акэ Исавохкирэ чявэ (вов жэ Эдомо) тай акэ лэндирэ барэдэра. 20 Акэ Сеирохкирэ хорейхкирэ чявэ, савэ джюдэ дэ кодэя пхув: Лотано, Шовало, Цывеоно, Ана, 21 Дишоно, Эцэро тай Дишано. Кадэла Сеирохкирэ чявэ дэ Эдомо сле барэдэра хореендирэ. 22 Лотанохкирэ чявэ: Хори, Хемамо тай Лотанохкири пхэнь Тимна. 23 Шовалохкирэ чявэ: Алвано, Манахато, Эвало, Шэфо тай Ономо. 24 Цывеонохкирэ чявэ: Аяй тай Ана. Када кодэва Ана, саво оттерда дэ шуки пхув пхабардо пани, кала чяравэлэс пэхкирэ дадэхкирэ Цывеонохкирэн магарен. 25 Анахкирэ чяворэ: Дишоно тай Охоливама, Анахкири чей. 26 Дишанохкирэ чявэ: Хемдано, Эшбано, Йитрано тай Керано. 27 Эцэрохкирэ чявэ: Билхано, Заавано тай Акану. 28 Дишанохкирэ чявэ: Уцо тай Арану. 29 Акэ барэдэра хореендирэ: Лотано, Шовало, Цывеоно, Ана, 30 Дишоно, Эцэро тай Дишано. Вонэ сле барэдэра хореендирэ пав лэндири порода дэ пхув Сеиро. 31 Акэ тхагаря, савэ сле дэ Эдомо, инте дыкалэ, сар дэ Израилё сле тхагаря: 32 Бела, Беорохкиро чяво, сля тхагари дэ Эдомо. Лэхкиро форо акхарэлэспэ Динхава. 33 Сар Бела муля, тхагарега ачиля Йоваво, Зерахохкиро чяво, Боцратар. 34 Сар Йоваво муля, тхагарега ачиля Хушаму теманитянэндирятар пхуятар. 35 Сар Хушаму муля, тхагарега ачиля Хададо, Бедадохкиро чяво, саво розмарда мидьянитянонэн дэ пхув Моавохкири. Лэхкиро форо акхарэлэспэ

Авито. 36 Сар Хададо муля, тхагарега ачиля Самла Масрекатар. 37 Сар Самла муля, тхагарега ачиля Сауло Реховотостар, со паша лэнь. 38 Сар Сауло муля, тхагарега ачиля Баал-Ханано, Ахборохкиро чяво. 39 Сар Баал-Ханано, Ахборохкиро чяво, муля, тхагарега ачиля Хададо. Лэхкиро форо акхарэлэспэ Пау, ай лэхкиря ромня акхарэнас Мехетавель, чей Матредохкири, внучка Ме-Завахохкири. 40 Акэ лава барэдэрэн — Исавохкирэн потомконэн, пав лэндирэ лава, породе тай пхуя. Тимна, Алва, Етето, 41 Охоливама, Эла, Пиноно, 42 Кеназо, Темано, Мивцаро, 43 Мигдаэло тай Ирамо. Када барэдэра Эдомохкирэ, пав тханэн, тев джюдэ, дэ пхув, сави вонэ лиле. Када сля Исаво — эдомитянэндиро дар.

37 Иаково джовэлэс дэ кодэя пхув, тев джюда лэхкиро дад, дэ пхув Ханаано. 2 Акэ роспхэндимо пала Иаково тай пала лэхкирэн чяворэн. Иосифо, савэсти сля душефета бэрш, чяравэлэс гуртуря бакрэн екхтанэ пэхкирэнца пхралэнца — Валлатирэнца тай Зелфатирэнца чявэнца. Иосифо роспхэнэлэс дадэсти врытимо пала пхралэн. 3 Израилё камэлэс Иосифо будэр всаворэн аврэн чявэн, пала када со вов сля бзяндэ лэсти дэ пхурима. Вов кадиж стерда важ лэсти барвали шукар їда. 4 Кала пхрала удыххле, со дад камэл лэ будэр, сар аврэн, вонэ камле лэсти врытимо тай на дэдумане лэга лачимага. 5 Екхфар Иосифо дыкхля суно. Вов роспхэнда пала лэ пхралэнди, тай вонэ закамле лэсти врытимо инте будэр. 6 Акэ со вов пхэнда лэнди: — Пошунэнти, саво манди авиля суно. 7 Амэ пхандэга снопуря дэ маля, тай муро снопо подлиляпэ тай састиля, ай тумарэ снопуря ачиле всаворэ ригэндар тай тэлиле. 8 Пхрала пхэндэ лэсти: — Чи на тхагарега ту авэга амэндэ? Чи амэ авага тут тэ кандэ? Тай вонэ камэнас лэсти врытимо инте будэр пала лэхкиро суно тай пала кадэва роспхэндимо. 9 Иосифости авиля инте екх суно, тай вов упалэ роспхэнда пала лэ пхралэнди: — Пошунэнти, манди авиля инте екх суно: пэ кадэва моло манди тэлиле кхам, чён тай дэшуекх чергэня. 10 Вов роспхэнда суно на кацик пхралэнди, ай и дадэсти, тай дад выпхэнда лэсти: — Со када за суно тутэ авиля? Со када, мэ, дэй тири тай пхрала тирэ чяче авага тай тэлювага туты ды пхув? 11 Пхрала холявэнас пэ лэстэ, ай дад зарипирда кадэя дума. 12 Пхрала уджиле тэ чяравэ дадэхкирэ гуртуря пашэ Шэхемо, 13 тай Израилё пхэнда Иосифости: — Ту джянэх, со тирэ пхрала чяравэн гуртуря пашэ

Шэхемо. Мэ камав тэ бичялэ тут лэндэ. — Мэ джява, — пхэнда Иосифо. 14 Дад пхэнда лэсти: — Джя, подыхк, вса мишто тирэнца пхралэнца тай гуртонэнца. Тунчи авэга и пхэнэга манди. Вов када прэпхэнда дэ Хевронохкири маля, тай Иосифо джиля дэ Шэхемо. 15 Котэ вов родэлас лэн дэ мален, покы екх мануш дыкхляпэ лэга тай пхучля лэстар: — Со родэх ту? 16 Вов пхэнда: — Мэ родав мурэн пхралэн. Мангав тут, пхэн манди, тев вонэ чяравэн пэхкирэ гуртурия? 17 — Вонэ уджиле катар, — пхэнда кодэва мануш. — Мэ шундом, сар вонэ пхэнэнас: «Джяга дэ Дотано». Иосифо джиля пала пхралэн тай арахла лэн Дотаностэ. 18 Вонэ удыхкле лэ дурал тай дыкалэ, сар вов тэ поджял лэндэ, допхэндэпэ тэ умарэ лэ. 19 — Акэ джял кадэва, ко дыкхэл сунэ! — пхэндэ вонэ екх екхэсти. 20 — Умарага лэ тай чювага лэ дэ шуко ханинг, ай дадэсти пхэнага, со лэ схалья дыко зверё. Тунчи подыххага, со выджяла лэхкирэ сунэндар. 21 Нэ Рувимо ушунда тай фирисарда лэ лэндар. Вов пхэнда: — Нат, на авага лэ тэ умарэ. 22 Вов допхэнда: — На прочювэн рат. Чювага лэ дэ кадэва ханинг катэ, дэ шуки пхув, кадик на ваздэн пэ лэстэ васт. Рувимо камля тэ фирисарэ лэ лэндар тай тэ рисявэл вов дадэстэ. 23 Кала Иосифо поджиля пхралэндэ, вонэ счиндэ лэстар їда, кодэя барвали шукарни їда, со сля пэ лэстэ, 24 тай чютэ лэ дэ ханинг. Ханинг сля шушо, би панехкиро. 25 Вонэ бэшле тэ ха тай удыхкле: измайльтянурия джян Галаадостар. Лэндирэ верблюдурия сле зачютэ пхаримага спецыенца, бальзамога тай мирага, савэ вонэ лиджнянас дэ Египто. 26 Иуда пхэнда пхралэнди: — Со амэнди колэстар, сар амэ умарага амарэ пхралэ тай сгравага када? 27 Фэдэр битинага лэ измайльтянэнди тай на авага тэ ваздэ пэ лэстэ васт. Вов жэ амаро пхрал, амаро рат, амэ екхэ масэстар. Пхрала кангле лэ. 28 Кала битинимаря Мидьяностар проджнянас пашэ, пхрала доросле Иосифо ханингатар тай битиндэ измайльтянонэнди пала биш рупунэ шэкиля. Измайльтянурия лиле лэ дэ Египто. 29 Кала Рувимо рисиля ханингатэ, вов удыхкля, со Иосифо котэ нинай, тай росчинда пэхкири їда. 30 Вов рисиля пхралэндэ тай пхэнда: — Чяворэ котэ нинай! Тев манди кана тэ джя? 31 Тунчи вонэ лиле їда Иосифохкири, зачиндэ бузнэ тай вымакхле їда дэ рат. 32 Котар вонэ отлиджялдэ барвали шукарни їда дадэсти тай пхэндэ: — Акэ со амэ арахла. Подыхк, када їда на тирэ чявэхкири? 33 Вов уджянгля ла тай затиписия: — Када їда мурэ чявэхкири! Лэ схалья дыко зверё! Чяче, Иосифо

сля розчиндо пэ котора! 34 Иаково розчинда їда пэ пэстэ, обпхангля кущик їдага, сави гонэндар, тай бут дивэ ровэлас пала чявэ. 35 Всаворэ лэхкирэ чявэ тай чея авиле тэ анэ пачя лэсти, ай вов отпхэнэласпэ пачятар, пхэнэлас: — Нат, мэ кади глабатар джява дэ мулэндири люмля, мурэстэ чявэстэ! Кади дад ровэлас пала пэхкиро чяво. (Sheol h7585) 36 Ай мидьянитянурия кодэя врямага битиндэ Иосифо дэ Египто Потифарости, саво сля фараоностэ барэдэра пэ халавдэ.

38 Дэ кодэя вряма Иуда ачявда пхралэн тай ачиля тэ джювэ екхэстэ манушэстэ, савэ акхарэнас Хира Адулламостар. 2 Котэ Иуда удыхкляпэ ханаанеёхкиря чя, савэ акхарэнас Шуа. Вов лиля ла дэ ромнен тай ачиля лага тэ джювэ. 3 Вой ачиля пхари тай бэянда чявэ тай акхарда лэ Эро. 4 Вой инте ачиля пхари тай бэянда чявэ и акхарда лэ Онано. 5 Вой бэянда инте екхэ чявэ тай акхарда лэ Шэла. Вой бэянда лэ дэ Кезиво. 6 Иуда лиля важ пэхкирэ барэдэр чявэ Эро ромня, ла акхарэнас Тамарь. 7 Эро, барэдэр чяво Иудахкиро, сля бэээхало дэ якхэн РАЕХКИРЭН, тай РАЙ умарда лэ. 8 Тунчи Иуда пхэнда Онаности: — Тути трэбуни тэ совэх тирэ пхралэхкиря ромняга, кади сар ту исин пхрал латирэ ромэсти: трэбуни тэ стерэх чяворэ важ тиро пхрал. 9 Нэ Онано джянэлас, со чяворэ авэна на лэхкирэ, тай кала совэлас пэхкирэ пхралэхкиря ромняга, вов счювэлас пэ пхув, соб тэ на стерэ чяворэн важ пэхкиро пхрал. 10 Када, со вов терэлас, дэ РАЕХКИРЭН якхэн сля бэээхало, пала када Вов умарда и Онано. 11 Тунчи Иуда пхэнда Тамаряти, боряти пэхкиряти: — Джюв, сар пхивли, дэ тирэ дадэхкиро цэр, покы на выбарёла муро чяво Шэла. Вов думисарэлас: «Сар бы и Шэла тэ на мэрэл, сар лэхкирэ пхрала». Тамарь джиля тэ джювэ дэ дадэхкиро цэр. 12 Проджиля бут вряма. Иудахкири ромни, Шуахкири чей, муля. Кала Иуда заджиля дэ пачя глабатар, вов джиля дэ Тимна манушэндэ, савэ подчинэлас бала лэхкирэ бакрэндирэ. Лэхкиро амало адулламитянино Хиро джиля лэга. 13 Тамаряти пхэндэ: — Тиро састро джял дэ Тимна тэ подчинэ бала пэхкирэнди бакрэнди. 14 Вой злиля пхивликани їда, чюта пэ пэстэ ушардо, соб ла тэ на уджянэн, тай бэшла пашэ удара дэ Энаимо, саво пэ дром дэ Тимна, пала када со вой дыкхля, со Шэла выбариля и ла на отдэн лэсти дэ ромнен. 15 Кала Иуда удыхкля ла, вов думисарда, со када лубни, пала када со латиро муй сля затердо їдага. 16 Вов порисарда

дромэстар латэ тай пхэнда: — Джам, дэ мэ пэрава туга. Вов на джянэлас, со када лэхкири бори. Вой пхучля: — Со ту дэга манди, соб тэ совэ манца? 17 Вов пхэнда: — Мэ бичялава тути бузнорэ мурэстар гуртостар. Вой пхучля: — Ай ту дэга манди сось пэ вряма, сар на бичялэга бузнорэ? 18 Вов пхэнда: — Со тэ дэ тути? Вой пхэнда: — Тири цол пэ ланчюго тай дэсто, саво тутэ дэ вастэ. Вов дэня лати када вса тай сута лага, и вой ачиял лэстар пхари. 19 Кала вов уджиля котар, вой злиля кадэя їда тай упалэ урявда пхивликани їда. 20 Дэ кодэя вряма Иуда бичялда пэхкирэ амалэга адулламитянинога бузнорэ, соб тэ залэ павпалэ када, со колатэ джювлэтэ, нэ амал на аракхля ла. 21 Вов пхучля катутнэндэ манушэндэ: — Тев исин кодэя лубни, сави бэшэлэс пашэ дром дэ Энаимо? Вонэ пхэндэ: — Катэ на сля нисави лубни. 22 Вов рисиля Иудастэ тай пхэнда: — Мэ на аракхлём ла, тай мануша колэстар тханэстар пхэндэ: «Катэ на сля нисави лубни». 23 Иуда пхэнда: — Мэк ачявэла пэсти кода, со лиля, соб тэ на асанпэ амэндар мануша. Мэ бичялавас лати бузнорэ, кацик ту на аракхлян ла. 24 Проджиля чёна трин, и Иудасти пхэндэ: — Тири бори Тамарь терда бээзх тай ачиял пхари. Иуда пхэнда: — Вылиджян тай спхабарэн ла! 25 Нэ кала ла вылиджянас, вой бичялда састрэстэ кацавэнца лавэнца: — Мэ пхари колэ манушэстар, какхири вса када. Инте вой пхэнда: — Подыкх, на уджянэх, какхири кадэя цол, ланчюго тай дэсто? 26 Иуда уджянгла лэн тай пхэнда: — Вой май чячюни мандар, пала када со мэ на отдэнём ла пала муро чявэ Шэла. Будэр вов на совэлас лага. 27 Кала авиля латиرو вряма тэ бэянэ, латэ дэ води сле дуй чяворэ блезняшкура. 28 Кала вой бэянэлас, екх лэндар вычюта васт. Тунчи джювли, сави дэлэс лати зор дэ када, лиля лоли тхав, запхангла лэсти пэ васторо тай пхэнда: — Кадэва выджиля англуно. 29 Нэ вов зацырда васт павпалэ, тай выджиля лэхкиро пхрал. Тунчи вой пхэнда: — Сар када ту прочинданпэ англунэга? Тай лэ акхардэ Парецо. 30 Тунчи выджиля и кодэва, савэстэ пэ васторо сля лоли тхав, тай лэсти дэне лав Зерахо.

39 Иосифо андэ дэ Египто, тай египтянино Потифаро, саво сля рай фараоностэ и барэдэр халавдо, тинда Иосифо измаильтянонэндэ, савэ пордэ лэ андэ. 2 РАЙ сля Иосифога. Лэстэ сля вса фартэ мишто, тай вов джювэлэс да пэхкирэстэ египетсконэстэ раестэ. 3 Лэхкиро рай удыхля, со РАЙ сля Иосифога тай

со Вов дэл лэсти бахт дэ вса, со вов терэл. 4 Иосифо аракхля лачимо дэ лэ лэхкирэн якхэн тай ачиял пашутнэга копылэга. Потифаро тховда лэ барэдэрэга дэ лэхкиро цэр и отдэня лэсти всаворо хулаимо. 5 Кола вряматар, сар вов тховда лэ барэдэрэга дэ лэхкиро цэр и пэ всаворо хулаимо, РАЙ бахталисарда египтянонэхкиро цэр пала Иосифо. Дэвлэхкиро бахталисаримо сля пэ вса, со сля Потифаростэ: и дэ цэр, и дэ маля. 6 Пала када вов отдэня Иосифости вса, со сля лэстэ. Вов ни пала со на думисарэлэс, сар кацик тэ ха. Иосифо сля лачё пэга тай шукарно. 7 Проджиля савись вряма, тай ромни лэхкирэ раехкири ачиял тэ задыхкэпэ пэ лэстэ и пхэнда: — Сов манца! 8 Вов отпхэнда: — Англа ман муро рай ни пала со на думисарэл дэ цэр. Вса, со исин лэстэ, вов отдэня манди. 9 Дэ кадэва цэр мэ барэдэр. Муро рай на отпхэнда манди ни дэ со, кацик тут, пала када со ту — лэхкири ромни. Сар жэ мэ терава кацаво баро врытимо тай бээзх англа Дэвлэ? 10 Вой дэдумэлэс лэга пала када диво дивэстар, вов отпхэнэласпэ тэ совэ лага тай тэ авэ пашэ латэ. 11 Екхвар вов заджиля дэ цэр пав пэхкиро рындо, кала ника цэрутнонэн на сля дэ цэр. 12 Вой схутилда лэ пала їда тай пхэнда: — Сов манца! Ай вов вычиндапэ тай унашля, ачявда упруаруни їда латэ дэ вастэн. 13 Кала вой удыхля, со вов унашля и ачявда їда латэ дэ вастэн, 14 вой акхарда цэрутнонэн копылен тай пхэнда лэнди: — Дыххэн, кадэлэ еврее андэ амэндэ дэ цэр, ай вов асалпэ амэндар! Вов авиля кордэ тай камля тэ совэ манца, ай мэ ачилём тэ типисявэ. 15 Мурятар типисьявиматар вов ачявда пэхкири їда тай нашля. 16 Вой рицарда Иосифохкири їда пэстэ, покы на авиля цэрэ латино хулай. 17 Вой роспхэнда лэсти кодэва жэ роспхэндимо: — Кадэва копыли-еврее, савэ ту андан амэндэ, авиля мандэ тай камля тэ асапэ мандар. 18 Ай мэ ачилём тэ типисявэ, тай вов нашла и ачявда мандэ пэхкири їда. 19 Кала Иосифохкиро рай шунда роспхэндимо ромнятиро, сави пхэнда: «Акэ сар тиро копыли обджиляпэ манца», вов фартэ холиля. 20 Вов лиля Иосифо и чюта лэ дэ баруно, тев бэшэнас тхагарехкирэ барунаря. Тай акэ кади Иосифо ачиял тэ бэшэ дэ баруно. 21 Нэ РАЙ сля лэга; Вов сикавда лэсти мила и дэня лачимо дэ якхэн барэдэрэ барунэхкиро. 22 Барунэхкиро барэдэр тховда Иосифо барэдэрэга пэ всаворэ барунаря, тай вов дыкхэлэс пала всаворэ рындуря дэ барунэ. 23 Барунэхкиро барэдэр на дыкхэлэс пала кода, со сля отдино Иосифости, пала када

со РАЙ сля Иосифога тай дэлас лэсти бахт дэ
всаворэ рындуря.

40 Кала проджила набут вряма, молымари тай
пэклимари, тхагарехкирэ бутярнэ, тердэ дош
англа пэхкиро рай, Египетско тхагари. **2** Фараоно
фартэ холила пэ дуен пэхкирэн пашутнэн, пэ
барэдэрэ молымаре тай пэ барэдэрэ пэклимаре, **3**
тай чюта лэн дэ баруно, тев сля цэр барэдэрэхкиро
халавдэхкиро, пордэ жэ, тев бэшэл Иосифо. **4**
Барэдэр халавдо отдэня лэн Иосифости, тай
кодэва терэлас бути пэ лэндэ. Вонэ сле котэ савось
вряма, **5** тай акэ лэнди дуенди — молымарести тай
пэклимарести тхагаре Египетско, савэ бэшэнас дэ
барунэ, — дэ екх рат авиле сунэ, тай кожно суно
дэдуманя пэхкиро. **6** Кала жэ дэнзор Иосифо авила
лэндэ, вов удыхля, со лэндири годи сось тасавэл.
7 Вов пхучля фараонохкирэн пашутнэн, савэ сле
екхтанэ лэга дэ екх цэр лэхкирэ раехкиро: —
Сости тумэ авдивэ заровинэ пэ муй? **8** — Амэнди
дуенди авиле сунэ, — пхэндэ вонэ, — тай тэ
гатырэ лэн никасти. Иосифо пхэндэ лэнди: —
Со гатыримо на Дэвлэстар? Роспхэнэн манди
тумарэ сунэ. **9** Тунчи барэдэр молымари роспхэнда
Иосифости пэхкиро суно: — Мэ дыкхлём дэ
сунэ рандэ дракостар, **10** тай патар выджянас
трин рандя. Тай кацик сикавдэлэ почки, вой
розмукхляпэ тай лулудя тердэлэ дракога. **11** Мандэ
дэ вастэ сля фараонохкиро тахтаё. Мэ лилём
драко, вытасавдом дэ тахтаё тай подэнём дэ васт
фараонохкиро. **12** — Акэ со када, — пхэнда лэсти
Иосифо. — Трин рандя — када трин дивэ. **13**
Проджяна трин дивэ, тай фараоно ваздэла тут.
Вов рисарэла тут пэ тири тхан, тай ту подэга
фараоности лэхкиро тахтаё, сар дыкалэ, кала ту
подэгас лэсти мол. **14** Тунчи кала тутэ вса мишто
авэла, мангав тут, взрапир пала ман тай тер манди
мила: пхэн пала ман фараоности, соб тэ вылэ
ман барунэстар. **15** Ман жэ зорага улиджялдэ
еврейсконатар пхуятар, тай катэ мэ кадиж на
тердом нисо кацаво, соб тэ бэшэ дэ баруно. **16**
Кала барэдэр пэклимари удыхля, со Иосифо
мишто роспхэнда суно, вов пхэнда Иосифости:
— Манди кадиж авила суно: мэ рицаравас пэ
шэро трин корзыны мандрэга. **17** Дэ упралуни
сля выпэкlimо фараоности, нэ ла ханас чирикля
корзынатар, сави сля пэ муро шэро. **18** — Акэ
со када, — пхэнда Иосифо. — Трин корзыны
— када трин дивэ. **19** Проджяна трин дивэ, тай
фараоно ваздэла и тут кадиж: тути отчинэна шэро,
ай тиро трупо абмлавэна пэ рандэ, тай чирикля

авэна тэ ха лэ. **20** Пэ трито диво, пэ диво, кала
бэяндапэ фараоно, вов терда пиро важ всаворэ
лэхкирэ рая. Англа лэндэ вов ваздэня барэдэрэ
молымаре тай барэдэрэ пэклимаре. **21** Барэдэрэ
молымаре вов рисарда пэ лэхкиро тхан, тай кодэва
упалэ подэня тахтаё дэ фараонохкиро васт. **22**
Ай барэдэрэ пэклимаре амблавдэ пэ рандэ, сар
Иосифо и пхэнда лэнди. **23** Нэ барэдэр молымари
на взрапирда пала Иосифо; вов бистарда пала лэ.

41 Проджила дуй бэрш, тай фараоности авила
суно: вов ачелас пэ брэго Нилохкиро, **2** тай
акэ лэнятар подлилепэ ефта гурувнен — лаче тай
тхулэ — тай ачиле тэ чярэвэлэ дэ тростниконэн. **3**
Пала лэндэ выджиле Нилостар авэр ефта гурувня
— тишлэ тай фартэ нашукарнэ — тай ачиле
пашэ колэнца пэ брэго лэнятиро. **4** Тай тишлэ,
нашукарнэ гурувня схале ефта лачен, тхулэн
гурувнен. Катэ фараоно джонгавдапэ. **5** Вов засута
упалэ, тай лэстэ авила авэр суно: ефта колосуря
— зоралэ тай тхулэ — барёнас пэ екх стеблэ.
6 Пала лэндэ выбариле мите ефта колосуря —
тишлэ тай обпхабардэ восточнонага балвалаяга.
7 Тишлэ колосуря нахкадэ ефта зоралэн, тхулэн
колосонэн. Катэ фараоно джонгавдапэ. Када сля
суно. **8** Дэнзор вов фартэ пэрэджювлас пала сунэ.
Вов акхарда всаворэн врэжымарен тай годяврэнэн
дэ Египто тай роспхэнда лэнди пэхкирэ сунэ, нэ
нико лэндар на роспхэнда, со пхэнэн сунэ. **9**
Тунчи барэдэр молымари пхэнда фараоности: —
Кана мэ взрапирав, со тердом дош. **10** Екхвар
фараоно холила пэ пэхкирэн копылен тай тховда
ман тай барэдэрэ пэклимаре дэ барунэ. **11** Тай
манди, тай лэсти дэ екх рат авила суно, тай
дэ кажно суно пэхкири годи. **12** Котэ амэнца
сля тэрно еврей, барэдэрэхкиро халавдэхкиро
копыли. Амэ роспхэндэ лэсти амарэ сунэ, тай вов
роспхэнда пала лэн амэнди; кажнёнэсти пэхкиро
роспхэндимо. **13** И сар вов роспхэнда, кади вса
и выджиля: ман рисардэ павпалэ пэ муро тхан,
ай колэ амблавдэ пэ рандэ. **14** Фараоно бичялда
пала Иосифо, тай лэ сиво андэ барунэстар. Вов
подчинда бала, парувда їда тай ачила англа
фараоно. **15** Фараоно пхэнда Иосифости: — Мэ
дыкхлём суно, тай нико на галёлас тэ роспхэнэ,
со кадэва суно пхэнэл. Нэ мэ шундом пала тут,
со ту полэх сунэ тай галёх тэ роспхэнэ пала
лэн. **16** Иосифо пхэнда: — На мэ, Дэвэл дэла
фараоности роспхэндимо дэ лачима. **17** Фараоно
пхэнда Иосифости: — Мэ дыкхлём, со мэ ачяв пэ
брэго Нилохкиро, **18** тай акэ, выджян лэнятар ефта

гурувня, лаче тай тхулэ, тай ачиле тэ чыравэлэ дэ тростниконэн. 19 Пала лэндэ подлилепэ ефта аврэн гурувнен — тишлэ, пэ лэндэ душонас кокала, кацавэ нашукарнэ, савэн мэ на дыкхлём дыкалэ никала дэ всавори пхув Египто. 20 Тунчи тишлэ, нашукарнэ гурувня схале ефта тхулэн гурувнен, савэ выджиле англал. 21 Вонэ заджиле лэнди дэ води, кацик када на душолос: вонэ ачилепэ кацавэ жэ нашукарнэ, сар дыкалэ. Катэ мэ джонгавдомпэ. 22 Тунчи мэ дыкхлём дэ сунэ ефта колосуря пэ екх стеблэ, пхэрдэ лаче ворзога. 23 Пала лэндэ выбариле авэр ефта колосуря — шукэ, тишлэ тай обпхабардэ восточнонага балваляга. 24 Тишлэ колосуря наххавдэ ефта пхэрдэн колосонэн. Мэ роспхэндом врэжымаренди, нэ нико на сгалювда тэ роспхэнэ пала лэн манди. 25 Иосифо пхэнда фараоности: — Дэ кадэлэн сунэн фараонохкирэн екх годи. Дэвэл оттерда фараоности, со Вов стидэлпэ тэ терэ. 26 Ефта лачен гурувнен — када ефта бэрша, тай ефта лачен колосонэн — када кадиж ефта бэрша; када екх суно. 27 Ефта тишлен, нашукарнэн гурувнен, савэ авиле пала лэнди, — када ефта бэрша, тай кадиж ефта тишлэ колосуря, обпхабардэ восточноняга балваляга, — када ефта бокхалэ бэрша. 28 Акэ, со мэ рицаравас дэ годи, кала пхэндом фараоности, со Дэвэл оттерда лэсти, со Вов камэл тэ терэ. 29 Дэ Египетско пхув авэн ефта барвалимакхирэ бэрша. 30 Ай пала лэндэ джяна ефта бокхалэ бэрша, кала всаворо барвалимо дэ Египто авэла бистардо, тай бокх шушарэла пхув. 31 Барвалимо дэ пхув бистарэлалэ пала бокх, саво джяла пала лэстэ, пала када со бокх авэла фартэ зорали. 32 Тай кода, со суно авиля фараоностэ дувар, када Дэвэл састэ камэл када сиво тэ терэ тай сиво вса стерэла. 33 Мэк жэ фараоно аракхэла годявэрнэ манушэ тай тховэла лэ барэдэрэга пэ Египетско пхув. 34 Мэк фараоно тховэла раен пэ всавори пхув, соб вонэ тэ стидэн панчто котор дэ вса, со дэла пхув дэ Египто дэ кодэла ефта барвалимакхирэ бэрша. 35 Мэк дэ кодэла лаче бэрша вонэ стидэн всаворо хамо, со авэл лэндэ, тай мэк фараонохкирэстар лавэстар стидэн ворзо тай фирисарэн лэ дэ форурия. 36 Кадэва хамо авэла тэ пашлэ, соб пхув тэ на хасявэл дэ кодэла ефта бокхалэ бэрша, савэ авэна тунчи дэ Египто. 37 Фараоности тай лэхкиренди пашутнэнди чялиля кадэя дума. 38 Фараоно пхучля пэхкирэн пашутнэн: — Аракхага амэ инте кацавэ, сар кадэва мануш, дэ савэ Фано Дэвлэхкиро? 39 Тай фараоно пхэнда Иосифости: — Сар Дэвэл оттерда тути вса када, нинай ника годявэрнэ тутар.

40 Мэ тховав тут барэдэрэга дэ муро цэр, тай всаворэ мурэ мануша авэна тэ кандэлэ тут, вса, со ту пхэнэга. Кацик мурэга тронэга мэ авава вучидэр тутар. 41 Фараоно пхэнда Иосифости: — Дыхх, мэ тховав тут барэдэрэга дэ всавори Египетско пхув. 42 Вов зилия наестар пэхкири ангрусни цолага тай урявда пэ най Иосифости, урявда лэ дэ сани полотностар їда тай амблавда лэсти пэ кор сувнаконо ланчюго. 43 Вов прыпхэнда тэ пхиравэн лэ дэ вурдон, сар дуйтонэ пала пэстэ, тай тэ типисявэ англа лэстэ: «Аврех!» Кади вов тховда лэ пэ всавори пхув Египто. 44 Фараоно пхэнда Иосифости: — Мэ фараоно, нэ би тирэ лавэско нико дэ всаворо Египто нисо на терала ни вастэга, ни пурэга. 45 Фараоно дэня Иосифости лав Цафнато-Панеахо тай отдэня лэсти дэ ромнен Асната, Потиперахкиря чя. Потипера сля рашаи дэ форо Оно. Тай Иосифо лагля дэ дром пав всавори пхув Египто. 46 Иосифости сля трянда бэрш, кала вов ачиля тэ терэ бути пэ фараоно, тхагаре Египетсконэ. Вов выджия фараоностар тай джия дэ дром пав всаворо Египто. 47 Дэ ефта барвалимакхирэ бэрша пхув анэлас лачэ урожаё. 48 Иосифо стидэлас всаворо урожаё дэ кодэла ефта бэрша барвалима дэ Египто тай стховэлас лэ дэ форурия. Дэ кажно форо вов стховэлас урожаё пашутнэндар малендар. 49 Иосифо кади бут стидэня ворзо, сар тишай дэ море. Вов пэрэачия тэ бинэ лэ, пала када со нико на сгалэлас тэ пробинэ лэ. 50 Англа када, сар авиле бокхалэ бэрша, Иосифостэ бэяндэлэ дуй чывэ Аснататар, Потиперахкиря чя, саво сля рашаи дэ форо Оно. 51 Иосифо акхарда пэхкирэ пхурэдэрэ чывэ Манассиё. Вов пхэнда: «Дэвэл дэня манди тэ бистарэ всавори глаба и мурэ дадэхкиро цэр». 52 Дуйтонэ чывэ вов акхарда Ефремо. Вов пхэнда: «Дэвэл дэня манди чыворэн дэ пхув муря духхатири». 53 Ефта барвалимакхирэ бэрша дэ Египто проджиле, 54 тай авиле ефта бокхалэ бэрша, сар и пхэнэлас Иосифо. Бокх сля дэ аврэн всаворэн пхуен, кацик дэ Египетско пхув сля хамо. 55 Кала всаворо Египто ачиля тэ бокхавэл, мануша ачиле тэ мангэ фараоностэ пала хамо, тай фараоно пхэнда египтянонэнди: — Джяна Иосифостэ тай терэн, сар вов пхэнэла. 56 Кала бокх розджиялэ пав всавори пхув, Иосифо оттерда складуря тай ачиля тэ битинэ ворзо египтянонэнди. Бокх дэ Египто сля зорали. 57 Мануша авэнас дэ Египто всаворэндар тханэндар, соб тэ тинэ Иосифостэ ворзо, пала када со бокх сля зорали пав всавори люмля.

42 Кала Иаково уджянгла, со дэ Египто исин
ворзо, вов пхэнда чявэнди: — Со түмэ дыкхэн
екх пэ ех? 2 Мэ шундом, со дэ Египто исин
ворзо. Джян тай тинэн лэ котэ важ амэн, соб
амэ тэ выджювах тай тэ на мэрах. 3 Дэш пхрала
Иосифохкирэ джиле дэ Египто, соб тэ тинэ ворзо.
4 Кацик Вениамино, Иосифохкирэ пхралэ, Иаково
на мукля лэнца, пала када со вов пхэнда: — Тэ на
терэлпэ лэга савись бида. 5 Кади машкар бутэн
аврэн и чявэ Израилёхкирэ авиле тэ тинэ ворзо,
пала када со дэ Ханаанско пхув сля бохх. 6 Иосифо
сля хулай пэ всавори кодэя пхув. Вов битинэлас
ворзо манушэнди пав всаворо Египто, тай кала
пхрала Иосифохкирэ авиле, вонэ тэлиле лэсти ды
пхув. 7 Сар кацик Иосифо удыкхля пхралэн, вов
екхатар уджянгла лэн, нэ прытердапэ, со вов лэн
на джянэл, тай задэдуманя лэнца холяга. — Катар
түмэ авиле? — пхучля вов. — Хананаанохкирятар
пхуятар, соб тэ тинэ хамо, — пхэндэ вонэ. 8
Иосифо уджянгла пэхкирэн пхралэн, нэ вонэ на
уджянгле лэ. 9 Вов взрапирда пэхкирэ сунэ пала
лэн тай пхэнда: — Түмэ шпионуря! Түмэ авиле тэ
выдыкхэ дэ амари пхув, тев исин назоралэ тхана.
10 — Со ту, раё, — пхэндэ вонэ. — Тирэ копыли
авиле тэ тинэ хамо. 11 Амэ всаворэ чявэ екхэ
дадэхкирэ. Тирэ копыли — чячюнэ мануша, на
шпионуря. 12 Вов пхэнда лэнди: — Нат, түмэ авиле
тэ выдыкхэ дэ амари пхув, тев исин назоралэ
тхана. 13 Ай вонэ пхэндэ: — Амэ, тирэ копыли,
— дэшудуй пхрала, чявэ екхэ дадэхкирэ, саво
джювэл дэ Ханаанско пхув. Цыкнэдэр и екхатар
дадэга, ай екхэ будэр нинай. 14 Иосифо пхэнда
лэнди: — Мэ пхэндом жэ, со түмэ шпионуря! 15
Акэ сар мэ када выпучява тумэндар: солахов
фараонохкирятар джювимага, түмэ на уджяна
катар, сар на авэла кордэ тумаро цыкнэдэр пхрал.
16 Бичялэн екхэ тумэндар пала пхралэ, ай авэр
авэна тэ бэшэ дэ баруно. Кади мэ уджянава тумарэ
лава — чячимо ли түмэ манди дэдумэн. Сар
нат, солахов фараонохкиряга джювимага, түмэ
— шпионуря! 17 Тай затерда лэн всаворэн дэ
баруно пэ трин дивэ. 18 Гэ трито диво Иосифо
пхэнда лэнди: — Терэнти, со мэ пхэнава, тай авэна
джюдэ, пала када со мэ дарав Дэвлэ. 19 Сар түмэ
чячюнэ мануша, мэк екх тумэндар ачелалэ катэ
дэ баруно, ай авэр джяна тай отлиджяна ворзо
тумарэнди боххалэнди їренди. 20 Нэ түмэ анэна
мандэ тумарэ цыкнэдэр пхралэ, соб тэ авэн тумарэ
лава чячюнэ тай түмэ тэ аченпэ джюдэ. Кади вонэ
и стердэ. 21 Вонэ пхэндэ екх екхэсти: — Душол,
со пэ амэн авиля кадэя глаба пала амарэ пхралэ.
Амэ дыкхле лэхкири дар, кала вов мангэлас амэн,
нэ амэ на ачиле тэ шунэ, тай акхэ пэ амэн авиля
кадэя глаба. 22 Рувимо пхэнда: — Мэ жэ пхэнаवास
түмэнди— на терэн кадэва бээзэх пала чяворо, ай
түмэ на пошундэ! Кана авэл распотинимо пала
лэхкиро рат. 23 Вонэ и на думисаренас, со Иосифо
полэл лэн, пала када со вов дэдуманя лэнца пав
дуешибэндирэ манушэ. 24 Вов оджиля дэ риг тай
заровиня. Тунчи рисиля павпалэ тай задэдуманя
лэнца. Вов лиля лэндар Симеоно тай спхангля лэ
лэндэ пэ якхэн. 25 Иосифо прыпхэнда тэ пхэрдэн
лэндирэ трасты ворзога, тай тэ чювэн всаворэнди
павпалэ лэндирэ рупь, кажнонэсти дэ лэхкиро
гоно, ай тэ дэн лэнди хамо пэ дром. Кади и сля
стердо. 26 Пхрала чютэ ворзо пэ магарен тай
джиле дэ дром. 27 Кала вонэ ачиле, соб тэ ратарэ,
екх лэндар розпхангля гоно, соб тэ лэ ворзо тэ
парварэ магаре, тай удыкхля дэ гонэ пэхкири рупь.
28 — Мури рупь рисиля! — пхэнда вов пхралэнди.
— Акэ вой дэ муро гоно. Лэндирэ їлэ позамуле.
Вонэ дэ дар порисиле екх екхэсти тай пхэндэ: —
Со када терда амэнца Дэвлэ? 29 Кала вонэ авиле
пэхкирестэ дадэстэ Иаковостэ дэ Ханаано, вонэ
роspхэндэ лэсти пала вса, со лэнца тердапэ. Вонэ
пхэндэ: 30 — Мануш, саво хулай пэ кодэя пхув,
дэдуманя амэнца холяга тай прылиля амэн пала
шпионуря. 31 Нэ амэ пхэндэ лэсти: «Амэ чячюнэ
мануша, на шпионуря. 32 Амэн сля дэшудуй
пхралэн, чявэ екхэ дадэхкирэ, саво джювэл дэ
Ханаанско пхув. Цыкнэдэр и екхатар дадэга, ай
екхэ будэр нинай». 33 Тунчи мануш, саво хулай дэ
кодэя пхув, пхэнда амэнди: «Акэ сар мэ уджянава,
чячюнэ түмэ мануша чи нат: ачявэнти екхэ пхралэ
катэ манца, лэн хамо важ тумарэн боххалэн їрен
тай джян пэхкирэга дромэга. 34 Нэ анэн мандэ
тумарэ цыкнэдэр пхралэ. Кади мэ уджянава, со
түмэ на шпионуря, ай чячюнэ мануша. Тунчи мэ
одава тумэнди тумарэ пхралэ тай пхэнава, соб
түмэ тэ пхирэн пав кадэя пхув, тев камэн». 35
Кала вонэ вычютэ гонэндар вса, кажно удыкхля
котэ пэхкиро бузло рупага. Сар удыкхле рупь, и
вонэ, и лэнди ро дад пэрэдарапэ. 36 Иаково
пхэнда лэнди: — Түмэ залиле мандар чяворэн.
Иосифо будэр нинай, и Симеоно будэр нинай, ай
кана түмэ камэн тэ лэ Вениамино. Со кана авиля
пэ мандэ! 37 Рувимо пхэнда дадэсти: — Умарэга
мурэн дуен чявэн, сар мэ на анава лэ павпалэ
тутэ. Дэ лэ манди, тай мэ анава лэ павпалэ. 38
Нэ Иаково пхэнда: — Муро чяво на джяла пордэ
туга. Лэхкиро пхрал муло, вов ачильпэ екх. Сар дэ
дром лэга терэлалэ глаба, тунчи кадэлага грыжага

тумэ злиджяна муро парно шэро дэ мулэндири
люмля! (Sheol h7585)

43 Дэ кодэя пхув бохк ачелас вса зоралэдэр. 2
Кала пхрала схале всаворо ворзо, саво андэ
Египтостар, дад пхэнда лэнди: — Рисявэн тай
тинэн амэнди инте набут хамо. 3 Нэ Иуда пхэнда
лэсти: — Кодэва мануш састэс прыпхэнда амэнди:
«На сикавэнпэ манди пэ яххэн, сар тумэнца на
авэла тумарэ пхралэ». 4 Сар ту отмукэга амэнца
пхралэ, то амэ джяга тай тинага важ тутэ хамо. 5
Нэ сар ту на отмукэга лэ, амэ на джяга, пала када
со кодэва мануш пхэнда амэнди: «На сикавэнпэ
манди пэ яххэн, сар тумэнца на авэла тумарэ
пхралэ». 6 — Пэ со тумэ андэ пэ ман кадэя
глаба? Важ со пхэндэ кодэлэсти манушэсти, со
тумэндэ исин инте екх пхрал? — пхучля Израилё.
7 Вонэ пхэндэ: — Кодэва мануш распучелас вса
пала амэндэ тай пала амари їри: «Джюдо инте
тумаро дад? Исин тумэндэ инте пхрал?» Амэ
роspхэндэ лэсти пала када, со вов пхучля. Катар
амэ джангле, со вов пхэнэла: «Анэнти кордэ
тумарэ пхралэ»? 8 Иуда пхэнда Израилёсти,
пэхкирэ дадэсти: — Отмук чяворэ манца, тай
амэ екхатар джяга, соб всаворэ амэ тэ выджювах
тай тэ на мэрах: амэ, тай ту, тай амарэ чяворэ.
9 Мэ дав тути лав, мандар ту пхучега пала лэ.
Сар мэ на анава лэ тутэ тай на тховава катэ
англа тутэ, мэ авава дошало англа тутэ, покы
на мэрава. 10 Сар амэ тэ на цырдах вряма, то
дувар джиле бы тай рисиле. 11 Тунчи лэнди
дад Израилё пхэнда лэнди: — Сар када амэнди
тэ на обджя, терэнти акэ со: тховэн дэ трасты
фэдэдэр плодуря кадэлатар пхуятар тай отлиджян
дэ даро колэсти манушэсти — набут бальзамо тай
набут авдин, специй тай цил, савэндар джял лачё
фано, фисташкуря тай миндалё. 12 Лэн дувар
будэр рупь, соб тумэнди тэ анэ пэга и кода, со сля
тховдо павпалэ дэ тумарэ гонэ, чи на сля када
ошыбка. 13 Лэн тумарэ пхралэ, екхатар жэ джян
упалэ колэстэ манушэстэ. 14 Мэк Дэвэл Всазорако
дэла тумэнди мила, соб вов тэ отмукэл и аврэ
пхралэ, и Вениамино тэ рисявэ тумэнца цэрэ. Ай
сар манди трэбуни тэ ачявпэ би чяворэндиро, мэк
кади и авэла. 15 Пхрала лиле подаркуря тай дувар
будэр рупь, тунчи лиле Вениамино, екхатар жэ
джиле дэ Египто тай котэ ачиле англа Иосифо.
16 Кала Иосифо удыххля, со лэнца Вениамино,
вов пхэнда пэхкирэсти барэдэр бутярнэсти: —
Отлиджя кодэлэн манушэн мандэ дэ цэр, зачин
савось ското тай тав хамо. Вонэ авэна тэ ха манца

дэ їпаш диво. 17 Мануш терда, сар лэсти сля
прыпхэндо, тай анда лэн дэ Иосифохкиро цэр. 18
Вонэ пэрэдаравдэлэ, кала лэн андэ лэстэ дэ цэр,
пала када со думисарэнас: «Амэн андэ кордэ пала
рупь, сави рисиля дэ амарэ гонэ дэ англуно моло.
Вов камэл тэ помарэ амэн тай тэ лэ зорага, тэ чювэ
дэ копыли тай тэ залэ амарэн магарен». 19 Вонэ
поджила барэдэрэстэ бутярнэстэ Иосифохкирэ
тай задэдуманэ лэга паша удара дэ цэр: 20 — Раё,
пошун, — пхэндэ вонэ, — амэ авагаc кордэ екх
моло тэ тинэ хамо. 21 Нэ кала амэ ачиле пэ рат
тай розпхангле гонэ, кажно амэндар араххля котэ
пэхкири рупь, скацик сля дыкалэ. Пала када амэ
андэ лэ павпалэ. 22 Амэ андэ пэга инте рупь, соб
тэ тинэ хамо. Амэ на джянах, ко дэ кодэва моло
тховда амари рупь амэнди дэ гонэ. 23 Вов пхэнда:
— Вса мишто, на даранти. Тумаро Дэвэл, тумарэ
дадэжкиро Дэвэл, тховда кадэва барвалимо дэ
тумарэ гонэ. Ай манди дэне тумари рупь. Тунчи
барэдэр бутярно вылиджялда лэндэ Симеоно. 24
Вов анда пхралэн дэ Иосифохкиро цэр, дэня лэнди
пани тэ выхалавэ пурэ тай дэня хамо магаренди.
25 Вонэ лилэ подаркуря Иосифости, кала вов
авэла дэ їпаш диво, пала када со лэнди пхэндэ,
со вонэ авэна тэ ха котэ. 26 Кала Иосифо авилия
цэрэ, вонэ отдэне лэсти подаркуря тай тэлиле
лэсти ды пхув. 27 Вов пхучля лэн пала састимо,
тунчи пхэнда: — Сар тумаро пхуро дад, пала савэ
тумэ дэдумане манди? Джюдо вов инте? 28 Вонэ
пхэндэ: — Тиро копыли, дад амаро, инте джюдо
тай састо. Тай тэлэ тэлиле лэсти пативатар. 29
Вов обдыххляпэ тай додыххля пэхкирэ пхралэ
Вениамино, пэхкиря датирэ чявэ. Вов пхучля: —
Када тумаро цыкнэдэр пхрал, кодэва, пала ка
тумэ дэдумане манди? Дэвэл тэ терэл мила тути,
муро чяво! 30 Иосифохкиро їло сля на пэ тхан,
кала вов удыххля пэхкирэ пхралэ, тай инте набут,
и вов розровэлас бы. Вов екхатар жэ уджиля,
заджиля пэстэ дэ цэроро тай котэ фартэ заровиня.
31 Тунчи вов халавда муй тай выджиля упалэ. тай
рицарэласпэ, соб тэ на заровэ, пхэнда: — Подэнти
хамо. 32 Лэсти подэне ригатар, пхралэнди ригатар,
тай египтянонэнди, савэ ханас лэга, кадиж ригатар,
пала када со египтянуря на ханас еврее́нэнца, када
египтянонэнди сля гряцымо. 33 Пхралэн бэшавдэ
англа лэ пав пхуриматэ, англунэстар ды цыкнэдэр,
тай вонэ дыкхле екх пэ екхэстэ тай нисо на
полэнас. 34 Лэнди подэнас хамо Иосифохкирэстар
скаминдэстар, ай котор Вениминохкиро сля
панчвар барэдэр, сар аврэнди. Вонэ кадиж пэнас
лэга, тай вонэ набут матиле.

44 Иосифо прыпхэнда пэхкирэ барэдэрэ бутярнэсти: — Пхэр гонэ кадэлэн манушэн хамага, скацки вонэ улиджяна, тай тхов рупь кажнонэхкиро павпалэ дэ гонэ. 2 Ай дэ цыкнэхкиро гоно екхтанэ лэхкиря рупага пала ворзо тхов муро рупуно тахтаё. Тай кодэва стерда, сар прыпхэнда Иосифо. 3 Кацки ачиля тэ душол пэ гаса, пхралэн отбичилдэ дэ дром екхтанэ лэхкирэнца магарэнца. 4 Вонэ сле инте надур форостар, кала Иосифо пхэнда барэдэрэсти бутярнэсти: — Екхатар жэ прастэ пала кодэлэн манушэн тай, кала доросэга лэн, пхэн: «Сости тумэ потиндэ врыгимага пала лачимо? 5 Пэ со тумэ чёрдэ мурэ раехкиро тахтаё, савэстар вов пэл тай пэ саво вов врисарэл? Тумэ тердэ нalachё рындо! 6 Кала доросля лэн, вов пропхэнда лэнди кодэла лава. 7 Вонэ пхэндэ: — Сости рай пхэнэл кацавэ лава? На авэна тирэ копыли тэ терэ кацаво! 8 Амэ жэ андэ тути павпалэ рупь Ханаансконатар пхуятар, сави арахкле пэстэ дэ гонэн. Пэ со амэнди тэ чёрэ рупь чи сувнак цэрэстар тирэ хулаестар? 9 Сар аракхэга тахтаё екхэстэ тирэстэ копылестэ, мэк вов мэрэла, ай амэ ачяга копыленца амарэ раехкирэнца. 10 Вов пхэнда: — Мишто, мэк авэла кади, сар тумэ пхэнэн: кастэ аракхэлапэ тахтаё, ачела мурэга копылега, ай авэр на дошалэ. 11 Пхрала сиго обмукле кажно пэхкиро гоно пэ пхув тай розпхангле лэн. 12 Барэдэр бутярно ачиля тэ родэ пхурэдэрэстар цыкнэстэ; тахтаё аракхляпэ дэ гоно Вениаминохкиро. 13 Пхрала розчиндэ пэ пэстэ їда, тховдэ гонэ пэ магарен тай рисиле дэ форо. 14 Иуда тай лэхкирэ пхрала рисиле дэ Иосифохкиро цэр, саво инте сля котэ. Вонэ тэлэдэне англа лэстэ пэ пхув. 15 Иосифо пхэнда лэнди: — Со жэ тумэ тердэ? Тумэ со, на джянэнас, со кацаво мануш, сар мэ, вса джянэл, кала врисарэл? 16 — Со амэ пхэнага амарэсти раести? — пхэнда Иуда. — Сар тэ дэдумэ? Сар тэ допхэнэ када, со амэ на дошалэ? Дэвэл оттерда дош тирэн копылен. Кана амэ копыли амарэ раехкирэ — амэ тай кодэва, кастэ аракхляпэ тахтаё. 17 Иосифо пхэнда: — Мэ на авава тэ терэ кацаво! Кацки кодэва, кастэ аракхляпэ тахтаё, авэла мурэ копылега, ай тумэ рисявэн дадэстэ пачяга. 18 Тунчи Иуда поджиля лэстэ тай пхэнда: — Мангав тут, муро раё, дэ тирэ копылести тэ пхэнэ лав мурэ раести. На холяв пэ тиро копыли, ту — сар фараоно. 19 Муро рай пхучля пэхкирэн копылен: «Исин тумэндэ дад чи пхрал? 20 Тай амэ пхэндэ: «Амэндэ исин пурано дад тай исин тэрно чяво, саво бэяндапэ лэсти дэ пхурима. Лэхкиро пхрал муля, тай вов ачиляпэ екх пэхкирятэ даятэ, тай дад камэл лэ». 21 Тунчи ту пхэндан пэхкирэнди копыленди: «Анэн лэ мандэ, соб манди тэ дыкхэ пэ лэстэ». 22 Тай амэ пхэндэ мурэ раести: «Чяворо нисар на ачявэла дадэ, ай сар ачявэла, дад мэрэла». 23 Нэ ту пхэндан пэхкирэнди копыленди: «Покы тумаро пхрал на авэла кордэ тумэнца, на сикавэнпэ манди пэ якхэн». 24 Кала амэ авиле тирэстэ копылестэ, мурэ дадэстэ, амэ роспхэндэ лэсти, со пхэнда муро раё. 25 Амаро дад пхэнда: «Рисявэн тай тинэн инте набут хамо». 26 Нэ амэ пхэндэ: «Амэнди нащи тэ джя. Кацки сар цыкнэдэр пхрал джяла амэнца, тунчи амэ джяга. Амэнди нащи тэ сикавэпэ пэ якхэн кодэлэсти манушэсти, сар на авэла амэнца цыкнэдэр пхрал». 27 Тиро копыли, муро дад, пхэнда амэнди: «Тумэ екджинэ джянэн, со мури ромни бэянда манди дуен чявэн. 28 Екх лэндар уджиля мандар, тай мэ пхэндом: «Вов сля розчиндо пэ котора», — тай кодэла вряматар мэ лэ на дыкхлём. 29 Сар тумэ лэна мандэ и аврэ, тай лэга терэлапэ глаба, тумэ злиджяна грыжага муро парно шэро дэ мулэндири люмля». (Sheol h7585) 30 Пала када, сар чяворэ на авэла амэнца, кала мэ рисявава тирэ копылести, мурэ дадэстэ, тай сар муро дад, саво кади прыпхангло кадэлэстэ чяворэстэ, 31 удыххэла, со лэ амэнца нинай, вов мэрэла. Тирэ копыли злиджяна грыжага парно шэро амарэ дадэхкиро дэ мулэндири люмля. (Sheol h7585) 32 Тиро копыли дэня лав англа дад, со фирисарава чяворэ. Мэ пхэндом: «Сар мэ на анава лэ тутэ, дош англа тутэ, дадэ, всаворо джювимом авэла пэ ман». 33 Кана, мангав тут, дэ тирэсти копылести тэ ачепэ катэ копылега мурэ раехкирэ пала чяворэ, тай дэ чяворэсти тэ рисявэ пхралэнца. 34 Сар мэ рисявава дадэстэ, сар чяворэ манца на авэла? Тэ на удыххав грыжа мурэ дадэхкири!

45 Тунчи Иосифо на галювэлэс будэр тэ рицарэпэ англа копыли тай затиписиля: — Уджян всаворэ мандар! — тай ника на сля Иосифога, кала вов оттердапэ пхралэнди. 2 Вов кади зоралэ заровина, со ушундэ египтянуря, тай дума пала када доджиля фараоностэ. 3 Иосифо пхэнда пхралэнди: — Мэ — Иосифо! Джюдо инте муро дад? Пхрала нисо на галёнас тэ пхэнэ, пала када со вонэ сле пэрэдараудэ. 4 Тунчи Иосифо пхэнда пхралэнди: — Поджян мандэ. Тай кала вонэ поджиле, вов пхэнда: — Мэ — тумаро пхрал Иосифо, савэ тумэ битиндэ дэ Египто! 5 На даран тай на дошальэрэн будэр пэ пала кода, со битиндэ

ман кордэ: када Дэвэл бичялда ман англа тумэндэ, соб тэ фирисарэ тумаро джювимо. 6 Дуй бэрш, сар пэ пхув бокх, тай инте панч бэрша на авэна тэ чинэ пхув тай тэ стидэ ворзо. 7 Дэвэл бичялда ман англа тумэн, соб тэ фирисарэ тумаро родо пэ пхув тай тэ терэл баро фирисаримо тумаря джювимати. 8 Акэ, на тумэ бичялдэ ман кордэ, ай Дэвэл: Вов тховда ман тэ авав фараоности, сар дад, раега пэ всаворо лэхкиро цэр тай тэ авав хулай пэ всаворо Египто. 9 Сигидэр рисявэн мурэстэ дадэстэ тай пхэнэн лэсти: Акэ со пхэнэл тиро чяво Иосифо: «Дэвэл стерда ман хулаега дэ всаворо Египто. Ав мандэ, на цырдэ вряма. 10 Ту авэга тэ джювэ дэ пхув Гошэно тай авэга паша ман: ту, тай тирэ чяворэ, тай внукуря, тай тиро баро тай хурдо ското, тай вса, со тутэ исин. 11 Котэ мэ авава тэ дыкхэ пала тут, ай сар на кади, ту тай тиро цэр, тай вса, ко тутэ, авэна дэ чёрымо. Кади сар джан инте панч бокхалэ бэрша». 12 Тумэ дыкхэн тумарэнца якхэнца, тумэ тай муро пхрал Вениамино, со чяче када мэ дэдумав тумэнца. 13 Роспхэнэн мурэ дадэсти пала када, со тумэ дыкхле, тай пала када, сар мэ ашардо дэ Египто. Тай сигидэр анэн лэ кордэ. 14 Вов обилия пэхкирэ пхралэ Вениамино тай заровиня, тай Вениамино ровэлас тай облэлас лэ. 15 Вов чюминда всаворэн пхралэн тай ясвэнца обилия лэн. Тунчи пхрала дэдумане лэга. 16 Дума пала кода, со авиле пхрала Иосифохкирэ, доджия фараоностэ. Фараоно ачия лошало, тай кадиж лэхкирэ рая. 17 Фараоно пхэнда Иосифости: — Пхэн пхралэнди: «Терэн акэ со: тховэн гонэ хамага пэ тумарэ магаря, рисявэн дэ Ханаанско пхув 18 тай анэн мандэ дадэ тай тумарэ їря. Мэ дава тумэнди фэдэдэр пхув дэ Египто, тай тумэ авэна тэ ха вса, со фэдэр, со дэла кадэя пхув. 19 Инте прыпхэнав тути тэ пхэнэ лэнди: «Стерэн акэ со: лэн Египтостар вурдона важ тумарэн чяворэн тай ромнен, анэн дадэ тай авэн екджинэ. 20 Тэ на авэл дор тумэнди пала када, со ачявдэ тумаро барвалимо, пала када со вса, со исин фэдэдэр дэ Египто, авэла тумаро». 21 Чявэ Израилёхкирэ кади и стердэ. Сар прыпхэнда фараоно, Иосифо дэня лэнди вурдона тай хамо дэ дром. 22 Кажнонэсти вов дэня нэви їда, ай Вениаминости вов дэня трин шэла шэкеля рупь тай панч їды. 23 Дадэсти вов бичялда дэш магарен фэдэдэряга барвалимага, саво сля дэ Египто, тай дэш магарницен ворзога, мандрэга тай авря хамага дэ дром. 24 Тунчи вов отмуля пхралэн, тай кала вонэ уджянас, пхэнда лэнди: — Ни пала со на пэрэджовэн дэ дром! 25 Вонэ джиле дэ дром Египтостар, авиле пэхкирэстэ

дадэстэ Иаковостэ дэ пхув Ханаано 26 тай пхэндэ лэсти: — Иосифо джюдо! Иосифо — хулай пэ всаворо Египто! Иаковостэ замуля їло, тай вов на патиля лэнди. 27 Нэ кала вонэ пэрэдэне лэсти вса, со пхэнда Иосифо, тай кала вов удыхкля вурдона, савэ Иосифо бичялда, соб тэ пэрэлиджя лэ, їло Иаковохкиро одджюндиля. 28 Тай Израилё пхэнда: — Хутилэла! Муро чяво Иосифо джюдо. Джява тай дыкхава лэ, покы на мулём.

46 Израилё джиля дэ дром всаворэга, со сля лэстэ, авиля дэ Вирсавия тай анда котэ жэрта Дэвлэсти пэхкирэ дадэхкирэ Исаакохкирэ. 2 Дэвэл дэдуманя Израилёга дэ ратякуро сунэ тай пхэнда: — Иаково! Иаково! — Акэ мэ, — пхэнда Иаково. 3 Вов пхэнда: — Мэ — Дэвэл тирэ дадэхкиро. На дар тэ джя дэ Египто. Котэ Мэ стеравя тутар баро народо! 4 Мэ джява дэ Египто екхтанэ туга, тай Мэ анава тут павпалэ. Тай Иосифохкиро васт затерэла тути якха. 5 Иаково джиля дэ дром Вирсавиятар. Израилёхкирэ чявэ тховдэ дадэ, чяворэн тай ромнен дэ вурдона, савэ прыбичялда фараоно, соб тэ пэрэлиджя лэ. 6 Вонэ лиле пэга ското тай барвалимо, саво затердэ дэ Ханаано, тай Иаково всаворэнца пэхкирэнца авиля дэ Египто. 7 Вов лиля пэга дэ Египто чявэн тай внуконэн, чеен тай внучконэн — всаворо пэхкиро родо. 8 Акэ Иаковохкирэ чявэндирэ лава, савэ авиле дэ Египто, Иаково тай лэхкирэ потомкуря. Рувимо, пхурэдэр Иаковохкиро чяво. 9 Рувимохкирэ чявэ: Енохо, Паллу, Хецоно тай Кармиё. 10 Симеонохкирэ чявэ: Емуэло, Ямино, Охадэ, Яхино, Цохаро тай Сауло, ханаанеянкатино чяво. 11 Левиёхкирэ чявэ: Гершоно, Кехато тай Мерарийё. 12 Иудахкирэ чявэ: Эро, Онано, Шэла, Парецэ тай Зерахо. Эро тай Онано муле дэ Ханаано. Парецохкирэ чявэ сле Хецоно тай Хамуло. 13 Иссахарохкирэ чявэ: Тола, Пува, Иово тай Шымроно. 14 Завулонохкирэ чявэ: Середэ, Элоно тай Яхлезло. 15 Када Лиятирэ чявэ, савэн вой бэянда Иаковости дэ Паддано-Арамо. Вой бэянда инте чя Дина. Всаворэн лэн сля трянда трин мануша. 16 Гадохкирэ чявэ: Цыфионо, Хагиё, Шунийё, Эцбоно, Эриё, Ародийё тай Арелиё. 17 Асирохкирэ чявэ: Имна, Ишва, Ишвиё тай Берия. Лэндири пхэнь Серах. Чявэ Берийёхкирэ: Хеверэ тай Малкиэло. 18 Када чяворэ, савэн бэянда Иаковости Зелфа, ла Лавано дэня пэхкирати чяти Лияти, всаворэн дэшушов манушэн. 19 Чявэ Иаковохкирэ ромня, Рахилиятирэ: Иосифо тай Вениамино. 20 Дэ Египто Аснат, чей Потиперахкири,

саво сля рашаи дэ форо Оно, бзянда Иосифости Манассиё тай Ефремо. 21 Вениаминохкирэ чявэ: Бела, Бехеро, Ашбело, Гера, Наамано, Эхиё, Рошо, Муппимо, Хуппимо тай Ардо. 22 Када Рахилитирэ чявэ, савэн вой бзянда Иаковости; всаворэн дэшуштар манушэн. 23 Данохкиро чяво: Хушымо. 24 Неффалимохкирэ чявэ: Яхцээло, Гуниё, Ецэро тай Шыллемо. 25 Када чявэ, савэ Валла бзянда Иаковости. Лавано дэня ла Рахилияти, пэхкирати чяти. Всаворэн ефта манушэнэн. 26 Всаворэ, ко авилия дэ Египто Иаковога, лэхкирэ потомкуря, — шов дэша шов мануша; чявэндирэ ромня катэ на бинэнпэ. 27 Чявэ Иосифохкирэ, савэ бзяндэлэ лэстэ дэ Египто, сля дуй. Всаворо їри Иаковохкиро, савэ авиле дэ Египто, сля ефта дэша манушэн. 28 Иаково бичялда англа пэстэ Иосифостэ Иуда, соб тэ уджянэ дром дэ Гошэно. Кала вонэ авиле пордэ, 29 Иосифо залытирда вурдон тай лагя дэ Гошэно, соб тэ прылэ пэхкирэ дадэ Израилё. Вов ачиля англа лэстэ, обилия лэ тай зоралэ ровэлас. 30 Израилё пхэнда Иосифости: — Кана мэ галував и тэ мэрэ, пала када со удэххлём пэхкирэнца яххэнца, со ту джюдо. 31 Иосифо пхэнда пэхкирэнди пхралэнди тай дадэхкирэнди цэрутнэнди: — Мэ джява фараоностэ тай пхэнава лэсти: «Мурэ пхрала тай дадэхкиро цэр, савэ джюдэ дэ пхув Ханаанско, авиле мандэ. 32 Кадэла мануша — чябануря, вонэ розлиджан ското тай андэ пэга пэхкирэ гуртуря, тай андэ вса пэхкиро барвалимо». 33 Кала фараоно व्याхарэла тумэн тай пхучла: «Сога тумэ залэнпэ?» — 34 тумэ пхэнэн: «Амэ, тирэ копыли, чяворэндиратар вряматар тай дыкалэ розлиджях ското, сар терэнас и амарэ дада». Тунчи тумэнди дэна тэ тержэвэ дэ пхув Гошэно, пала када со египтянонэнди чябануря гряца.

47 Иосифо джиля фараоностэ тай пхэнда лэсти: — Муро дад тай пхрала пэхкирэнца гуртонэнца, баро тай хурдо ското, и вса, со лэстэ сля, авиле Ханааностар, тай екхатар вонэ дэ Гошэно. 2 Вов вылиля панч пхралэн тай авилия лэнца фараоностэ. 3 Фараоно пхучля пхралэн: — Сога тумэ залэнпэ? Вонэ пхэндэ фараоности: — Тирэ копыли — чябануря, кади и амарэ дада. — 4 Инте вонэ пхэндэ: — Амэ авиле кордэ тэ джювэ, пала када со дэ пхув Ханаано бари бокх, тай тирэнди копыленди нинай, тев тэ чяравэ гуртуря. Пала када дэ тирэнди копыленди тэ джювэ дэ Гошэно. 5 Фараоно пхэнда Иосифости: — Тиро дад тай пхрала авиле тутэ. 6 Пхув Египто англа

тутэ. Дэ лэнди тэ джювэ дэ фэдэдэр тхан пэ кадэя пхув. Мэк джювэн дэ Гошэно. Ай сар ту джянэх машкар лэндэ лаче бутярнэ, тхов лэн тэ дэххэ пала муро ското. 7 Иосифо анда пэхкирэ дадэ Иаково тай тховда лэ англа фараоно, тай Иаково бахталисарда фараоно. 8 Фараоно пхучля лэ: — Скацик тути бэрш? 9 Иаково пхэнда фараоности: — Мэ 130 бэрш пхирав пав пхув. Набарэ тай киркэ сле бэрша муря джювиммахкирэ, тай лэн сля на кади, сар дадэндирэ бэрша джювиммахкирэ. 10 Иаково бахталисардо фараоно тай джиля лэхкиро цэр. 11 Сар прыпхэнда фараоно, Иосифо чюта тэ джювэ дадэ тай пхралэн дэ Египто тай отдэня лэнди фэдэдэр котор пхув надур Раамсесостар. 12 Иосифо анда бут хамо дадэсти, пхралэнди тай всаворэнди, ко сля дэ цэр дадэхкиро. 13 Тунчи нитев на ачиля хамо, пала када со сля зорали бокх дэ Египто тай Ханаано. 14 Иосифо битинэлас мандро пала рупь, тай кади стидэня дэ фараонохкиро цэр всавори рупь, сави сля дэ Египто и дэ Ханаано. 15 Кала ни дэ Египто, ни дэ Ханаано на ачилепэ рупь, всаворэ египтянуря авиле Иосифостэ тай пхэндэ: — Дэ амэнди мандро. Пэ со амэнди тэ мэрэ тутэ пэ яххэн? Нэ рупь амэндэ будэр на ачиляпэ. 16 Иосифо пхэнда: — Сар тумэндэ нинай будэр рупь, анэн тумаро ското, тай мэ парувава мандро пэ ското. 17 Вонэ андэ Иосифости ското, тай вов парувэлас лэнди мандро пэ грастэн, бакрэн тай бузнен, гурувэн, гурувнен тай магарен. Дэ кодэва бэрш вов парувэлас лэнди мандро пэ ското. 18 Проджиля екх бэрш. Пэ дуйто бэрш вонэ авиле лэстэ тай пхэндэ: — Амэ на авага тэ гаравэ тутар, амаро рай, со ловэн амэндэ нинай, тай амаро ското кана тиро. Кади со амэндэ нисо на ачиляпэ важ амаро раестэ, кацик амэ тай пхув амари. 19 Пэ со амэнди тэ мэрэ тутэ пэ яххэн, амэнди тай амаряти пхуяти? Тин амэн тай амари пхув, парув пэ мандро, ай амэ тай амари пхув авага дэ копылен фараоностэ. Дэ амэнди самбуря, соб амэнди тэ джювэ тай на тэ мэрэ, тай соб кадэя пхув тэ на авэл шушы. 20 Кади Иосифо тинда всавори пхув дэ Египто важ фараоно. Египтянуря битиндэ кажно пэхкири маля, пала када со бокх сля бари. Пхув ачиля фараонохкири, 21 ай манушэн Иосифо стерда копыленца екха ригатар дэ Египто ды авря. 22 Вов на тинда кацик пхув рашаендири, пала када со ловэ, савэ дэня лэнди фараоно, лэнди хутилэнас пэ хама, акэ сости вонэ на битиндэ пэхкири пхув. 23 Иосифо пхэнда манушэнди: — Кана, кала мэ тиндом тумэн тай тумари пхув важ фараоно, акэ

тумэнди самбурия, соб тэ чювэ лэн дэ пхув. 24 Кала выбарёла ворзо, отдэн панчто котор фараоности, ай авэр штар котора авэна тумэнди пэ самбурия важ мален тай соб тэ хан тумэ, соб тэ хан тумэ, тумарэ цэрутнэ тай чяворэ. 25 Вонэ пхэндэ: — Ту фирисардан амэнди джовимо. Тэ аракхах амэ лачимо дэ яххэн амарэ раехкирэ. Кана амэ авага фараонохкирэнца копыленца. 26 Кади Иосифо дэня законо дэ Египто, саво и екхатар дэ зора: панчто котор ворзостар авэла фараонохкирэ. Кацик рашаендири пхув на ачиля фараонохкиряга. 27 Израильянурия джодэ дэ Египто, дэ пхув Гошэно. Котэ лэндэ сле цэра тай бэяндэнаспэ бут чяворэн. 28 Иаково проджюда дэ Египто дэшуефта бэрша. Всаворо лэхкиро джовимо сля шэл саранда ефта бэрша. 29 Кала авиля лэхкири вряма тэ мэрэ, вов акхарда пэхкирэ чявэ Иосифо тай пхэнда лэсти: — Сар мэ араклём лачимо дэ тирэн яххэн, тхов васт манди тала шолдо тай дэ лав, со сикавэга манди мила тай чячимо. На гарав ман дэ Египто. 30 Кала мэ сджява мурэндэ дадэндэ, вылиджя ман Египтостар тай гарав котэ, тев вонэ сле гаравдэ. Иосифо пхэнда: — Мэ терава кади, сар ту пхэнэх. 31 — Дэ солах, — пхэнда вов. Иосифо дэня солах лэсти. Израилё смукляпэ пэ пэхкиро дэсто тай тэлиля Дэвлэсти.

48 Проджиля савись вряма, тай Иосифости пхэндэ: — Тиро дад насвало. Иосифо лиля пэга дуен чявэн Манассиё тай Ефремо. 2 Иаковости пхэндэ: — Тутэ авиля тиро чяво, Иосифо. Израилё стидэнпэ зорага, привциля тай бэшла пэ пато. 3 Иаково пхэнда Иосифости: — Дэвэл Всазороко сикавдалэ манди дэ Лузо, дэ пхув Ханаано, тай бахталисарда ман. 4 Вов пхэнда: «Мэ терава, со тутэ авэла бут чяворэн, со тутар джяна бут народуря, ай кадэя пхув Мэ дава пэ всавори вряма тирэнди чяворэнди». 5 Кана дуй тирэ чяворэ, савэ бэяндэлэ дэ Египто, дыкалэ сар авилём мэ катэ, вонэ авэна мурэнца. Ефремо тай Манассиё авэна мурэнца, сар Рувимо тай Симеоно. 6 Ай чяворэ, савэ бэяндэлэ тутэ инте, авэна тирэ. Вонэ акхарэнапэ пхралэндирэнца лавэнца и лэна пэхкирэ котора лэндириятар пхуятар. 7 Кала мэ рисявавас Падданостар, Рахиль муля дэ пхув Ханаано, кала амэ инте сле дэ дром, надур Эфрататар. Мэ гаравдом ла котэ, пашэ дром дэ Эфрата (када исин Вифлеемо). 8 Кала Израилё удыххля Иосифохкирэн чявэн, вов пхучля: — Ко када? 9 Иосифо пхэнда дадэсти: — Када чявэ, савэн Дэвэл дэня манди катэ. Тай кодэва пхэнда:

— Подлиджя лэн мандэ, соб мэ тэ бахталисарав лэн. 10 Пхуриматар Израилё врыто дыкхэлэс, вов сля, сар коро. Иосифо подлиджялда чявэн пашэдэр пэхкирэстэ дадэстэ, тай кодэва чюминда тай обилиля лэн. 11 Израилё пхэнда Иосифости: — Мэ на думасаравас упалэ тэ удыххэ тут, ай Дэвэл дэня тэ удыххэ манди и тирэн чяворэн. 12 Иосифо отлиджялда лэн Израилёхкирэндар чянгэндар тай тэлиля лэсти ды пхув. 13 Иосифо тховда Ефремо дэ чячюни риг пэстар тай дэ зэрво риг Израилёстар, ай Манассиё дэ зэрво риг пэстар тай дэ чячюни риг Израилёстар, тай подлиджялда лэн пашэдэр дадэстэ. 14 Нэ Израилё процырдэ чячэ васт тай тховда ла пэ Ефремохкиро шэро, ай вов сля цыкнэдэр, тай зэрво васт вов тховда пэ Манассиёхкиро шэро, ай Манассиё сля пхурэдэр чяво. 15 Тунчи вов бахталисарда Иосифо тай пхэнда: — Дэвэл, англа Кастэ пхирэнас мурэ дада Авраамо тай Исаако, Дэвэл, Саво сля чябано важ манди всаворо муро джовимо, 16 Ангело, Саво фирисарэлэс ман всаворятар врытиматар, — тэ бахталисарэл кадэлэн чяворэн. Мэк вонэ пхирявэн муро лав тай лава мурэн дадэн Авраамохкиро тай Исаакохкиро, тай мэк лэндирэн чяворэн авэла будэр пэ пхув. 17 Кала Иосифо удыххля, со дад тховда чячэ васт пэ Ефремохкиро шэро, када на чялиля лэсти. Вов лиля дадэ пала васт, соб пэрэтховэ ла Ефремохкирэстар шэрэстар пэ Манассиёхкиро шэро. 18 Иосифо пхэнда лэсти: — Нат, дадэ, акэ кадэва — пхурэдэр, тхов чячэ васт пэ лэхкиро шэро. 19 Ай дад на закамля тай пхэнда: — Мэ джянав, муро чяво, джянав. Лэстар кадиж джяла народо, тай и вов авэла баро мануш. Нэ лэхкиро цыкнэдэр пхрал авэла барэдэр лэстар, тай лэхкирэндар чяворэндар джяна бут народуря. 20 Тай вов бахталисарда лэн дэ кодэва диво тай пхэнда: — Израилё авэна тэ пропхэнэ тумарэ лава, сар бахталисаримо, пхэнэна: «Дэвэл тэ стерэла тут, сар Ефремо тай Манассиё». Кади вов тховда Ефремо англэ Манассиё. 21 Израилё пхэнда Иосифости: — Мэ мэрав, нэ Дэвэл авэла тумэнца тай рисарэла тумэн дэ дадэндири пхув. 22 Мэ дав тутти барэдэр котор пхув, сар тирэнди пхралэнди, додав тутти котор пхув плаенца, саво мэ чюряга тай лукога отмардом амореендэ.

49 Иаково акхарда пэхкирэн чявэн тай пхэнда: — Стидэнпэ паша ман, тай мэ распхэнава тумэнди, со авэла тумэнца дурэдэр. 2 Стидэнпэ тай шунэн, Иаковохкирэ чявэ, шунэн пэхкирэ дадэ Израилё. 3 Рувимо, ту — муро пхурэдэр, мюри

зор, англуну плодо муря муршакуня зоратиرو, англуну пай патив, англуну пай зор. 4 Парувэхлэ ту, сар пани, будэр ту на авзга пхурэдэрэга чявэга, пала када со сутан пэ тиро дадэхкиро тхан, мусардан муро пато. 5 Симеоно тай Левиё — пхрала, лэндирэ чюря анэн мижымо. 6 Тэ на авэл муро їло лэнца дэ када, пала со вонэ думисарэн, тэ на авав, тев вонэ стидэнпэ Вонэ дэ холя умардэ муршэн, сар закамле, чиндэ гурувэн. 7 Прыдав мрая лэндири холи, пала када со фартэ сле холяти, фартэ зорали лэндири холи! Мэ рознювава лэн машкар Иаковохкирэ чяворэ, рознювава лэн машкар Израилёхкирэ чяворэ. 8 Иуда, тирэ пхрала ашарэна тут, тиро васт авэла пэ кор тирэн врыжымашонэн, тирэ дадэхкирэ чявэ авэна тэ тэлэн тут. 9 Ту — тэрно лево, Иуда, ту рисарэгапэ астаримага, муро чяво. Сар лево, вов прыпэрэл пхуятэ, сар львица, вов пэрэл, ко камэл ла тэ здаравэ? 10 Дэсто тхагаримахкиро на уджяла Иудастар, лэхкирэ потомкуря всавори вряма авэна тэ рицарэ тхагаримо. Ай тунчи авэла Шыло, тай лэсти тэлэна всаворэ народуря. 11 Вов прыпхэндэла пэхкирэ магаре дэ дракохкири лоза, тэрнэ магаре — дэ фэдэдэр дракохкири лоза. Вов халавэла пэхкири їда дэ мол, пэхкиро урявимо — дэ дракохкиро рат. 12 Лэхкирэ якха авэна калэдэр молэстар, данда лэхкирэ — парнэдэр тхудэстар. 13 Завулоно авэла тэ джювэ пашэ баро пани, барэ корабли заджяна дэ лэ. Лэхкири пхув процырделалэ ды Сидоно. 14 Иссахаро — састо магари, вов пашлёл машкар дуй пхарэ гонэ, савэ пхиравэн джювимо. 15 Кала дыкхля, сар лачё лэхкиро отцынимахкиро тхан тай сави лачи лэхкири пхув, вов прыцырдэла пэхкирэ пхикэ тала пхаримо тай отдэлалэ пхаря бутяти. 16 Дано сундисарэла пэхкиро народо, сар екх Израилёхкирятар породатар. 17 Дано авэла сапэга паша дром, сар сап, саво лиджял мэrimo пэ сано дром, саво дандярэл грастэ пала пуру, кади со кодэва, саво бэшэл англистэ, пэрэл пэ пхув. 18 О РАЁ, Тутар ажутярав фирисаримо! 19 Гадо авэна тэ обчёрэ, нэ вов даравэла лэн павпалэ. 20 Асиростэ авэла скаминд замардо барваляга хамага, вов авэла тэ дэ лачё хамо, саво хан тхагара. 21 Неффалимо — сар лань, сави прастэл пав мален, сави анэл райканэн чяворэн. 22 Иосифо — дракохкири рандь, сави анэл бут плодо. Вой барёл пашэ лэнь тай ваздэлпэ упрэ пэ ванта. 23 Холяга хукэнас пэ лэстэ лучникуря, зорага марэнас дэ лэстэ. 24 Нэ лэхкиро луко ачильяпэ састо. Зор лэхкирэ вастэндиро — зорало Дэвэл Иаковохкиро,

Лав Чябанохкиро, Бар Израилёхкиро. 25 Дэвэл тирэ дадэхкиро, Всазорако, Саво дэл зор тут. Вов бичялэл бахталисаримо упрал, болыбнатар, тай бахталисаримо, саво тала пхув, бахталисарэл чючя тай вода. 26 Тирэ дадэхкирэ бахталисаримо барыдэр, сар бахталисаримо пуранэн плаен, сар бахталисаримо пуранэн упралимахкирэн плаен. Тэ авэн всаворэ вонэ пэ Иосифохкиро шэро, пэ чекат тхагарехкиро машкар пэхкирэн пхралэн. 27 Вениамино — бокхало рув; дэнзор вов схал астаримо, бельвеляга розлэл кодэва мищимо. 28 Акэ савэ дэшууду Израилёхкирэ родуря, тай акэ со пхэндэ лэнди дад, лэндиро бахталисаримо; кажнонэсти вов дэня пэхкиро бахталисаримо. 29 Тунчи Иаково прыпхэндэ лэнди: — Мэ отджяв мурэндэ дадэндэ. Гаравэн ман пашэ мурэн дадэн дэ пищера пэ маля Эфронохкиря хеттеёхкиря, 30 дэ пищера пэ маля Махпела пашэ Мамрега дэ Ханаано, сави Авраамо тинда, сар тхан, тев тэ гаравэ Эфроностэ хеттеёстэ екхтханэ маляга. 31 Котэ сле гаравдэ Авраамо тай лэхкири ромни Сарра, котэ гаравдэ Исаако тай лэхкири ромни Ревека, тай котэ мэ гаравдом Лия. 32 Маля тай пищера сле тиндэ хеттеянэндэ. 33 Иаково пэрэачилия тэ дэдүмэ чявэнди, подлила пурэ пэ пато, вымукля фано тай отджилия пэхкирэндэ дадэндэ.

50 Иосифо авилия дадэстэ, ровиня тай чюминда лэ. 2 Вов прыпхэндэ пэхкирэнди копыленди — састимаренди тэ макхэ дадэхкиро трупэ бальзамога, тай састимари тердэ кади. 3 Лэндэ джиля пэ када саранда дивэса, сар када сля трэбуня. Тай ефта дэша дивэса египтянуря ровэнас пала лэ. 4 Кала проджиле ровимахкирэ дивэса, Иосифо пхэндэ фараонохкиренди бутярнэнди: — Сар мэ араххлём лачимо дэ тумарэн якхэн, помангэн пала ман фараоно тай пхэнэн лэсти: 5 «Муро дад прыпхэндэ манди тэ дэ солах и пхэндэ: "Мэ мэрав. Гарав ман дэ тхан, со мэ стердом дыкалэ пэсти дэ пхув Ханаано". Дэ манди тэ джя и тэ гаравэ мурэ дадэ. Сар мэ терава када, рисявава». 6 Фараоно пхэндэ: — Джя тай гарав дадэ кади, сар ту дэнян солах тэ стерэ. 7 Иосифо джиля тэ гаравэ дадэ, тай лэга джиле всаворэ фараонохкирэ бутярнэ, тай лэхкирэ цэрэхкирэ пхурэдэра, тай всаворэ Египтохкирэ пхурэдэра, 8 тай всаворо Иосифохкиро цэр, тай лэхкирэ пхрала, тай всаворо дадэхкиро цэр. Кацик лэндирэ чяворэ тай гуртуря, баро тай хурдо ското ачилепе дэ Гошэно. 9 Пролиджянас лэн вурдона

тай англистаря. Котэ сля бут манушэн. 10 Вонэ авиле дэ Горен-Атадо, када пала Иордано, тай котэ ачиле зоралэс тэ ровэ. Котэ Иосифо ровэлас пала дадэ ефта дивэса. 11 Кала ханаанея, савэ джувэнас дэ кодэя пхув, удыхкле ровимо паша Горен-Атадо, вонэ пхэндэ: «Египтянонэндэ баро ровимо тай глаба». Акэ сости кодэва тхан пала Иордано акхарэлпэ Авел-Мицраим. 12 Кади чявэ Иаковохкирэ стердэ лэхкиро прыпхэндимо: 13 вонэ отлиджялдэ лэ дэ Ханаанско пхув тай гаравдэ дэ пищера пэ маля Махпела, пашэ Мамрега. Кадэя пищера Авраамо тинда Эфроностэ хеттеёстэ екхтханэ маляга, соб тэ авэл лэстэ тхан, тев тэ гаравэ. 14 Кала гаравдэ дадэ, Иосифо рисия дэ Египто, екхтханэ пхралэнца тай всаворэнца, ко пхирэлас лэнца. 15 Кала дад муля, Иосифохкирэ пхрала думисардэ: «Со, сар Иосифо рицарэл пэ амэн холи тай кана отпотинэла амэнди пала всаворо врытимо, саво амэ лэсти андэ?» 16 Тай вонэ бичялдэ Иосифостэ тэ пхэнэ: — Англа када, сар тэ мэрэ, дад пхэнда амэнди: 17 «Акэ со пхэнэнти тумарэсти пхралэсти Иосифости: «Мэ мангав тут тэ на рицарэх холи пэ тирэн пхралэн, бистар лэндиро бээх тай дош, сави вонэ стердэ, кала стердэ кадэва налачё рындо». Тай кана, амэ мангах тут, эртисар амэнди амарэ бээха, амэ жэ Дэвлэхкирэ копыли, савэсти тэлёлас тиро дад». Кала Иосифо шунда када, вов заровиня. 18 Лэхкирэ пхрала авиле, тэлэдэне пэ пхув англа лэстэ тай пхэндэ: — Амэ — тирэ копыли. 19 Иосифо пхэнда: — На даран. Мэ со, Дэвэл? 20 Тумэ закамле манди врытимо, нэ Дэвэл порисарда лэ дэ лачимо, соб тэ терэ када, со выдзял екхатар: фирисаримо бутэндиро. 21 Пала када на даранти: мэ пропарварава и тумэн, и тумарэн чяворэн. Вов мишто дэдуманя лэнца, тай лэндири дар улиля. 22 Иосифо джюда дэ Египто екхтханэ дадэхкиряга їряга. Вов проджюда шэл дэша бэрш. 23 Вов удыхкля инте трито поколение Ефремохкирэн чяворэн. Тай кала бэяндэпэ Махиростэ чяворэ, Манассиёхкирэ чявэ, вов дыкхля лэн тай рицарэлас лэн пэ чянгэн. 24 Иосифо пхэнда пхралэнди: — Мэ мэрав, нэ Дэвэл чяче авэла тумэндэ, дэла зор тай вылиджяла тумэн кадэлатар пхуятар дэ пхув, сави Вов солахага пхэнда тэ дэ Авраамоности, Исаакости тай Иаковости. 25 Иосифо пхэнда Израилёхкирэнди чявэнди тэ дэ солах: — Дэвэл чяче авэла тумэндэ тай дэла зор. Тунчи тумэ вылиджянти катар мурэ кокали. 26 Иосифо муля, кала лэсти сля шэл дэша бэрш. Лэ макхле бальзамога тай тховдэ дэ гробо дэ Египто.

Руфь

1 Калась, ды вряма сундисарэн, ды пхув Иудея авиля бокх, тай екх мануш Вифлеемостар екхтанэ ромняга тай донца чывэнца пэрэлагля ды пхув Моаво. **2** Кадылэ манушэ акхарэнас Элимелехо, лэхкиря джювля — Нооми, а дон лэхкирэн чывэн — Махлоно тай Килионо. Вонэ джювэнас ды Эфрато пашэ ды Вифлеемо, со ды Иудея. Вонэ авиле ды пхув Моаво тай ачилепэ котэ. **3** Элимелехо, мурш Нооми, муля, тай вой ачиплэ донца чывэнца. **4** Вонэ лиле пэсти джювлен моавитянкен; екха акхарэнас Орпа, авря — Руфь. Вонэ проджюдэ котэ паша дэш бэрш, **5** тай тунчи Махлоно тай Килионо кади ж муле. Нооми пэрэджюда дон чывэн тай пэххэрэ муршэ. **6** Кала Нооми уджянгля ды Моаво, со РАЙ срапирда пала пэхкирэн манушэн тай дыня лэнди хамо, вой закамля тэ рисявэ пхуятар Моаво ды пэхкири пхув, тай лага скамле тэ джя дуй латирэ боря. **7** Нооми ачявда тхан, тев джюда, тай лакирэ боря джиле лага. Вонэ джиле ды дром павпалэ ды пхув Иудея. **8** Нооми пхэнда пэхкирэнди дуенди боренди: — Рисявэн цэрэ, дэ тумарэн чяче їрен! Мэк РАЙ дэл тумэнди лачимо, сар и тумэ дэнас лачимо пэхкирэ мулэнди муршэнди тай манди. **9** Тэ дэл РАЙ тумэнди тэ аракхэн бахт ды цэр нэвэ муршэга. Вой чюминдэня лэн, нэ вонэ фартэ подлиле гвалто тай заровине. **10** Тай пхэндэ: — Амэ джяга туга, тирэ манушэндэ. **11** Нооми пхэнда: — Чея, рисявэн павпалэ. Пэ со тумэнди тэ джя манца? Чи авэна мандэ инте чявэ, соб тэ авэн тумэнди муршэнца? **12** Рисявэн, чея мурэ, мэ фартэ пурани, соб тэ выджя пала ром. Тэ думисаравас бы мэ кади: «Мандэ исин надежда!», тэ пэрэрятаравас бы мэ кадья рят ромэга тай тэ быяндэнпэ бы чявэ, **13** со калэстар? Тумэнди тэ дожутярэ, кала вонэ выбарёна? Со калэстар, тэ ачепэ тумэнди на пала ром?! На трэбуни, чея. Мурэ джювимо фартэ кырко, мэ фартэ пала тумэн пэрэджював. РАЙ счюта пы ман пэхкири холи. **14** Вонэ упалэ подлиле гвалто тай заровине. Орпа чюминдэня пэхкиря сасуя тай джиля, а Руфь отпхэндалэ тэ уджя. **15** Нооми пхэнда: — Дыхх, тири ятровка рисявэл пэхкирэ манушэндэ тай пэхкирэ дэвлэндэ. Джя и ту лага. **16** Нэ Руфь пхэнда: — На манг ман тэ ачявав тут тай тэ рисяв. Мэ джява пордэ, тев ту джях, тай ачявалэ котэ, тев ту ачехпэ; тирэ мануша авэна мурэ манушэнца, тиро Дэвэл — муро Дэвэл. **17** Тев мэрэга ту, котэ и мэ мэрава, тай

котэ мэк ман гаравэна. Тэ помарэл ман РАЙ, какич мэримо розачявэла амэн! **18** Нооми полиля, со Руфь всаекх джяла лага тай пэрэачилия тэ мангэ ла тэ уджял. **19** Вонэ джиле дуйджинэ ды Вифлеемо. Кала вонэ авиле, ды форо подлиляпэ баро гвалто: — Када со, Нооми?! — типисявэнас джювля. **20** Нооми пхэнэлэс лэнди: — На акхарэн ман будэр Нооми, ай акхарэн Мара, колэсти со Всазорако бичялда манди беда! **21** Кала мэ уджявас, мандэ сля вса, нэ РАЙ рисарда ман павпалэ нисога. Пэ со тумэ акхарэн ман Нооми? РАЙ сундисарда ман, Всазорако бичялда манди бибахталимо. **22** Кади рисардалэ пхуятар Моаво Нооми тай лага латири бори моавитянка Руфь. Кала вонэ авиле ды Вифлеемо, ачиле тэ стидэ ячменё.

2 Муршэстэ Нооми сля родо пав лавэ Боазо, мануш пативало, колэстар родостар, со и Элимелехо. **2** Моавитянка Руфь пхэнда Нооми: — Мук ман тэ джя ды маля тэ стидэ ворзо, саво тэлэдыня, котэ, тев манди сикавэна мищимо. Нооми пхэнда: — Джя, чей мури. **3** Руфь джиля пы маля, тев стидэнас ворзо, тай ачилия тэ подлэ кода, со тэлэдэлэс пы пхув. Тай ачилия кади, со кодыя маля сля маля Боазохкири, саво сля родо Элимелехости. **4** Дэ кадыва диво еджино Боазо авиля пордэ Вифлеемостар. — РАЙ тумэнца! — пхэнда вов бутярнэнди. — Тэ авэх бахтало РАЕСТАР! — пхэндэ вонэ лэсти. **5** Боазо пхучля пхурэдэрэ бутярнэстар: — Кахири када чей, кадья тэрни джювли? **6** Пхурэдэр бутярно пхэнда: — Када моавитянка, сави Нооми анда пхуятар Моаво. **7** Вой пхучля: «Мукэга ман тэ стидэ ворзо, саво тэлэдыня». Авиля дэнзор тай ачиплэ вой катэ, тай на прыбэшля тэ отцинявэ. **8** Тунчи Боазо пхэнда Руфяти: — Чей мури, пошун. На джя тэ стидэ ворзо пэ авэр маля, на уджя катар, нэ рицарпэ пашэ мурэ бутярнэндэ. **9** Дыхх, тев тирэн бутярнэ, тай джя пав шпэра бутярнен. Мэ прыпхэндом пэхкирэ манушэнди тэ на холярэн тут. Кала скамэга тэ пэ, поджя тай пи хкорэстар, савэстар лэн пани мурэ копыли. **10** Вой тэлиля лэсти ды пхуя тай пхэнда: — Сости ту сикавэх манди кацаво мищимо? Сости ту чювэх пы ман сама, мэ ж авря пхуятар? **11** Боазо пхэнда лати: — Манди роспхэндэ пала кода, со ту стердан пэхкиряти сасуяти, кала муля тиро мурш: сар ту ачявдан дадэ тай да, ачявдан пэхкири пхув, тев аракхляпэ, тай джилян манушэндэ, савэн ды калэ на джянэгас. **12** Мэк РАЙ воздэла тути пала тирэ рындоря, савэ ту тирдан, тай дэла бахт тути Дэвэл, РАЙ Израилехкоро, пала лэхкирэ пхака ту

камэх тэ ушаравэпэ! 13 Вой пхэнда: — Рай муро, ту сикавэх манди кацаво мищимо. Ту дынян пачя тиря копыляти, кала мэ на тирэ копылендар. 14 Кала авиля вряма тэ ха, Боазо пхэнда Руфяти: — Джя кордэ, ха тай обмук пэхкоро котор мандро ды шуклима. Руфь бэшля пашэ бутярнэн, тай вов дыня лати присардо ворзо. Вой чялиля, тай латэ интэ ачиляпэ. 15 Кала Руфь упалэ джиля тэ стидэ ворзо, Боазо прыпхэнда пэхкирэ манушэнди: — Тай кала вой закамэла тэ стидэ помашкар снопура, на холярэн лати. 16 Кала авэна тэ стидэ, на залэн вса тай ачявэн лати. Мэк подлэл, тай тумэ нисо на дэдумэн лати. 17 Дэ бельвель Руфь стидэлэс ворзо пэ маля. Нэ кала вой обмарда лэн, выджиля йпаш гоно ячмени. 18 Кала авиля ды форо, Руфь сикавда сасуяти, скацик вой стидыня. Тунчи вой доросля кода, со ачиляпэ хаматар, тай отдыня Нооми. 19 Сасуи пхучля латар: — Тев ту стидэгас? Тев ту тирдан авдивэ? Тэ авэл бахтало кодыва, саво дыня тути зор. Руфь пхэнда сасуяти, кастэ вой тирда пэ маля. — Манушэ, пэ маля кастэ мэ авдивэ слём, акхарэн Боазо, — пхэнда вой. 20 — Тэ дэл лэсти РАЙ бахт! Вов патив тховэл и пы джюдэн тай пы мулэн! — пхэнда Нооми боряти. — Кадыва мануш амаро пашутно родо, кастар авэла амэнди зор. 21 Руфь моавитянка пхэнда: — Вов пхэнда манди тэ рицарэпэ екхтанэ лэхкирэ бутярнэнца ды колэ, кала вонэ стерэна всаворэ бутя пэ лэхкирэн мален. 22 Нооми пхэнда Руфяти, пэхкиря боряти: — Чяёри, мишто, кала ту авэга лэхкирэ бутярнэнца. Тунчи нико на холярэла тут пэ авэр маля. 23 Руфь рицардапэ екхтанэ бутярнэнца Боазохкирэнца тай подлэлэс када, со тэлэдэлэс ды колэ, кала постидыне ячмени тай див. Джювэлэс вой тунчи пэхкиря сасуея.

3 Екхвар латири сасуи Нооми пхэнда лати: — Мури чей, на трэбуни ли манди тэ араках тути тхан, соб тути тэ авэл мишто? 2 Хыба Боазо, пэхкирэнца бутярнэнца, савэнца ту слян, амэнди на родо? Авдивэ бельвельяга вов жужарэл ячмени пы токо. 3 Тай кади, джя, выхалавпэ, помаклэ лаче мастинаяга тай уряв тири лачи йда. Джя пы токо, качик на сикавпэ лэсти ды кодыя вряма, кала вов на пэрэачела тэ ха тай тэ пэ. 4 Кала вов пэрэла, рапир кадыва тхан, тев вов пэрэла. Тунчи джя, оттер ушардо ды лэхкирэ пурэн тай пэр. Вов пхэнэла тути, со тэ тирэ. 5 — Мэ тирава вса, сар ту пхэндан, — пхэнда Руфь. 6 Вой джиля пы токо тай тирда вса, со пхэнда лати тэ тирэ латири сасуи. 7 Кала Боазо пэрэачила тэ ха тай

тэ пэ, тай ачила лэсти мишто, вов отджия, пэля ды угло скирдатэ. Руфь локхэ поджиля, оттерда ушардо лэхкирэ пурэндэ тай пэля. 8 Дэ йпаш рят вов сдарыняпэ, порисардапэ тай додыкхля джювля, сави пашлёлэс ды лэхкирэ пурэн. 9 — Ко ту? — пхучля вов. — Мэ тири копыля, Руфь — пхэнда вой. — Ушарав ман тиря йдага, ту же екх пашутнэндар родостар амэнди, саво лиджял лав пала амэн. 10 Вов пхэнда: — Тэ дэл тути РАЙ бахт, чей мури. Када лачё рындо барыдэр колэстар, саво ту тирэгас дыкалэ. Ту на ачиляпэ тэ пхирэ пала тэрэнэн мурушэндэ — на пала барвалэн, тай на пала чёрорэн. 11 Нэ кана, мури чей, на дара. Мэ тирава важ тути вса, со ту помангэга. Всаворо муро форо джянэл, со ту пативали джювли. 12 Мэ пашутно родо, нэ исин родо пашэдэр тути. 13 Ачпэ пы рят катэ. Дэнзор, кала вов скамэла тэ вытинэ тут, када мишто — мэк кади и тэ авэл. Нэ сар на закамэла, чячимага, сар кода, со джюдо РАЙ, када тирава мэ. Сов катэ ды дэнзор. 14 Тай вой сля ды лэхкирэн пурэн ды дэнзор, нэ вшила дыкалэ, кала ек мануш роздыкхэла аврэ манушэ. Боазо пхэнда ды пэ: «Мэк нико на джянэл, со пы токо авэлэс джювли». 15 Вов пхэнда лати: — Дэ манди упрани йда, сави пэ тут, тай рицар ла. Кала вой тирда када, вов вычюта ды кадыя йда баро гоно ячмени тай дыня лати зор тэ зачювэ пы пхикен. Тунчи вов рисардапэ ды форо. 16 Кала Руфь авиля пэхкиря сасуятэ, Нооми пхучля: — Нэ сар ту, чей мури? Тай Руфь роспхэнда лати пала вса, со тирда Боазо важ лати 17 тай прыпхэнда: — Вов дыня манди йпаш гоно ичинэ тай пхэнда: «На рисов пэхкиря сасуятэ жышэ вастэнца». 18 Нооми пхэнда: — Поач, мури чей, кала на уджянага, дысо вса доджяла. Кадыва мануш на прыбэшэла, вов авдивэ затирэла кадыва рындо.

4 Боазо джиля тай бэшля ды форохкирэн ударэн. Тай акэ дыкхэл: джял кодыва родо, пала савэ вов дэдуманя. Боазо акхарда лэ тай пхэнда: — Амал, поджя, бэш. Кодыва поджиля тай бэшля. 2 Боазо анда дэшэн манушэн пхурэдэрэн ды форо тай пхэнда лэнди: — Бэшэн катэ. Вонэ бэшлэ. 3 Боазо пхэнда родости: — Дума джял пала маля Элимелехохкири, амарэ родохкири. Нооми рисила пхуятар Моаво тай битинэл лэ. 4 Мэ думисардом, со трэбуни тэ пхэнэ тути пала када. Камэх, вытин кадыя маля англа всаворэн, ко исин катэ, тай англа пхурэдэрэн мурэ народостар. Камэх — вытин. Сар на камэх — пхэн манди, соб мэ тэ джянав. Тути трэбуни англэ тэ вытинэ

када, мэ — авэр, касти трэбуни тэ вытинэ. — Мэ
 вытинава, — пхэнда кодыва. 5 Боазо пхэнда: —
 Кала вытинэга маля Ноомиятири, тути трэбуни тэ
 лэ моавитянка Руфь, кастэ муля ром, соб, кала
 тумэндэ бяндёлапэ чяворо, всаворо хаббэ тэ
 ачелпэ лэсти. 6 Тунчи пашутно родо пхэнда: —
 Нат, манди на выджял тэ вытинэ. Дарав, соб тэ
 на хасявэл мандэ вса. Мэк пала тут вса авэла,
 вытин ту, мандэ на выджял. 7 (Англал ды Израили
 сля упхэнимо: кала пэрэдэнас вытинимо тай
 парувэнас, соб ды калэ тэ авэл зор, мануш слэлас
 пэстар цэрюли тай отдэлас аврэсти. Кади ды
 Израили састярэнас упхэнимо.) 8 — Тин ту, —
 пхэнда пашутно родо Боазости тай слиля цэруля.
 9 Боазо пхэнда пхурэдэрэнди тай всаворэсти
 народости: — Тумэ допхэнимаря: екхатар мэ тинав
 Ноомиятэ вса, со сля Элимелехостэ, Килииностэ
 тай Махлониостэ. 10 Кади ж моавитянка Руфь,
 со сля ромни Махлонохкири, мэ лав пэсти ды
 ромнен, соб ко авэла латар тэ авэн хулая пхуяти,
 со сля лэстэ, тай соб тэ на хасявэл лэхкиро родо
 ды амаро форо. Тумэ калэсти допхэнимаря! 11
 Всаворэ ко котэ сля пашэ ударэн тай пхурэдэра
 пхэндэ: — Акэ, амэ допхэнимаря! Мэк РАЙ дэла
 ромняти, сави заджял ды тиро цэр, бут чяворэн,
 сар сля Рахиялэтай тай Лиятэ, савэндар джиля
 всаворя народо Израилёхкоро! Тэ авэх зорало ды
 Эфрата, тай тэ джянэн тут ды Вифлеемо. 12 Мэк
 РАЙ дэла тути чяворэн кала тэрня джовлятар! Мэк
 тиро цэр авэла пхуджило пы цэр Парецохкиро,
 савэ Тамар быянда Иудасти! 13 Боазо лиля Руфь
 пэсти ды ромнен. Вонэ сле екхтанэ, тай дыня
 РАЙ, вой быянда лэсти чявэ. 14 Джювля пхэндэ
 Нооми: — Наис РАЕСТИ, саво на ачявда тут
 би чяворэндиро! Тэ лашарэлпэ вов ды Израили!
 15 Вов рисарэла тути джюймо тай подрицарэла
 тут ды пуранэн бэршэн! Бори тири, сави камэл
 тут, быянда лэ! Вой важ тути фэдэр, сар ефта
 чявэн. 16 Нооми пхиравэлас пы вастэн чяворэ,
 саво быяндапэ, тай дыкхэлас пала лэ. 17 Пашэ
 джювля дэдумэнас: — Ноомиятэ быяндапэ чяворо!
 Вонэ дыне лэсти лав тай акхардэ лэ Овидо. Када
 дад Иессеехкоро, саво сля дад Давидохкоро. 18
 Акэ родо Давидохкоро, саво джял Парецостар:
 Парецо сля дад Хецронохкоро, 19 Хецроно сля
 дад Рамости, Рамо сля дад Аминадавости, 20
 Аминадаво сля дад Нахшоности, Нахшоно сля дад
 Салмоности, 21 Салмоно сля дад Боазости, Боазо
 сля дад Овидости, 22 Овидо сля дад Иессеести,
 Иессеи сля дад Давидости.

Иона


1 Сля лав РАЕСТАР Ионасти, чявэ Амиттаёхкирэсти: **2** — Вщи, джя ды Ниневия, баро форо, тай роспхэн ды лэ, со дума пала врыти рындуря кадылэн манушэн доджия ды ман. **3** Нэ Иона вщиля, соб тэ нашэ ды Таршыш РАЕСТАР, тай авия ды Яффа, арахля корабли, саво оджялас ды Таршыш, потинда, соб лэ тэ пролиджан, и заджия ды лэ, соб тэ авэ РАЕСТАР ды Таршыш. **4** Нэ РАЙ бичялда пы море састо балвал. Тирдалэ баро гвалто, и кораблести трэбуни сля тэ розмарэпэ. **5** Матросуря здарэнэпэ тай ачиле тэ типисявэ кожно пэхкирэ дэвлэсти. Вонэ вычютэ всаворэ бужэ кораблестар ды пане, соб тэ авэл локхэдэр. Нэ Иона ды калэ смукляпэ андрэ, пыля тай састэс засута. **6** Капитано кораблехкоро авия лэстэ тай пхэнда лэсти: — Со ту совэх? Вщи, типисяв тирэ Дэвлэсти. Ко джянал, Вов ушунэла амэн, тай амэ на хасявага. **7** Матросуря пхэндэ екх екхэсти: — Джям, чювага жребие, соб тэ уджянэ, пала ка кадыя грыжа авия пы амэн. Вонэ чютэ жребие, и жребие выпыла пы Иона. **8** Тунчи вонэ пхэндэ лэсти: — Пхэн амэнди, пала ка дорэсля амэн кадыя грыжа? Сога ту залэхпэ? Катар ту джях? Тев тири пхув? Савэндэр ту манушэндэр? **9** Вов пхэнда лэнди: — Мэ еврей, даравпэ РАЕСТАР, Дэвлэ болыбнахкирэ, Саво стерда баро пани тай пхув. **10** Тунчи Иона пхэнда лэнди, со вов нашэл РАЕСТАР. Кала мануша уджянгле пала када, вонэ фартэ пэрэдарэне тай пхэндэ лэсти: — Сости ту када тирдан? **11** Море на пэрэachelас гвалтовать. Вонэ пхэндэ лэсти: — Со амэнди тэ тирэ туга, тэ на гвалтует море? **12** Тунчи вов пхэнда лэнди: — Лэн ман и вычювэн ды море, тай море пэрэachelа гвалтовать важ тумэнди. Мэ джянав, со кадыя бари грыжа доросля тумэн пала ман. **13** Нэ кала мануша ачиле фартыдэр тэ тирэ бути, соб тэ прыаче пхуятэ, лэндэ нисо на выджялас, колэсти со море на пэрэachelас гвалтовать. **14** Тунчи вонэ типисине РАЕСТИ тай пхэндэ: — Мангах Тут, РАЕ, тэ на хасявах пала води кадылэ манушэ, тай на прычувэга амэнди навуджило рат. Тут, РАЕ, стердан, со Ту камлян! **15** Вонэ лиле Иона тай вычютэ ды пане, тай пы море авия пачя. **16** Матросуря фартэ пэрэдаранепэ РАЕСТАР, андэ Лэсти жертва и дыне солах. **17** РАЙ бичялда баро мачё, тай вой прозумавда Иона. Вов просля андрэ ды пэр мачестэ трин дивэ тай трин рятя.

2 Кала Иона сля ды пэр мачестэ, вов поманглыпэ РАЕСТИ, пэхкирэ Дэвлэсти. **2** Вов пхэнда: — Ды бида мэ типисилём РАЕСТИ, и Вов задэдуманя мандэ. Мэ затиписилём кола люмлятар мулэндэр — тай Ту ушундан муро гласо. (Sheol h7585) **3** Ту обмуклян ман фартэ тэлэ ды пане, вой тирёлас тай подлэлэспэ понад муро шэро. **4** Мэ пхэндом: «Отчюто мэ Тирэ яххэндэр, нэ всаекх мэ джянав, со мэ удыхава свэнто Тиро цэр». **5** Пани ушаравда ман, чяря панестар обкхувдэ муро шэро. **6** Мэ тэлэ пхув сджилём, тев барён пляя, тай удара затердэлэ пала ман, соб тэ на вымукэ ман вако. Нэ Ту, РАЙ, муро Дэвлэ, вылилан ман хывьятар джюдэга. **7** Кала джювимо муро мурдёлэс, тай ачилёмпэ мэ би зорако, мэ РАЕ сралирдом, тай муро мангимо доджия Тутэ, ды свэнто Тиро цэр. **8** Кола, ко тэлёл хохавнэ, шушэ дэвлэнди, прыдыне Тут. **9** А мэ ашаримахкирэ гласога анава Тути жертва, со пхэндом англа Тут, стерала! Фирисаримо РАЕСТАР! **10** РАЙ пхэнда мачести, тай вов вычюта Иона мостар пы пхув.

3 Авэр моло сля лав РАЕСТАР Ионасти: **2** — Вщи, джя ды Ниневия, баро форо, тай роспхэн ды лэ када, со Мэ пхэндом тут. **3** Иона вщиля тай джия ды Ниневия, сар пхэнда лэсти РАЙ. Ниневия сля баро форо Дэвлэстэ, пэ трин дивэ тэ джя пэза. **4** Иона заджия ды форо и састо диво пхирэлэс тай пхэнэлэс: «Интэ саранда дивэ, и Ниневия хасявэла!» **5** Мануша ды Ниневия патиле Дэвлэсти тай отпхэндэпэ тэ ха и тэ пэ. Всаворэ — барвалэ и чёрорэ — урявдэлэ ды їда гонэндэр. **6** Кала кадыва лав доджия ды тхагари, вов вщиля троностар, слиля барвали їда, урявдалэ ды їда гонэндэр тай бэшля ды прахо. **7** Вов прыакхарда барэ манушэн, тай вонэ пхэндэ всаворэнди ды Ниневия: «Мануша нисо тэ на хан, тэ на пэн пани. Тай хулаимо, гурува, бакрэ бузненца тэ на пхирэн пы мален и тэ на пэн пани. **8** Мануша тай хулаимо тэ авэн ушаравдэ ды похтан гонэндэр тай зоралэс тэ типисявэн Дэвлэстэ. Соб кажно мануш отрисардалэ пэххэрэндэр мижэ дромэндэр тай прохарицики рындонэндэр. **9** Ко джянал, на парувэла ли Дэвлэ Пэхкиро гындо тай отрисарэла амэндэр Пэхкири холи, тай амэ на хасявага». **10** Дэвлэ удыхля лэндирэ рындуря, со вонэ отрисардэлэ пэхкирэ мижэ дромэндэр, и ачила Лэсти дор лэн, тай на бичялда бида, сави камля тэ бичялэ.

4 Када сля бари бида ды якхэн Ионасти. Вов фартэ холявэлас. **2** Вов ачиля тэ мангэпэ РАЕСТИ: — РАЕ! Мэ ж дэдуманём пала када, кала мэ инте слём пэстэ цэрэ. Колэсти мэ нашлём ды Таршыш. Мэ джянаvas, со Ту, Дэвла, тирэх лачимо, Ту доруно, бут вряма на холявэх, Ту барвало камлимага тай на камэх тэ бичялэ бида. **3** Екхатар, РАЕ, лэ мури води. Манди фэдэр тэ мэрэ, сар тэ джювэ. **4** РАЙ пхэнда: — Мишто када, со ту холявэх? **5** Иона выджиля форостар тай бэшля, тев восточно риг форостэ, стерда пэсти котэ катуна рандендар тай бэшля тала ла, дэ шалин, соб тэ удыхкэ, со авэла форога. **6** РАЙ Дэвэл прыпхэнда рандяти, и рандь подлиляпэ понад шэро Ионасти, соб вов тэ авэл ды шалин, тэ авэл лэсти мишто. Иона сля фартэ лашало. **7** Тала дэнзор Дэвэл бичялда термэ тэ подха кодья рандь, тай вой зашутуля. **8** Кала вщиля кхам, Дэвэл бичялда зорало, пхабардо балвал, тай кхам ачиля тэ пхабарэ шэро Ионасти, кади со лэсти ачиля бибахт. Вов мангля мэrimo тай пхэнэлас: — Манди фэдэр тэ мэрэ, сар тэ джювэ. **9** Дэвэл пхэнда Ионасти: — Мишто када, со ту холявэх пала кадыя рандь? Вов пхэнда: — Мишто! На кацик тэ холявэ, нэ и тэ мэрэ. **10** Тунчи РАЙ пхэнда: — Тути дор кадыя рандь, пала савля ту на пхирэгаc тай на тирдан бути. Ды екх рят рандь выбариля, тай ды екх рят вой хасиля. **11** Манди ли на дор Ниневия, баро форо, ды саво фартэ бут хулаимо тай будэр тев шэл биш пхангля манушэн, савэ на джянэн, со мищимо, а со врытимо?

NEW TESTAMENT



Исусо пхэнэлас: — Дадэ! Эртисар лэн! Вонэ на джянэн, со терэн.
Халавдэ чутэ жребии и розлиле Лэхкири їда.
Лукастар 23:34

Лукастар

1 Кана бут ко манушэндар ачиле тэ зачинэ дума пала кода, со стердапэ машкар амэн, **2** и сар амэнди розпхэндэ мануша, савэ англунэ дивэндар дыккле кода, со сля, тай терэнас бути важ Дэвлэхкэрэ Лавэ, **3** тунчи и манди, пативало Феофило, авиля пэ гындо тэ розлэпэ дэ кодэлэ, со стердапэ англунэ дивэндар, тай екх пала аврэ тэ чинэ тути, **4** соб ту тэ полэх, пэ скици исин чячюно сиклярино, саво ту прылилян. **5** Дэ кодыя вряма, кала Иродо сля тхагари дэ Иудея, джювда екх рашай, саво вджялас дэ рашаенгири группа, тев сля пхурэдэрэґа Ави. Лэ акхарэнас Захария, тай лэхкиря ромняґа сля Елизавета, манушни Ааронохкэрэ родостар. **6** Вонэ лэдуй сле дэвликунэ мануша, и лэнгоро джювимо сля бидошакоро. И вонэ джювдэ пав Дэвлэ Раехкэрэ заповеди и пав дума Дэвлэхкири. **7** Лэндэ на сля чяворэн, колэсти со Елизаветатэ на выджялас тэ авэ пхаряґа, и вонэ лэдуй сле дэ пуранэн бэршэн. **8** Екхвар поджиля вряма Захариясти рашаенца тэ лиджя бути англа Дэвлэ. **9** Сар прылито сля рашаендэ, вонэ чутэ жребии, касти тэ джя дэ храмо, тай Захариясти выпэля тэ заджя дэ храмо Раехкоро и тэ ваздэ тхув. **10** Дэ кодыя вряма, кала Захария ваздэлас тхув дэ храмо, всавэрэ мануша мангэнаспэ аври, дэ грэда. **11** Тунчи сикавдапэ Захариясти Раехкоро ангело, пав чячи риг жэртвенникостар, пэ савэ ваздэнас тхув Дэвлэсти. **12** Кала Захария удыхкла ангело, дэня пэ лэстэ дар, и затинисия даратар лэхкоро іло. **13** Ангело пхэнда лэсти: — На дар, Захария! Шунда Дэвлэ мангимо тиро, тай ромни тири, Елизавета, бэнеґа тути чявэ, и дэґа лэсти лав Иоанно. **14** Тиро іло авэла бахтало баря лошатар, и Иоаннохкэрэ бэнимасти лошавэна бут мануша. **15** Авэла вов барэ манушэґа англа Рае: на пэла мол и мортхали тай Свэнтонэ Фаноґа авэла пхэрдэ инте тала дакэрэ ілэ. **16** Бутэн манушэн дэ Израили вов рисарэла Раестэ, лэнгэрэ Дэвлэстэ. **17** Вов джяла англа Рае, тай Ильяхкэрэ фано и зор авэна пэ лэстэ, и вов рисарэла дадэнгэрэ ілэ лэнгэрэ чярэндэ, тай накандунэн рисарэла свэнтонэ годятэ, тай лалярэла манушэн, соб тэ авэн вонэ англа Дэвлэ. **18** Захария пхэнда ангелости: — Сар манди тэ патя кадэлэсти? Мэ пхуро, тай ромни мури дэ пуранэн бэршэн. **19** Ангело пхэнда лэсти: — Мэ Гавриило, саво ачел англа Дэвлэ, тай бичалдо тэ дэдумэ туґа и тэ розпхэнэ тути пала када вса. **20** Акэ, ту авэґа

лало и ни екх лав на пхэнэґа ды кодэлэ, сар вса стерэлапэ. Кодэлэсти со ту на патинян мурэ лавэсти, пав савэ стерэлапэ вса дэ пэхкири вряма. **21** А мануша дожутярэнас Захария аври тай на полэнас, сости вов на выджял храмостар скици вряма. **22** Кала вов выджия храмостар, тунчи на сґалювда тэ выпхэнэ ни екх лав, нэ кици сикавэлас вастэнца, сар лало. Тунчи мануша полиле, со Дэвлэ сикавда лэсти вари-со дэ храмо. **23** Ай кала проджиля лэхкири вряма тэ лиджя бути дэ храмо, Захария рисия цэрэ. **24** Проджиля набут вряма, и Елизавета, ромни лэхкири, ачиля пхари тай гаравэласпэ манушэндар панч чён. **25** Тай пхэнэлас: — Со терда манца Рай? Вздыхляпэ пэ ман! И слиля ладжявимо мандар англа манушэн! **26** Пэ шовто чён, сар Елизавета ачиля пхари, ангело Гавриило сля бичалдо Дэвлэстар дэ форо Назарето, саво ачел дэ пхув Галилея, **27** чятэ, савя акхарэнас Мария, пала савя дэне лав тэ отдэ ла пала Иосифо Давидохкэрэ родостар. **28** Ангело авиля латэ тай пхэнда: — Лошав, бахтали! Рай исин туґа! **29** Вой на полиля, со када терэлпэ тай сар тэ полэ лэхкэрэ лава. **30** Ангело пхэнда лати: — На дар, Мария! Дэвлэ дэня тути бахт бари! **31** Акэ, ту авэґа пхари тай бэнеґа Чяворэ, и дэґа Лэсти Лав Исусо. **32** Вов авэла баро, тай Лэ авэна тэ акхарэ Барэдэрэхкоро Чяво. Дэвлэ Рай дэла Лэсти трону, пэ савэ бэшэлас тхагари Давидо, дад Лэхкоро. **33** И авэла Вов Тхагари дэ родо Иаковохкоро, и Тхагаримо Лэхкоро никала на пэрэачела. (aion g165) **34** Мария пхучля ангелостар: — Сар откада вса авэла, кала мэ чей и муршэ на джянав? **35** Ангело пхэнда лати: — Свэнто Фано сджяла упрал пэ тут, и зор Барэдэрэхкири ушарэла тут. И кодэлэсти Свэнто, Саво бэнеґалэпэ, акхарэлапэ Дэвлэхкэрэ Чявэґа. **36** Акэ и Елизавета, тирэ родостар, пэ савя пхэнэнас «бичяворэнгири», шовто чён, сар ачиля пхари дэ пуранэн бэршэн. **37** Акэ, важ Дэвлэ нэнай нисо, соб Вов тэ на стерэл! **38** Тунчи Мария пхэнда: — Дэвлэ — муро Хулай, мэк авэла вса, сар ту пхэндан. Тай отджиля латар ангело. **39** Проджиля набут вряма, и Мария стидэняпэ тай сигэдэр джиля дэ форо Иудеенгоро, саво ачелас машкар плаен. **40** Тай авиля дэ цэр Захариястэ и наисардапэ Елизаветаґа. **41** Кала Елизавета шунда лакэрэ лава, подхукля чяворо тала лакэрэ ілэ, и пэ Елизавета сджиля Свэнто Фано. **42** Вой ваздэня пэхкоро іласо тай пхэнда: — Бахтали ту машкар джювлен, тай бахтало Чяворо, Савэ ту пхиравэх тала тирэ ілэ! **43** Пала со манди кадыя бахт, со авиля мандэ Мурэ Раехкири дэй?

44 Кала ашундом тиро җласо, тунчи ваздэняпэ чяворо дэ мурэ ілэ лошаҗа. 45 Бахтали ту, колэсти со патинян и Раехкэрэ лавэсти и со авэла кади, сар Вов пхэнда! 46 И пхэнда Мария: — Ашарэл Рае води муро, 47 и лошавэл фано муро англа Дэвлэ мурэ, Саво фирисарэл ман. 48 Вов удыхля ман, бутярня, сави нисо на ачел, и акана всавэрэ родуря пхэнэна, со бахтали мэ, 49 кала шунэна, со Дэвлэ Зорало стерда важ ман кадэва баро рындо. И свэнто исин Лав Лэхкоро! 50 И родонэндэ, савэ полэн и трашан Лэстар, Вов обрисявэл ковлэ іло Лэхкоро! 51 Барэ рындуря стерда Вов зоралэ вастэҗа, розпхаҗла дрома пхутимаренди. 52 Вов счута раен лэнгэрэ трононэндар и ваздэня упрэ чёрэн, 53 бокхалэн чялярда лачимаҗа, ай барвалэн мукля шушэ вастэнца. 54 Авиля Лэсти пэ гындо тэ подрицарэ Израиле, бутярнэ Лэхкэрэ, 55 сар дэня Вов лав амарэ дадэнди, Авраамости тай лэхкэрэ родости пэ всавири вряма. (aiōn g165) 56 Мария просля латэ пашэ трин чён тай рисиля цэрэ. 57 Тай авиля вряма Елизаветати тэ бэнё, и вой бэня чяворэ. 58 Пашунэ мануша и родо лакоро шундэ, сар Рай дэня лати баро лачимо Пэхкоро, тай лошавэнас ітханэ лаҗа. 59 Пэ охто диво авиле вонэ тэ обчинэ чяворэ, и камле тэ дэ лэсти лав Захария, кади, сар акхарэнас лэхкэрэ дадэ. 60 Нэ Елизавета, лэхкири дэй, пхэнда: — Нат, дэн лэсти лав Иоанно. 61 Пхэндэ лати: — Ника дэ тумаро родо кади на акхарэн! 62 Тай пхученас вастэнца лэхкэрэ дадэстэ, Захариястэ, камле тэ уджянэ лэстэ, сар вов камэл тэ акхарэ чяворэ. 63 Захария поманҗла сандёры важ лилэн тай чинда упрал: «Лэсти лав Иоанно». Всавэрэ прылиле када пала дыво. 64 Тунчи отмукля лэсти муй и чиб, и вов ачиялэ тэ дэдүмэ тай тэ ваздэ слава Дэвлэсти. 65 И всавэрэн пашунэн облиля бари дар, и када вса розджияпэ пав всавири Иудея плаенгири. 66 Мануша, савэ шундэ вса кода, пхученас еджинэ пэстэ: — Каҗа дурэдэр авэла кадэва чяворо? И Раехкоро васт сля пэ чяворэ. 67 Ай Свэнто Фано сдҗиялэ пэ Захария, Иоаннохкэрэ дадэ, и вов ачиялэ тэ дэдүмэ Дэвлэстар: 68 — Тэлював англа Тут, Бахталэ Рай, Дэвлэ Израилехкоро! Ту авилян Тирэ манушэндэ тай фирисардан лэн. 69 Ваздэня важ амэн Фирисаре цэрэстар, савэстар исин Тиро бутярно Давидо, 70 зрицардан Тиро лав, саво Ту пхэнэҗас дэ думутни вряма Тирэ свэнтонэ англунаренца, (aiōn g165) 71 со фирисарэҗа амэн врыжымашэндар, кодэлэндар, савэ вурыцён амэндар. 72 Вов сикавда ковлэ іло Пэхкоро амарэ дадэнди тай на бистарда, со спханҗла лэнца

Еджино Пэ Свэнтонэ заветоҗа. 73 Солаханя Вов Авраамости, амарэ дадэсти, 74 со фирисарэла амэн врыжымашэндар, соб амэ битрашакоро тэ терах свэнто бути англа Лэстэ, 75 соб тэ авэл амаро джювимо свэнто тай чячюно англа Лэхкоро Муй всавэрэ бэрша амарэ. 76 И тут, чяворо, акхарэна Барэдэрэхкоро англунари, колэсти со ту дҗяҗа англа Рае и лачярэҗа Лэсти дром, 77 и тховэҗа Лэхкэрэ манушэнди дэ гындо, со Дэвлэ злэл лэндар бэзимо и фирисарэла лэнгэрэ водя. 78 Пэхкэрэ ковлэ ілэстар Дэвлэ бичалэла амэнди Кхам, Саво ваздэлапэ дэнзор, 79 и манушэнди, савэ мэрэн дэ калима, дэла одуд и сикавэла амэнди дром, саво анэл пачя. 80 Ай чяворо барёлас, тай фано лэхкоро ачелас зорало, и сля вов дэ шуки пхув ды кодыя вряма, кала трэбуни лэсти сля тэ сикавэпэ манушэнди дэ Израили.

2 Дэ кодыя вряма императоро Августо чинда упхэнимо, соб тэ пэрэдинэ и тэ зачинэ, скици манушэн джювэл пав всавири римско пхув. 2 Када сля англуно упхэнимо пала кода, соб тэ пэрэдинэ и тэ зачинэ манушэн, кодэла вряматар, кала Квиринии ачиялэ раеҗа дэ Сирия. 3 И всавэрэ мануша дҗянас тэ зачинэпэ, кожно дэ пэхкоро форо. 4 Тунчи и Иосифо Назаретостар, саво ачел дэ Галилея, дҗиялэ дэ Иудея, дэ форо Давидохкоро, Вифлеемо, колэсти со вов сля Давидохкэрэ родостар. 5 Иосифо дҗиялэ, соб лэ тэ зачинэн, ітханэ Марияҗа, лэхкиря терняҗа, сави сля пхари. 6 Дэ Вифлеемо авиля вряма, кала лати трэбуни сля тэ бэнё. 7 Тай бэня пэхкэрэ англунэ Чявэ, закхувда Лэ дэ похтан тай тховда дэ граждо, колэсти со дэ цэр важ акхардэн манушэн на сля лэнди тхан. 8 Надур сле чукняря, савэ чяравэнас пэ маля пэхкэрэн бакрэн и бузнен и прыдыкхэнас пала лэн ратяҗа. 9 И акэ, ачиялэ англа лэндэ ангело Раехкоро, и слава Дэвлэстар, сар баро одуд, дэня пэ лэндэ. И бари дар облиля лэн. 10 Нэ ангело пхэнда лэнди: — На даран! Мэ пхэнава тумэнди пала бари лош, сави авэла всавэрэ манушэнди. 11 Акана бэняпэ тумэнди дэ форо Давидохкоро Фирисари, Саво исин Рай Христосо. 12 И акэ тумэнди шпэра: тумэ аракхэна Чяворэ, закхувдэ дэ похтан, Саво пашлёл дэ граждо. 13 Тунчи упралимастар авиле фартэ бут ангелонэн, савэ ваздэне бари слава Дэвлэсти тай пхэнэнас: 14 — Слава Дэвлэсти пэ упралима, а пэ пхуя пачя манушэнди, важ савэн ковлиля Дэвлэхкоро іло! 15 Кала ангелуря ваздэнепэ лэндар упрэ, чукняря пхэндэ екх екхэсти: — Авэн

дэ Вифлеемо, дыкхага, со котэ стердапэ, пала со амэнди пхэнда Рай. 16 Вонэ сиво авиле дэ форо Вифлеемо и арахкле Мария, Иосифо тай Чяворэ, Саво пашлёлас дэ граждо. 17 Ай кала дыкхле Лэ, тунчи розпхэндэ лэнди вса, со вонэ ашундэ пала Чяворэ. 18 Всавэрэ, ко шундэ лэн, дэнас дыво лавэнди, савэ пхэндэ чукняря. 19 Ай Мария стховэлас кадэла лава дэ пэхкэрэ ілэ тай думисарэлас пала лэн. 20 Тунчи чукняря рисиле павпалэ, ашарэнас Дэвлэ и ваздэнас Лэсти слава пала кода, со дыкхле и со лэнди сля пхэндо. 21 Пэ охто диво, кала авиля вряма тэ обчинэ Чяворэ, Лэсти дэне Лав Иусо. Кадэва Лав дэня Лэсти ангело, кала дэй Иусохири инте на сля пхари. 22 Авиля вряма, кала Мария тай Иосифо жужардэпэ пав Моисеяхкэрэ Упхэнима, тай тунчи вонэ лиджялдэ Чяворэ дэ Ерусалимо, соб тэ свэнтисарэ Лэ Раести. 23 Сар чиндо дэ Дэвлэхкэрэ Упхэнима: «Чяворэ, саво бэняпэ англуно, трэбуни тэ свэнтисарэ Раести». 24 И тэ анэ свэнто жертва, дон ґолубонэн чи дон ґолубонэнгэрэ пуицен, сар пхэндо дэ Упхэнима Раехкэрэ. 25 Тунчи джювда дэ Ерусалимо екх мануш, савэ ахарэнас Симеоно. Вов сля дэвликуно тай жужэ ілэга и дожутярэлас, со Дэвлэ подрицарэла Израиле, тай Свэнто Фано сля пэ лэстэ. 26 Свэнто Фано пхэнда лэсти, со вов на мэрэла ды кодэлэ, сар на удыххэла Христо Дэвлэхкэрэ. 27 Лэ лиджялда Свэнто Фано дэ храмо, кала дад и дэй андэ Чяворэ Иусо, соб тэ стерэ вса, сар трэбуни пав Упхэнима. 28 Симеоно лиля Чяворэ пэ вастэн, ваздэня слава Дэвлэсти тай пхэнда: 29 — Акана отмукех Ту, Дэвла, Хулае, Тирэ бутярэні и дэх лэсти пача кади, сар Ту и пхэндан. 30 Колэсти со дыкхле мурэ яхха фирисаримо Тиро, 31 саво Ту лачярдан англа всавэрэн манушэн. 32 Вов — одуд, саво дэла душлимо важ всавэрэ народуря и анэла слава Тирэ манушэнди, Израилести. 33 Дад и дэй прылиле пала дыво лава, савэ Симеоно пхэнда пала Чяворэ. 34 Тунчи Симеоно пхэнда бахталэ лава лэнди тай дэдуманя Марияти, Иусохирия дати: — Важ Кадэлэ Чяворэ, Саво пашлёл катэ, бут манушэн дэ Израили тэлэдэна и бут ваздэнапэ. И туті еджиняти чори заджяла дэ ілэ. 35 Вов авэла сар шпэра, сави бут мануша на прылэна. И оттерэлапэ вса чёрахано, со мануша рицарэн пэстэ дэ ілэн. 36 Катэ кади ж сля и англунарька Анна, чей Фануилохири, Асирохкэрэ родостар. Вой сля манушни дэ пуранэн бэршэн, сави выджиял паларом тэрня чяга и пэхкэрэ ромэга проджювда эфта бэрш. 37 Тунчи латэ муля ром, и вой джювда еджини охтодэша штар бэрш.

Диво и рят вой терэлас бути важ Дэвлэ, сля дэ мангима и посто и на уджялас храмостар. 38 Дэ кодья вряма вой поджиля и ачиля тэ ашарэ Дэвлэ. Тай розпхэнэлас пала Чяворэ всавэрэнди, савэ дожутярэнас фирисаримо важ Ерусалимо. 39 Кала Мария и Иосифо стердэ Чяворэга вса пав Упхэнима Раехкэрэ, тунчи рисиле павпалэ дэ Галилея, дэ пэхкоро форо Назарето. 40 Чяворэ ж барёлас тай бэршэнца прылэлас бари годи и зор, тай Дэвлэхкоро мищимо сля Лэга. 41 Иусоохкэрэ дад и дэй кожно бэрш пхирэнас пэ Патради дэ Ерусалимо. 42 И кала Лэсти сля дэзудуй бэрш, вонэ джилие дэ Ерусалимо пэ сырботори, сар сля прылило. 43 А кала проджиля сырботори и вонэ рисявэнас цэрэ, Чяворэ Иусо ачиляпэ дэ Ерусалимо, нэ дад и дэй на додыкхле када. 44 Нэ думисардэ, со Вов джял аврэ манушэнца. Кала ж проджиле екх диво дромэга, тунчи ачиле тэ родэ Лэ машкар пэхкэрэн манушэн и джянглэн. 45 Тай на арахкле Лэ, тунчи рисиле дэ Ерусалимо и родэнас Лэ котэ. 46 Кала проджиле трин дивэ, арахкле Лэ дэ храмо. Вов бэшэлас сиклимаренца, шунэлас лэн тай пхучелас лэндэ. 47 Всавэрэ шунэнас Лэ тай дэнас дыво Лэхкэрэ годяти тай лавэнди. 48 Кала дад и дэй удыххле Лэ, прылиле када пала баро дыво. Тунчи Лэхкири дэй пхэнда Лэсти: — Чяворэ! Со Ту стердан амэнца? Мэ тай дад Тиро родагас Тут баря дукхага дэ ілэн. 49 Вов пхэнда лэнди: — Пэ со тумэ родэнас Ман? Чи на джянэн тумэ, со Манди трэбуни тэ авэ дэ цэр Мурэ Дадэстэ? 50 Нэ вонэ на полиле, пала со Вов пхэнда. 51 Вов рисиля лэнца дэ Назарето тай сля кандуно лэнди. Лэхкири ж дэй стидэлас кодэла лава дэ пэхкэрэ ілэ. 52 Иусо барёлас, и Лэхкири годи ачелас барэдэр, а Дэвлэ и мануша камэнас Лэ вса будэр и будэр.

3 Пэ дэшупанчто бэрш, кала Тиверии сля императоро, и кала Понтии Пилато сля барэдэрэга дэ Иудея, а Иродо сля тетрархо дэ Галилея, лэхкоро пхрал, Филиппо, сля тетрархо дэ Итурея тай дэ пхув Трахонитско, а Лисании сля тетрархо дэ Авилиния. 2 Англунэ рашаэнца тунчи сле Аннас тай Каиафа. Дэ кодья вряма бичалдо сля Лав Дэвлэхкоро дэ шуки пхув Иоанностэ, Захарияхкэрэ чявэстэ. 3 Иоанно пхирэлас пав всавири пхув паша Иордано, прыакхарэлас манушэн тэ отрисявэ бэзимастар тай тэ болдэпэ, соб Дэвлэ тэ эртисарэл лэнгоро бэзимо. 4 Сар чинда англунари Исаия: «Гласо дэ шуки пхув типисявэл: Лачярэн дром Раести, терэн важ Лэ

чыче дромора. 5 Тхана, савэ машкар плаен, — ваздэнапэ, а вуче пляя тай цыкнэ плаёра — тэлэна, бангэ дрома — выцырдэнапэ, и помардэ дрома — авэна лачярдэ. 6 Тунчи всавэрэ мануша дыкхэна фирисаримо Дэвлэхкоро». 7 Иоанно пхэналас манушэнди, савэ авиле лэстэ тэ болдэлэ: — Родо сапэнгоро! Ко пхэнда тумэнди тэ нашэ бидатар, сави пэ тумэн джял? 8 Мэк тумарэ рындуря сикавэн, со тумэ ачявдэ бэзимо, и на думисарэн: «Амаро дад исин Авраамо». Пхэнав тумэнди, со Дэвлэстэ исин зор кадэла барэндар тэ терэ чявэн Авраамости. 9 Акэ, товэр лачярдэ и тала каштэнгоро корни пашлёл: кожно кашт, саво на анэл лачё барило, сцинэн и чувэн дэ яга. 10 Пхученас лэ мануша: — Со амэнди тэ терэ? 11 Вов пхэнда лэнди: — Кастэ исин дуй гада, отдэ екх кодэлэсти, кастэ нэнай. И кастэ исин хамо, дэ епаш кодэлэсти, кастэ нэнай. 12 Авиле тэ болдэлэ стидэмаря, савэ лэнас налогурия, тай пхучле лэстар: — Сиклимари! Со амэнди тэ терэ? 13 Вов пхэнда лэнди: — На лэн манушэндар будэр, сар тумэнди прыпхэндэ тэ лэн! 14 Пхученас лэ и халавдэ: — Со амэ тэ терах? Вов пхэнда лэнди: — На залэн манушэндар зорага, на дошарэн манушэн ївьа и джювэн пэ ловэн, савэ потинэн тумэнди. 15 Мануша дожутярэнас тай гинисардэ пала Иоанно: — Чи на Христосо вов исин? 16 Иоанно пхэнда всавэрэнди: — Мэ болдав тумэн панега, нэ джял пала ман зорэдэр мандар, мэ на ачяв тэ розпхэндэ Лэсти пундрангэ. Вов болдэла тумэн Свэнтонэ Фанога тай ягага. 17 Каштуни ганавди дэ вастэ Лэстэ, тай Вов жужарэла див и стховэла ла дэ граждо, а кода, со ачиляпэ, спхабарэла дэ яга, савя нащи тэ мурдарэ. 18 Бут инте со пхэнэлас Иоанно, кала дэдумэлас Бахтало Лав. 19 Кала ж Иоанно дошарда Иродо, саво сля тетрархо, пала кода, со вов лиля пала пэ пхралэхкиря ромня, и пала авэр налаче рындуря, 20 тунчи Иродо додэня пэхкэрэ бэзимастэ инте кода, со чута Иоанно дэ барунэ. 21 Кала болдэнепэ всавэрэ мануша, болдэняпэ кади ж Иусо. И кала Вов мангэласпэ, оттердалэ упралимо, 22 и Свэнто Фано сджиля упрал пэ Иусо, сар ґолубо, тай сля ґласо упралимастар, саво пхэнэлас: — Ту — Муро камло Чяво! Ту — Мури бари бахт! 23 Кала Иусо ачиля тэ терэ бути важ Дэвлэ, Лэсти сля пашэ трянда бэрш. Сар думисарэнас, Вов сля Иосифохкоро Чяво. И Лэхкэрэ пхурэнца сле Илья, 24 Матфато, Леви, Мелхии, Ианнаи, Иосифо, 25 Маттафия, Амосо, Наумо, Еслии, Наггеи, 26 Маафо, Маттафия, Шымьи, Иосифо, Иодаи, 27

Иоханано, Рисаи, Зоровавели, Шэалтиило, Нирии, 28 Мелхии, Аддии, Косамо, Элмадамо, Иро, 29 Иосии, Элиезеро, Иоримо, Матфато, Леви, 30 Симеоно, Иуда, Иосифо, Ионамо, Элиакимо, 31 Мелеаи, Маинаи, Маттафаи, Нафано, Давидо, 32 Иессеи, Овидо, Боазо, Сала, Нахшоно, 33 Аминадаво, Админо, Арнии, Хецроно, Паресто, Иуда, 34 Иаково, Исаако, Авраамо, Терахо, Нахоро, 35 Серуго, Реуо, Пелего, Еверо, Шэлахо, 36 Каинано, Арпахшадо, Симо, Нои, Ламехо, 37 Мафусало, Енохо, Иаредо, Малелеило, Каинано, 38 Еносо, Сифо, Адамо, Дэвлэ.

4 Иусо, пхэрдило Свэнтонэ Фанога, рисиля Иорданостар тай лиджялдо сля Фанога дэ шуки пхув. 2 Котэ Лэ саранда дивэ зумавэлас баро бэнг. Всавэрэ кадэла дивэ Вов нисо на халас тай ачиля бокхало. 3 Тунчи пхэнда Лэсти баро бэнг: — Кала Ту — Дэвлэхкоро Чяво, тер мандро кадэлэ барэстар. 4 Пхэнэл лэсти Иусо павпалэ: — Чиндо: «На кици мандрэга джювэл мануш». 5 Тунчи ваздэня Лэ баро бэнг пэ вучё плай тай сикавда Лэсти всавэрэ тхагарима, савэ исин пэ люмля, пала цыро вряма. 6 Тай пхэнда Лэсти баро бэнг: — Мэ отдава Тути всавэрэ зор тай слава, савэ исин дэ кадэлэн тхагаримэн. Вса када дэно манди, и мэ када дав, касти камав. 7 Вса када авэла Тиро, кала Ту тэлёга англа ман. 8 Иусо пхэнда лэсти: — Чиндо: «Рае Дэвлэсти тэлюв тай кици Лэсти тер тири бути». 9 Тунчи баро бэнг лиджялда Лэ дэ Ерусалимо, тховда пэ майвучё тхан дэ храмо тай пхэнда Лэсти: — Кала Ту — Дэвлэхкоро Чяво, тунчи хук тэлэ. 10 Колэсти со чиндо: «Ангелонэнди Пэхкэрэнди Вов прыпхэнэла тэ фирисарэн Тут». 11 «Пэ вастэн пхиравэна Тут, тэ на дукхавэлпэ барэстар пуно Тиро». 12 Иусо пхэнда лэсти павпалэ: — Пхэндо: «На зумав Тирэ Рае Дэвлэ». 13 Тунчи баро бэнг пэрэачиля тэ зумавэ Лэ тай отджиля Лэстар пэ вряма. 14 Тунчи Иусо рисиля дэ Галилея, пхэрдило зорага Фаностар, тай розджиляпэ пала Лэ дума пав всавири кодья пхув. 15 Вов сиклярэлэс дэ синагоги, тай всавэрэ ашарэнас Лэ. 16 Тунчи Иусо авиля дэ Назарето, тев Вов выбариля, и, сар Лэстэ сля прылило, дэ суббота заджиля дэ синагога тай вщиля, соб тэ динэ. 17 Лэсти дэне лил, саво чинда англунари Исаия. Иусо оттерда лэ тай аракхля тхан, тев сля чиндо: 18 — Фано Раехкоро пэ Ман, колэсти со Вов помакхля Ман тэ пхэнэ Бахтало Лав чёрэнди. Вов бичалда Ман тэ дэдумэ спханглэ манушэнди, со лэн отмукэна пэ воля, корэнди,

со авэна тэ дыкхэ, и тэ фирисарэ кодэлэн, савэ хан грыжа, 19 тай тэ розпхэнэ, со авиля лачи вряма Раехкири. 20 Тунчи Иусо стховда лил, отдэна павпалэ бутярнэсти дэ синагога тай бэшла. Тай всавэрэ ды екхэ дэ синагога дыкхэнас пэ Лэстэ. 21 Тай ачиля тэ дэдүмэ лэнди: — Авдивэ стердапэ пав лавэн, савэ тумэ шүндэ екхатар. 22 Всавэрэ ашарэнас Лэ тай фартэ лошавэнас Лэхкэрэ бахталэ лавэнди. Тай пхэнэнас: — Чи на Иосифохкоро Вов Чяво? 23 Иусо пхэнда лэнди: — Түмэ дэна Манди пэ гындо лав, сар мануша пхэнэ: «Састимари, састяр еджино пэ!» И кади ж пхэнэна: «Амэ шүндэ, со Ту тердан дэ Капернаумо. Стер када и катэ, тев Ту выбралиян». 24 Нэ пхэнав тумэнди чячимо: ни екхэ англунаре на прылэн котэ, тев вов барияля. 25 Пхэнав тумэнди чячимо: дэ вряма, кала джювда Илья, дэ Израили сля бут джювлен, савэндэ муле рома. Тунчи трин епашега бэрш на сля брышынд, тай пав всавири пхув сля бари бохх. 26 Тай никастэ лэндар на сля бичалдо Илья, кици дэ Сарепта паша Сидоно джювлятэ, савятэ муля ром. 27 Кади ж дэ Израили бут сля насвалэн, пэ савэн сля проказа, кала джювда англунари Елисеи. Тай нико лэндар на састярдапэ, кици екх Неемано Сириятар. 28 Кала мануша дэ синагога шүндэ кадэла лава, вонэ фартэ мижыле. 29 Тунчи вонэ всхукле тай поцүрдэне Иусо аври пэ плай, пэ савэ сля ваздэно форо, соб тэ чувэ тэлэ. 30 Нэ Вов проджиля машкар лэн тай уджиля котарь. 31 Тунчи Иусо джиля дэ форо Капернаумо, саво дэ Галилея, тай дэ суббота сиклярэлэс котэ манушэн. 32 Тай динэнас пала дыво сикляримо Лэхкоро, колэсти со дэ Лэхкэрэ лавэн сля бари зор. 33 Котэ, дэ синагога, сля мануш, дэ савэ сля нажужэ бэнгэхкоро фано. Тай вов фартэ затиписия: 34 — Ааа! Со Тути трэбуни амэндар, Иусо Назаретостар? Ту авилян, соб тэ хасярэ амэн? Мэ джянав, Ко Ту Кацаво! Ту — Свэнто Дэвлэхкоро! 35 Нэ Иусо запхэнда лэсти: — Заач мулком тай выдзя лэстар! Тунчи бэнг аравда манушэ англа всавэрэн пэ пхуя, тай выджиля лэстар, тай на стерда манушэсти нисави бида. 36 Тунчи дэня пэ всавэрэн бари дар, тай пхэнэнас екх екхэсти: — Катарь дэ Лэхкэрэ лавэн кацави бари зор, со Вов прыпхэнэл нажужэнди тай вонэ кандэн Лэ? 37 Тай дума пала Иусо розджиляпэ пав всавири кодыя пхув. 38 Тунчи Вов ачявда синагога тай джиля Симоностэ цэрэ. Симонохкири пхуромни пашлелас насвали дэ пхабарима. Тай мангле Иусо, соб Вов тэ састярэл ла. 39 Вов тэлиля латэ тай прыпхэнда пхабаримасти тэ

ачявэл ла. Тунчи пхабаримо ачявда ла, тай джювли екхатар ущиля и ачиля тэ стидэ важ лэн скаминд. 40 Кала бэшэлэс кхам, ачиле тэ анэ Иусостэ фартэ насвалэн манушэн. Вов тховэлэс пэ лэндэ васта тай састярэлэс лэн. 41 И бутэ манушэндар выджнянас бэнга тай типисывэнас: — Ту — Чяво Дэвлэхкоро! Нэ Иусо пхандэлэс лэнди муя тай запхэнэлэс тэ дэдүмэ, колэсти со вонэ джянгле, со Вов — Христосо. 42 Кала авиля диво, Иусо джиля дэ шуки пхув, нэ мануша родэнас Лэ. Тай кала арахкле, мангэнас Лэ, соб тэ ачелпэ лэнца. 43 Нэ Иусо пхэнда лэнди: — Манди трэбуни тэ пхэнэ Бахтало Лав пала Дэвлэхкэрэ Тхагарима и дэ аврэн форонэн. Пэ кадэва рындо Мэ и слём бичалдо. 44 Тай сиклярэлэс дэ синагоги пав Иудея.

5 Екхвар Иусо ачиля паша Генисаретско озеро, тай бут манушэн стидэнепе паша Лэстэ, соб тэ шүнэ Дэвлэхкоро Лав, и стасавэнас Лэ всавэрэ ригэндар. 2 Вов удыхкля дуй лодкы пэ пане паша пхуя и мацярен, савэ выджиле лодкэндар и халавэнас кхувдя. 3 Иусо заджиля дэ Симонохкири лодка тай помангля Симоно тэ отлидджал ла пав пане надур пхуятар. Тунчи бэшля и лодкатар ачиля тэ сиклярэ манушэн. 4 Кала ж пэрэачиля тэ сиклярэ, пхэнда Симоности: — Отлидзя лодка дүрэдэр пхуятар, тев будэр пани, тай зачув кхувдя тэ астарэн мацё! 5 Симоно пхэнэл Лэсти: — Пхүрэдэр амаро! Амэ всавири рят терагас пхари бути и камле тэ астарэ мацё, тай вса ивяэ. Нэ сар Ту пхэнэх, мэ кандава Тут тай инте зачувава кхувди. 6 Кала вонэ кади стердэ, тунчи астардэ фартэ бут мацен, пэ скици бут, со кхувди ачиля тэ чинэпэ. 7 Тунчи вонэ сикавдэ вастэнца амалэнди, савэ сле пэ авэр лодка, соб тэ подрицарэн лэн. Кодэла авиле тай итханэ зачүтэ пхэрдо мацё дэ лэдуй лодкы, кади со лодкы ачиле тэ тасё. 8 Кала дыкхля вса откада Симоно Пётро, вов тэлиля Иусохкэрэ чянгэндэ тай пхэнда: — Выдзя мандар, Рае! Кодэлэсти со мэ мануш дэ бэзима! 9 Бари дар дэня пэ лэстэ тай пэ всавэрэн, ко дыкхля, скици мацё вонэ астардэ. 10 Трашане кади ж амала Симонохкэрэ, Иаково тай Иоанно, Зеведеехкэрэ чявэ. Нэ Симоности Иусо пхэнда: — На дар. Акана манушэн авэга тэ астарэ. 11 Тунчи вонэ выцүрдэне лодкы пэ пхув, ачявдэ вса тай джиле пала Иусо. 12 Екхвар Иусо сля дэ екх форо. Тунчи авиля Лэстэ мануш, пэ савэстэ сля насвалимо проказа. Вов пэля англа Иусо пэ муй тай мангля Лэ мангимага: —

Рае! Коли закамэ'а, Ту жужарэ'а ман! 13 Иусо процырдэня васт, лиляпэ лэстэ тай пхэнда: — Камав, жужарпэ! Тунчи проказа екхатар сджия лэстар. 14 Иусо прыпхэнда лэсти: — Никасти на розпхэн пала кода, нэ джя, сикавпэ рашаести тай ан жэртва пала кода, со жужарданпэ, сар пхэнда Моисеи, соб вонэ када тэ дыкхэн. 15 Нэ инте будэр розджиялэпэ дума пала Иусо, тай фартэ бут манушэн джянас Лэстэ, соб тэ шунэ Лэхкэрэ лава тай тэ састярэпэ бутэ дукхэндар. 16 Нэ Вов уджялас дэ тханэн, тев манушэн на сля, соб тэ мангэпэ. 17 Екхвар, кала Иусо сиклярэлас манушэн, котэ сле фарисея тай сиклимаря пав Упхэнима. Вонэ авиле всавэрэ тханэндар Галилеятар, Иудеятар тай Ерусалимостар. И зор Раехири сля пэ Иусо, соб тэ састярэ манушэн. 18 Тай акэ, андэ пэ пато насвалэ, саво на пхирэлас, тай камле тэ залиджя лэ дэ цэр тай тэ тховэ англа Иусо. 19 Тай на аракхле, сар тэ анэ лэ дэ цэр, колэсти со фартэ бут манушэн сля паша цэрэ. Тунчи вонэ ваздэнепэ упрэ пэ цэр, розлиле ушарди тай змукле насвалэ пэ пато англа Иусо. 20 Кала Вов удыхля лэнгоро патявимо, тунчи пхэнда насвалэсти: — Мануша! Отмукэлпэ туту тиро бэзимо. 21 Сиклимаря пав Упхэнима тай фарисея ачиле тэ дэдүмэ еджинэ пэсти дэ гындо: — Ко Вов исин, со дэдүмэл кацавэ бэзимахкэрэ лава? Кици Дэвлэстэ исин зор тэ эртисарэ бэзимо манушэсти! 22 Иусо полиля, со лэндэ дэ гындо, тай пхэнда лэнди: — Сости тумэ гинисарэн кади дэ тумарэн ілэн? 23 Со лохкэдэр, тэ пхэнэ: «Отмукэлпэ тиро бэзимо», — чи тэ пхэнэ: «Вщи тай пхир»? 24 Нэ соб тумэ тэ джянэн, со Манушыканэ Чявэстэ исин зор тэ эртисарэ бэзимо, — пхэнда Вов насвалэсти: — Туту пхэнав: Вщи, лэ пато тиро тай джя цэрэ! 25 Тунчи Вов екхатар вщиля англа лэндэ, лиля кода, пэ со пашлэлас, джия цэрэ и ваздэлас слава Дэвлэсти. 26 Тунчи и вонэ ваздэнас Дэвлэсти слава тай пхэнэнас: — Авдивэ амэ пэхкэрэ яххэнца дыкхле кода, со на сля никала! 27 Пала кадэлэ Иусо выджия тай удыхля стидэмаре, саво лэлас налогуря, акхарэнас лэ Леви. Вов бэшэлас паша тханэ, тев здэнас налогуря. Тай пхэнда лэсти Иусо: — Джя пала Ман! 28 Вов ачявда вса тай джия пала Иусо. 29 Тунчи Леви тховда важ Иусо баро скаминд пэстэ цэрэ. Лэнца пала скаминдэ сля бут аврэн манушэн и стидэмарен. 30 Фарисея тай сиклимаря пав Упхэнима сле дэ холя и пхученас Иусохкэрэ сиклярэн: — Сости тумэ хан и пэн стидэмарэнца тай бэзимахкэрэ манушэнца? 31 Иусо пхэнда лэнди: — На састэ манушэнди

трэбуни састимари, нэ насвалэнди. 32 Мэ авилём тэ прыакхарэ, соб тэ обрисьявэнпэ Дэвлэстэ на бидошакэрэ мануша, а кодэла, савэ джювэн дэ бэзима. 33 Тунчи вонэ пхэндэ Иусоссти: — Иоаннохкэрэ тай фарисеенгэрэ сиклярнэ мангэнпэ тай рицарэн посто, а Тирэ сиклярнэ хан тай пэн. 34 Иусо пхэнда лэнди: — Сар тумэ пхэнэна пэ бьяв манушэнди тэ рицарэн посто, кала лэнца тэрно? 35 Нэ авэла вряма, кала лэндар залэлалэ тэрно, тунчи авэна тэ рицарэ посто. 36 Тунчи Вов пхэнда лэнди кацави дума: — Нико на прысуювэл пураня ідатэ котор, саво отчиндо нэвя ідатар. Кодэлэсти со тунчи и нэви іда мусарэла, и пуранятэ на поджяла. 37 Нико на чувэл тэрно мол дэ пурано ґравлицико гоноро, колэсти со и гоноро пхарола, и мол розчувэлапэ. 38 Нэ тэрно мол чувэн дэ нэвэн ґравлицикунэн гонорэн. 39 Тай нико на закамэла тэ пэ тэрно мол, кала зумавда пурано мол, нэ пхэнэла: «Пурано фэдэр».

6 Екхвар дэ суббота джялас Иусо сиклярнэнца маля'а, а сиклярнэ сцинэнас див, розхосэнас вастэнца тай ханас ворзо. 2 Койсавэ фарисеендар пхэндэ Лэсти: — Сости тумэ терэн кода, со наши тэ терэ дэ суббота? 3 Иусо пхэнда лэнди: — Тумэ со, на динэнас, со терда Давидо, кала вов тай лэхкэрэ мануша ачиле бокхалэ? 4 Вов заджия дэ Дэвликуно Цэр, лиля мандро, свэнтисардо Дэвлэсти. Вов еджино лэ халя тай дэня пэхкэрэ манушэнди. А кодэва мандро наши никасти сля тэ ха, кици рашаенди. 5 Тунчи Иусо пхэнда лэнди: — Чяво Манушыкано исин субботако Хулай. 6 Дэ авэр суббота Иусо заджия дэ синагога тай ачия тэ сиклярэ. Котэ сля екх мануш, савэстэ чячэ васт сля шуко. 7 Сиклимаря пав Упхэнима тай фарисея дыкхэнас пала Иусо, чи састярэла Вов дэ суббота, соб тэ дошарэ Лэ. 8 Нэ Вов джянэлас лэнгоро гындо тай пхэнда манушэсти шукэ вастэ'а: — Вщи тай выджя машкар! Мануш подлиляпэ тай ачия машкар. 9 Тунчи Иусо пхэнда лэнди: — Пхучяв тумэн: трэбуни дэ суббота тэ терэ лачимо чи бибахт? Тэ фирисарэ води чи тэ мулярэ? 10 Тунчи Вов подыхля пэ всавэрэн тай пхэнда манушэсти: — Процырдэ тиро васт! Вов стерда кади, и васт ачия састо. 11 Вонэ фартэ мижыле тай ачиле тэ дэдүмэ екх екхэ'а, со лэнди тэ терэ Иусоґа. 12 Дэ кодэлэн дивэн Иусо джия пэ плай тэ мангэпэ тай мангялпэ Дэвлэсти котэ всавири рят. 13 Кала авила диво, Иусо акхарда Пэхкэрэн сиклярнэн тай вытидэня лэндар дэшудуен, савэнди дэня лав «апостолурия»: 14 Симоно, савэ акхарэнас

Пётро, лэхкоро пхрал Андреи, Иаково, Иоанно, Филиппо, Варфоломеи, 15 Матфеи, Фома, Иаково Алфеехкоро, Симоно, пэ савэ пхэнэнас «Зилото», 16 Иуда Иаовохкоро тай Иуда Искарियोто, саво ачиля здымарега. 17 Тунчи Иусо змукляпэ лэнца плаестар пэ маля. Паша Лэстэ стидэняпэ фартэ бут манушэн: Лэхкэрэ сиклярнэ, мануша всавиря Иудеятар тай Ерусалимостар, кади ж Тиростар тай Сидоностар, форонэндар, савэ ачен паша море. 18 Вонэ авиле тэ шунэ Лэхкэрэ лава тай тэ састярэпэ пэхкэрэ дукхэндар. Тай мануша, савэн марэнас нажужэ, састярэнаспэ. 19 Всавэрэ вонэ камле тэ лэлэ Иусостэ, колэсти со Лэстар выджялас бари зор тай састярэлас манушэн. 20 Тунчи Иусо подыхля пэ Пэхкэрэн сиклярнэн тай пхэнда: — Бахталэ тумэ, чёрорэ! Тумаро исин Тхагаримо Дэвлэхкоро. 21 Бахталэ тумэ, бокхалэ акана! Тумэ авэна чялярдэ. Бахталэ, савэ ровэн акана! Тумэ авэна тэ лошавэ. 22 Бахталэ тумэ, кала мануша тумэн на камэна, кала авэна тэ вытрадэ тумэн, тэ кошэ тумаро лав, тэ пхэнэ пэ тумэн налаче лава пала Чявэ Манушыканэ. 23 Кадики ж теренас англунаренца и дада кадэлэ манушэнгэрэ! Лошавэн тунчи тай хукэн лошатар! Бари цимин потинэна тумэнди пэ упралима. 24 Нэ бида тумэнди, барвалэ! Тумэ катэ ужэ чялиле джювимага. 25 Бида тумэнди, чялэ! Тумэ авэна бокхалэ. Бида тумэнди, ко асалпэ акана! Тумэ авэна тэ ровэ и ваздэна типимо дэ грыжа. 26 Бида тумэнди, кала авэна тэ ашарэ тумэн всавэрэ мануша! Колэсти со лэнгэрэ дада кади ж ашарэнас хохавнэн англунарен. 27 Тумэнди, ко шунэн, Мэ пхэнав: камэн тумарэн врыжымашэн. Терэн лачимо кодэлэнди, ко тумэн на камэн. 28 Пхэнэн бахталэ лава кодэлэнди, савэ придэн тумэн мрая. Мангэн Дэвлэ пала кодэлэн, ко акошэл тумэн. 29 Ко дэла палма тут пав екх чямни, бандяр лэсти авэр. Ко залэл тутар упралуни їда, дэ лэсти тэ отлэ и гад тиро. 30 Всавэрэнди, ко мангэл тутэ, дэ. Кодэлэстар, ко отлэл тутар, на манг павпалэ. 31 Сар тумэ камэн, соб тумэнди тэ терэн мануша, кади и тумэ терэн лэнди. 32 Кала камэн кици кодэлэн, ко камэл тумэн, пала со тумэн тэ ашарэ? Кади ж мануша дэ бэзима камэн кодэлэн, ко лэн камэл. 33 Кала терэн лачимо кодэлэнди, ко тумэнди терэл лачимо, пала со тумэн тэ ашарэ? Мануша дэ бэзима кади ж терэн. 34 Кала дэн ловэ дэ вуджилима кодэлэнди, кастар думисарэн тэ лэ павпалэ, тунчи пала со тумэн тэ ашарэ? Мануша дэ бэзима кади ж залэн кодэлэнди, кастар думисарэн тэ лэ павпалэ. 35 Нэ тумэ камэн

тумарэн врыжымашэн, терэн лачимо лэнди, залэн дэ вуджилима тай на дожутярэн, со тумэнди отдэна павпалэ. Тунчи бари цимин тумэнди потинэна. Тумэ авэна Барэдэрэхкэрэ чявэнца, колэсти со Вов терэл лачимо и налаченди, и мижэнди. 36 Сар ковло їло тумарэ Дадэстэ, кади тумэ ковлисарэн тумарэ їлэ манушэндэ. 37 На сундисарэн, тай еджинэ на авэна сундисардэ. На дошарэн, тай тумэн на дошарэна. Эртисарэн, тай тумэнди авэла эртисардо. 38 Дэнтэ, и тумэнди дэлапэ. Дэлапэ дэ бэрг тумэнди пхэрдо, кади чувэлапэ, со авэла прытасавдо и авэла тэ вычувэпэ аври. Сар тумэ дэна, кади и тумэнди дэно авэла. 39 Тунчи Иусо пхэнда кацави дума: — Чи лиджяла коро корэ? Чи на пэрэна вонэ лэдуй? 40 Сиклярно на барэдэр сиклимарестар, нэ сар высиклёлэпэ, авэла, сар сиклимари. 41 Со ту дыкхэх сулуморы дэ якха тирэ пхралэстэ, нэ дэ пэхкиря якха баро кашт на дыкхэх? 42 Сар пхэнэга тирэ пхралэсти: «Пхрала, дэ, вылава сулуморы тиря якхатар!» — кала ту дэ пэхкиря якха баро кашт на дыкхэх? Домуенгоро, англал вылэ кашт тиря якхатар, тунчи мишто дыкхэга, сар тэ вылэ сулуморы якхатар тирэ пхралэстэ. 43 Лачё кашт на анэл цэрно барило. А цэрно кашт на анэл лачё барило. 44 Пав барило уджянэлпэ кашт. На стидэн инжыро пусанэ рандендар, на стидэн виноградо пусанэ чярендар. 45 Лачё мануш вылэл лачимо мищимастар, саво исин лэстэ дэ їлэ. Налачё мануш вылэл пэхкэрэ їлэстар бибахт. Кода, со пхэрдо дэ їлэ, выджял чибатар манушэстэ. 46 Со тумэ аххарэн Ман: «Рае! Рае!» — а на терэн, сар Мэ тумэнди пхэнав? 47 Мэ пхэнава тумэнди, пэ кастэ чувэлпэ мануш, саво авэл Мандэ, ашунэл, со Мэ пхэнав, и терэл кода. 48 Вов — сар кодэва мануш, саво выганавда пхув ды барэн и ваздэня пэхкоро цэр пэ баруно фундаменто. Кала дэня пэ цэр баро пани лэнятар, вов на аравда цэр, колэсти со вов сля мишто стердо. 49 Мануш, саво шунэл Муро лав, нэ на джювэл пав лэ, чувэлпэ пэ манушэ, саво ваздэня цэр пэ пхуя. Тунчи дэня пэ цэр баро пани лэнятар, екхатар аравда кодэва цэр и фартэ розмарда лэ.

7 Кала Иусо пэрэачиля тэ дэдумэ манушэнди, Вов авиля дэ Капернаумо. 2 Котэ сля екх шэлякоро пхурэдэр. Лэхкоро бутярно, саво важ лэ сля кучотно, фартэ занасвалиля и сля пашэ мэримастэ. 3 Шэлякоро пхурэдэр шунда пала Иусо тай бичалда Лэстэ иудеенгэрэн пхурэдэрэн тэ мангэн Иусо, соб Вов тэ авэл и тэ састярэл бутярнэ. 4 Вонэ авиле Иусостэ, фартэ мангле

Лэ и пхэнэнас: — Кадэва мануш ачел, соб Ту тэ терэх важ лэ кава рындо. 5 Колэсти со Вов камэл амаро народо тай ваздэня амэнди синагога. 6 Иусо джиля лэнца. Кала Вов сля пашэ цэрэстэ, шэлякоро пхурэдэр бичалда Лэстэ англат пэхкэрэн амалэн, соб вонэ тэ пхэнэн: — Рае! На трэбуни Тути тэ цинё! Мэ на ачяв, соб Ту тэ заджях мандэ дэ цэр! 7 Нэ мэ еджино на ачяв тэ авав Тутэ. Кици пхэн лав, и састярэлапэ бутярно муро. 8 Упрэ мандар исин пхурэдэра, савэн мэ кандав. Нэ исин мандэ халавдэ, савэ ман кандэн. Пхэнав екхэсти: «Джя!» — и вов джял. Пхэнав аврэсти: «Ав!» — и вов авэл. Пхэнав мурэ бутярнэсти: «Тер!» — тай вов терэла. 9 Иусо шунда кадэла лава, прылиля пала дыво, обрисилы тай пхэнда манушэнди, савэ джянас пала Лэ: — Пхэнав тумэнди, со и дэ Израили на араклём Мэ кацаво патявимо. 10 Кала мануша, савэн бичалдэ Иусостэ, рисиле цэрэ, вонэ удыхкле, со насвало састярдапэ. 11 Тунчи Иусо джиля дэ форо, саво акхарэлпэ Наино. Джянас пала Лэ бут Лэхкэрэн сиклярнэн и фартэ бут манушэн. 12 Кала Вов поджиля форохкэрэ вударэндэ, котарь вылиджянас тэ гаравэ тэрнэ чявэ. Вов сля екх пэхкиря датэ, савятэ муля ром. Фартэ бут манушэн кодэлэ форостар джянас йтахэн лага. 13 Кала Рай удыхкля ла, Лэсти ачиль дор кадэла манушня. Тай пхэнда Вов лати: — На ров! 14 Тунчи Вов поджиля тай лиляпэ вастэга гробостэ. Мануша, савэ лиджянас гробо, ачиле. Вов пхэнда мулэсти: — Чяво! Тути пхэнав, вщи! 15 Муло ваздэняпэ, бэшля тай ачиль тэ дэдумэ. Тунчи Иусо отдэня лэ дати. 16 Пэ всавэрэн дэня бари дар. Вонэ ачиле тэ ваздэ слава Дэвлэсти тай пхэнэнас: — Баро англунари ваздэняпэ машкар амэн, и Дэвлэ авиля Пэхкэрэ манушэндэ. 17 Кади дэдумане пала Иусо пав всавири Иудея тай дэ пхуен, савэ сле пашэ. 18 Иоаннохкэрэ сиклярнэ розпхэндэ Иоанности пала кода, со стердапэ. Иоанно акхарда дон пэхкэрэн сиклярнэн 19 тай бичалда Раестэ тэ пхучен Лэстар: — Ту исин Кодэва, Касти трэбуни тэ авэ, чи трэбуни амэнди тэ дожутярэ аврэ? 20 Мурша авиле Иусостэ тай пхэндэ: — Иоанно Болдэмари бичалда амэн тэ пхуче Тут: «Ту исин Кодэва, Касти трэбуни тэ авэ, чи трэбуни амэнди тэ дожутярэ аврэ?» 21 Дэ кодыя вряма Иусо бутэн манушэн састярэлас насвалимэндар и духхэндар, вытрадэлас начачен тай бутэ корэнди оттерэлас якха. 22 Тунчи Вов пхэнда Иоаннохкэрэ сиклярнэнди: — Джян, пхэнэн Иоанности, со тумэ дыхкле тай шундэ: корэ дыххэн, лангэ пхирэн, мануша дэ проказа жужарэнпэ латар, кашукэ шунэн, мулэ оджювдён, и чёрэнди пхэнэлпэ Бахталло Лав. 23 Бахталло кодэва, ко пала Ман на змарэлапэ дромэстар. 24 Кала бичалдэ Иоанностар джиле, Иусо ачиль тэ пхэнэ манушэнди пала лэ: — Со тумэ пхирдэ тэ дыкхэ дэ шуки пхув? Чяр, сави тинисявэл барвалатар? 25 А сар на кади, ка тумэ пхирдэ тэ дыкхэ: манушэ дэ ковля йда? Нэ кодэла, савэ урявэнпэ дэ райкани йда тай джювэн дэ барвалима, бэшэн дэ тхагарнэн цэрэн. 26 Ка тумэ пхирдэ тэ дыкхэ: англунаре? Кади, пхэнав тумэнди, вов барэдэр, сар англунаря. 27 Вов кодэва, пала кастэ чиндо: «Акэ, Мэ бичалав Мурэ манушэ англа Тиро муй. Вов лачярэла дром Тиро англа Тут». 28 Пхэнав тумэнди: машкар кодэлэн, савэ джювлэндар бэнepэ, нэнай ни екхэ англунаре барэдэр Иоанностар. Нэ цыкнэдэр дэ Дэвлэхкэрэ Тхагарима исин барэдэр лэстар. 29 Всавэрэ мануша, савэ шундэ Иусо, тай стидэмаря прыджянгле, со Дэвлэхкоро дром исин чячюно. Тунчи болдэнепэ Иоаннохкэрэ болдимага. 30 А фарисея тай сиклимаря пав Упхэнима на прылиле Дэвлэхкири воля и на болдэнепэ. 31 Тунчи Рай пхэнда: — Пэ кастэ счувэлпэ кадэва родо? Пэ кастэ счувэнпэ кадэла мануша? 32 Вонэ счувэнпэ пэ чяворэн, савэ бэшэн пэ форо, акхарэн екх екхэ тай пхэнэн: «Амэ цэлдэ тумэнди пэ дудка, нэ тумэ на цэлэнас пэ пурэн. Амэ дилиябане тумэнди дилия ровимахкэрэ, нэ тумэ на ровэнас». 33 Акэ, авиля Иоанно Болдэмари, на хал мандро и на пэл мол, а тумэ пхэнэн: «Дэ лэстэ бэшэл бэнг». 34 Авиля Чяво Манушыкано, хал и пэл, а тумэ пхэнэн: «Акэ исин Мануш, Касти чялёл тэ ха и тэ пэ. Вов амал стидэмаренди тай бэзимахкэрэ манушэнди!» 35 Нэ кодэла, ко прылэн бари Дэвлэхкири годи, кадэлэга сикавэн, со када чячимо. 36 Екх фарисеи акхарда Иусо скаминдэстэ, тай Вов заджиля лэстэ дэ цэр и залиля тхан пала скаминдэ. 37 Тай акэ, екх джювли дэ бэзима кодэлэ форостар уджянгля, со Иусо дэ цэр фарисеестэ пала скаминдэ, анда алабастрово вахор кучутнэ мирога. 38 Вой вщиля павпалэ, паша Иусохкэрэн пурэн, заровиня, тай лакэрэ ясва ачиле тэ чюлэ. А вой выкхосэлас Иусохкэрэ пурэ пэхкэрэ балэнца, чюминдэлас лэн и макхэлас мирога. 39 Фарисеи, саво акхарда Иусо, удыхкля када тай пхэнда пэсти дэ гындо: «Тэ авэл Кадэва Мануш чячимага англунари, Вов бы джянэлас, сави манушни Лэстэ лэлпэ тай дэ савэ бэзима вой джювэл». 40 Иусо пхэнда лэсти: — Симоно! Камав тэ пхэнэ тути екх лав. Кодэва дэдуманя: — Пхэн, Сиклимари! 41 Иусо пхэнда: — Екхэ хулаестэ дуй мануша залиле

ловэ. Екх сля вуджило лэсти панчшэл динарии, ай авэр — пандэша. 42 Нэ сар лэндэ на сля ловэ, хулай эртисарда лэдуенди вуджилимо. Ко дуендар авэла будэр тэ камэ кадэлэ манушэ? 43 Симоно пхэнда: — Гинисарав, со кадэва, касти вов будэр эртисарда. Иусо пхэнда: — Тиро чячимо. 44 Тунчи обрисилия манушнэтэ и пхэнда Симоности: — Ту дыкхэх кадэла манушня? Мэ авилём дэ тиро цэр, и ту на дэнян Манди пани, соб Мэ пурэ тэ халавав. А вой ясвэнца обхалава Манди пурэ и выххосля лэн пэхкэрэ балэнца. 45 Ту на чюминдан Ман, а вой всавири вряма, сар Мэ заджилём дэ цэр, на прэзачел тэ чюминдэ Мурэ пурэ. 46 Ту на помакхлян Муро шэро зэтога оливкэндар, а вой пурэ Манди помакхля кучутнэ мирога. 47 Пхэнав тути: эртисардэ бут бэзима лакэрэ, кодэлэсти вой и покамля бут. Касти набут эртисарэлапэ, кодэва набут и камэла. 48 Тунчи Иусо пхэнда джювяти: — Эртисарэнпэ тути тирэ бэзима. 49 Авэр мануша, савэ сле пала скаминдэ, ачиле тэ гинисарэ: — Ко Вов Кацаво, соб бэзима тэ эртисарэ? 50 Вов жэ пхэнда манушнати: — Тиро патявимо тут фирисарда. Джя, и тэ авэл туга пачя!

8 Тунчи Иусо пхирэлас пав гавэн тай форонэн, сиклярэлас и розпхэнэлас Бахтало Лав пала Дэвлэхкэрэ Тхагарима. Паша Лэ сле дэшудуй апостолурия. 2 Сле паша Лэстэ кади ж и джювя, савэндар Вов вытрадэня налачен тай састярда насвалимастар: Мария, савя акхарэнас Магдалина и савятар выджиле эфта бэнгэн, 3 Иоанна, ромни Хузохкири, саво Иродостэ дыкхэлэс пала цэр, Сусанна и бут аврэн джювлен, савэ подрицарэнас Иусо и сиклярэнэн пэхкэрэ барвалимага. 4 Екхвар, кала паша Иусо стидэняпэ бут манушэн, савэ авэнас Лэстэ бутэ форонэндар, Вов пхэнда кацави дума: 5 — Выджиля мануш тэ чувэ ворзо дэ пхув. Кала чувэлас, екх ворзо пэля паша дром. И койсаво ворзо чирикля упралимакхэрэ похале, а койсаво мануша тасавдэ пурэнца. 6 Авэр ворзо пэля пэ барэн тай сиво бариля, нэ зашутилия, колэсти со котэ на сля пани. 7 Трито ворзо пэля машкар пусани чяр. Кодыя чяр бариля тай затасавда ворзо. 8 Штарто ворзо пэля дэ лачи пхув, ваздэняпэ тай анда барило дэ шэл молы будэр. Тунчи Иусо пхэнда зоралэ 'ласога: — Кастэ исин кана тэ шунэ, мэк шунэл! 9 Лэхкэрэ сиклярнэ пхучле Лэстар: — Сар тэ полэ кадэла лава? 10 Вов пхэнда: — Тумэнди дэно тэ джянэ чёраханэ лава пала Дэвлэхкэрэ Тхагарима. Ай аврэнди пхэнэлпэ дума, соб вонэ тэ дыкхэн и тэ на удыхкэн, тэ шунэн и тэ

на полэн. 11 Акэ сар трэбуни тэ полэ кадэла дума. Ворзо — када исин Дэвлэхкоро Лав. 12 Ворзо, саво пэля паша дром, када исин мануша, савэ шунэн Лав. Нэ лэндэ авэл баро бэнг тай чёрэл Лав лэнгэрэ 'лэндар, соб вонэ тэ на патян и тэ на фирисарэнпэ. 13 Ворзо, саво пэля пэ барэн, када мануша, савэ шунэн Лав тай прылэн лошага, нэ лэндэ нэнай корни. И набут вряма вонэ патян. Нэ кала авэл пхари вряма и вонэ зумавэнпэ, тунчи вонэ одджян Дэвлэстар. 14 Ворзо, саво пэля дэ пусани чяр, када мануша, савэ ашунэн Лав. Нэ пэ годя лэндэ кици, сар тэ джювэ пэ кадэла люмля и сар тэ затерэ барвалимо, и соб тэ авэл драго важ лэнгоро трупо. Вса када полокхэ авэл и затасавэл Лав, и мануша на анэн барило. 15 Ворзо, саво пэля дэ лачи пхув, када мануша, савэ шунэн Лав, рицарэн лэ дэ лачё и пативало 'ло, вса пэрэлиджян и кодэлэсти анэн барило. 16 Кала пхабарэн лампа, тунчи на тховэн ла тала ваххор чи тала пато. Нэ тховэн упрэ, соб мануша, савэ заджян, тэ дыкхэн одуд. 17 Нэнай нисо гаравдо, со на авэла аракхло, нэнай нисо чёрахано, со на авэла уджянгло и на выджяла аври. 18 Дыкхэн, сар тумэ шунэн! Кодэлэсти, кастэ исин, инте дэлапэ. А кастэ нэнай, лэстар залэлапэ и кода, со вов думисарэл, со лэстэ исин. 19 Тунчи авиле Иусостэ Лэхкири дэй тай Лэхкэрэ пхрала и на поджиле Лэстэ, важ кода со паша Лэ стидэняпэ фартэ бут манушэн. 20 Тай пхэндэ Лэсти: — Дэй Тири тай пхрала Тирэ ачен аври и камэн тэ дыкхэ Тут. 21 Иусо пхэнда лэнди: — Мури дэй тай Мурэ пхрала исин кодэла, савэ шунэн Дэвлэхкоро Лав и терэн кади, сар вов пхэнэл. 22 Екхвар Иусо заджиля дэ лодка Пэхкэрэ сиклярнэнца тай пхэнда лэнди: — Авэн пэ авэр риг. Тай лагле. 23 Кала вонэ джянас пав пане пэ лодка, Иусо засута. Ваздэняпэ бари барвал пэ пане, лодка пхэрдэня панега, и вонэ ачиле тэ тасё. 24 Поджиле Иусостэ, джюнгавдэ Лэ и пхэндэ: — Сиклимари! Сиклимари! Амэ хасявах! Иусо вщиля, запхэнда барваляти и барэ панести, саво ваздэлэспэ. Тунчи барвал и пани улилэпэ, и вса заачилия мулком. 25 Тунчи Иусо пхэнда сиклярнэнди: — Тев тумаро патявимо? Вонэ фартэ дарэне, и лэнди на заджялас дэ шэрэ, со када терэлпэ. И вонэ кици пхэнэнас екх екхэсти: — Ко исин Кадэва, со и барваляти запхэнэл, и панести, и вонэ кандэн Лэ? 26 Тай авиле дэ пхув Гераса, сави исин пэ авэр риг Галилеятар. 27 Кала Иусо выджиля лодкатар, авилия Лэстэ форостар екх мануш, дэ савэ бэшэнас бэнга. Вов бут вряма пхирэлас нанго и джювэлас на дэ цэр, нэ дэ

склепо, тев мулэн гаравэнас. 28 Кала вов удыхля Исусо, чуталэ Лэхкэрэ пурэндэ тай затиписия зоралэ гласога: — Со Тути трэбуни мандар, Исусо, Чяво Дэвлэ Барэдэрэхкэрэ? Мангав Тут, на тер манди бида! 29 Вов типисия, колэсти со Исусо прыпхэнда нажужэсти тэ выджял манушэстар. Ай нажужо бут вряма марэлас кадэлэ манушэ, кади, со пхэндэнас лэхкэрэ васта и пурэ ланцога и дыкхэнас пала лэ. Нэ вов розчинэлас ланцуря, и бэнг традэлэс лэ дэ мален. 30 Исусо пхучля лэстар: — Сар тиро лав? Вов пхэнда: — Легионо, — колэсти со бут бэнгэн заджиле дэ лэ. 31 Тай мангле Исусо, соб Вов тэ на бичалэл лэн дэ хасютно тхан. (Abyssos g12) 32 Котэ пэ плай чяравэнаспэ фартэ бут балэн, тай бэнга мангле Исусостар, соб лэнди тэ заджя дэ балэн. Исусо домукля лэнди. 33 Бэнга выджиле манушэстар тай заджиле дэ балэн. Тунчи всавэрэ балэ чутэпэ плаэстар дэ пане тай потасиле. 34 Чукняря, савэ чяравэнас балэн, удыхкле, со тердалэ, и тунчи прастэне и розпхэндэ пала кода дэ форо и пав гавэн. 35 Кала стидэнепэ мануша, соб тэ дыкхэ, со тердалэ, воне авиле Исусостэ тай дыкхле, со мануш, дэ кастэ сле бэнга, бэшэл дэ пурэн Исусостэ, урявдо и дэ пэхкиря годя, тай фартэ дарэне. 36 Ай кодэла, савэ еджинэ дыкхле, сар вса от када тердалэ, розпхэндэ лэнди, сар састярдалэ мануш, дэ савэ сле бэнга. 37 Всавэрэ мануша кадэла пхуятар, сави акхарэллэ Гераса, мангле Исусо, соб Вов тэ джял лэндар, колэсти со фартэ дарэне. Вов заджила дэ лодка тай рисия павпалэ. 38 Мануш, дэ савэ сле бэнга, мангя тэ джял лэсти Исусога. Нэ Исусо отмукля лэ тай пхэнда: 39 — Рисяв пэстэ цэрэ и розпхэн, со терда туга Дэвлэ. Мануш джила и всавэрэнди дэ форо розпхэнэлас, со терда лэсти Исусо. 40 Кала Исусо рисия павпалэ, мануша прылиле Лэ, колэсти со вонэ дожутярэнас Исусо. 41 Тай акэ, авиля екх мануш, савэ акхарэнас Иаиро и саво сля пхурэдэр дэ синагога. Вов тэлэдэня Исусости дэ пурэн тай мангя, соб Исусо тэ авэл лэстэ цэрэ. 42 Кадэлэ манушэстэ сля кици екх чей, савяти сля пашэ дэшудуй бэрш, и вой мэрэлас насвалимастар. Исусо джила лэстэ, и мануша всавэрэ ригэндар стасавэнас Лэ. 43 Машкар кадэлэн манушэн сля екх джювли, савятар дэшудуй бэрш джила рат. Вой отдэня састимаренди вса, со латэ сля, нэ нико ла на састярда. 44 Тунчи вой поджила павпалэ, лиляпэ подятэ Исусохкиря їдатар, и екхатар рат пэрэачила тэ джя. 45 Исусо пхучля: — Ко лиляпэ Мандэ? Нэ нико на прыджянгляпэ.

Тунчи Пётро пхэнда: — Сиклимари! Бут манушэн пашэ Тут и всавэрэ ригэндар Тут стасавэн. 46 Нэ Исусо пхэнда: — Койсаво мануш лиляпэ Мандэ, и Мэ шундом, со Мандар выджиле зор. 47 Кодыя джювли удыхля, со лати на выджиле тэ гаравэлэ, затинисия, поджила Исусостэ, тэлэдэня Лэсти дэ пурэн тай розпхэнда англа всавэрэн манушэн, сости вой лиляпэ Исусостэ и сар екхатар састярдалэ насвалимастар. 48 Исусо пхэнда лати: — Чей! Тиро патявимо тут састярда. Джя, и мэк авэл туга пачя! 49 Кала Вов инте пхэнэлэс кадэла лава, авиля екх мануш цэрэстар, тев джювда пхурэдэр дэ синагога, тай пхэнда лэсти: — Тири чей муля. Будэр на замисар Сиклимаре! 50 Нэ Исусо шунда када тай пхэнда лэсти: — На дар, кици патя, и тири чей састярэлапэ. 51 Кала авиле дэ цэр, Исусо запхэнда тэ заджя пордэ манушэнди, а лиля Пэга кици Петро, Иаково тай Иоанно и чиёракэрэн дадэ и да. 52 Всавэрэ ровэнас тай марэнас пэ дэ колинэн дэ баря грыжа. Нэ Исусо пхэнда лэнди: — На ровэн! Вой на муля, вой совэл. 53 И асанас Лэстар. Вонэ ж джянгле, со чиёры сля мули. 54 Нэ Исусо лиля чиёра пала вастэ тай пхэнда: — Вщи, чиёры! 55 Тай рисия лакоро фано, и чиёры екхатар вщиля. Тунчи Исусо пхэнда, соб тэ дэн лати тэ ха. 56 Лакэрэ дадэ и дэй прылиле када пала дыво, нэ Исусо запхэнда лэнди тэ розпхэнэ пала кода, со стердалэ.

9 Тунчи Исусо акхарда Пэхкэрэн дэшудуен апостолонэн и дэня лэнди бари зор тэ вытрадэ бэнгэн и тэ састярэ насвалимэндар. 2 Тунчи бичалда лэн тэ розпхэнэ пала Дэвлэхкэрэ Тхагарима и тэ састярэ насвалэн. 3 Вов пхэнда лэнди: — Нисо на лэнтэ дэ дром: ни дэсто, ни траста, ни мандро, ни рупь, ни инте екх гад. 4 Дэ саво цэр тумэ заджяна, котэ аченпэ и котарь джян дэ дром. 5 А кала тумэн на прылэна, тунчи джян кодэлэ форостар тай обмарэн прахо тумарэ пурэндар. И мэк кода авэла шпэра важ лэн. 6 Вонэ джиле пав гавэн, пхэнэнас Бахтало Лав и пав всавэрэ тхана састярэнас насвалэн. 7 Дума пала кода вса доджила Иродостэ, саво сля тетрархо. Вов на джянгля, сар када тэ полэ. Койсавэ мануша пхэнэнас, со када Иоанно Болдэмари отджювдиня мулэндар. 8 Авэр пхэнэнас, со када Илья авиля, а тритэ — со отджювдиня екх думутнэ англунарендар. 9 Тай пхэнда Иродо: — Мэ отчиндом шэро Иоанности, а ко исин Кадэва, пала Ка мэ шунав? И родэлэс тэ дыкхэ Исусо. 10 Апостолурия рисиле Исусостэ и розпхэндэ Лэсти,

со вонэ тердэ. Вов стидэня лэн, и вонэ джиле форостэ, саво акхарэлпэ Вифсаида, еджинэ, би манушэн. 11 Нэ мануша уджянгле пала кода тай джиле пала Исусо. Вов прылила лэн тай дэдуманя лэнца пала Дэвлэхкэрэ Тхагарима. И касти сля трэбуни тэ састярэпэ, Вов састярэлас. 12 Кала диво сля пашэ рятятэ, дэшудуй апостолурия поджиле Исусостэ тай пхэндэ Лэсти: — Отмук манушэн, мэк джан вонэ дэ пашунэн гаворэн и гавэн, тэ аракхэн, тев лэнди тэ рятярэ и со лэнди тэ ха. Кодэлэсти со амэ катэ дэ шуки пхув. 13 Исусо пхэнда лэнди: — Тумэ дэн лэнди тэ ха. Вонэ пхэндэ: — Амэндэ исин кици панч мандрэ и дуй маче. Чи амэнди тэ джа тай тэ тинэ всавэрэнди хамо? 14 А котэ стидэнепэ кици екхэн муршэн пашэ панч пхангя. Исусо пхэнда Пэхкэрэ сиклярнэнди: — Пхэнэн манушэнди, мэк розмарэнпэ пав пандэша манушэн и бэшэн. 15 Вонэ тердэ кади, и всавэрэ бэшле. 16 Исусо лила панч мандрэ и дуй маче, подыкхля дэ упралима, наисарда Дэвлэ пала хама, розпхагя мандро и мачё пэ которэн тай дэня сиклярнэнди, соб вонэ тэ роздэн манушэнди. 17 Всавэрэ хале и чялиле, и стидэне дэшудуй трасты которэнца, савэ ачилепэ. 18 Екхвар, кала Исусо ачиляпэ Еджино и мангляпэ, сиклярнэ поджиле Лэстэ. Тунчи Исусо пхучля лэндар: — Пала кастэ динэн Ман мануша? 19 Вонэ пхэндэ: — Пала Иоанно Болдэмарэ, ай авэр — пала Илья. А тритэ пхэнэн, со када отджювдиня екх думутнэ англунарендар. 20 Вов пхучля лэндар: — А тумэ пала ка Ман прылэн? Пётро пхэнда: — Пала Христо Дэвлэхкэрэ. 21 Нэ Исусо запхэнда лэнди тэ дэдумэ пала кода. 22 Тунчи Вов дэдуманя лэнди, со Манушыканэ Чявэсти трэбуни авэла тэ ха бари gryжа, со Лэстар отпхэнэнпэ пхурэдэра, англуэнэ рашая тай сиклимаря пав Упхэнима, со Лэ умарэна, нэ пэ трито диво Вов отджювдэла мулэндар. 23 А всавэрэнди пхэнда: — Кала ко камэл тэ джа пала Ман, тунчи отпхэнпэ еджино пэстар, лэ пэхкоро трушул кожно диво и джа пала Ман. 24 Ко камэл тэ фирисарэ пэхкоро води, кодэва хацарэла лэ. А ко хацарэла пэхкоро води важ Ман, кодэва сфирисарэла лэ. 25 Сави бахт кодэлэстар, со мануш затерэла всавиря люмля, а еджино хасявэла чи терэла пэсти беда? 26 Ко ладжяла Мандар чи Мурэ лавэндар, кодэлэстар ладжяла и Чяво Манушыкано, кала авэла дэ Пэхкири слава, дэ слава Дадэхкири и свэнтононэ ангелонэнгири слава. 27 Чячимага пхэнав тумэнди: ачен катэ мануша, савэ инте ды мэрима дыкхэна Дэвлэхкоро Тхагаримо. 28 Кала проджила пашэ охто дивэ, Исусо лила Пэга Пётро, Иаково тай Иоанно и

джиля пэ плай тэ мангэпэ. 29 И кала мангляпэ, парувдалэ англа лэн муй Лэхкоро, тай йда Лэхкири кади парниля, со духхано сля тэ дыкхэ. 30 Тай акэ, авиле дуй мурша, савэ дэдумане Лэга. Када сле Моисеи тай Илья. 31 Вонэ авиле дэ бари слава и пхэнэнас, со Исусости трэбуни авэла тэ джа дэ Ерусалимо и тэ ачявэ кадья люмля. 32 Пётро и кодэла, савэ сле лэга йтханэ, совэнас, а кала джюнгавдэпэ, удыхкле слава Исусохкири и дон муршэн, савэ аченас Лэга. 33 Кала мурша ачиле тэ уджя, Пётро пхэнда Исусости: — Сиклимарь! Сар мишто амэнди катэ! Тховага трин катуны, екх Тути, екх Моисеести и екх Ильясти. Ай еджино на полэлас, со пхэнэл. 34 И кала вов инте дэдуманя, авиля хмара и ушарда лэн упрал. Кала ж вонэ ачиле дэ хмара, лэн облиля бари дар. 35 Тай сля шундо йласо хмаратар: — Када Чяво Мурэ вытидэно. Шунэн Лэ! 36 Кала йласо пэрэачилэ тэ дэдумэ, Исусо ачиляпэ Еджино. И сиклярнэ аченас мулком и никасти на розпхэнэнас, со дыкхле дэ кодья вряма. 37 Пэ авэр диво, кала вонэ сджнянас плаестар, авиля Исусостэ гроза манушэн. 38 Екх мануш типисилэ: — Сиклимарь! Мангав Тут, подыхк пэ мурэ чяворэ! Мандэ вов екхоро исин. 39 Дэ лэстэ заджял бэнгано фано и чяворо ачел тэ типисявэ. Нажужо марэл чяворэ кади, со лэхкэрэ мостар чюлён саля. И вов дэл тэ ха чяворэсти бари gryжа, и пхаро отмукул лэ. 40 Мэ манглём Тирэ сиклярнен, соб вонэ тэ выпрадэн нажужэ, нэ лэндэ нэнай зора. 41 Исусо пхэнда: — Мануша бипатявнэ и родо мусардэ йлэнца! Скици инте тэ авэ тумэнца? Скици инте тэ вырицарав тумэн? Ан кордэ пэхкэрэ чявэ! 42 Кала чяворо джялас Исусостэ, бэнг аравда лэ пэ пхув тай ачиля тэ марэ. Тунчи Исусо запхэнда нажужэсти, састярда чяворэ и отдэня лэ дадэсти. 43 Всавэрэ дэнас дыво кодэлэсти, саво баро Дэвлэ. И кала вонэ дэнас дыво кодэлэсти, со терда Исусо, Вов пхэнда Пэхкэрэ сиклярнэнди: 44 — Тховэн дэ тумарэ канэн кадэла лава: Чявэ Манушыканэ сиво здэна манушэнди дэ вастэн. 45 Нэ вонэ инте на полиле, пала со Исусо дэдуманя. Лэнгири годи инте сля затерди, а тэ пхуче Исусостар, сар тэ полэ Лэхкоро лав, вонэ даранас. 46 Екхвар Лэхкэрэ сиклярнэ ачиле тэ халэ екх екхэга пала кода, ко лэндар исин барэдэр. 47 Исусо джангя, со лэндэ пэ годен, тунчи Вов лиля цыкнэ чяворэ тай тховда паша Пэстэ. 48 Тай пхэнда сиклярнэнди: — Ко прылэла кадэлэ чяворэ важ Мурэ Лавэ, кодэва Ман прылэла. Ай ко прылэла Ман, прылэла Кодэлэ, Ко Ман бичалда. Ко тумэндар исин цыкнэдэр

всавэрэндар, кодэва авэла всавэрэндар барэдэр. 49 Тунчи Иоанно пхэнда Лэсти: — Сиклимари! Амэ дыкхле манушэ, саво вытрадэл бэнгэн Тирэ Лавэга, и запхэндэ лэсти кади тэ терэ. Кодэлэсти со вов на пхирэл амэнца їтханэ. 50 Исусо дэдуманя: — На запхэнэн лэсти. Кодэла, савэ на ваздэнпэ пэ тумэн, кодэла пала тумэн. 51 Кала поджялас вряма тэ ваздэпэ Исусости пэ упралима, Вов лиля Пэсти дэ гындо тэ джя дэ Ерусалимо. 52 Тунчи Исусо бичалда англал Пэстэ манушэн, и вонэ авиле дэ гав Самариякоро, соб вса важ Лэ тэ лачярэ. 53 Нэ самарянура на прылиле Исусо, колэсти со Вов джялас дэ Ерусалимо. 54 Кала Исусохкэрэ сиклярнэ Иаково тай Иоанно дыкхле кода, вонэ пхэндэ: — Рае! Камэх, амэ пхэнага, соб тэ сджял яг упралимастар и тэ спхабарэл лэн? 55 Нэ Исусо обрисиля лэндэ тай запхэнда када тэ терэ. И джиле дэ авэр гав. 57 Кала вонэ джянас пав дром, екх мануш пхэнда Исусости: — Мэ джява пала Тут, курик Ту тэ на джях. 58 Исусо пхэнда лэсти: — Рувэндэ исин тхан, тев вонэ отцинён, и чириклендэ кади ж. Ай Манушыканэ Чявэстэ нэнай тхан, тев шэро тэ притховэ. 59 Аврэ манушэсти Исусо пхэнда: — Джя пала Ман! Кодэва пхэнда: — Рае! Мук ман майанглал тэ гаравав мурэ дадэ! 60 Исусо пхэнда лэсти: — Мэк мулэ гаравэн пэхкэрэн мулэн, а ту джя тай розпхэн пала Дэвлэхкэрэ Тхагарима! 61 Трито мануш пхэнда Исусости: — Рае! Мэ джява пала Тут, нэ дэ манди майанглал тэ джяв и тэ дыкхав муро їри. 62 Исусо пхэнда лэсти: — Мануш, саво лэлпэ пала плуго, нэ обрисявлэлпэ павпалэ, на поджял важ Дэвлэхкэрэ Тхагарима.

10 Тунчи Рай Исусо вытидэня эфтадэша аврэн сиклярнэн тай бичалда лэн пав дуй англал Пэстар дэ всавэрэн форонэн и тханэн, тев Еджино камля тэ авэ. 2 И пхэнда лэнди: — Ваздэняпэ бут мандро пэ мален, а бутярнэн набут. Важ кода мангэн Хулае малякэрэ, соб Вов тэ бичалэл бутярнэн, тэ злэн див малендар. 3 Джянтэ! Мэ бичалав тумэн, сар бакрэн машкар рувэн. 4 На лэн пэга ни тышыла, ни траста, ни пундрангэ. И пав дромэ на наисарэнпэ манушэнца. 5 Дэ саво цэр заджяна, майанглал пхэнэн: «Пачя кадэлэ цэрэсти!» 6 Кала котэ джювэл мануш, саво камэл пачя, кадья пачя ачела пэ лэстэ. А кала нат, тумари пачя рисявэла тумэндэ павпалэ. 7 Аченпэ дэ кодэлэ цэрэ, хантэ тай пэнтэ кода, со тумэнди дэна. Бутярно мануш ачел кода, соб лэсти тэ потинэн важ лэхкири бути. На пэрэджян цэрэстар дэ цэр. 8 Кала

авэна дэ форо и прылэна тумэн котэ, хантэ вса, со тумэнди дэна. 9 Састярэн лэнгэрэн насвалэн и пхэнэн лэнди: «Надур тумэндар Дэвлэхкоро Тхагаримо». 10 Кала авэна дэ форо тай на прылэна тумэн котэ, тунчи джян пэ гаса и пхэнэн: 11 «И прахо, саво прыачили амарэ пурэндэ дэ тумаро форо, амэ обмарах. Нэ джянэн, со надур тумэндар Дэвлэхкоро Тхагаримо». 12 Пхэнав тумэнди, дэ кодэва диво форости Содомо авэла локхэдэр, сар кадэлэ форости. 13 Бида тути, форо Хоразино! Бида тути, форо Вифсаида! Тэ дыкхэн форура Тиро тай Сидоно дывурия, савэ сле тумэндэ, вонэ б думут обрисявэнаспэ пэхкэрэ бэзимастар, урявэнаспэ дэ їда гонэндар и бэшэнас дэ прахо. 14 Нэ Тирости и Сидоности пэ сындэ авэла локхэдэр, сар тумэнди. 15 И ту, форо Капернаумо, гинисарэх тэ ваздэпэ упрэ? Ту дэ адо тэлэдэга. (Hades g86) 16 Кодэва, ко шунэла тумэн, кодэва Ман шунэла, и ко отпхэнэлпэ тумэндар, отпхэнэлпэ Мандар. А ко отпхэнэлпэ Мандар, отпхэнэлпэ и Кодэлэстар, Ко Ман бичалда. 17 Эфтадэша сиклярнэн рисиле баря лошага тай пхэндэ: — Рае! И бэнга кандэн амэн важ Тиро Лав! 18 Исусо пхэнда лэнди: — Мэ дыкхлём, сар сатана тэлэдэня упралимастар кади, сар тэлэдэл молния. 19 Акэ, дав тумэнди зор тэ тасавэ пурэнца салэн и скорпионэн, и тэ чувэ пэ пхув врыжымашэн, и нисави бибахт вонэ тумэнди на терэна. 20 Кици лошаваэн на колэсти, со фанура кандэн тумэн, а колэсти, со тумарэ лава зачиндэ пэ упралима. 21 Тунчи Исусо лошыля дэ Свэнтэ Фано тай пхэнда: — Наисарав Тут, Дадэ, Тхагари пэ пхуя и пэ упралима, со Ту оттердан цыкнэнди гаравдо їрвалэндар и годявэрэндар. Кади, Дадэ! Кацави сля Тири лачи воля! 22 Вса дэно Манди Мурэ Дадэстар. Нико на джянэл Чявэ, кици Дад, и нико на джянэл Дадэ, кици Чяво и кодэла, касти Чяво камэл тэ сикавэ Дадэ. 23 Тунчи обрисиля сиклярнэндэ тай пхэнда лэнди: — Бахталэ якха, савэ дыкхэна кода, со тумэ дыкхэн екхатар! 24 Пхэнав тумэнди, со бут ко англунарендар тай тхагарендар камле тэ дыкхэ кода, со тумэ акана дыкхэн, нэ на дыкхле. Камле тэ шунэ кода, со тумэ акана шунэн, нэ на шундэ. 25 Тунчи екх сиклимарендар пав Упхэнима вщиля, соб тэ зумавэ Исусо, тай пхучля: — Сиклимари! Со манди тэ терэ, соб тэ авэл мандэ вечно джювимо? (aiōnios g166) 26 Исусо пхэнда лэсти: — Сар чиндо дэ Упхэнима? Сар ту полэх? 27 Кодэва пхэнда: — Кам тирэ Рае Дэвлэ всавэрэ тирэ їлэга и всавэрэ тирэ водега, всавирия тиря зорага и всавирия годяга. И кам тирэ пашунэ, сар еджино пэ камэх. 28 Исусо

дэдуманя: — Чячимо ту пхэндан. Тер кади и авэга тэ джювэ. 29 Нэ кодэва камля тэ допхэнэ пэхкоро и пхучля Исусостар: — А ко исин муро пашуно? 30 Исусо пхэнда: — Екх мануш джиля Ерусалимостар дэ Ерихоно. Тай хутилдэ лэ прахаря, злиле лэстар їда, домардэ лэ и джиле, а вов ачиляпэ тэ пашлэ епашмуло. 31 Вьджиля кади, со трэбуни сля тэ джя кодэлэ дромэга рашаести. Вов удыххля кадэлэ манушэ, пэрэджиля пэ авэр риг и проджиля мамуй. 32 Джялас котэ и левито, удыххля манушэ, пэрэджиля пэ авэр риг и проджиля мамуй. 33 Екх самарянино ладэлас кодэлэ дромэга, удыххля манушэ, и ачиля лэсти дор лэ. 34 Вов поджиля манушэстэ, упрал чута мол, помакхля духхавдэ тхана зэтога тай пэрэпхангя лэн. Тунчи тховда лэ пэ пэхкэрэ мугаре, анда дэ гостиница тай прыдыкхэлэс пала лэ. 35 Пэ авэр диво, кала трэбуни лэсти сля тэ уладэ, вов дэня хулаести дуй динарии тай пхэнда: «Прыдыкх пала кадэлэ манушэ, а кала джяна будэр ловэ, мэ дава тути инте, кала рисявава павпалэ». 36 Ко тринэндар сля пашуно манушэсти, савэ домардэ прахаря, сар ту гинисарэх? 37 Сиклимари пав Упхэнима пхэнда: — Кодэва, ко терда манушэсти лачимо. Тунчи Исусо пхэнда лэсти: — Джя и ту тер кади! 38 Кала вонэ джянас дурэдэр, Исусо заджиля дэ екх гав. Котэ манушни, савя акхарэнас Марфа, прылиля Лэ дэ пэхкоро цэр. 39 Латэ сля пхэнь Мария. Вой бэшля паша пурэн Раестэ тай шунда Лэхкэрэ лава. 40 Марфа ж змардалэ пурэндар, соб тэ тховэ баро скаминд. Тунчи поджиля Исусостэ и пхэнда: — Рае! Чи ту на дыкхэх, со мури пхэнь всавири бути ачявда пэ ман? Пхэн лаги, мэк терэл манца. 41 Рай Исусо пхэнда: — Марфа! Марфа! Бут пала со ту думисарэх, и бут пала со тутэ дукхал шэро. 42 Нэ кици екх трэбуни. Мария ж вытидэня кода, со фэдэр, и када латар на залэлэпэ.

11 Екхвар Исусо мангяпэ, ай кала пэрэачиля, екх Лэхкэрэ сиклярнэндар пхэнда Лэсти: — Рае! Сикляр амэн тэ мангэпэ, сар Иоанно сиклярда пэхкэрэн сиклярнэн! 2 Исусо пхэнда лэнди: — Кала мангэпэ, пхэнэн: Дадэ! Мэк тэ свэнцолпэ Лав Тиро! Мэк авэл Тхагаримо Тиро! 3 Пэ кожно диво мандро амэнди дэ авдивутно. 4 И бэзимо амаро эртисар амэнди, сар и амэ дош эртисарах кодэлэнди, ко исин амэнди вуджилэ. И на домук, соб тэ змарахпэ дромэстар. 5 Тунчи Исусо пхэнда лэнди: — Кала вариго тумэндар авэла рятяга амалэстэ тай пхэнэла лэсти: «Морэ! Залэ манди трин питы мандро. 6 Амал дромэстар

заджиля мандэ, и нэнай мандэ, со тэ дав лэсти тэ ха». 7 Чи пхэнэла амал тиро тути андрал: «На замисар ман! Мэ вудара затердом, и мурэ чяворэ совэн манца. Нисар манди тэ вше и тэ дэ тути мандро?» 8 Пхэнав тумэнди: кала на вщела и на дэла тути мандро, сар амал тиро, тунчи вщела и дэла тути кодэлэсти, со ту на пэрэачех тэ мангэ. 9 И Мэ пхэнав тумэнди: мангэн — и Дэвэл дэла тумэнди, родэн — и тумэ аракхэна, марэн дэ вудара — и Дэвэл оттерэла тумэнди. 10 Акэ, кожно, ко мангэл — лэл, кодэва, ко родэл — аракхэл. И кодэлэсти, ко марэла дэ вударэн, — Дэвэл оттерэла. 11 Чи исин машкар тумэн кацаво дад, саво подэла пэхкэрэ чяворэсти сапэ, кала вов мангэл лэстар мачэ? 12 И саво дад подэла чяворэсти скорпионо, кала вов мангэл дадэстар парноро? 13 Кала тумэ, мижэ мануша, джянен, сар тэ терэ лачимо тумарэ чяворэнди, тунчи пэ скици будэр Дад Упралимастар дэла Свэнто Фано кодэлэнди, савэ мангэн Лэстар? 14 Екхвар Исусо вытрадэня бэнгэ, саво терэлэс манушэ лалэга. Кала бэнг выджиля, лало мануш ачиля тэ дэдумэ, а всавэрэ мануша прылиле када пала баро дыво. 15 А койсавэ лэндар дэдумане: — Вов вытрадэл бэнгэн зорага, сави дэл Лэсти Веельзевуло, барэдэр бэнгэнгоро. 16 Авэр мануша зумавэнас Лэ и мангле Лэстар шпэра упралимастар. 17 Нэ Исусо джянгя лэнгоро гындо тай пхэнда лэнди: — Тхагаримо, дэ савэ ханпэ екх екхэга, авэла шушо. Тай цэр, дэ савэ ханпэ екх екхэга, розпхагэлапэ. 18 И кала сатана халпэ еджино пэга, тунчи сар выачела лэхкоро тхагаримо? Тумэ пхэнэн, со Мэ вытрадав бэнгэн зорага, сави дэл Манди Веельзевуло. 19 А кала Мэ вытрадав бэнгэн зорага, сави дэл Манди Веельзевуло, тунчи савя зорага вытрадэн бэнгэн тумарэ сиклярнэ? Кодэлэсти вонэ сундисарэна тумэн. 20 А кала Мэ вытрадав бэнгэн Дэвлэхкиря зорага, тунчи тумэндэ авиля Дэвлэхкоро Тхагаримо. 21 Кала зорало мануш дэстэнца и чюренца дыкхэл пала пэхкэрэ цэрэ, лэхкоро хулаимо нико залэла. 22 Нэ кала авэла зорэдэр лэстар, тунчи марэла лэ, залэла лэстар дэста и чюря, пэ савэн лэстэ сля надия, и всаворо лэхкоро барвалимо роздэла. 23 Ко на їтханэ Манца, кодэва ваздэлпэ пэ Ман. Ко на стидэл Манца, кодэва розчувэл. 24 Кала нажужо выджяла манушэстар, тунчи пхирэл пав бипаненгирэн тханэн, родэл тхан, тев лэсти тэ отчинэ, нэ нисар на аракхэл. Тунчи пхэнэл: «Рисявава павпалэ дэ муро цэр, катарь мэ выджилём». 25 А кала авэл павпалэ, дыкхэл, со цэр шулавдо и прытидо. 26

Тунчи джял, акхарэл пэстэ эфта аврэн нажужэн, мижэдэр пэстар, и вонэ заджян тай джювэн котэ. И кода авэла важ манушэ инте шымай, сар сля. 27 Кала Исусо дэдуманя кадэва лав, екх манушни лэнгэрэ стидэмастар затиписила зоралэ ҕласоҕа: — Бахтали джювли, сави бэня Тут и парварда! 28 Исусо пхэнда: — Нат, на кади! Бахталэ кодэла, савэ шунэн Дэвлэхкоро Лав и джювэн кади, сар вов пхэнэл! 29 Кала инте будэр манушэн стидэняпэ паша Исусостэ, Вов ачилэ тэ дэдүмэ: — Кадэва родо — хохавно. Вов родэл пэсти шпэра, нэ лэсти авэла кици шпэра Ионахкири. 30 Сар Иона ачилэ шпэра важ манушэн Ниневиятар, кади Чяво Манушыкано авэла шпэра важ кадэва родо. 31 Тхагарни югостар ваздэлапэ пэ сындэ ҕтханэ кадэлэ родоҕа и дошарэла лэ, колэсти со вой авилия авря ригакиря пхуятар тэ пошунэ годявэр лава Соломонохкэрэ. Нэ акэ, катэ Кодэва, Саво исин барэдэр Соломоностар. 32 Мануша Ниневиятар ваздэнапэ пэ сындэ ҕтханэ кадэлэ родоҕа и дошарэна лэ. Колэсти со вонэ ачявдэ пэхкэрэ бэзима, кала Иона пхэнэлэс лэнди лав Дэвлэстар. Нэ акэ, катэ Кодэва, Саво барэдэр Ионастар. 33 Кала мануш запхабарэл лампа, вов на тховэл ла ни дэ граждо, ни тала вакхор, нэ тховэл ла упрэ, соб лакири яг тэ дэл душлимо манушэнди, савэ заджян. 34 Якха — када лампа важ тиро трупэ. Кала якха тутэ жужэ, тунчи дэ трупэ тиро пхэрдо одуд. А кала якха тутэ налаче, тунчи и дэ трупэ тиро авэла пхэрдо калимо. 35 Кади дыкх: одуд, саво дэ тут исин, соб тэ на авэл вов калимаҕа. 36 Кала дэ тиро трупэ исин одуд и нэнай калимо, тунчи ту всаворо жужо, пхэнэҕа, сар душлимо лампатар марэл пэ тут. 37 Кала Исусо пхэнда кадэла лава, екх фарисеендар акхарда Лэ пэстэ тэ ха. Исусо авилия лэстэ и залиля тхан пала скаминдэ. 38 Фарисеи удыхля, со Вов на халавда васта англа колэ, сар тэ ха, и дэняпэ дыво. 39 Нэ Рай пхэнда лэсти: — Акэ тумэ, фарисея, жужарэн аврял тахтая тай чярэ, нэ андрал тумэндэ пхэрдо ханджывалимо тай вурьитимо. 40 Бигодякэрэ! Кодэва, Саво стерда кода, со аврял, чи на стерда кади ж и кода, со андрал? 41 Кала тэ пхэнэ пала кода, со андрал, тунчи подэн боҕудэенди ҕлэстар, и вса тумэндэ авэла жужо. 42 Нэ бида тумэнди, фарисея! Тумэ дэн Дэвлэсти дэшто котор чярэндар мята и рута и всавэрэстар, со барёл тумэндэ пэ баря, нэ бистарэн чячюно сындэ и Дэвлэхкоро камавино. Трэбуни и када тэ терэ, и пала кода тэ на бистарэ. 43 Бида тумэнди, фарисея! Тумэ камэн тэ бэшэ пэ англунэн тханэн дэ синагоги, и чялёл тумэнди, кала пэ форо мануша наисарэнпэ тумэнца. 44 Бида тумэнди! Тумэ сар могилы, савэ на душон, пав савэн пхирэн мануша и на джянэн. 45 Екх сиклимари пав Упхэнима шунда кадэла лава и пхэнда Лэсти: — Сиклимари! Кадэлэ лавэнца Ту и амэн кошэх. 46 Нэ Исусо пхэнда: — Бида и тумэнди, сиклималя пав Упхэнима! Тумэ чувэн пэ манушэн баро пхаримо, саво нащи тэ подваздэ, а еджинэ и ангуштэҕа лэстэ на лэмпэ. 47 Бида тумэнди! Тумэ ваздэн пэ кладбищен памятникурия англунаренди, савэн мулярдэ тумарэ дада! 48 Тумарэ дада мулярэнас англунарен, а тумэ ваздэн лэнди памятникурия. Кадэлэҕа тумэ сикавэн, со тумэ цырдэн васта пала тумарэн дадэн. 49 Колэсти пхэнэл Дэвлэхкири годи: «Бичалава лэндэ англунарен и апостолонэн. Екхэн вонэ мулярэна, а аврэн авэна тэ вытрадэ». 50 Колэсти пхучелалэ кадэлэ родостар пала англунаренгоро рат, саво сля прочуто кодэла вряматар, сар Дэвэл терда люмля. 51 Ратэстар, саво прочута Авели, ды Захарияхкэрэ ратэ, кала лэ умардэ машкар храмо и жэртвеннико. Чячиммаҕа пхэнав тумэнди, пхучелалэ кадэлэ родостар. 52 Бида тумэнди, сиклималя пав Упхэнима! Тумэ залиле тии вударэндар, савэ лиджян джянимастэ. Нэ и еджинэ на заджиле, и аврэн, савэ камле тэ заджя, на мукле. 53 Кала Исусо джиля котарь, сиклималя пав Упхэнима и фарисея фартэ мижыле пэ Лэстэ тай ачиле тэ долэ Исусо и тэ пхуче Лэстар бут пала со. 54 Вонэ родэнас, сар тэ астарэ Исусо пэ лавэн.

12 Екхвар стидэняпэ бут пхангля манушэн, кади бут, со ачиле тэ тасавэ екх екхэ. Исусо ачилэ тэ дэдүмэ англэдэр Пэхкэрэ сиклярнэнди: — Ричарэнпэ дурэдэр фарисеенгэрэ закваскатар, соб тэ на авэн тумэ домуенгэрэ мануша, сар вонэ. 2 Нэнай нисо гаравдо, со б тэ на оттерэллэ, и нэнай чёрахано, со б тэ на авэл уджянгло. 3 Кода, со тумэ пхэндэ рятяҕа, шунэна дивэсэ, и со тумэ чёраханэ пхэндэ дэ цэр, пхэнэна зоралэ ҕласоҕа пэ ушарди. 4 Пхэнав жэ тумэнди, Мурэ амалэнди: на даран кодэлэндар, савэ умарэн трупэ, а будэр нисо на терэна. 5 Нэ сикавава тумэнди, кастар трэбуни тэ дара: даран Кодэлэстар, Кастэ исин зор на кици тэ мулярэ, нэ тэ чувэ дэ геенна. Кади, пхэнав тумэнди, Кодэлэстар даран. (Geenna g1067) 6 Пала дүй харумэ мардэ тинэн панч чириклен. Нэ ника лэндар Дэвэл на бистарда. 7 А тумэндэ Вов джянэл, и скици бала исин пэ тумаро шэро. На даран! Тумэ пэ бутэ кучэдэр цыкнэн чириклен! 8 Пхэнав

жэ тумэнди: кодэлэ, ко прыджанэла Ман англа манушэн, прыджанэла и Чяво Манушыкано англа Дэвлэхкэрэн ангелонэн. 9 А ко отпхэнэлапэ Мандар англа манушэн, кодэлэстар и Чяво Манушыкано отпхэнэлапэ англа Дэвлэхкэрэн ангелонэн. 10 Манушэсти, саво пхэнэла налачэ лав пэ Чявэ Манушыканэ, эртисарэлапэ бэзимо, а кодэлэсти, и ко кошэла Свэнто Фано, бэзимо на эртисарэлапэ. 11 Кала ж лиджяна тумэн дэ синагоги, пхурэдэрэндэ и раендэ, на пэрэдживэн пала кода, сар и со тэ пхэнэ лэнди дэ отпхэнима. 12 Дэ кодыя вряма Свэнто Фано сиклярэла тумэн, со трэбуни тэ пхэнэ. 13 Екх мануш, саво ачиля машкар лэн, пхэнда Исусости: — Сиклимаи! Пхэн мурэ пхралэсти, соб тэ дэл манди кодэлэ хулаимастар, саво ачиляпэ амарэ дадэстар! 14 Нэ Исусо пхэнда лэсти: — Ко тховда Ман тэ сундисарэ тумэн и тэ розлэ тумаро рындэ? 15 Тунчи пхэнда лэнди: — Дыххэн, соб тэ на авэн тумэ ханджывалэ. Саво б тэ на авэл мануш барвало, лэхкэрэ джовимастэ када бэрша на додэла. 16 Тунчи Вов розпхэнда лэнди кацави дума: — Екхэ барвалэ манушэстэ выбарила бут ворзо пэ маля. 17 Тай дэдүмэлэс еджино пэсти: «Со манди тэ терэ? Нэнай мандэ, тев тэ стидэ див». 18 Тай пхэнда: «Пхагава мурэ граждуря и терава инте барэдэр. Стидава дэ лэн див и всаворо муро барвалимо. 19 Тай пхэнава пэхкэрэ водести: "Води муро! Бут исин тутэ барвалимо, саво ту стидэнян, хутилэла тути пэ бут бэрша. Отцинюв, ха, пи и ав лошало!"» 20 Нэ Дэвэл пхэнда кадэлэ манушэсти: «Быгодякоро! Кадэла рятяга тиро води залэна тутар. Тунчи касти доросэлалэ кода, со ту стидэнян?» 21 Кади авэла кодэлэга, ко стидэл барвалимо важ пэ, а англа Дэвлэ ачелпэ чёро. 22 И пхэнда Пэхкэрэ сиклярнэнди: — Пхэнав тумэнди, на пэрэдживэн пала джовима, ни пала кода, со тумэнди тэ ха, ни пала трупэ, дэ со тумэнди тэ урявэлэ. 23 Джовимо будэр хамастар, и трупэ будэр їдатар. 24 Подыхкэнтэ пэ воронэн: вонэ на чувэн ворзо дэ пхув, на стидэн мандро малендар. Лэндэ нэнай ни цэра, ни граждо, нэ Дэвэл парварэл лэн. Тумэ ж пэ бутэ кучэдэр чириклендар! 25 Ко тумэндар, кала пэрэдживэл, додэла джовимастэ пэ екх часо вряма? 26 И кала тумэ кадэва цыкно рындэ на стерэна, сости пала аврэ пэрэдживэн? 27 Подыхкэн пэ маленгэрэн лулуден, сар вонэ барён. Вонэ на терэн бути и на сювэн пэсти їда. Нэ пхэнав тумэнди, со и тхагари Соломоно дэ пэхкири слава на урявэлэспэ кади, сар кадэла лулудя. 28 Кала чяр малякири, сави авдивэ барёл, а атася чувэна ла дэ бов, Дэвэл кади урявэл, пэ скици будэр Вов тумэн урявэла, мануша набарэ патявимага? 29 И тумэ на родэн, со тэ ха чи со тэ пэ, и на пэрэдживэн пала кода. 30 Вса откада родэн народуря кадэла люмлякэрэ, нэ тумаро Дад джянэл, со тумэнди када трэбуни. 31 Нэ родэн Лэхкоро Тхагаримо, и вса откада тумэнди дэлапэ прэдэбэ. 32 На даран, цыкнэ бакрора! Тумаро Дад закамля тэ дэ тумэнди Тхагаримо. 33 Битинэн тумаро хулаимо и дэн чёрорэнди! Лачярэн тышыла, савэ никала на чинэнапэ! Стидэн барвалимо, саво никала на хасявэла, пэ упралима, курик чёр на пашола и тев цэрмо на схала. 34 Тев тумаро барвалимо, котэ и тумаро їло авэла. 35 Мэк всавири вряма тумарэ кущика тэ авэн зацырдэнэ, и мэк всавири вряма пхабон тумарэ лампы. 36 Авэн, сар бутярнэ, савэ дожутярэн пэхкэрэ хулае бьявэстар. Вонэ екхатар лэсти оттерэна вудара, кала шунэна, со вов марэл дэ лэн. 37 Бахталэ кодэла бутярнэ, савэ на совэна, кала авэла лэнгоро хулай. Чячимага пхэнав тумэнди: вов еджино зацырдэла кущик, акхарэла лэн пала скаминд и терэла важ лэн бути. 38 Бахталэ кодэла, савэ дожутярэн хулае и дэ епашрят, и дэнзор. 39 Полэн, тэ джянэл хулай, кала авэла чёр, вов бы на домукэлэс лэсти тэ загуле дэ цэр. 40 А тумэ дожутярэн и авэн гата, колэсти со Чяво Манушыкано авэла тунчи, кала тумэ на думисарэн. 41 Тунчи Пётро пхэнда Лэсти: — Рае! Ту кици амэнди пхэнэх кадэла лава чи важ всавэрэн? 42 Рай пхэнда: — Со терэла пативало и годявэр бутярно, савэ хулай ачявда тэ дыкхэ пала цэрэ и аврэн бутярнэн, соб тэ роздэл лэнди хамэ дэ пэхкири вряма? 43 Кала рисявэла хулай и дыкхэла, со бутярно терэл пэхкири бути, тунчи кадэва бутярно авэла бахтало. 44 Чячимага пхэнав тумэнди, со хулай терэла кадэлэ бутярнэ пхурэдэрэга пав всавэрэ пэхкэрэ хулаима. 45 Нэ кала кадэва бутярно пхэнэла еджино пэсти: «Муро хулай на сиво авэла», — и ачела тэ марэ аврэн бутярнэн и бутярнен, обхалапэ тай матёла, 46 тунчи авэла хулай дэ дивэ, кала бутярно лэ на дожутярэл, и дэ вряма, пала савя бутярно на джянэл. И мулярэла лэ, и авэла лэсти бида їтаханэ бидэвлэхкэрэ манушэнца. 47 Бутярно, саво джянгля, со камэл лэстар хулай, нэ на сля гата, и на стерда кади, авэла фартэ мардо. 48 А бутярно, саво на джянгля и стерда кода, пала со марэна, авэла мардо набут. Касти Дэвэл дэня бут, кодэлэстар бут и лэлапэ. И касти бут допатиня, кодэлэстар будэр пхучелапэ. 49 Мэ авилём, соб тэ запхабарэ яг пэ пхуя, и сар Мэ

камав, соб вой сигэдэр тэ розпхаболпэ! 50 Манди трэбуни тэ болдэпэ, и стасавэл грыжа Муро йло, кала кода вса дожухтарав! 51 Тумэ гинисарэн, Мэ авилём, соб тэ анэ пэ пхув пача? Нат, пхэнав тумэнди: Мэ авилём тэ анэ врыжымо. 52 Акана їри панче манушэндэр розджылапэ машкар пэстэ, трин ваздэнапэ пэ дон и дуй ваздэнапэ пэ тринэн. 53 Дад ваздэлапэ пэ чявэ, и чяво ваздэлапэ пэ дадэ. Дэй ваздэлапэ пэ чя, и чей ваздэлапэ пэ да. Сасуни ваздэлапэ пэ боря, а бори ваздэлапэ пэ сасуна. 54 Тунчи Исусо пхэнда манушэнди: — Кала тумэ дыкхэн, сар пэ западо ваздэлпэ хмара, тумэ пхэнэн: «Дэла брышынд». И кади исин, брышынд дэл. 55 И кала пхурдэл барвал южнона ригатар, тумэ пхэнэн: «Кхам пэкэла», — и кади выджял. 56 Домуенгэрэ! Тумэ дыкхэн пэ упралима и пэ пхуя и джянэн, со авэла аври, ай сави вряма авиля акана, тумэ на полэн? 57 И сости тумэ еджинэ на розлэнпэ, со исин чячимо? 58 Кала ту джях пэхкэрэ врыжымашэга дэ сындэ, стер вса, соб тэ допхэнэпэ лэга инте пав дром. А кала на допхэнэгапэ, вов цырделэ тут сындимарестэ, а сындимари отдэла тут халавдэсти, и халавдо чувэла тут дэ барунэ. 59 Пхэнав тут: на выджяга котарь ды колэ, сар на отдэга ды екхэ мардэ.

13 Дэ кодыя вряма авиле Исусостэ койсавэ мануша и розпхэндэ пала манушэн Галилеятар, савэн Пилато прыпхэнда тэ мулярэ и мукля лэнди рат, кала вонэ анэнас жэртвы. 2 Исусо пхэнда лэнди: — Тумэ гинисарэн, со кадэла галилеянуря тердэ бэзимо будэр аврэ манушэндэр дэ Галилея и кодэлэсти хале грыжа? 3 Нат, пхэнав тумэнди. Нэ кала тумэ на ачявэна бэзимо, хасявэна, сар и вонэ. 4 А кадэла дэшуохто манушэн, савэ помуде, кала тэлэдэня пэ лэн упрал башня дэ Силоамо? Тумэ гинисарэн, со вонэ сле дошадэр всавэрэндэр, савэ джювэнас дэ Ерусалимо? 5 Нат, пхэнав тумэнди. Нэ кала тумэ на ачявэна бэзимо, тунчи всавэрэ хасявэна, сар и вонэ. 6 Тунчи пхэнда лэнди кацави дума: — Екхэ манушэстэ сля инжырно кашт дэ лэхкоро винограднико. Вов авиля тэ родэ пэ кадэва кашт барило, нэ нисо на араххля. 7 И пхэнда виноградарести: «Акэ, дыкх, мэ трито бэрш авав, соб тэ араххэ барило пэ кадэва инжырно кашт, нэ нисо на араххав. Сщин лэ! Пэ со вов ивья залэл пхув дэ садо?» 8 Нэ виноградари пхэнда лэсти: «Хулае! Мэк кадэва кашт инте екх бэрш барёла. А мэ пхув ковярава и гуниво чувава. 9 И кала пэ авэр бэрш анэла барило — мишто. А кала на

анэла, сщинэга лэ». 10 Екхвар дэ суббота Исусо сиклярда дэ синагога. 11 Котэ сля екх джювли, дэ кастэ дэшуохто бэрш сля налачэ фано, саво дэлас лати дукх. Вой сля банги, кади со нащи лати сля тэ ваздэ шэро. 12 Исусо удыххля ла, акхарда тай пхэнда: — Джювлие! Ту састярэхпэ тирэ насвалимастар! 13 И хтовда пэ латэ васта. Вой екхатар пэрэачиля тэ авэ банги и ачиля тэ ваздэ слава Дэвлэсти. 14 Тунчи пхурэдэр дэ синагога мижыля, со Исусо састярда дэ суббота, и пхэнда манушэнди: — Исин шов дивэ, кала трэбуни тэ терэ бути. Дэ кадэлэн дивэн авэнтэ тэ састярэлэ, а на дэ суббота. 15 Рай пхэнда лэсти дэ отпхэнима: — Домуенгэрэ! Чи на отпхэндэн тумэ пэхкэрэ мугаре чи гурувэ, на вылиджян лэ граждостар и на лиджян панестэ дэ суббота? 16 А вой исин чей Авраамохири. Дэшуохто бэрш ла спхандэлэс сатана! И со, на трэбуни сля тэ розпхэндэ ла дэ суббота? 17 Кала Исусо пхэнда кадэла лава, всавэрэ Лэхкэрэ врыжымашура сле ладжьюврдэ, а всавэрэ мануша лошавэнас важ кода, со Вов терэлэс барэ и лаче рындурия. 18 Исусо ж пхэнда: — Пэ со счувэлпэ Дэвлэхкоро Тхагариммо? Сар Манди када тэ сикавэ? 19 Вов счувэлпэ пэ цыкно горчично ворзо, саво мануш лиля и чута дэ пхув дэ пэхкоро садо. И кадэлэ ворзостар бариля вучё кашт, кади со упралимахкэрэ чирикля джювэнас пэ лэхкэрэн ранден. 20 Инте пхэнда Исусо: — Пэ со счувэлпэ Дэвлэхкоро Тхагариммо? 21 Вов счувэлпэ пэ закваска, савя лиля манушни тай чута дэ трин барэ чярэ варэга, а тунчи кадья закваска розджиялэпэ пав всаворо хумэр. 22 Тунчи Исусо упалэ джиля дромэга дэ Ерусалимо, проджылэс пав гавэн и фронэн и котэ сиклярэлэс. 23 Екх мануш пхучля Лэстар: — Рае! Када чячимо, со кици набут манушэн фирисарэнапэ? Исусо пхэнда: 24 — Прытховэн зора кодэлэстэ, соб тэ заджя тумэнди набуглэ вударэнца. Чячимага пхэнав тумэнди, со бут мануша закамэна тэ заджя, нэ нисо лэндэ на выджяла. 25 Кала цэрэхкоро хулай вщела и затерэла вудара, тунчи тумэ авэна тэ аче аври, тэ марэ дэ вударэн тай тэ мангэ: «Рае, оттер амэнди!» Нэ Вов пхэнэла тумэнди: «На джянав, катарь тумэ». 26 Тунчи тумэ пхэнэна: «Амэ хале и пиле англа Тут, и пэ амарэн гасэн Ту сиклярэга». 27 Нэ Вов пхэнэла: «На джянав, катарь тумэ. Нашэн Мандар всавэрэ, ко вурьитимо терэн!» 28 Котэ тумэ авэна тэ ровэ и тэ ха бари грыжа, кала дыкхэна, со Авраамо, Исаако тай Иаково и всавэрэ ангунаря дэ Дэвлэхкэрэ Тхагаримма, а тумэн котарь вытрадэна. 29 Авэна мануша штарэ

пхуякэрэ ригэндар тай бэшэна пала скаминдэ дэ Дэвлэхкэрэ Тхагарима. 30 Тай акэ, мануша, савэ палунэ, авэна англэ. И кодэла, савэ англэ, и терэна тути кади, сар и ту лэнди тердан. 13 Нэ авэна палунэ. 31 Дэ кодья вряма авиле койсавэ фарисеендар и пхэндэ Лэсти: — Наш катарь, колэсти со Иродо камэл тэ мулярэ Тут. 32 Исусо пхэнда: — Джян и пхэнэн кадэлэ хрантимарести кацавэ лава: «Акэ, Мэ авдивэ и атася авава тэ традэ бэнгэн и тэ састярэ, а пэ трито диво дотерава пэхкоро рындо». 33 Нэ Манди трэбуни тэ джя Мурэ дромэга авдивэ, атася и пэ авэр диво. Нэнай кади, соб англунаре тэ умарэн на дэ Ерусалимо. 34 Ерусалимо, Ерусалимо! Ту мулярэх англунарен и барэнца помарэх кодэлэн, савэ сле бичалдэ тутэ! Скаци молы Мэ камлём тэ стидэ Тирэ чяворэн кади, сар кагни стидэл пуицен тала пэхкэрэ пхака! Нэ тумэ на закамле кади. 35 Тай акэ, ачявав тумэн еджинэн дэ тумарэ цэрэ. Пхэнав тумэнди, со на дыкхэна Ман ды кодья вряма, сар пхэнэна: «Бахталло Кодэва, Саво джял важ Лав Раехкоро!»

14 Екхвар дэ суббота Исусо заджиля дэ цэр фарисеенгэрэ пхурэдэрэстэ, соб тэ ха мандро. И всавэрэ дыкхэнас пала Исусо. 2 Тай акэ, англа Исусо бэшля екх мануш, саво сля всаворо шуло панехкиря духхатар. 3 Исусо пхучля сиклимарендар пав Упхэнима и фарисеендар: — Чи трэбуни пав Упхэнима тэ састярэ дэ суббота? 4 Вонэ ачиле мулком. Исусо лиляпэ насвалэстэ, састярда лэ и отмукия. 5 Тунчи пхэнда лэнди: — Кала тумаро чяворо чи гурув тэлэдэла дэ ханиг, чи тумэ на выцырдэна лэн екхатар и дэ суббота? 6 Вонэ на джянгле, со тэ пхэнэ Исусости. 7 Кала Исусо дыкхля, сар мануша, савэн акхардэ, вытидэнас пэсти фэдэр тхана, Вов пхэнда кацави дума: 8 — Кала тут акхарэна пэ бьяв, на бэш пэ фэдэр тхан. Кала машкар манушэн, савэн акхардэ пэ бьяв, авэла пативэдэр тутар, 9 тунчи кодэва, ко акхарда и тут, и лэ, поджяла и пхэнэла тут: «Уштав тхан кадэлэ манушэсти». И авэла тути ладжяво, и прыджялапэ тути тэ залэ шымай тхан. 10 Нэ кала акхарэна тут, бэш пэ шымай тхан. Тунчи кодэва, ко акхарда тут, поджяла тутэ и пхэнэла: «Морэ, бэш англэ!» И кодэла, ко бэшэна пала скаминдэ паша тут, дыкхэна, со тути дэне патив. 11 Кодэва, ко ваздэлпэ упрэ, авэла тэлярдо. Нэ кодэва, ко тэлярэл еджино пэ, авэла ваздэно. 12 Пхэнда Исусо и манушэсти, саво акхарда Лэ: — Кала ту тховэх скаминд дивэсэ чи пашэ рятятэ, на акхар пала лэ ни тирэ амалэн, ни тирэ пхралэн, ни тиро

родо, ни пашунэн, савэ исин барвалэ. Колэсти со и кадэла мануша акхарэна тут, кала терэна скаминд, и терэна тути кади, сар и ту лэнди тердан. 13 Нэ кала ту терэх скаминд, акхар пала лэ чёроорэн, помардэн, лангалэн и корэн. 14 Бахталло ту авэга, кала кадэла мануша на дэна тути павпалэ кода, со ту важ лэн стердан. Нэ рисявэлалэ вса тути дэ кодэва диво, кала дэвликунэ мануша оджювдэна мулэндар. 15 Екх мануш, саво бэшэлэс Исусога пала скаминдэ, пхэнда: — Бахталло мануш, саво хала мандро дэ Дэвлэхкэрэ Тхагарима! 16 Исусо пхэнда лэсти: — Екх мануш терда баро скаминд и акхарда бутэн манушэн. 17 И кала авила вряма, соб тэ бэшэн пала скаминдэ, бичалда бутярнэ, соб вов тэ пхэнэл акхардэ манушэнди: «Авэн, вса дожутярэл тумэн». 18 Нэ всавэрэ мануша сар допхэндэпэ и ачиле тэ мангэ патив. Екх мануш пхэнда: «Мэ тиндом пхув, и манди трэбуни тэ джя и тэ дыкхэ ла. Мангав патив тутар!» 19 Авэр мануш пхэнда: «Мэ тиндом дэшэн гурувэн, и манди трэбуни тэ дыкхэ, сар вонэ терэн бути. Мангав патив тутар!» 20 Трито мануш пхэнда: «Мэ лилём хуланя, на выдджял мандэ тэ авэ тутэ». 21 Кала бутярно рисиля, вов вса розпхэнда хулаести. Тунчи хулай холиля и пхэнда пэхкэрэ бутярнэсти: «Джя сигэдэр пав барэн и цыкнэн гасэн дэ форо тай стидэ кордэ чёроорэн, помардэн, корэн и лангалэн!» 22 Бутярно пхэнда: «Хулае! Вса тердом, сар ту манди прыпхэндэн, нэ инте исин тхана». 23 Хулай пхэнда бутярнэсти: «Джя пав дромэн и паша гредэн, и манг манушэн, соб муро цэр тэ авэл пхэрдо. 24 Пхэнав тумэнди, со нико кодэлэндар, савэ сле акхардэ майанглал, на хана муро хамо пала мурэ скаминдэ». 25 Джянас їтханэ Исусога бут манушэн. Тунчи Исусо обрисиля лэндэ и пхэнда: 26 — Кала мануш, саво авэл Мандэ, на покамэла Ман будэр пэхкэрэн дадэ и да, ромня, чяворэн, пхралэн, пхэнэн и будэр пэхкэрэ джювимастар, тунчи вов нисар на авэла Мурэ сиклярнэга. 27 Мануш, саво на лиджял пэхкоро трушул и на джял пала Ман, нисар на авэла Мурэ сиклярнэга. 28 Кала ко тумэндар закамэла тэ ваздэ башня, чи на бэшэла вов англал и на бинэла, скици ловэ пэ када трэбуни, соб тэ дотерэ рындо? 29 Кала вов чувэла фундаменто тала башня, нэ на дотерэла кадэва рындо, мануша асаналэ лэстар. 30 И пхэнэна: «Кадэва мануш ачиля тэ терэ бути, нэ на дотерда». 31 Кала тхагари стидэлпэ пэ марима аврэ тхагарега, чи на бэшэла вов англал и на гинисарэла, исин ли лэстэ зор дэшэ пхангленца манушэн тэ выдджя пэ марима тхагарега, кастэ

исин биш пханглы манушэн? 32 А кала нат, тунчи бичалэла пативалэн манушэн тхагарестэ, кала вов инте дур и мангэла лэстар пачя. 33 Кади и тумэндар нико на авэла Мурэ сиклярнэ'а, кала на ачявэла вса, со лэстэ исин. 34 Лон — када мишто. Нэ кала лон хацарэла пэхкири зор, сар тэ терэ, соб тэ авэл вов лондо? 35 Ни дэ пхув, ни дэ гуниво лэ на чувэ'а. Лэ кици вычувэн аври. Кастэ исин кана тэ шунэ, мэк шунэл!

15 Авэнас Исусостэ всавэрэ стидэмаря, савэ лэнас налогуря, и бэзимахкэрэ мануша, соб тэ шунэ Лэ. 2 Нэ фарисеенди и сиклимаренди пав Упхэнима на чялёлас, со терда Исусо, и вонэ пхэнэнас: — Вов прылэл бэзимахкэрэ манушэн и хал лэнца. 3 Нэ Исусо пхэнда лэнди кацави дума: 4 — Пхэна'а, екхэстэ тумэндар исин шэл бакря, и екх лэндар хасиля. Чи на ачявэла вов енядэша тай еня бакрен дэ маля и чи на джяла тэ родэ бакря, сави хасиля? 5 Ай кала аракхэла бакря, баря лоша'а тховэла ла пэ пхикэ и лиджяла. 6 Кала авэла цэрэ, акхарэла пэхкэрэн амалэн и пашунэн и пхэнэла лэнди: «Лошавэн манца, мэ аракхлём бакря, сави хасиля». 7 Пхэнав тумэнди, со кади ж пэ упралима пала екхэ манушэ, саво ачявда бэзимо, будэр лошавэна, сар пала енядэша еня патявнэн манушэн, савэнди на трэбуни тэ ачявэ бэзимо. 8 Кала манушнэтэ исин дэш драхмы и вой хацарэла екх лэндар, чи на пхабарэла вой лампа, на шулавэла всаворо пэхкоро цэр и на авэла тэ родэ, соб тэ аракхэ кадья драхма? 9 А кала аракхэла ла, тунчи стидэла пэхкэрэн амалкэн и пашунэн джювлен тай пхэнэла: «Лошавэн манца, мэ аракхлём драхма, сави хацардом!» 10 Кади, пхэнав тумэнди, лошавэн ангелуря Дэвлэхкэрэ и пала екхэ манушэ, саво ачявда пэхкоро бэзимо. 11 Инте пхэнда Исусо: — Екхэ манушэстэ сле дуй чявэ. 12 И тэрнэдэр лэндар пхэнда дадэсти: «Дадэ! Дэ манди тирэ барвалимастар котор, саво манди доросэлапэ». И дад розмарда вса, со лэстэ сля, пэ дон и дэня пэхкэрэ чявэнди. 13 Проджила набут вряма, и цыкнэдэр чявэндар стидэня вса, со лэсти доросляпэ, и джиля дур, дэ авэр пхув. Котэ розтерда вса, со лэстэ сля, и пав диниманэ розчувэлас ловэ. 14 Кала вов розчута всавэрэ ловэ, дэ кодья пхув авиля бари бокх, и чяво мэрэлас бокхатар. 15 Тунчи джиля и намисардапэ екхэ манушэстэ кодэла пхуятар, тэ чяравэ баличен пэ маля. 16 Вов мэрэлас бокхатар и сля лошало тэ ха 'тханэ баличенца, нэ лэсти и кода на дэнас. 17 Кала чявэстэ рисиля годи, тунчи вов пхэнда:

«Бут намисардэн бутярнэн мурэ дадэстэ, и вонэ хан, скици закамэна, а мэ бокхатар катэ мэрав! 18 Вщява, рисявава павпалэ мурэ дадэстэ и пхэнава лэсти: "Дадэ! Мэ тердом бэзимо англа Дэвлэ пэ упралима и англа тут 19 и на ачяв тэ акхарэпэ тирэ чявэ'а. Нэ прылэ ман сар тирэ бутярнэ"». 20 Тунчи вщиля и джиля пэхкэрэ дадэстэ. Кала чяво сля дур цэрэстар, дад удыххля лэ. И ачиля лэсти дор пэхкэрэ чявэ. Тунчи вов прастэня лэстэ, облиля и чюминдэня лэ. 21 Чяво пхэнда дадэсти: «Дадэ! Мэ тердом бэзимо англа Дэвлэ пэ упралима и англа тут и на ачяв тэ акхарэпэ тирэ чявэ'а». 22 Нэ дад пхэнда пэхкэрэ бутярнэнди: «Джан сигэдэр! Анэн фэдэр 'да, сави исин, и урывэнтэ чявэ, дэнтэ лэсти ангрусни пэ ангушт и пундрангэ пэ лэхкэрэ пурэн. 23 Анэн парвардэ гурувэ и чинэн лэ пэ мас. Тхова'а баро скаминд и ава'а тэ лошавэ! 24 Кадэва муро чяво сля муло, нэ отджювдиня, сля хацардо, нэ кана аракхляпэ». Тай ачиле тэ лошавэ. 25 Пхурэдэр чяво сля пэ маля. Кала вов рисиля малятар и сля паша цэр, шунда, сар цэлэн и дилибэн. 26 Тунчи акхарда екхэ бутярнэ и пхучля: «Со када терэппэ?» 27 Бутярно пхэнда лэсти: «Авиля тиро пхрал. И тиро дад прыпхэнда тэ чинэ парвардэ гурувэ, колэсти со лэхкоро чяво рисиля цэрэ джювдо». 28 Тунчи пхурэдэр чяво холиля и на камля тэ заджя дэ цэр. Нэ дад выджиля цэрэстар и ачиля тэ акхарэ лэ. 29 Нэ вов пхэнда дадэсти: «Акэ, мэ скици бэрш терав бути важ тут, со никала тэ ваздэ шэро, и дэ всавэрэ кандав тут. Нэ ту и цыкнорэ бузнорэ на дэнян манди, соб мэ тэ лошавав мурэ амалэнца. 30 А кала кадэва тиро чяво, саво протерда пэхкэрэ ловэ налаче джювленца, авиля цэрэ, ту важ лэ чиндан парвардэ гурувэ». 31 Нэ дад пхэнда чявэсти: «Чяворо! Ту всавири вряма манца. И вса, со мандэ исин, када тиро. 32 Нэ важ кода трэбуни тэ лошавэ, со тиро пхрал сля муло, нэ отджювдиня, сля хацардо, нэ аракхляпэ».

16 Тунчи Исусо пхэнда Пэхкэрэ сиклярнэнди: — Екхэ барвалэстэ сля бутярно, саво дыкхэлас пала лэхкоро цэр. Екхвар хулаести пхэндэ пэ кан, со бутярно протерэл вса кода, со лэстэ исин. 2 Тунчи хулай акхарда бутярнэ и пхэнда: «Со када мэ пала тут шунав? Здэ манди тири бути. Колэсти со ту будэр на терэ'а мандэ». 3 Тунчи бутярно пхэнда еджино пэсти: «Со манди тэ терэ? Муро хулай вытрадэл ман кадэла бутятар. Тэ 'ганавэ пхув мандэ зора нэнай, а тэ мангэ ловэ манди ладжяво. 4 Джянав, со тэ терэ, соб тэ прылэн

ман мануша дэ пэхкэрэн цэрэн, кала хацарава
бути!» 5 Тунчи акхарда манушэн, савэ сле вуджилэ
лэхкэрэ хулаести, тай пхэнда екхэсти: «Скици
ту вуджило мурэ хулаести?» 6 Кодэва пхэнда:
«Шэл барэ вакхор зэто». Бутярно пхэнда: «Залэ
тиро лил, бэш и чин, со ту вуджило пандэша барэ
вакхор». 7 Тунчи пхучля аврэстэ: «А ту скици
вуджило?» Кодэва пхэнда: «Екх пхангли гонэ див». Бутярно пхэнда лэсти: «Залэ тиро лил, бэш и чин,
со ту вуджило охтошэл гонэ див». 8 И ашарда
хулай бипативалэ бутярнэ пала кода, сар годяға
выджила кадэлэ рындэстар. Кадэла люмлякэрэ
чявэ лиджня рындуря пэхкэрэ амалэнца годявэдэр,
сар чявэ Дэвлэхкэрэ, Саво исин Одуд. (aibn g165) 9
Мэ ж пхэнав тумэнди: азбан пэсти амалэн хасютнэ
барвалимаға. И кала тумаро барвалимо проджяла,
тумэн прылэна дэ катунэн, савэ авэна тэ аче
вечно. (aibn g166) 10 Ко дэ набарэ исин чячюно,
кодэва и дэ барэ авэла чячюно. А ко начячюно дэ
набарэ, кодэва и дэ барэ на авэла чячюно. 11 И
кала нащи тэ допатя тумэнди хасютно барвалимо,
ко тумэнди дэла барвалимо чячюно? 12 И кала
тумэ на сле чячюнэ на дэ пэхкэрэ барвалима,
ко тумэнди дэла тумаро? 13 Нисаво бутярно на
авэла тэ терэ бути дуге хулаендэ. Важ кода со
вов екхэ хулае на камэла, а аврэ камэла, екхэ
хулаести авэла чячюно, ай пэ аврэ авэла тэ
чюнгардэ. Нащи дэ екх вряма тэ тэрэ бути важ
Дэвлэ и важ барвалима. 14 Шундэ вса откада
фарисея, савэ камле ловэ, тай ваздэне Исусо пэ
асама. 15 Исусо пхэнда лэнди: — Тумэ камэн тэ
сикавэлэ пативалэ манушэнца, нэ Дэвлэ джянэл
тумарэ йлэ. И кода, со драго важ манушэн, исин
гряцимо важ Дэвлэ. 16 Упхэнимо тай англунаря сле
англа Иоанно, нэ кана пхэнэлпэ Бахтало Лав пала
Дэвлэхкэрэ Тхагарима, и всавэрэ прытховэн зора,
соб тэ заджя дэ лэ. 17 Нэ сигэр пхув и упралимо
хасявэна, а Упхэнимастар на хасявэла ни екх
цыкно лаворо. 18 Кожно мануш, саво чувэл пэхкиря
ромня и уджял аврятэ, терэл бэзимо и прэдэл
пэхкиря ромня. И кодэва, ко лэл джювля, сави
розлиджялдапэ, терэл бэзимо. 19 Сля екх барвало
мануш, саво урявэласпэ дэ фартэ кучутни йда санэ
похтаностар тай кожно диво джювда шукар дэ
пэхкэрэ барвалима. 20 И паша вударэн лэстэ аври
пашлёлас чёро мануш, савэ акхарэнас Лазари,
и трупэ лэхкоро сля помардо насвалимастар. 21
Вов фартэ камля тэ чялэ хамаға, саво тэлэдэлас
скаминдэстар. Авэнас лэстэ риконэ и чибэнца
тиндярэнас лэхкэрэ дукха. 22 Тай акэ, муля чёро,
и ангелуря отлиджялдэ лэ Авраамостэ. Муля и

барвало мануш, тай зағанавдэ лэ. 23 И кала
барвало халас gryжа дэ адо, вов подыкхля упрал
и удыкхля дур пэстар Авраамо и Лазаре, саво
сля паша лэстэ. (Hades g86) 24 А тунчи акхарда:
«Дадэ Авраамо! Ковлисар тиро йло важ ман! Бичал
Лазаре, соб вов тэ тиндярэл пэхкоро ангушт дэ
пани и тэ подлиджял муря чибатэ, колэсти со мэ
хав бари gryжа». 25 Нэ Авраамо пхэнда: «Чяво!
Взгинисар, со дэ тирэ джювима ту лилян лачимо, а
Лазарестэ сля екх бидэ. Кана Лазари катэ улэлпэ
gryжатар и лошаваэл, а ту прылэх бари gryжа.
26 Када инте на вса, нэ машкар тумэн и амэн
стердэ бари вығанавди, соб тумэндар нащи сля
тэ пэрэджя амэндэ и амэндар — тумэндэ». 27
Тунчи барвало пхэнда: «Мангав тут, дадэ, бичал
Лазаре мурэ дадэстэ дэ цэр. 28 Мандэ исин панч
пхрала. Мэж Лазари розпхэнэла лэнди, соб и вонэ
тэ на попэрэн дэ кадэва тхан, тев хан gryжа». 29
Авраамо пхэнда: «Лэндэ исин Моисеи и англунаря,
мэж шунэн лэн». 30 Нэ барвало пхэнда: «Нат, дадэ
Авраамо! Нэ кала ко мулэндар вщела и авэла
лэндэ, тунчи вонэ ачявэна бэзиммо». 31 Авраамо
пхэнда лэсти: «Кала вонэ на шунэн Моисее тай
англунарен, тунчи вонэ на патяна, кала и муло
отджювдэла».

17 Тунчи Исусо пхэнда Пэхкэрэ сиклярнэнди:
— Бут исин, со цырэдэл манушэ бэзимастэ.
Нэ бидэ кодэлэсти, ко залиджял манушэн дэ
бэзима. 2 Фэдэр важ лэ, соб тэ прыпхандэн лэсти
баро и пхаро бар пэ кора и тэ чувэн лэ дэ море,
сар тэ залиджял вов дэ бэзима екхэ кадэлэн
цыкнэндар. 3 Дыкхэн пала пэстэ! Кала пхрал
тиро терэла бэзимо, запхэн лэсти када тэ терэ! И
кала вов ачявэла бэзимо, эртисар лэ! 4 И кала
пхрал тиро эфта молы дэ дивэ терэла бэзимо
и эфта молы авэла тутэ и пхэнэла: «Дошало!
Мангав патив!» — эртисар лэ. 5 Апостолуря екхвар
пхэндэ Раести: — Баряр амаро патявимо! 6 Рай
пхэнда: — Кала тумэндэ исин патявимо, сар
цыкно горчично ворзо, и тумэ пхэнэна кадэлэ
тутовонэ каштэсти: «Вычинпэ пхуятар, джя дэ
море и барюв», — тунчи кашт кандэла тумэн.
7 Ко тумэндар пхэнэла бутярнэсти, саво рисиля
малыятар, тев вов вушарэлас пхув чи чяравэлас
бакрэн: «Джя сигэдэр, бэш пала скаминд?» 8
Нат, тумэ на кади дэдүмэна, нэ пхэнэна лэсти:
«Вщи, тав манди тэ ха! Обпхандэлэ кущикаға,
подэ и прылэ скаминдэстар, кала мэ авава тэ
ха и тэ пэ! Тунчи еджино хаға и пэға!» 9 Чи
наисарэна тумэ бутярнэ пала кода, со стерда

бути, сави лэсти трэбуни сля тэ терэ? 10 Кади и тумэ, кала терэна вса, со тумэнди прыпхэндо, дэдүмэн пала пэстэ: «Амэ бутярнэ, савэ нисо на ачен. И стердэ кода, со амэнди трэбуни сля тэ стерэ». 11 Пав дром дэ Ерусалимо Исусо проджялас машкар Самария тай Галилея. 12 Кала Вов заджиля дэ екх гав, авиле Лэстэ дэш мануша, савэндэ сля насвалимо проказа. Вонэ ачиле дэ рига 13 тай типисиле зоралэ ґласоґа: — Исусо Сиклимари! Ковлисар ґло Тиро важ амэн! 14 Кала Исусо удыххля лэн, Вов пхэнда: — Джян и сикавэнлэ рашаенди! И кала мануша джиле, пав дромэ вонэ састярдэпэ насвалимастар. 15 Екх лэндар дыкхля, со састярдапэ, рисиля павпалэ и ашарда Дэвлэ зоралэ ґласоґа. 16 Вов тэлэдэня Исусостэ дэ пурэн и наисарда Лэ. А кодэва мануш сля самарянино. 17 Тунчи Исусо пхэнда: — Чи на дэш манушэн састярдэпэ? Тев жэ инте еня? 18 Сости вонэ на рисиле, соб тэ ваздэ слава Дэвлэсти? Ай рисиля кици кадэва самарянино? 19 И пхэнда кадэлэ манушэсти: — Вщи, джя цэрэ! Тиро патявимо тут фирисарда. 20 Тунчи фарисея пхучле Исусостар, кала авэла Дэвлэхкоро Тхагаримо. Исусо пхэнда: — Дэвлэхкоро Тхагаримо на авэла кади, соб всавэрэ лэ тэ дыкхэн. 21 Нико на пхэнэла: «Акэ, вов катэ исин». Чи: «Акэ, вов котэ». Нэ Дэвлэхкоро Тхагаримо машкар тумэн исин. 22 Тунчи Исусо пхэнда Пэхкэрэ сиклярнэнди: — Авэла вряма, кала закамна тэ дыкхэ екх дивэндар Манушыканэ Чявэхкэрэ, нэ на дыкхэна. 23 Кала пхэнэна тумэнди: «Акэ, Вов катэ!» Чи: «Акэ, Вов котэ исин!» — на джян пордэ и на престан пала лэн. 24 Сар молния марэл упралимастар и дэл яг и душлимо пав всавири пхув, кади ж и Чяво Манушыкано рисявэла павпалэ. 25 Нэ англал кадэлэстар Чяво Манушыкано хала бари грыжа и кадэва родо Лэстар отпхэнэлапэ. 26 Сар сля дэ вряма, кала джювда Нои, кади авэла и дэ вряма, кала рисявэла Чяво Манушыкано. 27 Мануша ханас, пэнас, лэнас ромнен и джянас паларом аж ды кодья вряма, сар Нои заджиля дэ ковчего, а тунчи джиля баро пани и всавэрэ хасиле. 28 Кади ж сля дэ вряма, кала джювда Лото: мануша хале, пиле, тинэнас, битинэнас, чувэнас ворзо дэ пхув, ваздэнас цэра. 29 Нэ дэ дивэ, кала Лото выджиля форостар Содомо, джиле упралимастар ягуно брышынд и сера и всавэрэ хасиле. 30 Кади ж авэла и дэ кодэва диво, кала Чяво Манушыкано сикавэлапэ. 31 Дэ кодэлэ дивэ мануш, саво авэла упрэ пэ ушарди, а кырпы лэхкэрэ — дэ цэр, мэк на змукэллэ тэлэ пала лэн. Ко авэла пэ маля, мэк на

рисявэл цэрэ. 32 Рипэрэн Лотохкиря ромня! 33 Ко камэл тэ фирисарэ пэхкоро джювимо, кодэва хасярэла лэ. Ай ко хасярэла пэхкоро джювимо, кодэва сфирисарэла лэ. 34 Пхэнав тумэнди: дэ кодья рят совэна дуй мануша, екхэ залэна, ай авэр мануш ачелалэ. 35 Дуй манушня авэна тэ терэ варо ворзостар: екха манушня залэна, ай авэр ачелалэ. 37 Тунчи пхэндэ Исусости: — Рае, тев када авэла? Исусо пхэнда: — Пордэ, тев пашлёл муло трупо, стидэнапэ орлуря.

18 Тунчи Исусо пхэнда лэнди пала кода, со трэбуни всавири вряма тэ мангэлэ и тэ на grisявэ: 2 — Дэ екх форо сля сындимари, саво Дэвлэстар на даралас и манушэндар на ладжяласпэ. 3 Дэ кодэва форо сля и екх джювли, савятэ муля ром. Вой пхирэлэс сындимарестэ и мангэлэс: «Пав чячима розлэ муро рындо! Фирисар ман кодэлэстар, ко дошарэл ман!» 4 Нэ сындимари бут вряма нисо на камля тэ терэ. Тунчи пхэнда еджино пэсти: «Мэ Дэвлэстар на дарав и манушэндар на ладжявпэ. 5 Нэ важ кода со кадыя джювли на пэрэачел тэ доха ман, пав чячима розлава лакоро рындо, соб вой будэр мандэ тэ на пхирэл и тэ на дохал ман». 6 И пхэнда Рай: — Шунэн, со пхэнэл бибахтало сындимари? 7 А кала кади, Дэвлэ ли на фирисарэла пав чячима кодэлэн, савэн вытидэня и савэ зоралэ ґласоґа акхарэн Лэ диво и рят? Чи помукэла лэн Дэвлэ? 8 Пхэнав тумэнди, со Дэвлэ сиго лэн фирисарэла пав чячима. Нэ Чяво Манушыкано кала авэла, чи аракхэла Вов пэ пхуя патявимо? 9 Пхэнда Исусо кацави дума манушэнди, савэ гинисарэнас пала пэстэ, со вонэ фартэ пативалэ, а пала аврэн пхэнэнас, со вонэ бибахталэ: 10 — Дуй мануша заджиле дэ храмо тэ мангэлэ. Екх лэндар сля фарисеи, ай авэр — стидэмари, саво лэлэс налогуря. 11 Фарисеи ачелас тай мангляпэ дэ пэхкэрэ ґлэ кади: «Дэвла! Наисарав тут пала кода, со мэ на кацаво, сар авэр мануша, савэ исин чёра, хохавнэ, терэн биладжявимо ромнатар, чи сар кадэва стидэмари. 12 Мэ рицарав посто дуй молы дэ курко, отдав дэшто котор мурия ворхатар». 13 Стидэмари жэ ачиля дэ рига и ладжяво лэсти сля тэ ваздэ якха упрэ, нэ марэлэс дэ коллинэ еджино пэ и пхэнэлэс: «Дэвлэ! Ковлисар ґло Тиро важ ман, бэзимахкэрэ манушэ!» 14 Пхэнав тумэнди, со стидэмари джиля бидошакоро англа Дэвлэ, а фарисеи ачиля дошало. Кодэлэсти со кожно мануш, саво ваздэл еджино пэ, авэла обмукло, а саво тэлярэл еджино пэ, авэла ваздэно. 15

Анэнас Исусостэ цыкнэн чяворэн, соб Вов тэ лэлпэ лэндэ, а сиклярнэ дыкхле кода и запхэндэ лэнди. 16 Нэ Исусо акхарда сиклярнэн и пхэнда: — Мукэн чяворэн, соб тэ авэн Мандэ, и на запхэнэн лэнди, колэсти со Дэвлэхкоро Тхагаримо исин лэнгоро. 17 Чячимага пхэнав тумэнди: ко на прылэла Дэвлэхкоро Тхагаримо кади, сар прылэн цыкнэ чяворэ, кодэва дэ Дэвлэхкэрэ Тхагарима на заджяла. 18 Екх пхурэдэрэндар пхучля Исусостар: — Сиклимари лачё! Со манди тэ терэ, соб тэ доросав вечно джювимо? (aiōnios g166) 19 Исусо пхэнда лэсти: — Сости ту пхэнэх пала Ман «лачё»? Кици Екх Дэвэл исин лачё. 20 Ту джянэх заповедь: на тер билладжявимо тирэ їрестар, на умар, на чёр, на пхэн хохавимо пэ сындэ, полэ тирэ дадэ и да. 21 Кодэва мануш пхэнда: — Вса откада мэ терав тэрнэ бэршэндар. 22 Исусо шунда када и пхэнда лэсти: — Екх тути на хутилэл: битин вса, со тутэ исин, и роздэ ловэ чёрорендэ, соб тэ авэл тутэ барвалимо пэ упралима. Тунчи ав и джя пала Ман! 23 Кала пхурэдэр шунда када, вов загрисилэ, колэсти со сля фартэ барвало. 24 Исусо дыкхля, со вов загрисилэ, и пхэнда: — Сар пхаро барвалэнди тэ заджя дэ Дэвлэхкэрэ Тхагарима! 25 Локхэдэр верблюдости тэ проджя машкар сувякоро каноро, сар барвалэсти тэ заджя дэ Дэвлэхкэрэ Тхагарима. 26 Кодэла, ко шундэ, пхучле: — Кастэ тунчи исин зора тэ фирисарэпэ? 27 Исусо пхэнда: — Кодэ, со манушэсти нащи тэ стерэ, кода стерэла Дэвэл. 28 Пётро пхэнда Исусости: — Акэ, амэ вса ачявдэ и джила пала Тут. 29 Исусо пхэнда лэнди: — Чячимага пхэнав тумэнди: мануш, саво ачявда важ Дэвлэхкэрэ Тхагарима цэр, чи ромня, чи пхралэн, чи дадэ и да, чи чяворэн, 30 лэла будэр дэ кадэлэ джювима, а дэ вряма, сави авэла, — вечно джювимо. (aiōn g165, aiōnios g166) 31 Тунчи Исусо отлиджялда дэ рига Пэхкэрэ сиклярнэн и пхэнда лэнди: — Акэ, амэ заджях дэ Ерусалимо, и терэлапэ вса, со чиндэ англунаря пала Чявэ Манушыканэ. 32 Кади со здэна Лэ бидэвлэхкэрэ манушэнди, и вонэ стерэна Лэстар асамо, дэна Лэсти бари дух и бари грыжа, авэна тэ чунгардэ пэ Лэстэ, 33 тэ марэ Лэ чукняга, а тунчи умарэна. Нэ пэ трито диво Вов оджювдэла. 34 Нэ сиклярнэ нисо кадэлэстар на полиле, кадэла лава сле гаравдэ лэндар. Вонэ на джянэнас пала со Вов дэдумэл. 35 Кала Исусо поджялас форостэ, саво акхарэлпэ Ерихоно, екх коро бэшэлэс паша дром и мангэлэс ловэ. 36 Кала коро шунда, со пашэ лэстар джян мануша, вов пхучля: — Со када терэлпэ? 37 Лэсти пхэнда: — Када джял Исусо

Назаретостар. 38 Тунчи коро ачилэ тэ типисявэ: — Исусо, Чяво Давидохкоро! Ковлисар Тиро їло важ ман! 39 Мануша, савэ джиле англал, прыпхэндэ лэсти, соб вов тэ заачел мулком, нэ коро типисилэ инте зоралэдэр: — Чяво Давидохкоро! Ковлисар тиро їло важ ман! 40 Исусо ачилэ пэ дром и прыпхэнда, соб тэ анэн кадэлэ корэ Лэстэ. Кала коро поджила, Исусо пхучля: 41 — Со ту камэх, соб Мэ тэ терав важ тут? Коро пхэнда: — Рае! Камав тэ дыкхэ! 42 Исусо пхэнда лэсти: — Дыкх! Тиро патявимо тут фирисарда! 43 Коро екхатар ачилэ тэ дыкхэ и джила пала Исусо, а еджино ачилэ тэ ваздэ слава Дэвлэсти. И всаевэр мануша, ко дыкхле кода, ваздэнас Дэвлэсти слава.

19 Тунчи Исусо заджила дэ форо Ерихоно и проджялас пав лэ. 2 Тай акэ, екх барвало мануш, стидэмаренгоро пхурэдэр, савэ акхарэнас Закхеи, 3 закамля тэ дыкхэ Исусо, Ко Вов исин. Нэ Закхеи сля цыкноро вучимага, и лэсти нащи сля тэ дыкхэ Исусо, колэсти со котэ стидэняпэ фартэ бут манушэн. 4 Колэсти вов прастэня англэ, загульда пэ тутово кашт, соб тэ дыкхэ Исусо, кала Вов проджяла мамуй. 5 Кала Исусо авилэ пэ кодэва тхан, Вов вздыкхля упрэ и пхэнда: — Закхеи! Змукпэ тэлэ! Авдивэ Манди трэбуни тэ авэ тутэ цэрэ! 6 Закхеи сиво змукляпэ и баря лошага прылила Исусо. 7 Манушэнди, савэ сле котэ, фартэ на чялила кода, и вонэ пхэнэнас: — Кастэ Вов заджила дэ цэр! Манушэстэ, саво джювэл дэ бзима! 8 Закхеи ж вщиля англа Рае тай пхэнда: — Рае! Епаш мурэ хулаимастар мэ отдава чёрорендэ, и кастэ лилём будэр, сар трэбуни, мэ рисарава штарвар будэр. 9 Исусо пхэнда лэсти: — Авдивэ фирисаримо авилэ дэ кадэва цэр, колэсти со и Закхеи исин Авраамохкоро чяво! 10 Чяво Манушыкано авилэ тэ аракхэ и тэ фирисарэ кодэлэн, савэ хасиле. 11 Кодэлэнди, ко када шунда, Исусо пхэнда инте екх дума. Колэсти со Исусо сля паша Ерусалимо, и мануша гинисардэ, со сиво оттерэлапэ Дэвлэхкоро Тхагаримо. 12 Исусо пхэнда: — Екх мануш барвалэ родостар лагля дэ дуратуни пхув, соб тэ аче лэсти тхагарега, а тунчи камля тэ рисявэ павпалэ. 13 Вов акхарда дэшен бутярнэн, дэня лэнди пав шэл драхмы и пхэнда: «Затерэн пэ кадэлэн ловэн манди ворха ды кодыя вряма, сар мэ рисявава павпалэ». 14 Нэ мануша лэхкиря пхуятар на камле кадэлэ рае и бичалдэ пативалэн манушэн пала лэ дэ дром, соб вонэ тэ пхэнэн: «Амэ на камах, соб кадэва мануш тэ авэл амарэ тхагарега». 15 Нэ вов ачилэ тхагарега

и рисиля павпалэ. Тунчи акхарда пэстэ бутярнэн, савэнди дэня ловэ, соб тэ уджянэ, скици вонэ затердэ лэсти ворха. 16 Авиля англунэ бутярно и пхэнда: «Хулае! Пэ тирэ шэл драхмы мэ затердом екх пхангли!» 17 Хулай пхэнда лэсти: «Мишто. Ту — лачё бутярно! Пала кода, со ту слян чячюно дэ кадэва набаро рындо, дава дэш форуря тала тиро васт». 18 Авиля авэр бутярно и пхэнда: «Хулае! Тирэ шэл драхмы затердэ панч шэла драхмы!» 19 Хулай пхэнда кадэлэ бутярнэсти: «И ту ав пхурэдэрэга пэ панчен форонэн». 20 Авиля трито бутярно и пхэнда: «Хулае! Акэ тути тирэ шэл драхмы! Мэ запханглём лэн дэ хюснэ и гаравдом. 21 Мэ даравас тутар, колэсти со ту мануш, саво бут мангэл: ту лэх кода, со на тховэга, и чинэх кода, со на чувэга дэ пхув». 22 Хулай пхэнда лэсти: «Бибахтало бутярно, тирэ лавэнца сундисарава тут! Ту джанглан, со мэ — мануш, саво бут мангэл, и со мэ лав котэ, тев на тховавас, и чинав кода, со на чувавас дэ пхув? 23 Сости ту на дэнян мурэ ловэ дэ рындо? И кала мэ рисилём, тунчи залилём бы лэн и ворха упрэ». 24 И пхэнда пашунэ манушэнди: «Залэнтэ лэстар шэл драхмы и дэнтэ кодэлэсти, кастэ исин екх пхангли!» 25 Мануша пхэндэ хулаести: «Хулае! Лэстэ и кади исин екх пхангли!» 26 Нэ хулай дэдуманя лэнди: «Пхэнав тумэнди, кастэ исин, кодэлэсти дэлапэ инте. А кастэ нэнай, залэлапэ и кода, со лэстэ исин. 27 Мурэн врыжымашэн, савэ на камле, соб мэ тэ авав лэнгэрэ тхагарега, анэн кордэ и мулярэн англа ман». 28 Исусо розпхэнда када и джиля пав дром дэ Ерусалимо. 29 Кала Вов поджиля гавэндэ Виффагия тай Вифания, савэ аченас паша Оливково плай, Вов бичалда англэ дон Пэхкэрэн сиклярнэн 30 и пхэнда: — Джян дэ гав, саво англа тумэн. Кала заджяна, дыкхэна, со ачел прыпхангло тэрно мугари, пэ савэ инте нико на бэшэлэс. Отпхандэн лэ и лиджан Мандэ. 31 Кала ко пхучела тумэндар: «Пэ со тумэ отпхандэн мугаре?» — пхэнэн кади: «Вов трэбуни Раести». 32 Бичалдэ сиклярнэ джиле тай аракхле мугаре, сар пхэнда Исусо. 33 Кала вонэ отпхандэнас мугаре, хулая пхучле лэндар: — Пэ со тумэ отпхандэн мугаре? 34 Сиклярнэ пхэндэ: — Вов трэбуни Раести. 35 Тунчи андэ мугаре Исусостэ, чутэ пэ лэстэ пэхкири упралуни їда тай тховдэ Исусо упрал. 36 Кала Исусо ладэлэс, мануша чувэнас пэ дром пэхкири упралуни їда. 37 Кала Исусо подлагля тханэстэ, тев дром змукэлпэ Оливковонэ плаестар, фартэ бут сиклярнэн подваздэне пэхкоро їласо и лошага ачиле тэ ашарэ Дэвлэ пала барэ рындуря, савэ

вонэ дыкхле. 38 И пхэнэнас: — Бахтало исин Тхагари, Саво авэл важ Раехкоро Лав! Пачя пэ упралима и слава Дэвлэсти пэ вуче упралима! 39 Койсавэ фарисея аченас котэ и пхэндэ Исусости: — Сиклимари! Улэ Тирэ сиклярнэн! 40 Нэ Исусо дэдуманя лэнди: — Пхэнав тумэнди: кала вонэ заачена мулком, тунчи бара затиписавэна. 41 Кала вонэ поджиле пашэдэр Ерусалимостэ, Исусо вздыкхля пэ форо и заровиня. 42 Тай пхэнда: — О, тэ полэх бы ту авдивэ, со анэла тути пачя! Нэ кана гаравдо када тирэ якхэндар. 43 Авэна дивэ, кала тирэ врыжымашуря выджяна маримага пэ тут, ваздэна пэ тут пхуанэ плая, поджяна тутэ тай стасавэна тут всавэрэ ригэндар. 44 Розпхагэна тут, тирэ чяворэн мулярэна, бар пэ барэ тути на ачявэна, пала кода со ту на уджянглан вряма, кала Дэвлэ авиля тутэ. 45 Тунчи Исусо заджиля дэ храмо и ачиля тэ вытрадэ тимисарен. 46 И пхэнэлэс: — Кади исин чиндо: «Муро цэр — када цэр мангимахкоро», а тумэ тердэ лэстар прахарицико цэр. 47 Диво дивэстар Исусо сиклярэлэс манушэн дэ храмо. Нэ англунэ рашая, сиклимаря пав Упхэнима тай манушэнгэрэ пхурэдэра родэнас, сар тэ мулярэ Исусо. 48 И на джангле, сар када тэ стерэ, колэсти со всавэрэ мануша шундэ Исусохкэрэ лава и на камле тэ промукэ ни екх лэндар.

20 Екхвар, кала Исусо сиклярэлэс манушэн дэ храмо и пхэнэлэс Бахтало Лав, поджиле Лэстэ англунэ рашая тай сиклимаря пав Упхэнима їтханэ пхурэдэрэнца 2 и пхучле Лэстар: — Пхэн амэнди, савя зорага Ту вса кода терэх? И ко дэня Тути кадья зор? 3 Исусо пхэнда лэнди дэ отпхэнима: — Пхучява и Мэ тумэн, пхэнэн Манди: 4 катарь Иоанностэ зор тэ болдэ, упралимастар чи манушэндар? 5 Тунчи вонэ дэдумане машкар лэстэ: — Кала пхэнага: «Упралимастар», — Вов пхучела: «Сости ж тумэ лэсти на патине?» 6 А кала пхэнага: «Манушэндар», — тунчи всавэрэ мануша марэна амэн барэнца, вонэ ж динэн, со Иоанно сля англунари. 7 И пхэндэ: — Амэ на джянах, кастар. 8 Исусо пхэнда лэнди: — Тунчи и Мэ на пхэнава тумэнди, савя зорага терав вса откада. 9 Тай пхэнда кацави дума: — Екх мануш выбаряда виноградноко. Тунчи здэня лэ манушэнди пала ловэн, а еджино улагля пэ бут вряма. 10 Кала поджиля вряма, бичалда лэндэ пэхкэрэ бутярнэ, соб тэ залэ котор виноградоустар, саво стидэне. Нэ виноградаря дукхавдэ бутярнэ и отбичалдэ лэ павпалэ шушэ вастэнца. 11 Хулай бичалда

лэндэ аврэ бутярнэ, нэ вонэ мардэ лэ тай тэлярдэ лэхкири патив, и отбичалдэ шушэ вастэнца. 12 Хулай бичалда лэндэ инте екхэ бутярнэ. Нэ виноградаря и кодэлэ домардэ и вычутэ аври. 13 Тунчи хулай пав винограднико пхэнда: «Со манди тэ терэ? Бичалава лэндэ мурэ камлэ чывэ, чи на ладжняна лэстар?» 14 Нэ виноградаря дыкхле чывэ и пхэндэ екх екхэсти: «Акэ кодэва, касти доросэлапэ всаворо хулаимо, мулярага лэ, тунчи хулаимо доросэлапэ амэнди». 15 Тунчи вылиджалдэ чывэ аври виноградникостар тай мулярдэ лэ. И со терэла лэнца виноградноохоро хулай? 16 Авэла тай мулярэла кадэлэн виноградарен, а виноградноико отдэла аврэ манушэнди. Мануша, савэ шундэ Исусо, пхэндэ: — Тэ на авэл кади! 17 Исусо въздыкхля пэ лэн и пхучля: — Сар тэ полэ кода, со чиндо: «Бар, саво вычутэ кодэла, ко ваздэнас цэр, ачиля шэрутнэ барэга дэ вэнгло»? 18 Ко тэлэдэла пэ кодэва бар, розмарэлапэ, а пэ кастэ кодэва бар пэрэла, розтасавэла лэ. 19 Дэ кодыя вряма сиклимаря пав Упхэнима тай англунэ рашая полиле, со Исусо пала лэн розпхэнэлас, и камле екхатар тэ хутилэ Лэ, нэ дарэне манушэндар. 20 Тунчи вонэ ачиле тэ дыкхэ пала Исусо и подбичалэнас Лэстэ манушэн, савэ поддыкхэнас пала Лэ и прытховэнаспэ пативалэ манушэнца, нэ родэнас, сар тэ астарэ Исусо пэ лавэн тай тэ здэ Лэ раенди и прыбэшлэсти Римостар. 21 Вонэ пхучле Исусостар: — Сиклимари! Амэ джнянах, со Ту пхэнэх тай сиклярэх пав чячима. И на дыкхэх пэ мо манушэсти, нэ сиклярэх манушэн чячюнэ Дэвлэхкэрэ дромеэсти. 22 Чи мишто пав Упхэнима тэ потинэ налогоуря императости, чи нат? 23 Исусо полиля лэнгоро хрантимо тай пхэнда лэнди: 24 — Сикавэнтэ манди динарии: какхоро муй исин вымардо пэр лэстэ и какхоро катэ лав? Вонэ пхэндэ: — Императохкэрэ. 25 Исусо пхэнда лэнди: — Тунчи отдэн императости императохкоро, а Дэвлэсти отдэн Дэвлэхкоро. 26 Лэндэ на выджиля тэ схутилэ Исусо пэ лавэ англа манушэн. Вонэ дэнепэ дыво Лэхкэрэ лавэнди и заачиле мулком. 27 Тунчи авиле койсавэ саддукея. Вонэ на патянас, со мулэ отджювдэна, тай пхучле Исусостар: 28 — Сиклимари! Моисеи чинда амэнди, со, кала мэрэла мануш, кастэ сля ромни и на сля чяворэн, тунчи лэхкэрэ пхралэсти трэбуни тэ лэл боря паларом, соб тэ авэл пхралэстэ родо. 29 Сля эфта пхралэн. Пхурэдэр лэндар лиля пэсти ромня, нэ тунчи муля, и чяворэн на сля лэндэ. 30 Кади ж и авэр пхрал. 31 И трито пхрал лиля пэсти кадэла ромня, и кади ж всавэрэ эфта пхралэн.

Всавэрэ пхрала помуле, и чяворэн лэндэ на сля. 32 Тунчи муля и ромни. 33 Кала мулэ отджювдэна, какхири ромни кадья манушни авэла? Вой жэ эфта молы паларом выджялас! 34 Исусо пхэнда лэнди: — Мануша дэ кадэва вако лэн пэсти ромнен и джян паларом. (aion g165) 35 А касти вытэлэдэла патив тэ джювэ дэ авэр вако тай савэ отджювдэна мулэндар, кадэла мануша на лэн пэсти ромнен и паларом на выджян. (aion g165) 36 Вонэ на мэрэна, нэ исин сар ангелурия. Вонэ важ Дэвлэ чывэ и чея, колэсти со авэна ваздэнэ мулэндар. 37 Ай кода, со мулэ отджювдэн, сикавда Моисеи паша терново кашт, саво пхаболас, кала пхэнда Раести, со Вов — Дэвлэ Авраамохкоро, Дэвлэ Исаакохкоро тай Дэвлэ Иаковохкоро. 38 Вов — Дэвлэ джювдэн, а на мулэн. Лэстэ всавэрэ исин джювдэ. 39 Пэ кода койсавэ сиклимаря пав Упхэнима пхэндэ: — Сиклимари! Ту мишто пхэндан. 40 И всавэрэ даранас тэ пхуче Исусостар дурэдэр. 41 Тунчи Исусо пхучля лэндэ: — Сар пхэнэн, со Христосо исин Чяво Давидохкоро? 42 Кала еджино Давидо пхэнэл дэ лил «Псалмы»: «Пхэнда Рай Дэвлэ мурэ Раести: Бэш пав чяче вастэ Мандар 43 ды кодыя вряма, сар Мэ чувавэ Тирэ врыжымашэн тала пурэн Тути». 44 Давидо акхарэл Лэ Раега. Сар Вов прыджялпэ Давидости чывэга? 45 И кала Исусо шундэ всавэрэ мануша, Вов пхэнда Пэхкэрэ сиклярнэнди: 46 — Даран сиклимарендар пав Упхэнима, савэнди чялэл тэ пхирэ дэ лунго їда и соб мануша тэ наисарэнпэ лэнца пэ форо. Дэ синагога и дэ цэрэн, курик лэн акхарэн, вонэ камэн тэ бэшэ пэ англунэ тхан. 47 Вонэ залэн цэра джювлендар, савэндэ муле рома, и бут мангэнпэ кади, соб тэ дыкхэн лэн мануша. Лэн дожутярэл барэдэр сындэ.

21 Тунчи Исусо дыкхля, сар барвалэ мануша чувэнас даруля дэ храмохкоро сыртали. 2 Дыкхля кади ж, сар чёроуры манушни, савятэ муля ром, чута дэ сыртали дуй харумэ хурдэ ловэнца. 3 Исусо пхэнда: — Чячимага пхэнав тумэнди, со кадья чёроуры манушни чута будэр всавэрэндар. 4 Всавэрэ пэхкэрэ барвалимастар дэне даро Дэвлэсти, а кадья чёры отдэня всавэрэ ловэ, савэ сле латэ пэ джювима. 5 Кала мануша пхэнэнас пала храмо, сар вов стердо кучутнэ барэндар тай шукар обтховдо дарэнца, савэ анэнас Дэвлэсти, Исусо пхэнда: 6 — Авэла вряма, кала кодэлэстар, со тумэ катэ дыкхэн, на ачелалэ бар пэ барэ, вса авэла розмардо. 7 Тай пхучле Исусостар: — Сиклимари! Кала вса откада авэла? Сави шпэра,

со када вса сиво авэла? 8 Исусо пхэнда: — Дыххэн, соб тумэн тэ на хохавэн! Бут манушэн авэна тала Муро Лав и пхэнэна: «Када Мэ» и «Авиля вряма». На джян пала лэндэ. 9 Кала шунэна пала маримо и пала кода, сар ваздэнпэ мануша екх пэ екхэстэ, тунчи на даран. Англал кадэлэсти трэбуни тэ авэ. Нэ агор авэла на екхатар. 10 Исусо пхэнэлас дурэдэр: — Народуря ваздэнпэ пэ марима екх екхэга, и тхагаримо выджяла пэ марима тхагаримага. 11 Пхув затинисявэла баря зорага, авэна пав тханэн бокха, насвалимо и бари дар, тай упралимо парувэлапэ. 12 Нэ англал мануша авэна тэ хутилэ тай тэ традэ тумэн, тэ отлиджя дэ синагоги тай тэ чувэ дэ барунэн. Вонэ лиджняна тумэн тхагарендэ и раендэ пала Муро Лав. 13 Тунчи тумэндэ авэла вряма тэ пхэнэ пала Ман. 14 Нэ тховэн пэсти дэ їлэ: на пхагэн шэро, со тэ пхэнэ. 15 Мэ дава тумэнди кацавэ лава и годи, со тумарэ врыжымашуря пхандэна муя и на выачена англа тумэн. 16 Доджяла ды кодэлэ, со дада и дэя, пхрала, родо тумаро и амала авэна тэ здэ тумэн, а койсавэн тумэндар мулярэна. 17 Всавэрэ мижона пэ тумэн пала Ман. 18 Нэ ни екх балоро тумарэ шэрэстар на хасявэла. 19 Кодэлэсти рицарэнпэ тумарэ патявимаэстэ, соб тэ фирисарэ тумаро джовимо. 20 Кала ж дыкхэна, со бут халавдэн стасавэн Ерусалимо, тунчи джянэн, со авиля вряма, кала форо кадэва авэла розмардо и ачявдо. 21 Тунчи кодэла, савэ дэ Иудея, мэк нашен дэ плаен, и кодэла, ко дэ форо, мэк выджян лэстар, и савэ джовэн дэ гавэн, мэк дэ форо на заджян. 22 Кода исин вряма, кала Дэвэл дэла лэнди пав лэнгэрэн рындонэн и кала стэрэлапэ вса, со чиндо. 23 Бида дэ кодэлэн дивэн джовленди, савэ исин пхарэ и савэ парварэн цыкнэ чяворэн. Важ кода со бари грыжа джял пэ кадья пхув и бари холи пэ кадэлэн манушэн. 24 Койсавэн мулярэна барэ чюренца, бутэн схутилэна тай отлиджяна дэ пхуя, тев джовэн авэр народуря. Наиудея авэна тэ тасавэ пурэнца Ерусалимо ды кодэлэ, сар на пэрэачела лэнгири вряма. 25 Тунчи парувэнапэ кхам, чён тай чергэня. Народуря пэ пхув шунэна, сар море дэла баро їласо, и лэн облэна бари дар и бари грыжа. 26 Вонэ авэна тэ хацарэ зора даратар, кала авэна тэ дожутярэ кода, со джял пэ кадья люмля, и зора пэ упралима издрана. 27 Тунчи дыкхэна Чявэ Манушыканэ, Саво джял пэ хмара баря зорага и дэ бари слава. 28 Кала вса кода авэла, тунчи вшен ворта и ваздэн тумарэ шэрэ упрэ, колэсти со фирисаримо тумаро пашэ. 29 И пхэнда лэнди Исусо кацави дума: —

Подыххэнтэ пэ инжырно кашт и пэ авэр кашта. 30 Кала тумэ дыкхэна, со пэ лэн рандя розмукэнпэ, тунчи джянэн, со сиво авэла милай. 31 Кала тумэ дыкхэна, со вса кода терэлпэ, джянэн, со надур тумэндар исин Дэвлэхкоро Тхагаримо. 32 Чячимага пхэнав тумэнди: родо кадэва на проджяла, сар вса откада терэлапэ. 33 Упралимо тай пхув проджяна, нэ лава Мурэ на проджяна никала. 34 Дыххэн пала пэстэ, соб тумарэ їлэ тэ на тасавэн биладжявимо, матимо и годи, сави кици думисарэл, сар дурэдэр тэ джовэ. Дыххэн, соб кадэва диво тэ на авэл пэ тумэн, кала тумэ лэ на дожутярэн. 35 Сар кхувди чувэн пэ чириклен, кала вонэ на дожутярэн кода, кади ж и кадэва диво авэла пэ всавэрэн, ко джовэн пэ люмля. 36 Всавири вряма дыкхэн пала пэстэ тай мангэнпэ, соб тумэндэ тэ авэл зор тэ пэрэлиджя кода, со авэла пэ кадья пхув, и тэ аче англа Чявэ Манушыканэ. 37 Дивэсэ Исусо сиклярэлас дэ храмо. Кала ж бэшэлас кхам, Вов джялас пэ Оливково плай и ратярэлас котэ. 38 Дэнзор всавэрэ мануша авэнас Исусостэ дэ храмо, соб тэ шунэ Лэ.

22 Сля пашэ сырботори, саво акхарэлпэ Биквасно мандро, а инте — Патради. 2 Англунэ рашая и сиклимаря пав Упхэнима родэнас, сар тэ мулярэ Исусо, нэ даранас манушэндар. 3 Тунчи сатана заджия дэ Иуда, савэ акхарэнас Искарियो, екхэ дэшудуе сиклярнэндар. 4 Иуда джия тай допхэндапэ англунэ рашаенца и халавдэнца, со вов здэла лэнди Исусо. 5 Вонэ лошыле тай пхэндэ Иудасти, со потинэна лэсти. 6 Вов дэня лав и родэлас поджили вряма, кала Исусо ачелапэ Еджино, соб тэ здэ Лэ. 7 Авиля диво, саво акхарэлпэ Биквасно мандро, кала трэбуни тэ чинэ патраджкэрэ бакрорэ. 8 Тунчи Исусо акхарда Петро тай Иоанно и пхэнда лэнди: — Джян и лачярэн патраджкоро хамо. 9 Вонэ пхэндэ Исусости: — Тев Ту камэх, соб амэ тэ лачярах? 10 Исусо пхэнда лэнди: — Акэ, кала тумэ заджяна дэ форо, дыкхэна манушэ, саво лиджял вахкор панега. Джян пала лэ и заджян дэ кодэва цэр, курик вов заджяла. 11 Тай пхэнэн цэрэхкэрэ хулаести: «Сиклимари пхучел тутар: "Тев цэр, соб Манди тэ ха патради Мурэ сиклярнэнца?"» 12 Хулай сикавэла тумэнди баро цэр упрэ, саво прытидэне важ сырботори. Котэ терэн скаминд. 13 Вонэ джиле тай вса аракхле, сар пхэнда лэнди Исусо, и лачярдэ патраджкоро хамо. 14 Кала авиля вряма, Исусо тай апостолуря бэшле пала скаминдэ. 15 Тунчи Исусо пхэнда: — Сар Мэ камлём тэ ха

кадэва патрадыкоро хамо тумэнца англа кода, сар прылава бари грыжа. 16 Пхэнав тумэнди, со будэр на хава Мэ лэ ды кодья вряма, сар терэллэпэ кадья патради дэ Дэвлэхкэрэ Тхагарима. 17 Тунчи Вов лиля тахтай, наисарда Дэвлэ тай пхэнда: — Прылэн кадэва тахтай и всавэрэ пэн лэстар. 18 Пхэнав тумэнди, со будэр на авава тэ пэ пимо виноградоустар аж ды кодья вряма, сар авэла Дэвлэхкоро Тхагаримо. 19 Тунчи Иусо лиля мандро, наисарда Дэвлэ, пхаглы мандро пэ которэн, дэня лэнди и пхэнда: — Када исин Муро труп, саво пала тумэн отдава. Кади терэн, соб тэ рапирэн Ман. 20 Кала вонэ хале, Иусо кади ж лиля тахтай и пхэнда: — Кадэва тахтай исин нэво завето дэ Мурэ ратэ, саво пала тумэн прочувэлпэ. 21 Тай акэ, васт кодэлэхкоро, ко здэл Ман, Манца пала екхэ скаминдэ. 22 Чяво Манушыкано джыл кади, сар Лэсти трэбуни тэ проджя. Нэ бида кодэлэ манушэсти, саво здэл Лэ. 23 Тунчи сиклярнэ ачиле тэ пхуче екх екхэстар, ко лэндар камля кода тэ терэ. 24 Тунчи вонэ ачиле тэ хапэ екх екхэга пала кода, ко лэндар барэдэр. 25 Иусо пхэнда лэнди: — Тхагаря народонэнгэрэ прыпхэнэн лэнди. Кодэла, кастэ исин зор, пхэнэн, со вонэ терэн лачимо. 26 Нэ тумэ на терэн кади. Барэдэр тумэндар мэк тэ авэл сар цыкнэдэр всавэрэндар, и кодэва, ко прыбэшло тумэндэ, мэк авэл сар бутярно. 27 Екх бэшэл пала скаминдэ, ай авэр стховэл пэ скаминдэ хамо. Ко лэндар барэдэр? Чи на кодэва, ко бэшэл пала скаминдэ? А Мэ машкар тумэн сар бутярно. 28 Тумэ пэрэлиджылдэ Манца бут зумавимо. 29 Сар Дад Муро дэня Манди Тхагаримо, кади и Мэ дав тумэнди, 30 соб тумэ тэ хан и тэ пэн пала Мурэ скаминдэ дэ Мурэ Тхагарима. Тумэ бэшэна пэ тронуря тэ сундисарэ дэшудуй родуря Израилёхкэрэ. 31 — Симоно, Симоно! Акэ, сатана манглы тэ зумавэ тумэн, соб тумэ тэ авэн жужардэ, сар див жужарэлпэ сулумэндар. 32 Нэ Мэ манглёмпэ пала тут, соб тэ на хацарэх патявимо. И кала ту рисьявэга павпалэ Мандэ, тунчи подрицарэга тирэ пхралэн. 33 Пётро пхэнда Лэсти: — Рае! Пала Тут мэ и дэ барунэ, и пэ мэрима джява! 34 Иусо дэдуманя: — Пхэнав тути, Пётро, англа колэ, сар задилабэла башно авдивэ, ту тривал Мандар отпхэнэгапэ. 35 Тунчи Иусо пхэнда лэнди: — Кала Мэ бичалавас тумэн и тумэндэ на сля ни тышыла, ни траста, ни пундрангэ, чи на хутилэлас со тумэнди? Вонэ пхэндэ: — Нат. 36 Тунчи Иусо пхэнда лэнди: — Нэ екхатар, кала кастэсэ исин тышыла чи траста, лэнтэ лэн. Ай кастэ нэнай, мэк кодэва битинэла пэхкири йда тай тинэла чюри. 37 Пхэнав тумэнди, со Манца авэла кода, сар чиндо: «И пала прахаре динэнас Лэ». Трэбуни, соб тэ стерэлпэ вса, со пхэндо пала Ман. 38 Вонэ пхэндэ: — Рае! Акэ, амэндэ исин дуй чюри! Иусо пхэнда лэнди: — Када хутилэла. 39 Тунчи Иусо выджилэ цэрэстар тай джиля, сар Лэстэ сля прылито, пэ Оливково плай. Джиле Лэга и Лэхкэрэ сиклярнэ. 40 Кала вонэ авиле пэ кодэва тхан, Иусо пхэнда: — Мангэнпэ, соб тэ на авэн тумэ зумавдэ! 41 Еджино джиля лэндар пэ скици чувэн бар, пэля пэ чянгэн, ачилэ тэ мангэлэ 42 тай пхэнда: — Дадэ! Кала исин Тири воля, залэ кадэва тахтай Мандар! Нэ мэк авэла, на сар Мэ камав, а сар камэх Ту. 43 Тай авилэ ангело упралимастар и подрицарэлас Иусо. 44 Сля Лэсти фартэ пхаро, и Вов инте зоралэдэр мангэласпэ, кади со Лэхкоро пото сля сар рат и тэлэдэлас пэ пхув. 45 Кала поманглыпэ, Иусо вщиля, поджиля сиклярнэндэ и дыкхля, со вонэ засутэ баря грыжатар. 46 Иусо пхэнда лэнди: — Сости тумэ совэн? Вщен и мангэнпэ, соб тэ на авэн тумэ зумавдэ! 47 Кала Иусо инте пхэнэлас кадэла лава, авилэ гроза манушэн. Англал лэндар джялас екх дэшудуендар, савэ акхарэнас Иуда. Вов поджиля Иусостэ тэ чюминдэ Лэ. 48 Иусо пхэнда лэсти: — Иуда! Ту чюминдэх и дэ кодья ж вряма здэх Чявэ Манушыканэ? 49 Кодэла, ко аченас пашэ, полиле, со екхатар авэла, тай пхэндэ: — Рае! Чи тэ на малавэ амэндэ чюряга? 50 Екх лэндар вылиля чюри, малавда англунэ рашаехкэрэ бутярнэ тай отчинда лэсти чячэ кан. 51 Тунчи Иусо пхэнда: — Авэла тумэнди! Вов лиляпэ канэстэ и састярда бутярнэ. 52 Англунэ рашаендэ, халавдэндэ храмоустар тай пхурэдэрэндэ, савэ авиле тэ схутилэ Иусо, Вов пхучля: — Сар пэ прахарэ, выджиле тумэ пэ Ман чюренца тай дэстэнца? 53 Диво дивэстар Мэ слём тумэнца дэ храмо, и тумэ на ваздэне пэ Ман пэхкоро васт. Нэ екхатар тумари вряма, кала калимо лиля зор. 54 Тунчи вонэ схутилдэ Иусо тай отлиджылдэ англунэ рашаестэ дэ цэр. А Пётро рицардапэ лэндар ригага, нэ джялас пала лэн. 55 Машкар грэда розлиджылдэ яг, и бэшле всавэрэ пашэ ягатэ. Бэшля и Пётро лэнца. 56 Екх бутярни дыкхля Пётро, кала вов бэшэлас паша яга, прыдыкхляпэ лэстэ тай пхэнда: — И кадэва сля Лэга. 57 Нэ Пётро на прыджянглыпэ тай пхэнда джювлиати: — Нат, джювлие, мэ на джянав Лэ. 58 Проджиля набут вряма, авэр мануш дыкхля Пётро и пхэнда: — И Ту екх лэндар! Нэ Пётро пхэнда кадэлэ манушэсти: — Нат, мануша, када на мэ! 59 Проджиля екх

мардо вряма, тай инте екх мануш пхэнда дэ яххэн: — Чычимага, кадэва кади ж сля Лэга, вов исин галилеянино. 60 Нэ Пётро пхэнда кадэлэ манушэсти: — Мануша, на джянав, пала со ту пхэнэх. И екхатар, кала вов инте пхэнэлас кадэва лав, затиписия башно. 61 Тунчи Рай обрисиялэпэ тай вздыкхля пэ Петро. И Пётро възгинисарда Раехкоро лав, сар Вов пхэнда лэсти: «Ды колэ, сар задилабэла башно авдивэ, ту тривал Мандар отпхэнэгалэ». 62 Вов выджия котарь и заровиня, кэркэ ясвэнца. 63 Мануша, савэ рицарэнас Исусо, марэнас Лэ тай асанас Лэстар. 64 Вонэ запхангле Лэсти якха, мардэ Лэ пав муй и пхученас: — Ту, англунари, пхэн, ко малава Тут? 65 И бут налаче лава пхэнэнас пала Исусо. 66 Кала проджия рят, стидэнэпэ манушэнгэрэ пхурэдэра, англунэ рашая и сиклималя пав Упхэнима, андэ Исусо дэ лэнгоро Синедрионо 67 тай пхучле Лэ: — Ту исин Христосо? Пхэн амэнди. Исусо дэдуманя: — Кала пхэнава тумэнди, тумэ на патяна. 68 А кала Мэ пхучява тумэндар, тумэ нисо на пхэнэна Манди. 69 Нэ екхатар Чяво Манушыкано авэла тэ бэшэ пав чячи риг Дэвлэхкиря зоратар. 70 Тай пхэндэ всавэрэ: — И кади, Ту исин Дэвлэхкоро Чяво? Исусо пхэнда лэнди: — Тумэ еджинэ пхэнэн, со Мэ исин Дэвлэхкоро Чяво. 71 Кодэла мануша пхэндэ: — Саво допхэнимо амэнди инте трэбуни? Амэ еджинэ шундэ, со Вов пхэнда.

23 Тунчи всавэрэ, ко сле котэ, вщиле и отлиджялдэ Исусо Пилатостэ. 2 Тай ачиле тэ дошарэ Лэ и пхэнэнас: — Амэ уджянгле, со Вов змарэл амаро народо дромэстар, пхэнэл, со на трэбуни тэ потинэн налогоуря императости, и дэдумэл пала Пэстэ, со Вов — Христосо, Тхагари. 3 Пилато пхучля Лэстар: — Ту Тхагари иудеенгоро? Исусо пхэнда: — Ту кади пхэнэх. 4 Пилато дэдуманя англунэ рашаенди и всавэрэ манушэнди: — Мэ на аракхав дэ Кадэлэ Манушэ нисави дош. 5 Нэ вонэ на пэрэчаченас тэ дошарэ Исусо и пхэндэ: — Вов ваздэл манушэн и сиклярэл пав свавири Иудея, англал дэ Галилея, а тунчи авила пэ кадэва тхан. 6 Пилато шунда када и пхучля: — Вов Галилеятар? 7 Кала Пилато уджянгле, со Исусо кодэлэ тханэстар, тев сля тхагарега Иродо, вов бичалда Исусо Иродостэ, саво дэ кадэлэн дивэн сля дэ Ерусалимо. 8 Иродо дыкхля Исусо и фартэ лошыля. Вов думут камля тэ дыкхэ Исусо, колэсти со бут ашунда пала Лэ и камля, соб Вов тэ сикавэл лэсти варисаво диво. 9 И бут пала со розпхучелас Лэ, нэ Исусо нисо на пхэнда Иродости. 10 Ай

англунэ рашая и сиклималя пав Упхэнима аченас котэ и дурэдэр дошарэнас Лэ. 11 Иродо їханэ халавдэнца ачиле тэ обмукэ патив Исусохкири тай асанепэ Лэстар. Тунчи урявда Лэ дэ барвали їда тай отбичалда павпалэ Пилатостэ. 12 Дэ кодэва диво Иродо тай Пилато ачиле амалэнца, а ды колэ вонэ сле врыжымашэнца. 13 Пилато ж акхарда англунэ рашаен, пхурэдэрэн и всавэрэн манушэн. 14 Тай пхэнда лэнди: — Тумэ андэ мандэ Кадэлэ Манушэ и пхэндэ, со Вов ваздэл манушэн. Тай акэ, мэ англа тумэн роздыкхлём Лэхкоро рындо и на аракхлём дэ Кадэлэ Манушэ нисави дош, дэ савя тумэ Лэ вуджилисарэн. 15 Тай Иродо на дошарда Лэ и бичалда павпалэ. Вов нисо кацаво на терда, пала со Лэ трэбуни тэ сундисарэ пэ мэрима. 16 Мэ прыпхэнава тэ марэн Лэ чукненца, а тунчи отмукава. 18 Нэ всавэрэ мануша затиписиле: — Мэримо Лэсти! Отмук амэнди Варавва! 19 Ай Варавва бэшля дэ барунэ пала кода, со вов мулярэлас и ваздэлас манушэн дэ форо. 20 Пилато упалэ подваздэнэ пэхкоро їласо, колэсти со камля тэ отмукэ Исусо. 21 Нэ мануша типисиле: — Прымар, прымар Лэ пэ трушул! 22 Пилато дэ трито моло пхэнда лэнди: — Сави биде Вов терда? Мэ на аракхлём дэ Лэстэ нисави дош, пала савя Лэ трэбуни тэ сундисарэ пэ мэрима. Мэ прыпхэнава, соб Лэ тэ марэн чукненца, тай тунчи отмукава. 23 Нэ мануша затиписиле зоралэ їласога, соб тэ прымарэ Лэ пэ трушул, и типимага домардэпэ пэхкоро. 24 Тунчи Пилато сундисарда Исусо кади, сар вонэ камле. 25 И отмукля барунэстар прахарен, саво мулярэлас и ваздэлас всавэрэн манушэн дэ форо, а Исусо одтэнэ дэ лэнгэрэн вастэн, сар и мангле иудея. 26 Кала халавдэ лиджянас Исусо пэ мэрима, вонэ схутилдэ Симоно кирениянино, саво джялас малятар, и прыпхэндэ лэсти тэ лиджэ трушул пала Исусо. 27 Фартэ бут манушэн джянас пала Исусо. Джянас пала Лэ и джювля, савэ марэнас еджинэ пэ дэ колинэн баря грыжатар тай фартэ ровэнас пала Лэ. 28 Исусо обрисиялэ лэндэ тай пхэнда: — Чеялэ Ерусалимостар! На ровэн пала Ман! Нэ ровэн пала пэстэ и пала тумарэн чяворэн. 29 Акэ, поджял вряма, кала пхэнэна: «Бахталэ бичяворэнгэрэ, савэ на бэнёнас и на парварэнас цыкнэ чяворэн!» 30 Тунчи мануша пхэнэна вуче тай цыкнэ плаенди: «Тэлэдэн пэ амэн!» тай «Ушарэн амэн!» 31 И кала терэн када джювдэ каштэга, со тунчи терэна шукага? 32 Лиджялдэ пэ мэрима їтханэ Лэга дон прахарен. 33 Кала авиле пэ тхан, саво акхарэлпэ Черепе, котэ прымардэ пэ трушул

Исусо тай дон прахарен, екхэ пав чячи риг, ай аврэ пав зэрво риг Лэстар. 34 Исусо пхэнэлас: — Дадэ! Эртисар лэн! Вонэ на джянэн, со терэн. Халавдэ чутэ жребии и розлиле Лэхкири їда. 35 А мануша аченас и дыкхэнас. Пхурэдэра терэнас асамо Исусостар тай пхэнэнас: — Аврэн фирисарда, а екхатар мэк Еджино Пэ фирисарэл, кала Вов исин Христосо, Савэ Дэвэл вытидэня. 36 Кади ж и халавдэ асанас Исусостар, поджянас Лэстэ тай дэнас Лэсти шукло мол. 37 И пхэнэнас: — Кала Ту исин Тхагари иудеенгоро, тунчи фирисар Еджино Пэ! 38 Упрэ Лэстар сля чиндо: «Кадэва исин иудеенгоро Тхагари». 39 Екх прахарендар, саво сля амблавдо пэ трушул, кошэлас Исусо и пхэнэлас: — Кала Ту исин Христосо, фирисар Еджино Пэ и амэн! 40 Авэр прахари улэлас лэ тай пхэнэлас: — Ту Дэвлэстар на дарах? Ту еджино сундисардо пэ мэрима, сар и Вов. 41 Амэн сундисардэ пала амари дош и дэне амэнди кода, со амэ затердэ. Нэ Вов на терда нисаво вурьтимо. 42 Тай пхэнда Лэсти: — Исусо, взгинисар пала ман, кала Ту авэга дэ Тирэ Тхагарима! 43 Тай пхэнда лэсти Исусо: — Чячимага пхэнав тути: авдивэ ту авэга Манца дэ раї. 44 Сля диво аври, пашэ дэшудуй чясо вряма, тай пав всавири пхув змукляпэ калимо ды тритонэ чясо вряма. 45 Кхам калиля, тай похтан, саво сля амблавдо дэ храмо, пхариля поепаш. 46 Тунчи Исусо затиписия зоралэ їласога: — Дадэ! Дэ Тирэ вастэн отдав Муро фано! Вов пхэнда када и отдэня фано. 47 Кала шэляжоро пхурэдэр дыкхля вса откада, вов ваздэня слава Дэвлэсти тай пхэнда: — Чяче, Вов сля дэвликуно Мануш! 48 Всавэрэ мануша, савэ стидэнепэ, соб тэ дыкхэ Лэхкоро мэримо, дыкхле, со тердапэ, джиле павпалэ тай марэнас еджинэ пэ дэ колинэн. 49 Дурал ачиле и дыкхэнас пэ кода мануша, савэ джянгле Исусо, тай джювля, савэ джянас пала Лэстэ Галилеятар. 50 Котэ сля лачё и пативало мануш, савэ акхарэнас Иосифо. Вов сля екх пхурэдэрэндар дэ Синедрионо, 51 нэ на подрицарэлас лэнгэрэ лава и рындуря. Вов выбарила дэ форо Аримафея тай дожутярэлас, кала авэла Дэвлэхкоро Тхагаримо. 52 Вов авиля Пилатостэ тэ мангэ, соб кодэва тэ отдэл лэсти Исусохкоро трупо. 53 Иосифо слиля трупо трушулэстар, обхувда похтаного, дэ савэ гаравэн мулэн, тай тховда дэ склепо, саво сля вымардо дэ барэ и тев инте ника на гаравэнас. 54 Када сля диво, кала лачярэнаспэ субботатэ. И суббота сля пашэ. 55 Пала Иосифо джянас джювля, савэ авиле Исусога Галилеятар. Вонэ дыкхле склепо и сар

тховэнас пордэ Исусохкоро трупо. 56 Тунчи рисиле цэрэ и лачярдэ мастина и миро. Ай кала авиля суббота, вонэ отцинёнас, сар чиндо дэ заповедь.

24 Пэ ангулно куркэхкоро диво, дэнзор, кала кхам вщелас, джювля лиле лачярдэ мастина и джиле склепостэ. 2 Нэ кала авиле, удыххле, со бар склепостар оттховдо дэ рига. 3 Кала заджиле андрал дэ склепо, на аракхле Рае Исусохкоро трупо. 4 Джювля на джянгле, сар кода тэ полэ. Тунчи ачиле англа лэн дуй мурша дэ їда, савятар марэлас одуд, сар молния. 5 Джювля фартэ дарэне и обмукле шэрэ тэлэ, нэ мурша пхэндэ лэнди: — Сости тумэ родэн джювдэ машкар мулэн? 6 Лэ нэнай катэ, Вов отджювдиня мулэндар. Взгинисарэн, сар Вов пхэнэлас тумэнди инте дэ Галилея: 7 «Чяво Манушыкано авэла отдэно дэ вастэн бэзимахкэрэ манушэнди, авэла прымардо пэ трушул и отджювдэла мулэндар пэ трито диво». 8 Тунчи вонэ взгинисардэ Исусохкэрэ лава. 9 Тунчи рисиле склепостар и розпхэндэ пала вса кода дэшукхэнди и всавэрэнди, савэ лэнца сле. 10 Кадэла джювля сле Мария Магдалина, Иоанна, дэй Иаковохкири, савя кади ж акхардэ Мария. И авэр джювля, савэ сле лэнца, кади ж пхэнэнас пала кода апостолонэнди. 11 Апостолуря думисардэ, со джювля дэдумане динимо, и на патине лэнди. 12 Нэ Пётро всаекх вщиля и прастэня склепостэ. А кала тэлювда склепостэ, вов дыкхля, со котэ пашлёл екх похтан. Тай джиля павпалэ, а еджино на патялас колэсти, со дыхле лэхкэрэ якха. 13 Дэ кодэва диво дуй сиклярнэндар джянас дэ гав Эммаусо, саво сля пашэ дэшудуй километры Ерусалимостар. 14 Тай дэдумэнас екх екхэга пала вса, со тердапэ. 15 Кала вонэ дэдумэнас тай розпхученас екх екхэ, Еджино Исусо пашыня лэндэ и джиля лэнца. 16 Нэ лэнди сля затердо, и вонэ на уджянгле Исусо. 17 Исусо пхучля лэндар: — Пала со тумэ дэдумэн дромэга? Вонэ ачиле и помукле муй. 18 Екх сиклярнэндар, Клеопа, пхэнда: — Всавэрэндар, ко авиля дэ Ерусалимо, Ту, выджял, екх, Саво на джянэл, со стердапэ пэ дивэн? 19 Исусо пхучля: — Пала со Мэ на джянав? Вонэ пхэндэ Лэсти: — Пала кода, со стердапэ Исусога Назаретостар, Саво сля ангулнари, зорало дэ всавэрэ, со терэлас и пхэнэлас англа Дэвлэ и англа манушэн. 20 Сар амарэ ангулнэ рашая и пхурэдэра отдэне Лэ пэ мэрима и прымардэ Лэ пэ трушул. 21 Ай амэндэ сля надия, со Вов фирисарэла Израили. Тай акэ, джиля трито диво, сар вса откада стердапэ. 22 Нэ койсавэ амарэ джювлендар розпхэндэ амэнди

кода, состар амэ дэнепэ дыво. Вонэ авиле дэнзор, кала ххам вщелас, склепостэ 23 тай на арахла котэ Исусохоро трупо. Тунчи рисиле тай розпхэндэ амэнди, сар лэнди сикавдэпэ ангелуря и пхэндэ, со Исусо джювдо. 24 Койсавэ амэндар джиле склепостэ и арахла, со котэ вса кади, сар и пхэндэ джювля, нэ Исусо на дыкхле. 25 Тунчи Вов пхэнда лэнди: — Чи нэнай тумэндэ годи? Сар пхаро тумэ патян кодэлэсти, со пхэндэ англунаря! 26 Чи на трэбуни сля Христости тэ ха бари грыжа и тэ заджя дэ бари слава? 27 И ачиля тэ розпхэнэ джикай Моисеестар тай всавэрэн аврэн англунарен и сикавда, со чиндо сля пала Лэ дэ всавэрэн Лилэн. 28 Тунчи сиклярнэ поджиле пашэ гавэстэ, курик джянас. Исусо сикавда лэнди, со камля тэ джя дурэдэр. 29 Нэ вонэ фартэ мангэнас Лэ: — Ачпэ амэнца! Диво поджиля пашэ рятятэ. Вов заджиля дэ цэр и ачиляпэ лэнца. 30 Кала Вов бэшля лэнца пала скаминдэ, тунчи лиля мандро, наисарда, розпхагля и подэня лэнди. 31 Тунчи оттердэпэ лэнгэрэ якха, и вонэ уджянгле Исусо. Нэ Лэ на ачиля душло. 32 Вонэ ачиле тэ пхэнэ екх екхэсти: — Чи на пхабонас амарэ їлэ, кала Вов дэдуманя амэнца дромэга и оттерда амэнди, со чиндо дэ Лилэн? 33 Вонэ екхатар вщиле тай рисиле дэ Ерусалимо. Кала авиле, котэ арахла дэшуекхэн и кодэлэн, савэ лэнца сле. 34 Апостолуря розпхэндэ лэнди, со Рай чычимага отджювдиня мулэндар тай сикавдапэ Симоности. 35 Тунчи кодэла розпхэндэ, со тердалэ лэнца пав дром и сар вонэ уджянгле Исусо, кала Вов пхагля мандро. 36 Кала вонэ инте дэдумане, Еджино Исусо ачиля машкар лэн и пхэнда: — Пачя тумэнди! 37 Вонэ замуле даратар и гинисардэ, со дыкхэн мулэхкоро фано. 38 Нэ Исусо пхэнда лэнди: — Сости тумэ даран? Сости тумаро патявимо исин кацаво цыкно? 39 Подыкхэнтэ пэ Мурэ вастэн и пурэн! Када Мэ исин. Лэмпэ Мандэ тай роздыкхэнтэ. Фаностэ нэнай трупо и кокала, а Мандэ исин. 40 Исусо пхэнда откада тай сикавда лэнди Пэхкэрэ васта и пурэ. 41 Кала вонэ лошатар инте на патянас и дэнаспэ дыво, Исусо пхучля лэндар: — Исин тумэндэ хамо? 42 Вонэ дэне Лэсти котор пэклэ мачестар. 43 Исусо лиля кода и халя англа лэн. 44 Тай пхэнда лэнди: — Акэ пала со Мэ пхэнавас, кала инте слём тумэнца: трэбуни, соб тэ авэл вса, сар чиндо пала Ман дэ Моисеехкэрэ Упхэнима, анлунарендэ и дэ Псалмэн. 45 Тунчи Вов оттерда лэнди годи, соб тэ полэн кода, со чиндо. 46 И пхэнда лэнди: — Чиндо, со Христосо хала бари грыжа и пэ трито диво отджювдэла мулэндар. 47

Важ Лэхкоро Лав джикай Ерусалимостар, ай тунчи всавэрэ народонэнди авэла розпхэндо, со, кала вонэ ачявэна бэзимо, тунчи Дэвэл эртисарэла лэн. 48 Тумэ авэна тэ розпхэнэ пала кода всавэрэ манушэнди. 49 Акэ, Мэ бичалава тумэнди кода, пала со Муро Дад пхэнда. Нэ тумэ аченпэ дэ форо джикай кодыя вряма, кала сджяла пэ тумэн зор упрал. 50 Тунчи Исусо вылиджялда лэн форостар и джиля лэнца дэ Вифания. Котэ Вов ваздэня Пэхкэрэ васта и пхэнда бахталэ лава пала лэн. 51 И кала инте пхэнэлас, ачявда лэн и ачиля тэ ваздэпэ пэ упралима. 52 Сиклярнэ тэлювдэ Лэсти тай баря лошага рисиле дэ Ерусалимо, 53 теф всавири вряма сле дэ храмо и ваздэнас слава Дэвлэсти.

Рындоря

1 Пативало Феофило, дэ муро англуно лил мэ искирисардом пала вса, со терэлас Исусо и сости Вов сиклярэлас **2** ды колэ дивэ, кала Свэнтонэ Фанога прыпхэнда вытидэне апостолонэнди кода, со лэнди трэбуни тэ терэ, и сля лито дэ болыбэн. **3** Пала Пэхкири бари грыва Вов сикавдалэ лэнди джювдэга тай допхэнда, со кода чачимо. Исусо сикавэласпэ лэнди саранда дивэ и дэдумэлас пала Дэвлэхкоро Тхагаримо. **4** Екхвар, кала вонэ сле ітханэ, Исусо прыпхэнда лэнди тэ на уджян Ерусалимостар, нэ тэ дожутярэн кода, со Дад камля лэнди тэ дэ. — Акэ, терэлпэ кода, со тумэ шундэ Мандар. **5** Иоанно болдэня панега, нэ тумэ сigo авэна болдэ Свэнтонэ Фанога. **6** Тунчи кодэла, савэ котэ сле, пхучле Лэстар: — Рае, на дэ кадья вряма Ту камэх тэ ваздэ упалэ Израилёхкоро тхагаримо? **7** Вов пхэнда лэнди: — На туморо рындо тэ джянэ вряма и чясо, савэ Дад тховда Пэхкиря зорага. **8** Нэ кала пэ тумэн сджяла Свэнто Фано, тумэ лэна зор и авэна тэ розпхэнэ пала Ман дэ Ерусалимо, пав всавири Иудея, дэ Самария и пав всавири люмля. **9** Кала Вов пропхэнда када, вонэ дыкхле, сар Вов ваздэняпэ упрал, и хмара затерда Лэ лэнгрэ яхэндар. **10** Вонэ на пэрэаченас тэ дыкхэ пэ болыбэн, кала Вов ваздэласпэ. Тай акэ, паша лэн ачиле дуй мануша дэ парни їда. **11** — Галилеянуря, — пхэндэ вонэ, — сости тумэ ачен и дыкхэн дэ болыбэн? Кадэва Исусо, Саво сля лито тумэндар дэ болыбэн, рисявэла кади ж, сар тумэ дыкхле Лэ, кала уджялас. **12** Тунчи вонэ рисиле дэ Ерусалимо плаестар, саво акхарэлпэ «Оливково». Вов сля надур форостар, дром, саво домукэнас тэ проджя дэ суббота. **13** Кала вонэ авиле дэ цэр, дэ саво джювдэ набари вряма, тунчи ваздэнепэ дэ упралуни цэра. Котэ сле Пётро тай Иоанно, Иаково тай Андреи, Филиппо тай Фома, Варфоломеи тай Матфеи, Иаково, Алфеехкоро чяво, Симоно Зилото тай Иуда, Иаковохкоро чяво. **14** Всавэрэ вонэ ітханэ сле дэ мангима. Лэнца сле набут джювлен, дэй Исусохкири, Мария, тай Лэхкэрэ пхрала. **15** Дэ кодыя вряма Пётро вщиля машкар патякунэн (а лэн стидэняпэ паша шэл тай биш мануш) и пхэнда: **16** — Мурша! Пхралалэ! Трэбуни сля, соб тэ стерэлпэ кода, со чиндо дэ Лилэн, тев Свэнто Фано пхэнда чэрез Давидо пала Иуда, саво лиджялас колэн, савэ пхангле Исусо. **17** Иуда сля екх амэндар, саво терэлас

амэнца екх бути. **18** (Пэ ловэ, савэ вов затерда пала пэхкоро вурыто рындо, вов тинда маля. Нэ тэлэдэня и кади фартэ замардалэ, со пхарияла лэхкоро води и выгульдэ лэстар всавэрэ пора. **19** Пала кода уджянгле всавэрэ, ко джювдэ дэ Ерусалимо, и проакхардэ маля пав пэхкири чиб Акелдама, ай пав аврэ — «Ратэхкири маля».) **20** Дэ лил «Псалмы» искирисардо: «Мэк лэхкоро цэр тэ авэл шушо, и мэк котэ нико на джювэл». Тай инте: «Мэк авэр лэхкоро тхан залэла». **21** Колэсти амэнди трэбуни тэ вытидэ екхэ кодэла манушэндар, ко пхирэлас амэнца всавири вряма, тев бы тэ на джыл Рай Исусо, **22** кодэла вряматар, кала Иоанно болдэня Лэ ды колэ дивэ, кала Исусо сля лито амэндар. Кадэва мануш, сар и амэ, трэбуни тэ авэл допхэнимари пала Исусохкоро отджюндивимо. **23** Вытидэне дон: Иосифо, савэ инте акхарэнас Варсавва, а кади ж — Иусто, тай Матфие. **24** Тай поманглепэ: — Рае, Ту джянэх їло кожнэхкоро; сикав екхэ кадэлэндар дондар, ка Ту вытидэнян **25** тэ лиджя бути апостолэнгири, соб вов тэ парувэл Иуда, саво ачявда амэн и джияла дэ тхан, тев трэбуни лэсти тэ авэ. **26** Тунчи вонэ чутэ жребии, тай вов выпэля пэ Матфие, саво прыачила дэшуекхэ апостолонэндэ.

2 Авиля Пандэшахкоро диво, и всавэрэ вонэ сле ітханэ. **2** Екхатар болыбнастар шундалэ фоно, саво сджялпэ, сар пхурдэл фартэ бари балвал, и саво пхэрдила всаворо цэр, тев вонэ бэшле. **3** Сиклярнэ дыкхле сось, со поджило пэ ягунэ чиб, савэ розджилепэ и ачиле по екхэ пэ кожно лэндар. **4** Всавэрэ вонэ пхэрдице Свэнтонэ Фанога и ачиле тэ дэдумэ аврэ чибэнца, сар дэлас лэнди Фано. **5** Дэ кадья вряма дэ Ерусалимо сле дэвликунэ иудея всавэрэ тханэндар, савэ исин дэ люмля. **6** Пэ кадэва фоно стидэнепэ бут манушэн, тай на полэнас, со катэ терэлпэ, колэсти со кожно лэндар шунда, сар кодэла дэдумане пав лэхкири чячи чиб. **7** Вонэ фартэ дэнас дыво тай пхученас: — Чи всавэрэ кадэла мануша, савэ дэдумэн, на галилеянуря? **8** Сар же када кожно амэндар шунэл, сар вонэ дэдумэн пав амари чячи чиб? **9** Машкар амэн исин кацавэ иудея: парфянуря, мидянуря, еламитурия, кодэла, ко джювэн дэ Месопотамия, Иудея тай Каппадокия, дэ Понто и дэ Цыкни Азия, **10** дэ Фригия тай Памфилия, дэ Египто, дэ котор Ливийско пхув, саво паша Кирена, и кодэла, ко джювэн дэ Римо, **11** иудея и кодэла, савэ прылиле иудеенгоро сикляримо, критянуря тай арабурия. И всавэрэ амэ шунах, сар вонэ дэдумэн пала

барэ рындуря Дэвлэхкэрэ пэ амарэн чибэн! 12 Вонэ дэнас дыво, на джянгле, сар кода тэ полэ, тай пхученас екх екхэстар: — Со када исин? 13 А койсавэ подасанаспэ: — Вонэ пиле тэрно мол тай матиле! 14 Пётро вщиля їтханэ аврэнца дэшуекхэнца, ачиля тэ дэдүмэ манушэндэ, ваздэня пэхкоро їласо тай пхэнда: — Мурша иудея и всавэрэ, ко джювэн дэ Ерусалимо! Соб түмэ тэ полэн вса, шунэн тай чувэн сама, со мэ пхэнав. 15 Кадэла мануша на матэ, сар түмэ думисарэн: екхатар енякоро чясо дэ дэнзор. 16 Нэ када терэлпэ пав лавэн, савэ пхэнда англунари Иоили: 17 «Дэ кодэлэн дивэн, — пхэнэл Дэвэл, — Мэ чувава Фано пэ всавэрэн манушэн. Тумарэ чявэ и чея авэна тэ дэдүмэ сар англунаря, тумарэ тэрнэ чявэ дыкхэна сунэ англунарехкэрэ дивэсэга, А тумарэ пуранэ — рятяга. 18 Пэ Мурэн копылен, мушэн тай джювлен, Мэ дэ кодэлэн дивэн чувава Фано тай авэна тэ дэдүмэ сар англунаря. 19 Мэ сикавава дывуря упрэ дэ болыбэн и барэ рындуря тэлэ пэ пхув: рат, яг и тхува. 20 Кхам калёла, а чён лолёла, сар рат англа кода, сар авэла баро и чудно диво Дэвлэхкоро. 21 Тай кожно, ко прыаххарэла Раехкоро Лав, авэла фирисардо». 22 Мурша израильтануря, вышунэн, со мэ пхэнава! Бари бути, зоралэ рындуря и допхэнимо Дэвэл стерда чэрэз Исусо англа амарэн якхэн, и түмэ джянэн пала кода. Кадэлэга Дэвэл сикавда, со Мурш Исусо Назаретостар авиля Лэстар. 23 Пав воля Дэвлэхкири и пав кода, со Лэстэ сля пэ гөдя майанглал, түмэ умардэ Лэ, кала өдэне дэ вастэн кодэлэнди, ко на джювэн пав Упхэнима, соб вонэ тэ прымарэн Лэ пэ трушул карфинэнца. 24 Нэ Дэвэл өдджювдырда Лэ, фирисарда мэримакхиря грыжатар, и мэримастэ на сля зор Лэ тэ урицарэ. 25 Давидо дэдүмэл пала Лэ: «Всавири вряма мэ дыкхлём Рае англа пэ: Вов пав чячэ васт мандар — тэ на зджяв дромэстар. 26 Колэсти цэлэл їло муро, тай лошавэл чиб, и трупо муро авэла тэ джювэ дэ надия. 27 Ту ж на ачявэга муро води дэ адо тай на дэга, соб свэнтэ Тиро тэ лэлпэ прахога. (Hadēs g86) 28 Ту сикавдан манди дрома джювимахкэрэ, Ту дэга манди лош англа муй Тиро». 29 Пхралалэ, дэн манди тэ пхэнэ түмэнди ворта, со пропапо Давидо муля и сля загаравдо. Тай лэхкоро склепо ачел амэндэ и авдивэ. 30 Вов сля англунари и джянгля, со Дэвэл дэня лэсти солах тэ тховэ пэ лэхкоро трөно манушэ, лэхкэрэ родостар. 31 Вов дыкхля англуни вряма и дэдүмэлас пала Христокхоро өдджюндивимо, со Вов на авэла ачявдо дэ адо, и со Лэхкоро

трупо на лэлапэ прахога. (Hadēs g86) 32 Тай акэ, Дэвэл өдджювдырда Кадэлэ Исусо, и амэ всавэрэ допхэнимаря кадэлэсти! 33 Исусо сля ваздэно чяче Дэвлэхкэрэ вастэга, прылиля Дадэстар, кода, со сля пхэндо — Свэнтэ Фано, тай чута Лэ пэ амэн, сар түмэ екхатар и дыкхэн и шунэн. 34 Давидо на ваздэласпэ пэ болыбэн, нэ дэдүмания: «Пхэнда Рай Дэвэл мурэ Раести: Бэш пав чяче вастэ Мандар, 35 Ды коя вряма, сар Мэ чувава Тирэ врыжымашэн Тути тала пурэн». 36 Колэсти, мэк всаворо цэр Израилёхкоро джянэл, со Кадэлэ Исусо, Савэ түмэ прымардэ пэ трушул, Дэвэл терда и Раега и Христога! 37 Кала мануша шундэ када, вонэ вса прылиле пашэ їлэстэ, и лэнди ачиля ладжяво. Вонэ пхученас Петро тай аврэн апостолонэн: — Пхралалэ, со амэнди тэ терэ? 38 Пётро пхэнда: — Ачявэн тумаро бэзимо, и мэк кожно түмэндар авэла болдо пала лав Исусо Христокхоро, соб тэ отмуkenпэ тумарэ бэзима, тай түмэ прылэна бициминакоро даро — Свэнтэ Фано. 39 Колэсти со кади сля пхэндо түмэнди, тумарэ чяворэнди и всавэрэнди, ко дурал түмэндар: всавэрэнди, ко авэла прыаххардо Раега, амарэ Дэвлэга. 40 Тай бүтэ аврэ лавэнца Пётро прыаххарэлас лэн, тай дэдүмэлас: — Фирисарэнпэ кадэлэ хасютнэ родостар. 41 Кодэла, савэ прылиле лэхкири дума, болдэнep. Дэ кодэва диво прыачиля лэндэ пашэ трин пхангля мануш. 42 Вонэ рицарэнаспэ апостолонэнгэрэ сикляримастэ, всавири вряма сле їтханэ, прэпхагэнас мандро и мангэнаспэ. 43 Всавэрэ даранас Дэвлэстар и апостолурия терэнас баро допхэнимо тай барэ дывуря. 44 Всавэрэ патякунэ мануша сле їтханэ, и вса лэндэ сля екх. 45 Вонэ битинэнас вса, со лэндэ сля, и всаворо пэхкоро хулаимо, и роздэнас всавэрэнди, касти скаци трэбуни. 46 Кожно диво вонэ стидэнаспэ дэ храмо, тай пав цэрэн прэпхагэнас мандро и ханас лошага и жужэ їлэга, 47 ашарэнас Дэвлэ и сле дэ лачима всавэрэ манушэндэ. И кожно диво Рай прытховэлас лэндэ фирисардэн.

3 Екхвар, дэ трито чясо дэ дивэ, дэ вряма мангимахкири, Пётро тай Иоанно джянас дэ храмо. 2 Паша храмохкэрэн вударэн, савэнди сля лав «Шукар», бэшэлас мануш, ланго бэнимастар. Кожно диво лэ ачявэнас паша вударэн, и вов мангля хурдимо кодэлэндар, ко заджялас дэ храмо. 3 Кала вов удыхля Петро тай Иоанно, савэ джиле дэ храмо, тунчи мангля и лэндар. 4 Пётро тай Иоанно вхалепэ дэ лэ якхэнца, тай Пётро пхэнда: — Подыхк пэ амэн! 5 Мануш ваздэня

пэхкэрэ якха, дожутярэлас, со вонэ сось дэна лэсти. 6 Нэ Пётро пхэнда: — Рупь тай совнак нэнай мандэ. Нэ кода, со исин, мэ дав тути. Дэ Лав Иусо Христокхэрэ Назаретостар — вщи тай пхир! 7 Тунчи Пётро лиля лэ пала чячэ васт, подрицарда, соб вов тэ вщел, и дэ кодыя ж вряма пурэ тай чянга лангэхкэрэ састиле. 8 Вов всхукля пэ пурэн и ачиля тэ пхирэ. Тунчи вов заджиля лэнца дэ храмо, пхирэлас, хукэлас и ашарэлас Дэвлэ. 9 И всавэрэ мануша дыкхле, со вов пхирэл и ашарэл Дэвлэ. 10 Вонэ уджянэнас, со када исин мануш, саво бэшэлас и мангэлас хурдимо аврля храмостар, паша Шукар вударэн, и дэнаспэ дыво кодэлэсти, со лэга тердапэ. 11 Чёро ро рицардапэ пала Петро тай Иоанно, тай всавэрэ мануша дэнаспэ дыво и стидэнаспэ лэндэ всавэрэ ригэндар дэ Соломонокхоро пусынд. 12 Пётро удыхля када и ачиля тэ дэдумэ манушэнди: — Мурша израильтянуря, сости тумэ кади дэнпэ дывости? Сости тумэ дыкхэн пэ амэн кади, сар бы амэ пэхкиря зорага тай пативага тердэ кода, со кадэва мануш пхирэл? 13 Дэвэл Авраамохкоро, Исаакохкоро тай Иаковохкоро, Дэвэл амарэ дадэнгоро лошарда Пэхкэрэ Копыле Иусо, Савэ тумэ прэдэне, и Савэстар отпхэндэпэ англа Пилато, кала кодэва камля Лэ тэ отмукэ. 14 Нэ тумэ отпхэндэпэ Свэнтонэстар и Пативалэстар и вымангле, соб тумэнди тэ отмукэн прахаре. 15 Тумэ умардэ Кодэлэ, Ко дэл джовимо, нэ Дэвэл отджовдярда Лэ мулэндар, и амэ кадэлэсти допхэнимаря. 16 Лэхкоро Лав дэня зор кадэлэ манушэсти, савэ тумэ дыкхэн и джянэн, и патявимо, саво Лэстар, састярда лэ тумэндэ пэ якхэн. 17 Пхралалэ! Мэ полава, со тумэ и тумарэ пхурэдэра на джянгле, со тердэ. 18 Нэ кади Дэвэл терда кода, со Вов пхэнэлэс чэрэз всавэрэн англунарен, кала дэдуманя, со Христости трэбуни тэ прылэ кадья грыжа. 19 И кади, ачявэн тумаро бэзимо и рисявэн Дэвлэстэ, соб тумарэ бэзима тэ авэн схослэ. 20 Соб Раестар тэ авэл вряма тэ отцинявэн, и соб Вов тэ бичявэл тумэнди Кодэлэ, Ка англэ вытидэня, Иусо Христо. 21 Нэ Иусосости трэбуни тэ ачелпэ дэ болыбэн, кала авэла Лэхкири вряма и кала Дэвэл возтховэла вса; вряма, пала сави Вов думут пхэнэлэс чэрэз Пэхкэрэн свэнтонэн англунарен. (aion g165) 22 Сар пхэнда Моисеи: «Тумарэ пхралэндар Рай, тумаро Дэвэл, тховэла тумэнди Англунаре, кацавэ, сар мэ. Тумэнди трэбуни тэ кандэ Лэс дэ всавэрэ, со Вов тумэнди пхэнэла. 23 И кожно, ко на кандэла кадэлэ Англунаре, авэла вычиндо кадэлэ манушэндар».

24 И всавэрэ англунаря, Самуило тай авэр пала лэ, кади ж допхэнэнас пала кадэлэн дивэн. 25 Тумэ ж англунаренгэрэ чявэ, и тумэ прылиле завето, саво дэня Дэвэл тумарэ дадэнди. Вов пхэнда Авраамости: «Тирэ родостар прылэна бахталимо всавэрэ мануша дэ люмля». 26 Кала Дэвэл отджовдярда Пэхкэрэ Копыле, Вов англа всавэрэ бичалда Лэ тумэндэ, соб тэ дэ бахталимо и тэ прыакхарэ кожнонэ тумэндар тэ отджян налече рындостар.

4 Кала Пётро тай Иоанно дэдумане манушэндэ, лэндэ поджиле рашая, халавдэнгоро пхурэдэр дэ храмо и саддукея, 2 савэ сле фартэ холярдэ кодэлэга, со вонэ сиклярэн манушэн и розпхэнэн, со какич дэ Иусо исин отджовдинимо мулэндар. 3 Вонэ захутилдэ Петро тай Иоанно, и, кади сар сля бельвель, бэшардэ лэн ды дэнзор дэ барунэ. 4 Бут мануша, савэ шундэ лав, патине, и кодэлэн, савэ патянас, ачиля паша панч пхангя. 5 Пэ авэр диво барэ рая, пхурэдэра и сиклимаря пав Упхэнима стидэнэпэ ітханэ дэ Ерусалимо. 6 Котэ сле англуну рашай Аннас, Каиафа, Иоанно, Александро и всавэрэ мануша англунэ рашаехкэрэ родостар. 7 Вонэ тховдэ Петро тай Иоанно помашкар и ачиле лэндар тэ пхуче: — Савя зорага и савэ лавэга тумэ када тердэ? 8 Тунчи Пётро, саво пхэрдила Свэнтонэ Фанога, пхэнда лэнди: — Рая манушэнгэрэ и пхурэдэра! 9 Кала тумэ авдивэ пхучен амэндар пала лачимо, саво амэ тердэ кадэлэ лангэсти, и сар амэ лэ высастярдэ, 10 тунчи джянэн тумэ и всавэрэ мануша Израилёхкэрэ: кадэва мануш екхатар ачел англа тумэн высастярдо важ лав Иусо Христос Назаретостар, Савэ тумэ ваздэне пэ трушул и Савэ Дэвэл отджовдярда мулэндар! 11 Иусо исин кодэва Бар, Саво сля отчутэ тумэнцар, ко ваздэн цэра, и Саво ачиля шэрутнэ барэга. 12 Нико авэр на дэла фирисаримо, колэсти со на дэно манушэнди нисаво авэр лав тала болыбэн, савэга трэбуни амэнди тэ фирисарэпэ. 13 Всавэрэ дыкхле, со дэ Петро тай Иоанно нэнай дар, а душолас, со вонэ сле наирвалэ и набарэ мануша. Кала ж полиле, со вонэ сле Иусога, тунчи дэнэпэ дыво. 14 Дыкхэнас паша лэн и высастярдэ манушэ, колэсти никастэ на сля зор сось лэнди тэ пхэнэ. 15 Тунчи вонэ прыпхэндэ лэнди тэ ачявэ Синедрионо и ачиле тэ дэдумэ машкар пэстэ. 16 — Со амэнди тэ терэ кадэла манушэнца? — пхэнэнас вонэ. — Всавэрэ, ко джовэн дэ Ерусалимо, джянэн, со вонэ тердэ баро дыво, и амэ колэстар на отрисарахпэ. 17 Соб када тэ на розджялпэ инте

буглэдэр помашкар мануша, прыдаравага лэн, соб
вонэ никасти тэ на пхэнэн пала кадэва лав. 18
Вонэ акхардэ апостолонэн тай прыпхэндэ лэнди
тэ на дэдүмэн и тэ на сиклярэн важ Исусохкэрэ
лавэ. 19 Нэ Пётро тай Иоанно пхэндэ лэнди: —
Акэ, пхэнэн еджинэ, чи мишто англа Дэвэл тэ
кандэ будэр түмэн, а на Дэвлэ? 20 Нэнай амэндэ
зор тэ аче мулком пала кода, со амэ дыкхле
тай шундэ. 21 Кодэла, ко вджынас дэ лэнгоро
Синедрионо, инте екхвар прыдаравдэ лэн тай
отмукле. Вонэ на арахкле дэ лэн нисави дош,
а всавэрэ мануша ашарэнас Дэвлэ пала кода,
со тердапэ. 22 Важ кода со манушэсти, савэга
тердапэ кадэва састяримахкоро дыво, сля будэр
саранда бэрш. 23 Кала отмукле Петро тай Иоанно,
вонэ рисиле пэхкэрэндэ тай розпхэндэ пала вса,
со дэдүмане англунэ рашая и пхурэдэра. 24 Кала
патыкунэ мануша шундэ пала када, вонэ всавэрэ
йтханэ ваздэне ґласо Дэвлэстэ тай пхэндэ: —
Дэвла Баро! Ту стердан болыбэн, пхув, море и
вса, со дэ лэн исин. 25 Ту пхэндан Свэнтонэ
Фанога вуштэндэр амарэ дадэ и Тирэ копыле
Давидо: «Сости ваздэнпэ тай мижон люмлякэрэ
родуля, и мануша камэн сось тэ терэ, нэ вса лэндэ
выджяла ївьэ? 26 Ваздэнпэ пхувякэрэ тхагаря,
и пхурэдэра стидэнпэ їтханэ, соб тэ выджя пэ
Рае Дэвлэ и пэ Христо Лэхкэрэ». 27 Чыкюнэ,
стидэнпэ дэ кадэва форо Иродо тай Понтии
Пилато наиудеенца и Израилёхкэрэ манушэнца пэ
Тиро Свэнто Копыли Исусо, Савэ Ту помакхлян.
28 Вонэ тердэ кода, со Ту тховдан Тиря зорага
и пав Тири воля. 29 И екхатар, Рае, подыхк,
сар вонэ даравэн амэн, и дэ Тирэ копыленди
бидаракоро тэ розпхэнэ Тиро лав. 30 Процырдэ
васт Тиро и састяр насвалэн, сикав допхэнимо
и барэ дывуря важ лав Тирэ Свэнтонэ Копыле
Исусо! 31 Кала вонэ помангленэ, тхан, тев вонэ
сле, затинисилэ. Вонэ всавэрэ пхэрдице Свэнтонэ
Фанога тай бидаракоро пхэнэнас Дэвлэхкоро лав.
32 Бутэ манушэндэ, савэ патине, сле екх їло и води.
Нико на бинэлас, со лэхкоро хулаимо исин кици
важ лэ, нэ вса лэндэ сля екх. 33 Апостолуря баря
зорага пхэнэнас пала оджюндивимо Раехкоро
Исусохкоро, и Дэвэл дэлас Пэхкоро бахталимо
лэнди всавэрэнди. 34 Помашкар лэн на сля
ниекх мануш, саво авэлэс бы чёро. Колэсти со
кодэла, кастэ сля пхув тай цэра, битинэнас лэн,
анэнас всавэрэ ловэ 35 тай стховэнас паша пурэн
апостолонэндэ. Кадэла ловэ роздэнаспэ кожонэ
манушэсти, пэ со лэсти трэбуни. 36 Акэ, Иосифо,
савэ апостолуря акхарэнас Варнава (пав аврэ

«чяво подрицаримахкоро»), левито Кипростар, 37
савэстэ сля пхув, битинда пэхкири маля, анда
ловэ и тховда паша пурэн апостолонэндэ.

5 Екх мануш, савэ акхарэнас Анания, їтханэ
пэхкиря ромняга Сапфирага, битинда епаш
хулаимо 2 и ловэндэр, савэ лиля пала хулаимо,
епаш ачявда пэсти, тай лэхкири ромни джянэлэс
пала кода. А епаш ловэ вов анда и тховда паша
пурэн апостолонэндэ. 3 Пётро пхэндэ лэсти: —
Анания, сар када выджия, со сатана залиля тиро
їло пэ скацик, со ту пхэндан начячимо Свэнтонэ
Фаности и ачявдан пэсти ловэ, кала битиндан
пэхкири пхув? 4 Пхув, сави ту битиндан, и кади
сля тири, и ловэ, савэ ту лилян пала ла, всавэрэ
тирэ сле. Пэ со ту лилян када пэсти дэ гындо? Ту
пхэндан начячимо на манушэнди, нэ Дэвлэсти.
5 Сар кацик Анания шунда кадэла лава, вов
тэлэдэня тай выджия лэстар води. Всавэрэ, ко
сле котэ, фартэ пэрэдаравдэпэ. 6 Поджице тэрнэ
мануша, залашардэ лэхкоро трупо, вылиджялдэ
тай гаравдэ лэ. 7 Проджиля пашэ трин чясуря, тай
авиля лэхкири ромни, сави на джянэлэс, со котэ
тердапэ. 8 Пётро пхучля латар: — Пхэн манди,
түмэ ромэга пала скацик ловэ битиндэ пхув? —
Нэ, — пхэндэ вой, — пала скацик. 9 Пётро пхэндэ
лати: — Со када түмэ сдэдүманепэ тэ зумавэ
Раехкоро Фано? Ту шунэх пасуря паша вудара?
Када джян павпалэ кодэла, савэ гаравдэ тирэ
ромэ. Вонэ и тут вылиджяна. 10 Тай дэ кодыя
вряма вой тэлэдэня лэхкэрэ пурэндэ тай выджия
латар води. Тэрнэ мануша заджиле, арахкле ла
муляга, вылиджялдэ тай гаравдэ паша лакоро ром.
11 Пэ всавиря кхандиря и кодэлэн, ко шунда пала
када, сджия бари дар. 12 Апостолэнгэрэ вастэнца
терэнаспэ баро допхэнимо тай дывуря машкар
манушэн. Всавэрэ ж сиклярнэ стидэнаспэ їтханэ
дэ Соломонохкоро пусын. 13 И аврэ манушэндэр
даранас лэндэ тэ прыаче, нэ дэ патива вонэ сле
всавэрэ манушэндэ. 14 А кодэлэн, ко патялас дэ
Рае, ачелас будэр и будэр, муршэн тай джювлен.
15 Мануша вылиджянас пэ гаса насвалэн, тховэнас
лэн пэ патуря тай пэ париндора, соб шалин
Петрохкири тэлэдэлэс пэ лэн, кала вов авэла
тэ проджя пашэ. 16 Тай форонэндэр, савэ сле
паша Ерусалимо, авэнас фартэ бут манушэн.
Вонэ анэнас насвалэн тай кодэлэн, дэ ка бэшэнас
нажужэ фануря, и всавэрэ састярэнаспэ. 17
Ангуно рашай и всавэрэ паша лэ саддукея ханас
пэ лэн данда. 18 Вонэ пхангле апостолонэн тай
бэшардэ лэн дэ форохкэрэ барунэ. 19 Нэ ангело

Раехкоро отрисарда рятяга вудара барунэстар тай вылиджялда лэн котарь. 20 — Джян тай ачен дэ храмо, — пхэнда вов, — тай дэдүмэн манушэнди вса пала кадэва нэво джювимо. 21 Вонэ кандэне лэ, авиле дэнзор дэ храмо тай ачиле тэ сиклярэ. Кала авиле англунэ рашай и всавэрэ паша лэ, вонэ акхардэ Синедрионо и всавэрэн Израилэхэкэрэн пхурэдэрэн тай бичалдэ дэ барунэ пала апостолурия. 22 Нэ кала бутярнэ авиле дэ барунэ, апостолонэн котэ на сля. Вонэ рисардэпэ и допхэндэ: 23 — Вудара дэ барунэ мишто затердэ, паша лэн ачен халавдэ, нэ кала амэ заджиле пордэ, амэ ника котэ на аракхле. 24 Халавдэнгоро пхурэдэр дэ храмо и англунэ рашая вышундэ лэн, тай нико на полиля, со ж када сля. 25 Тунчи кось авиля и пхэнда лэнди: — Мануша, савэн түмэ тховдэ дэ барунэ, ачен дэ храмо тай сиклярэн кодэлэн, ко стидэняпэ котэ. 26 Тунчи халавдэнгоро пхурэдэр джиля бутярнэнца тай анда апостолонэн. Нэ вонэ на тердэ кода зорага. Вонэ даранас, со мануша помарэна лэн барэнца. 27 Апостолонэн андэ и тховдэ англа Синедрионо. Англунэ рашай пхэнда лэнди: 28 — Амэ түмэнди прыпхэндэ, соб түмэ тэ на сиклярэн пала кадэва лав. Нэ тумарэ розлиджян пэхкоро сикляримо пав всаворо Ерусалимо тай чувэн пэ амэн дош дэ мэрима Кадэлэ Манушэхкэрэ. 29 Пётро тай авэр апостолурия пхэндэ: — Амэнди трэбуни будэр тэ кандэ Дэвлэ, а на манушэн. 30 Дэвэл амарэ дадэнгоро оджювдырда Исусо, Савэ түмэ умардэ тай амблавдэ пэ каштунэ трушулэ. 31 Нэ Дэвэл ваздэня Лэ и бэшарда пав чычэ васт Пэстар сар Пхурэдэрэ и Фирисаре, соб Израили тэ ачявэл пэхкоро бэзимо, и Дэвэл тэ отмукул лэхкири дош. 32 Допхэнимаря кадэлэсти — амэ тай Свэнто Фано, Савэ Дэвэл дэня кодэлэнди, ко кандэл Лэ. 33 Кала кодэла, савэ сле котэ, шундэ када, вонэ ачиле мижэ и камле тэ умарэ апостолонэн. 34 Нэ тунчи вщиля екх мануш, саво вджялас дэ Синедрионо. Лэ акхарэнас Гамалиило, вов сля сиклимари пав Упхэнима и дэ патива всавэрэндэ. Вов прыпхэнда тэ вылиджя апостолонэн пэ набут вряма. 35 Тунчи вов пхэнда: — Израильтянуря, мишто думисарэн пала кода, со түмэ камэн тэ терэ кадэла манушэнца. 36 Надэмут катэ подлиляпэ Февда, вов выдэлас пэ пала савэсь барэ манушэ. Пала лэ джянас пашэ штаршэла манушэн. Нэ кала лэ умардэ, всавэрэ, ко джиле пала лэ, розпрастэнэпэ, и вса упалэ ачия пэ пэхкэрэ тханэ. 37 А пала лэ сля Иуда Галилеятар. Вов авиля дэ кодыя вряма, кала искриисарэнас манушэн, тай

улиджялда бутэн пала пэ. Вов кади ж хасиля, тай всавэрэ, ко джиле пала лэ, кади ж розпрастэнэпэ. 38 Колэсти мэ пхэнав түмэнди екхатар: ачявэн кадэлэн манушэн. Отмукул лэн. Кала када вса исин манушэндар, тунчи када хасявэла. 39 А сар када Дэвлэстар, түмэ нисо на терэна, кацик еджинэ ачена врыжымашы Дэвлэсти. И лэхкири дума прылиле дэ лэн кодэла, ко котэ сля. 40 Вонэ прыакхардэ апостолонэн и прыпхэндэ лэн тэ марэ чукненца. Тунчи инте екхвар запхэндэ лэнди тэ дэдүмэ Исусохкэрэ лавэга тай отмукул лэн. 41 Апостолурия ачявдэ Синедрионо тай лошаვენас колэсти, со лэнди сля дэно тэ прылэ ладжэ пала Исусохкоро лав. 42 Тай кожно диво дэ храмо тай пав цэрэн вонэ на пэрэаченас тэ сиклярэ и тэ пхэнэ Бахтало Лав пала Исусо Христосо.

6 Дэ кадэла дивэ, кала ачия бут сиклярнэн, эллинистурия холявэнас пэ катутнэн евреем. Вонэ дэдүмэнас, со кодэла обджян лэнгэрэн джювлен, савэндэ муле рома, кала роздэн кожно диво хамо. 2 Тунчи Дэшудуй акхардэ всавэрэн сиклярнэн тай пхэндэ: — Амэнди нащи тэ ачявэ бути важ лав Дэвлэхкоро, соб тэ лашарэ скаминда. 3 Колэсти, пхралалэ, вытидэн пэстар эфта манушэн, савэндэ лачи патив и савэ пхэрдице Фанога тай годяга, и амэ дага лэнди тэ терэн кадыя бути. 4 Еджинэ амэ авага тэ мангэпэ и тэ лиджя бути лавэга. 5 Со вонэ пхэндэ, всавэрэнди чялиля, тай вытидэне Стефано, манушэ, дэ кастэ сля патявимо тай Свэнто Фано, Филиппо, Прохоро, Никаноро, Тимоно, Пармено тай Николае форостар Антиохия, саво прылиля иудеенгоро сикляримо. 6 Лэн тховдэ англа апостолонэн, и кодэла помангленэ пала лэн и возтховдэ пэ лэн васта. 7 Лав Дэвлэхкоро розджяласпэ, и дэ Ерусалимо ачия фартэ бут сиклярнэн, и бут рашая прылиле кадэва патявимо. 8 Стефано, мануш, дэ кастэ сле Дэвлэхкэрэ лачимо тай зор, терэлас машкар манушэн барэ дывуря тай допхэнимо. 9 Лэга ачиле тэ розлэпэ койсавэ мануша, ко пхирэнас дэ синагога отмукулэн пэ воля. Пордэ кади ж пхирэнас киренеянуря, александриянуря, тай кодэла, ко джювдэ дэ Киликия тай дэ Цыкни Азия. 10 Нэ Стефано дэдүмэлас годяга и зорага Фаностар, тай вонэ кадэлэга нисо на галёнас тэ терэ. 11 Тунчи вонэ поддэдүмане койсавэн манушэн тэ пхэнэ: «Амэ шундэ, сар Стефано дэдүмэл начячюнэ лава пала Моисее и пала Дэвлэ». 12 Вонэ подваздэне манушэн, пхурэдэрэн и сиклимарен пав Упхэнима. Тунчи схутилдэ Стефано и андэ дэ Синедрионо.

13 Тай подтховдэ хохавнэн допхэнимарен, савэ пхэндэ: — Кадэва мануш всавири вряма пхэнэл налаче лава пала свэнто храмо и Упхэними. 14 Амэ шундэ, сар вов дэдуманя, со Исусо Назаретостар розмарэла кадэва храмо и парувэла сикляримо, саво пэрэдэня амэнди Моисеи. 15 Всаверэ кодэла, ко бэшле дэ Синедрионо, чувэнас сама пэ Стефано и дыкхле, со лэхкоро муй исин сар муй ангелостэ.

7 Тунчи англуну рашай пхучля Стефаностар: — Када чячимо? 2 Стефано пхэнда: — Пхралалэ тай дада! Пошунэн ман! Пативакоро Дэвэл авиля амарэстэ пропалостэ Авраамостэ, кала вов инте джювда дэ Месопотамия — ды кодэлэ, сар вов ачиля тэ джювэ дэ Харрано. 3 «Ачяв кадэва тхан тай пэхкоро родо, — пхэнда лэсти Дэвэл, — тай джя дэ пхув, сави Мэ сикавава тути». 4 Авраамо ачявда пхув халдеенгири тай пэрэлагля дэ Харрано. Котарь, сар муля Авраамохкоро дад, Дэвэл пэрэлиджялда Авраамо дэ кодья пхув, дэ сави тумэ екхатар джювэн. 5 Дэвэл на дэня лэсти катэ нисави пхув, и которици пхуякоро на дэня. Нэ Дэвэл пхэнда, со дэла кадья пхув лэсти тай лэхкэрэ родости, кала Авраамостэ инте на сля чяворэн. 6 Дэвэл пхэнэлэс лэсти: «Тирэ чявэ на авэна хулая котэ, тев джювэна; вонэ авэна котэ копыля и лиджяна грыжа штаршэл бэрша. 7 Нэ Мэ марава кодэлэн манушэн, ко терэла лэн копыленца, — пхэнда Дэвэл, — и тунчи вонэ выджяна котарь тай авэна тэ тэлё Манди пэ кадэва тхан». 8 Тунчи Дэвэл дэня Авраамости завето тэ обчинэлэ. Авраамо ачиля дадэга Исаакости и обчинда лэ пэ охтанго диво. Исаако ачиля дадэга Иаковости, а Иаково — дэшудуенди патриархонэнди. 9 Патриархуля калэ їлэга дыкхэнас пэ Иосифо и битиндэ лэ дэ Египто. Нэ Дэвэл сля Иосифога 10 тай фирисарда лэ всавири бидатар. Вов дэня Иосифости годи тай терда кади, тэ авэл вов дэ патива фараоностэ, саво сля тхагари дэ Египто. Кодэва терда Иосифо прыбэшлэга дэ всаворо Египто тай дэ всаворо лэхкоро цэр. 11 Тунчи дэ всаворо Египто тай Ханаано ачиля бохх тай сля бари грыжа. Тай амарэ пропалуря нитев на аракхэнас хамо. 12 Кала Иаково шунда, со дэ Египто исин ворзо, вов бичалда пордэ амарэн пропалонэн пэрво моло. 13 Кала вонэ авиле авэр моло, Иосифо оттердалэ пэхкэрэ пхралэнди, тай фараоно уджянгля пала родо Иосифохкоро. 14 Тунчи Иосифо бичалда тэ акхарэ пэхкэрэ дадэ Иаково тай всаворо пэхкоро родо, савэн сля эфтадэша панч манушэн. 15

Иаково авиля дэ Египто, тев муля и вов, и амарэ пропалуря. 16 Лэнгэрэ трупля пэрэлиджялдэ дэ Шэхемо и тховдэ дэ склепо, саво Авраамо тинда пала рупь Хаморохкэрэ чявэндэ дэ Шэхемо. 17 Кала поджиля пашэ вряма, соб тэ терэлпэ пав лавэ, саво дэня Дэвэл Авраамости, амарэн манушэн дэ Египто ачеласпэ будэр. 18 Кади сля ды колэ, сар ваздэняпэ дэ Египто авэр тхагари, саво на джянгля пала Иосифо. 19 Вов прытасавэлэс амарэн пропалунэн тай хрантимага выджялас пэ амарэн манушэн: вов заачявэлэс тэ вычувэ чяворэн, савэ бзяндепэ, соб вонэ тэ мэрэн. 20 Дэ кадья вряма бзяндяпэ Моисеи и сля фартэ шукар англа Дэвэл. Трин чён лэ парварэнас дэ дадэхкоро цэр, 21 а кала поджиля вряма тэ ачявэ лэ, Моисее лиля пэстэ фараонохкири чей тай выбарярда лэ, сар пэхкэрэ чявэ. 22 Моисеи сля сиклярдо дэ всавири Египтохкири годи; вов сля зорало и дэ лав, и дэ рындонэн. 23 Кала лэсти сля саранда бэрш, вов задумисарда тэ дыкхэ, сар джювэн лэхкэрэ пхрала израильтянуря. 24 Тунчи вов удыххля, со екхэ лэндар марэл египтянино. Лэсти ачиля дор кадэлэ манушэ, тай вов умарда египтянино. 25 Моисеи думисарэлэс, со лэхкэрэ пхрала полэна: чэрэз лэ Дэвэл отмукул лэн пэ воля, нэ вонэ када на полиле. 26 Пэ авэр диво Моисеи удыххля, сар марэнпэ дуй израильтянуря. Вов камля тэ слиджя лэн, соб тэ на марэнпэ. «Чявалэ, тумэ ж пхрала, — пхэнда вов, — пэ со ж тумэ задэн холи екх екхэсти?» 27 Тунчи кодэва, саво марэлэс авэр, отчута пэстар Моисее тай пхэнда: «Ко тховда тут, соб ту тэ авэх пхурэдэрэга тай сундисарэга понад амэн? 28 Чи ту камэх и ман тэ умарэ, сар арати умардан египтянино?» 29 Кала Моисеи шунда кадэла лава, вов нашля тай ачиля тэ джювэ дэ Мадянохкири пхув, сар мануш авря пхувятар. Котэ лэстэ дэ ире бзяндепэ дуй чявэ. 30 Проджиля саранда бэрш, тай Моисеести авиля ангело дэ шуки пхув, надур плаестар Синаи, дэ яга, савяга пхаболас терново рандь. 31 Моисеи дэлэспэ дыво, кала када дыкхля. Вов поджиля пашэ, соб фэдэр тэ роздыххэ, и шунда їласо Раехкоро: 32 «Мэ Дэвэл тирэн пропалонэн, Дэвэл Авраамохкоро, Исаакохкоро тай Иаковохкоро». Моисеи ж тинисявэлэс даратар и даралас тэ подыххэ. 33 Рай пхэнда лэсти: «Злэ пэхкэрэ цуруля, колэсти со тхан, пэ саво ту ачех — свэнто пхув. 34 Мэ удыххлём, дэ савэ бибахталима джювэн Мурэ мануша дэ Египто и ушундом лэнгоро ровимо. Мэ сджилём, соб тэ дэ лэнди воля. А кана джя, Мэ бичалав тут дэ Египто». 35 Кодэлэ Моисее,

ка вонэ отчутэ пэстар тай пала ка дэдумане: «Ко тховда тут, соб ту тэ авэх пхурэдэрэга тай сундисарэга понад амэн?» — Дэвэл бичалда кана сар пхурэдэрэ и фирисаре чэрээ ангело, саво сикавдалэ лэсти дэ терново рандь. 36 Моисеи вылиджялда лэн Египтостар, терэлас дывуря тай допхэнимо дэ Египто, паша Лоло море и дэ шуки пхув, тев сле вонэ саранда бэрш. 37 Кадэва ж Моисеи пхэнда израильтянонэнди: «Тумарэ пхралэндар Дэвэл ваздэла тумэнди Англунаре, сар ман». 38 Кала вов ітханэ Израилёхкэрэ манушэнца стидэняпэ дэ шуки пхув, ангело пхэнэлас лэга тай амарэ пропапуэнца пэ плай Синаи. Тунчи Моисеи прылила джювдо лав и пэрэдэня лэ амэнди. 39 Нэ амарэ дада отпхэндэлэ тэ кандэ лэ, отчутэ лэ тай скамле тэ рисявэ дэ Египто. 40 Вонэ пхэндэ Аароности: «Стер амэнди дэвлэн, савэ англа амэн джяна. Колэсти со амэ на джянах, со тердалэ кадэлэ Моисеега, саво вылиджялда амэн Египтостар». 41 Дэ кодэлэ дивэ вонэ тердэ совнакунэ гуруворэ, андэ кадэлэ дэвлорэсти жэртва тай сле лошалэ рындостар, саво тердэ пэхкэрэ вастэнца. 42 Дэвэл же отрисардалэ лэндар и ачявда лэн тэ тэлён болыбнахкэрэ чэргэнэнди, сар искриисардо пала када дэ лилэн англунаренгэрэн: «Цэр Израилёхкоро! Чи важ Ман тумэ чинэнас тай анэнас жэртвы дэ шуки пхув, сар саранда бэрш котэ сле? 43 Тумэ лиле пэга дэвлорэ Молохохкири катуна, чэргэнь тумарэ дэвлорэстар Ремфаностар, и кода, со тердэ тумарэ васта, соб кадэлэсти тэ тэлё. Пала кода Мэ бичалава тумэн дэ копылен дурэдэр Вавилоностар». 44 Тумарэ дадэндэ дэ шуки пхув сля Катуна Допхэнимахкири, стерди пав прыпхэнимо, саво Дэвэл дэня Моисеести, и пав кодэва рындо, саво дыкхля Моисеи. 45 Кала амарэ дада прылиле кадья Катуна, вонэ тай лэнгоро пхурэдэр Иусо Навиёхкоро влиджялдэ ла дэ пхувен, тев джювдэ манушэнгэрэ родуля, савэн Дэвэл розтрадэня англа лэн. И кади сля ды колэ, кала ачиля тхагарега Давидо, 46 савэ Дэвэл камэлас и саво мангял Дэвлэстар тэ арахэ цэр, тев тэлён, важ родо Иаковохкоро. 47 Нэ цэр Дэвлэсти стерда Соломоно. 48 Барэдэрэхкоро же на джювэл дэ цэрэн, савэ стердэ мануша. Англунари дэдумэл пала када: 49 «Болыбэн — троне Муро, тай пхув исин тхан, тев ачен Мурэ пурэ. Саво тумэ камэн тэ терэ Манди цэр? — пхэнэл Рай. — Тев тхан, соб Манди тэ отцинявэ? 50 Чи на Мурэ вастэга вса откада стердо?» 51 Тумэ — накандинэ, тумэ — мануша барунэ ілэнца

и кашукэ канэнца! Тумэ, сар тумарэ пропапуря, всаири вряма на уштавэн Свэнтонэ Фаности! 52 Ка англунарендар на камле тэ вытрадэ тумарэ пропапуря? Вонэ умардэ кодэлэн, ко пхэнэнас пэ англал, со авэла Чячюно. А кана тумэ прэдэне тай умардэ Лэ! 53 Тумэ прылиле Упхэнимо, саво пэрэдэне тумэнди ангелуря, нэ на тердэ пав лэ. 54 Кала вонэ шундэ када, вонэ мижыле и ачиле тэ стасавэ пэхкэрэ данда. 55 Стефано же пхэрдилэ Свэнтонэ Фанога и ваздэня якха дэ болыбэн, и удыххля патив Дэвлэхкири тай Иусо, Саво ачелас пав чячи риг Дэвлэстар. 56 — Дыкхэн, — пхэнда вов, — мэ дыкхав оттердо болыбэн и Чявэ Манушыканэ, Саво ачел пав чячё васт Дэвлэстар. 57 Тунчи вонэ всавэрэ затердэ пэхкэрэ кана, фартэ типисиле и чутэпэ пэр лэстэ. 58 Вонэ выцырдэне Стефано пала форо тай ачиле тэ чувэ дэ лэ бара. Кодэла, ко дыкхле сар лэ дошарэнас, тховдэ пэхкири іда паша пурэн тэрнэ чявэстэ, савэ акхарэнас Савло. 59 Кала вонэ чувэнас пэр лэстэ барэнца, Стефано мангялэ: — Рае Иусо! Прылэ муро фано! 60 Тунчи вов тэлэдэня пэ чянгэн и фартэ затиписилэ: — Рае, отмук лэнди кадэва бэзимо! Кадэлэ лавэнца вов муля.

8 Савло же подэлас іласо пала кодэлэн, ко умарда Стефано. Кодэлэ дивэстар ачиле фартэ тэ традэ кхандири дэ Ерусалимо. И всавэрэ розпрастэнепэ пав Иудея и Самария, кици апостолуря ачилепэ дэ Ерусалимо. 2 Пативалэ мануша гаравдэ Стефано и фартэ ровэнас пала лэ. 3 Ай Савло традэлас кхандири. Вов захукэлас дэ цэрэн патякунэ манушэндэ, выцырдэлас муршэн тай джювлен тай чувэлас лэн дэ барунэ. 4 Машкар колэ мануша, савэн традэнас лэнгэрэ тханэндар, розпхэнэнас Бахтало Лав пав всавэрэ рига. 5 Филиппо ж авилэ дэ екх форо Самариякоро и розпхэнэлас котэ пала Христосо. 6 Гроза манушэн чувэнас сама, кала шунэнас лэхкэрэ лава, тай дыкхэнас допхэнимо, саво вов терэлас. 7 Бутэ манушэндар выдженас барэ типимага нажужэ фануря, тай бут попхалэ и лангэ высастярэнаспэ. 8 Тай дэ кодэва форо сля бари лош. 9 Котэ сля екх мануш, саво акхарэласпэ Симоно. Ды колэ вов врысарэлас дэ кодэва форо, и мануша, ко джювдэ дэ Самария, дэнаспэ дыво кадэлэсти. Вов выдэлас еджино пэ пала савэсь барэ манушэ. 10 Всавэрэ мануша, и тэрнэ, и пхурэ, фартэ прышунэнаспэ лэстэ тай пхэнэнас: — Кадэва мануш исин бари зор Дэвлэхкири. 11 А прышунэнаспэ вонэ колэсти, со вов бут вряма сикавэлас дыво пэхкэрэ врысаримага.

12 Нэ кала мануша патине Филиппости, саво розпхэнэлас пала Дэвлэхкоро Тхагаримо тай лав Иусоохкоро Христохкоро, тунчи бут мушэн тай джювлен болдэнэпэ. 13 Симоно кади ж патиня тай болдэнэпэ. Вов всавири вряма пхирэлас пала Филиппо, дыкхэлас баро допхэнимо тай барэ рындуля, и дэлэспэ дыво кадэлэсти. 14 Кала апостолура дэ Ерусалимо шундэ, со дэ Самария прылиле Дэвлэхкоро лав, вонэ бичалдэ пордэ Петро тай Иоанно. 15 Кодэла авиле тай манглепэ, соб Дэвлэ дэня манушэндэ Свэнто Фано. 16 Ни пэ кастэ лэндар Фано инте на сджялас, вонэ кацки болдэнэпэ важ Рае Иусоохкоро лав. 17 Тунчи Пётро тай Иоанно тховдэ пэ лэн васта, тай кадэла мануша прылиле Свэнто Фано. 18 Кала Симоно удыхля, со Свэнто Фано дэлпэ, кала апостолура тховэн васта пэ манушэн, вов анда лэнди ловэ. 19 тай пхэнда: — Дэн и манди кацави зор, соб кодэва, пэ кастэ мэ тховава васта, тэ лэл Свэнто Фано. 20 Нэ Пётро пхэнда: — Мэк тиро рупь хасявэла 'тханэ туга, колэсти со ту Дэвлэхкоро даро камлян тэ тинэ пала ловэ! 21 Ту на вджяга дэ кадэва рындо, важ кода со тиро 'ло начаячюно англа Дэвлэ. 22 Прыджян кадэва бэзимо тай мангпэ Раести, соб Вов тэ отмукул тути кода, со тутэ исин пэ годя. 23 Мэ дыкхав, со дэ тиро 'ло пхэрдо кэркимо тай со ту спхангло ланчукога, саво исин начаячимо. 24 Симоно пхэнда: — Помангэнпэ пала ман Раести, соб манца тэ на авэл кади, сар тумэ пхэндэ. 25 Апостолура ж допхэнэнас котэ тай розпхэнэнас Раехкоро лав. Тунчи вонэ джиле павпалэ дэ Ерусалимо и пав дром розпхэнэнас Бахтало Лав дэ бутэн гавэн дэ Самария. 26 Ангело Раехкоро пхэнда Филиппости: — Джя пэ юго, пэ дром, саво проджял пав шуки пхув Ерусалимостар дэ Газа. 27 Филиппо вщиля тай джиля. Дэ кадья вряма котэ сля ефиопско мануш. Вов терэлас бути прыбэшлэга тхагарнатэ дэ Ефиопия, Кандакиятэ, тай прыдыкхэлас пала всаворо лакоро барвалимо. Вов авэлас дэ Ерусалимо тэ тэлэ Дэвлэсти, 28 и кана рисявэлас цэрэ. Кала кадэва мануш бэшэлас дэ пэхкоро вурдон тай динэлас лил, саво искриисарда англунари Исаия. 29 Фано пхэнда Филиппости: — Поджя кадэлэ вурдонэстэ и джя пашэ. 30 Филиппо подпрастэня вурдонэстэ тай шунда, со котэ динэлпэ лил, саво искриисарда англунари Исаия. — Ту полэх, со ту динэх? — пхучля Филиппо. 31 — Сар же мэ полава, кала манди нико на розпхэнэл, — пхэнда кодэва мануш тай акхарда Филиппо, соб вов тэ подваздэлпэ и тэ бэшэл лэга дэ вурдонэ. 32 Ай вов динэлас

кацаво тхан Лилэндар: «Сар бакрорэ, лиджялдэ Лэ, соб тэ чинэ, и, сар бакроро на ваздэл пэхкоро 'гласо англа кодэлэ, ко злэл лэстар бал, кади ж и Вов ушта Пэхкэрэ на оттерэлас. 33 Вов сля ладжъвардо и на домукло чячюнэ сындостэ. Ко розпхэнэла пала Лэхкоро родо? Колэсти со джювимо Лэхкоро пхуятар залэлпэ». 34 Ефиопско мануш пхучля Филиппо: — Мангав тут, пхэн манди, пала ка дэдумэл катэ англунари? Пала пэ чи пала кась аврэ? 35 Тунчи Филиппо ачиль тэ розпхэнэ кадэлэ тханэстар Бахтало Лав пала Иусо. 36 Вонэ ладэнас дурэдэр пав дром тай подлагле пашэ панестэ. — Дыхк, акэ исин пани, — пхэнда ефиопско мануш. — Со на дэл манди тэ болдэпэ? 38 Вов прыпхэнда, соб тэ тэрдэл вурдон, и дуйджинэ вонэ, ефиопско мануш тай Филиппо, заджиле дэ пани. И Филиппо болдэня лэ. 39 А кала вонэ выджиле панестар, Фано Раехкоро улиджялда Филиппо, тай ефиопско мануш будэр лэ на дыкхля. Баря лошага вов лагля дурэдэр. 40 Ай Филиппо попэля дэ форо Ашдодо. Вов розпхэнэлас Бахтало Лав пав всавэрэн форонэн, а тунчи авиля дэ Кесария.

9 Савло жэ пхурдэлас холяга и мэримага пэ Раехкэрэн сиклярнэн. Вов авиля англунэ рашаестэ 2 и мангля лэстар лила дэ синагоги, савэ сле дэ Дамаско, соб вов, кала аракхэла кодэлэн, ко прырицарэлпэ Дромэстэ, мушэн тай джювлен, тэ спхандэл лэн тай тэ анэл дэ Ерусалимо. 3 Кала вов поджялас дэ Дамаско, пэр лэстэ сджиля душлимо больбнастар. 4 Вов тэлэдэня пэ пхув и ушунда 'гласо, саво пхэнда лэсти: — Савло, Савло, сости ту традэх Ман? 5 — Ко Ту, Рае? — пхучля Савло. — Мэ Иусо, Савэ ту традэх, — пхэнда Вов. 6 — Вщи тай джя дэ форо. Котэ тути пхэнэна, со трэбуни тэ терэ. 7 Мурша, савэ сле Савлога дэ дром, ачиле сар мутуля: вонэ шундэ 'гласо, нэ ника на дыкхле. 8 Савло вщиля пхуятар, нэ кала вов оттерда якха, тунчи полиля, со корыля, и лэ пала васт андэ дэ Дамаско. 9 Трин дивэ вов на халас и на пэлас, и сля коро. 10 Дэ Дамаско джювда сиклярно, савэ акхарэнас Анания. Рай пхэнда лэсти дэ дыкхлима: — Анания! — Кади, Рае! — пхэнда вов. 11 Рай дэдуманя лэсти: — Джя пэ гаса, сави акхарэлпэ «Вортага», аракх котэ Иудакхоро цэр, и пхуч Савло, саво акхарэлпэ «Тарсянино». Вов екхатар мангэлпэ. 12 И дэ лэхкэрэ дыкхлима мануш пав лавэ Анания авиля и тховда пэр лэстэ васта, соб вов тэ на авэл коро. 13 Анания пхэнда: — Рае, мэ бутэ манушэндар шундом пала лэ,

саво вурьитимо вов терда Тирэ свэнтонэнди дэ Ерусалимо. 14 И лэстэ катэ исин бари зор англуна рашаендар тэ пхэндэ всавэрэн, ко прыакхарэл Тиро Лав. 15 Нэ Рай пхэнда лэсти: — Дзя, колэсти со кадэва мануш — вытидэно Манца, соб тэ розпхэнэ пала Муро Лав англа наиудеен, англа тхагарен тай англа Израилёхкэрэн манушэн. 16 Мэ сикавава лэсти, сави бари грыжа вов прылэла пала Муро лав. 17 Анания джиля, заджиля дэ кодэва цэр, тховда пэ Савло васта тай пхэнда: — Пхрал Савло, Рай Иусо, Саво сикавдапэ пэ тиро дром, бичалда ман тутэ, соб ту упалэ тэ дыкхэх и тэ пхэрдэх Свэнтонэ Фанога. 18 Дэ кодья вряма калимо уджиля лэхкэрэ якхэндар, и вов ачиля тэ дыкхэ. Савло вщиля тай болдэняпэ. 19 А тунчи вов халэ, и лэстэ рисардапэ зор. Савло сля набут дивэн сиклярнэнца дэ Дамаско 20 тай сиво ачиля тэ пхэнэ дэ синагоги пала кода, со Иусо исин Дэвлэхкоро Чяво. 21 Всавэрэ, ко лэ шундэ, дэнаспэ дыво тай пхэнэнас: — Чи када на вов, ко умарэлас манушэн Ерусалимостар, савэ прыакхарэнас кадэва лав? И чи на авиля вов кордэ, соб тэ пхэндэ лэн и тэ лиджа англуна рашаэндэ? 22 Савло же инте зоралэдэр пхэнэлас тай допхэнэлас, со Иусо исин Христосо. Тай иудея, савэ джовэнас дэ Дамаско, на джянгле, со лэсти тэ пхэнэ. 23 Кала проджиля бут дивэн, иудея стидэне дума, соб тэ умарэ Савло. 24 Нэ Савло уджянгле пала кода. Иудея диво и рят дожутярэнас паша вударэн дэ форо, соб тэ умарэ лэ, 25 нэ сиклярнэ рятяга лиле тай обмукле лэ дэ бари траста пав форицико ванта. 26 Савло авиля дэ Ерусалимо и камля тэ прыаче сиклярнэндэ, нэ всавэрэ даранас лэстар и на патянас, со вов кади ж ачиля сиклярнэга. 27 Тунчи Варнава анда лэ апостолонэндэ тай розпхэнда, сар Савло пэ дром дыкхля Рае, сар Рай дэдумэлас лэга, и сар дэ Дамаско Савло бидаракоро пхэнэлас важ Иусохкоро лав. 28 Савло сля лэнца койсави вряма, пхирэлас пав Ерусалимо и битрашакоро пхэнэлас пала Раехкоро лав. 29 Вов бут молы дыкхэлэспэ эллинистонэнца, розпхэнэлас тай допхэнэлас лэнди, и кодэла терэнас вса, соб лэ тэ умарэ. 30 Кала пхрала уджянгле пала када, вонэ отлидждэ Савло дэ Кесария, а котарь отбичалдэ лэ дэ Тарсо. 31 А манушэн кхандирятар пав всавири Иудея, Галилея тай Самария будэр нико на традэлас. Кхандири прылэлас зор тай барёлас, джовда дарага англа Рае, тай Свэнто Фано подрицарэлас ла. 32 Кала Пётро джялас форо форостэ, вов авиля свэнтонэндэ, савэ

джовдэ дэ Лидда. 33 Котэ вов удыххля екхэ манушэ, савэ акхарэнас Энеи, вов сля насвало, попхагло мануш и пашлёлас пэ пато охта бэрш. 34 Пётро пхэнда лэсти: — Энеи! Иусо Христосо састярэл тут. Вщи тай стидэ тиро тхан. Дэ кодья ж вряма Энеи вщиля. 35 Кала всавэрэ мануша, савэ джовдэ дэ Лидда тай Шароно, удыххле, со вов састярдяпэ, вонэ обрисиле Раестэ. 36 Дэ Яффа сля екх сиклярни, савя акхарэнас Тавита, ай пав аврэ «Бузнори». Вой всавири вряма терэлас лаче рындурия и подрицарэлас чёrorэн. 37 Тай акэ, дэ кодья вряма вой занасвалиля тай муля. Лакоро трупю обхалавдэ и тховдэ дэ упралуни цэра. 38 Важ кода со Лидда надур Яффатар, кала сиклярнэ шундэ, со Пётро исин котэ, вонэ бичалдэ лэстэ дон манушэн, соб кодэла мангле лэ: — Ав амэндэ сигэдэр! 39 Пётро джиля лэнца, и кала вов авиля, лэ пролидждэ дэ упралуни цэра. Паша лэ стидэнепэ всавэрэ джовля, савэндэ муле рома. Вонэ ровэнас тай сикавэнас лэсти гада тай авэр їда, савэ сюда Бузнори, кала сля джовди. 40 Пётро выбичалда всавэрэн цэратар, вщиля пэ чянгэн тай помангялэ. Тунчи вов обрисардапэ мулятэ тай пхэнда: — Тавита, вщи! Вой оттерда якха, удыххля Петро тай бэшля. 41 Вов лиля ла пала вастэ и подрицарда, соб вой тэ вщел. Тунчи вов акхарда джовлен и патякунэн, и сикавда лэнди, со Тавита джовди. 42 Пала када уджянгле пав всавири Яффа, и бут манушэн патине Раести. 43 Пётро сля дэ Яффа инте бут дивэн, вов джовда Симоностэ, саво вытерэлас морця.

10 Дэ Кесария сля мануш, савэ акхарэнас Корнилии, шэлякоро пхурэдэр, халавдэнгэрэ Италиякэрэ стидэмастар. 2 Корнилии, сар и всавэрэ лэхкэрэ цэрүнэ, сля пативалэ манушэга тай даралас Дэвлэстар, роздэлас чёrorэнди пэхкэрэ хулаимастар и всавири вряма мангялэ Дэвлэсти. 3 Екхвар, паша трин чясуря дэ дивэ, Корнилиести сля дыкхлимо. Вов мишто дыкхля Дэвлэхкэрэ ангело, саво авиля лэстэ тай пхэнда: — Корнилии! 4 Вов подыххля пэр лэстэ дарага тай пхэнда: — Со, рае? Ангело пхэнда: — Дэвэл срапирда пала тут. Тиро мангимо и лачимо, саво ту терэх манушэнди, ваздэнепэ Лэстэ. 5 Бичал манушэн дэ Яффа, соб вонэ акхарэн Симоно, савэ инте акхарэн Петрога. 6 Вов джовэл Симоностэ, саво вытерэл морця, дэ цэр паша море. 7 Кала ангело, савэга вов дэдуманя, уджиля, Корнилии акхарда дон пэхкэрэн копылен тай пативалэ халавдэ, саво терэлас важ лэсти бути. 8 Вов розпхэнда

лэнди пала вса, со тердапэ, и бичалда лэн дэ Яффа. 9 Пэ авэр диво, кала бичалдэ поджнянас форостэ, паша дэшудуй чясуря, Пётро ваздэняпэ пэ цэрэхкири стрэха, соб тэ помангэпэ. 10 Вов ачиля бокхало и фартэ закамля тэ ха. Кала тавэнас хамо, Петрости сля дыкхлимо. 11 Вов дыкхля оттердо болыбэн и кода, со сля поджило пэ бари цэрга, сави обмукэлэспэ пэ пхув пала штар рига. 12 Дэ кадья цэрга сля всаворо штарэпурэнгоро ското, сапа тай болыбнахкэрэ чирикля. 13 Тунчи роздэняпэ ґласо тай пхэнда лэсти: — Пётро, вщи, чин и ха! 14 — Нат, Рае! — пхэнда Пётро. — Мэ никала на халём кода, со исин маґрисардо тай нажужо. 15 Тунчи ґласо пхэнда лэсти авэр моло: — На акхар маґрисардэґа кода, со Дэвэл жужарда. 16 Кади сля тривар, и тунчи цэрга сля подлти дэ болыбэн. 17 Пётро вса на полэлас, со када за дыкхлимо, кала мануша, савэн бичалда Корнилии, розпхучле, тев исин Симонохкоро цэр, поджиле тай ачиле паша вударэн. 18 Вонэ ачиле тэ пхуче, чи на джовэл катэ екхатар Симоно, савэ инте акхарэн Пётро. 19 Пётро инте думисарэлас пала дыкхлимо, кала Фано пхэнда лэсти: — Тут родэн трин мануша. 20 Вщи тай змукпэ тэлэ. Джя лэнца тай на думисар ни пала со. Колэсти со када Мэ лэн бичалдом. 21 Пётро змукляпэ тэлэ тай пхэнда кадэлэ манушэнди: — Мэ кодэва, ка тумэ родэн. Пав саво рындо тумэ авиле? 22 Вонэ пхэндэ: — Шэлякоро пхурэдэр Корнилии, мануш пативало, саво дарал Дэвлэстар, и пэ савэ тховэл патив родо иудеенгоро, прылиля свэнтонэ ангелостар лав тэ акхарэ тут дэ пэхкоро цэр тай тэ вышунэ, со ту лэсти пхэнэґа. 23 Тунчи Пётро акхарда лэн тэ заджя дэ цэр тай стховда лэнди патив. Пэ авэр диво Пётро и койсавэ пхрала Яффатар джиле лэнца. 24 Пэ авэр диво вонэ авиле дэ Кесария. Корнилии дожутярэлас лэн. Вов акхарда всаворо пэхкоро родо тай пашунэн амалэн. 25 Кала Пётро авиля, Корнилии выджиля лэстэ, тэлэдэня лэхкэрэ пурэндэ тай тэлиля лэсти. 26 Нэ Пётро подлиля лэ тай пхэнда: — Вщи, мэ кацаво ж мануш, сар и ту. 27 Кала Пётро инте дэдуманя Корнилиеґа, вов заджиля дэ цэр тай дыкхля, со котэ стидэняпэ бут манушэн. 28 Тай пхэнда лэнди: — Тумэ еджинэ джянэн, со иудеести нащи тэ авэ амалэґа наиудеенгэрэ манушэґа тай тэ заджя лэстэ дэ цэр. Нэ Дэвэл сикавда манди: нащи тэ дэдумэ ни пала савэ манушэ, со вов маґрисардо чи нажужо. 29 Колэсти, кала пала ман авиле, мэ джилём и нисо на пхэнаvas. Кана мэ камаv тумэндар тэ пхуче: пэ со тумэ бичалдэ пала ман? 30 Корнилии пхэнда: — Штар дивэ павпалэ, дэ кадья вряма, паша трин чясуря дэ дивэ, мэ манґлёмпэ дэ пэхкоро цэр. Тай англа ман ачиля мануш дэ ґда, сави сар яґ пхаболас. 31 «Корнилии, — пхэнда вов, — тиро мангимо ушундо, тай лачимо, саво ту терэх, سراпирда Дэвэл. 32 Бичал манушэн дэ Яффа пала Симоно, савэ инте акхарэн Пётро. Вов екхатар джювэл дэ цэр паша море, Симоностэ, саво вытерэл морця». 33 Мэ сиво бичалдом пала тут, тай ту мишто тердан, со авилян. Екхатар амэ всавэрэ катэ, англа Дэвлэ, и камах тэ шунэ кода, со Рай прыпхэнда тут тэ пхэнэ. 34 Пётро ачиля тэ дэдумэ: — Кана мэ полаv, со Дэвэл на дыкхэл пэ муй манушэхкоро, 35 нэ дэ всавэрэн манушэнгэрэн родонэн Лэсти чялёл кодэва, ко дарал Лэстар и терэл чячимо! 36 Вов бичалда Израилёхкэрэ родости Бахтало Лав пала кода, со Иусо Христосо, Саво исин Рай всавэрэ манушэндэ, слиджял амэн Дэвлэґа. 37 Тумэ джянэн пала кода, со тердапэ пав всавири Иудея, майанґлал Галилеятар и пала кодэлэ, сар Иоанно прыаххарэлас манушэн тэ болдэлэ. 38 Дэвэл помакхля Свэнтонэ Фаноґа тай зораґа Иусо Назаретостар тай Вов пхирэлас, терэлас лаче рындуря и састярэлас всавэрэн, ко сля дэ копылен барэ бэнгэстэ, колэсти со Лэґа сля Дэвэл. 39 Амэ — допхэнимаря пала кода, со терэлас Иусо дэ иудеенгири пхув тай дэ Ерусалимо. Лэ амблавдэ пэ каштунэ трушулэ тай умардэ, 40 нэ Дэвэл пэ трито диво одтджювдырда Лэ и дэня, соб Вов тэ сикавэлпэ манушэнди, — 41 на всавэрэнди, нэ амэнди, допхэнимаренди, ка майанґлал вытидэня Дэвэл. Тай амэ хале и пиле Лэґа пала колэ, сар Вов одтджювдиня мулэндар. 42 Вов прыпхэнда, соб амэ тэ розпхэнах манушэнди тай тэ авах допхэнимаря, со Вов исин Кодэва, Ка вытидэня Дэвэл тэ сундисарэ джювдэн тай мулэн. 43 Пала Лэ допхэнэн всавэрэ анґлунаря, кала дэдумэн, со кожно мануш, саво патял дэ Лэ, фирисарэлапэ бэзимастар важ Лэхкоро лав. 44 Кала Пётро инте дэдумэлас пала кода, пэ всавэрэн, ко шунда лэхкэрэ лава, сджиля Свэнто Фано. 45 Патякунэ иудея, савэ авиле Петроґа, дэнаспэ дыво, со Дэвэл бичалда Свэнто Фано дэ даро кади ж и наиудеенди, 46 колэсти со вонэ шундэ, сар кодэла дэдумэнаs пэ аврэн чибэн и ашарэнаs Дэвлэ. Тунчи Пётро пхэнда: 47 — Ко на дэла тэ болдэлэ панеґа кадэлэ манушэнди, савэ прылиле Свэнто Фано кади ж, сар и амэ? 48 И вов прыпхэнда лэнди тэ болдэнпэ важ Иусохкоро Христохкоро

лав. Тунчи хулая мангле Петро, соб тэ ачелпэ лэнца пэ набут дивэн.

11 Апостолуря тай пхрала, савэ джювдэ дэ Иудея, шундэ, со кади ж и наиудея прылиле Дэвлэхкоро лав. 2 Колэсти, кала Пётро авиля дэ Ерусалимо, патякунэ иудея ачиле тэ выпхэнэ лэсти: 3 — Ту пхирдан наобчиндэ манушэндэ и халян лэнца, — пхэнэнас вонэ. 4 Тунчи Пётро ачиля тэ розпхэнэ лэнди вса, со сля майанглал и пала кодэлэ. 5 — Мэ слём дэ форо Яффа тай манглёмпэ, — пхэнда вов, — и дэ кадья вряма мандэ сля дыкхлимо: кода, со сля поджило пэ бари цэрга, сави пала штар рига обмукэласпэ болыбнастар ворта пордэ, тев мэ слём. 6 Мэ подыкхлём андрал тай удыхклём штарэпурэнгоро ското, салэн тай болыбнахкэрэн чириклен. 7 Тунчи мэ шундом ґласо, саво дэдумэлас манди: «Пётро, вщи, чин тай ха!» 8 Мэ пхэндом: «Нат, Рае! Ни пала со! Мэ никала на халём кода, со исин маґрисардо тай нажухо». 9 Гласо болыбнастар пхэнда манди авэр моло: «На акхар маґрисардэґа кода, со Дэвэл жужарда». 10 Кади сля тривар, и тунчи цэрга сля подлито дэ болыбэн. 11 Дэ кадья ж вряма паша цэр, дэ саво мэ слём, пашыле трин мануша, бичалдэ мандэ Кесариятар. 12 Фано прыпхэнда манди тэ джяв лэнца и тэ на розпхучяв ни пала со. Акэ кадэла шов пхрала кади ж джиле манца, тай амэ авиле дэ цэр кодэлэстэ, ко ман акхарда. 13 Вов розпхэнда амэнди пала кода, сар дыкхля пэстэ ангело. Ангело пхэнда лэсти: «Бичал манушэн дэ Яффа пала Симоно, савэ инте акхарэн Пётро, 14 и вов розпхэнэла, сар тэ фирисарэпэ туту и всавэрэ тирэ цэрэсти». 15 Кала мэ ачилём тэ дэдумэ, пэ лэндэ сджиля Свэнто Фано, кади, сар Вов сджиля англэ и пэ амэн. 16 Тунчи мэ сралердом лава Раехкэрэ: «Иоанно болдэня панеґа, а тумэ авэна болдэ Свэнтонэ Фаноґа». 17 Колэсти, кала Дэвэл дэня лэнди кацаво даро, сар и амэнди, савэ патине Раести Исусости Христости, ко ж мэ кацаво, соб тэ запхэнэ Дэвлэсти? 18 Кала вонэ вышундэ када, тунчи пэрэачиле тэ розпхуче тай ваздэне патив Дэвлэсти. Тай дэдумэнас: — Выджял кади, со Дэвэл дэня и наиудеенди тэ уджян бэзимастар тай тэ лэн джювимо! 19 Патякунэ, савэ розджилепэ, кала лэн ачиле тэ традэ пала кодэлэ, сар муля Стефано, проджиле Финикия, Кипро тай Антиохия, нэ розпхэнэнас Лав кацик иудеенди. 20 Нэ койсавэ лэндар, савэ сле Кипростар тай дэ Киренеятар, авиле дэ Антиохия тай ачиле тэ розпхэнэ Бахталло Лав пала Рае

Иусо эллинистонэнди. 21 Раехкоро васт сля лэнца, и бут манушэн патине тай обрисардэпэ Раестэ. 22 Дума пала кода доджия кхандирятэ дэ Ерусалимо. Котарь бичалдэ дэ Антиохия Варнава. 23 Кала Варнава авиля тай удыхкля Дэвлэхкоро мищимо, вов лошыля тай умангэлас всавэрэн, соб тэ аченпэ дэ патявима Раести. 24 Варнава сля лачё мануш, пхэрдо Свэнтонэ Фаноґа тай патявимаґа. Тай фартэ бут манушэн ачиле тэ патя Раести. 25 Тунчи Варнава джиля дэ Тарсо, соб тэ аракхэ котэ Савло. 26 И кала аракхля лэ, тунчи анда дэ Антиохия. Састо бэрш вонэ аченаспэ дэ антиохийско кхандири тай сиклярэнас бутэн манушэн. Дэ Антиохия сиклярэнэн дэ перво моло ачиле тэ акхарэ «христиануря». 27 Дэ кадья вряма Ерусалимостар дэ Антиохия авиле койсавэ ангунаря. 28 Екх лэндар, савэ акхарэнас Агаво, вщиля тай Фаноґа пропхэнда, со пав всавири пхув авэла бари бокх. Кади и тердапэ, кала Клавдии сля императоро. 29 Колэсти сиклярнэ допхэндэпэ, со кожно лэндар дэла пэхкэрэ хулаимастар скици исин, тэ подрицарэ пхралэн дэ Иудея. 30 Кади вонэ и тердэ. Тай бичалдэ Варнава тай Савло тэ отлиджя ловэ, савэ вонэ стидэне, и тэ отдэ лэн пхурэдэрэнди.

12 Тевсь дэ кадья вряма тхагари Иродо спхангля койсавэн манушэн кхандирятар, соб тэ терэ лэнди бибахт. 2 Вов прыпхэнда тэ умарэ чюряґа Иоаннохкэрэ пхралэ, Иаково. 3 Кала вов удыхкля, со када чялиля иудеенди, тунчи прыпхэнда тэ пхандэ и Петро. Када сля пэ сырботори, саво акхарэлпэ Биквасно мандро. 4 Петро пхангле, чутэ дэ барунэ и тховдэ дэшушов халавдэн, по штар мануша дэ череда. Иродо камля тэ вылиджя Петро манушэндэ, кала проджяла Патради. 5 Петро сля дэ барунэ, а кхандири фартэ мангляпэ пала лэ Дэвлэсти. 6 Рятяґа, англа колэ, сар Иродо камля тэ вылиджя лэ пэ сындэ, Пётро совэлас машкар дон халавдэн тай сля спхангло донца ланчугонэнца, а халавдэ паша вударэн прыдыкхэнас пала барунэ. 7 Тай акэ, авиля ангело Раехкоро, тай дэ барунэ запхабиляпэ душлимо. Ангело малавда Петро дэ рига тай джюнгавда лэ. — Вщи сигэдэр! — пхэнда вов, тай ланчугурия тэлэдэне Петрохкэрэ вастэндар. 8 Тунчи ангело пхэнда: — Подпхандэпэ кущикаґа тай уряв цыруля. Пётро терда када. — Уряв упралуни їда и джя пала ман, — пхэнда ангело. 9 Пётро выджиля пала ангело барунэстар тай на полэлас, со ангело терэл вса пав чячима. Вов думисарэлас, со када дыкхлимо. 10 Вонэ

проджиле англунэн халавдэн, тунчи — аврэн тай поджиле саструнэ вударэндэ, савэндэр выдьянас дэ форо. Вудара еджинэ оттердэпэ англа лэн, тай вонэ выджиле. Вонэ проджиле екх гаса, тай акэ, ангело уджиля. 11 Кала Пётро авиля дэ пэстэ, вов пхэнда: — Кана мэ чяче джянав, со Рай бичалда пэхкэрэ ангело и фирисарда ман Иродохкорэ вастэстар и кодэлэ бибахталимастар, саво камле тэ терэ манди иудеенгерэ мануша. 12 Кала Пётро полиля, со тердапэ, вов джиля цэрэстэ, тев джювда Мария, дэй Иоаннохкири, савэ инте акхарэнас Марко. Котэ бут манушэн стидэнепэ тэ мангэпэ. 13 Пётро помарда дэ вударэн, тай лэстэ выджиля бутярни, савя акхарэнас Роза. 14 Вой уджянгля Петро пав 'ласо тай лошатар бистарда тэ оттерэ вудара. Тунчи вой прастэня павпалэ, соб тэ пхэнэ, со Пётро ачел паша вударэн. 15 — Ту на дэ пэхкиря годя! — пхэндэ лати. Нэ вой на пэрэачелас лэнди тэ допхэнэ. — Када лэхкоро ангело! — дэдумане вонэ. 16 Пётро вса ж марэлас дэ вударэн, и кала вонэ оттердэ вудара и удыхкле лэ, тунчи дэнепэ дыво. 17 Пётро сикавда лэнди вастэ'га, соб вонэ тэ заачен мулком, тай розпхэнда, сар Рай вылиджялда лэ барунэстар. — Розпхэнэн пала кода Иаковости и аврэ пхралэнди, — дэдуманя вов лэнди тай уджиля котарь дэ авэр тхан. 18 Дэнзор халавдэ ачиле тэ прастэ пордэ котарь, и нико на джянгля, со тердапэ Петро'га. 19 Иродо родэлас лэ тай на арахла, колэсти допхучля халавдэн тай прэдэня лэн мэримасти. Тунчи Иродо лагля Иудеятар дэ Кесария тай ачеласпэ котэ набут вряма. 20 Иродо ж фартэ мижыля пэ манушэн, савэ джювдэ дэ Тиро тай Сидоно. Кодэла ж допхэндэпэ машкар пэстэ, авиле Иродостэ тай помангле Бласто, саво прыдыкхэлас пала тхагарехкири цэра, соб вов тэ подрицарэл лэн. Тунчи мангле тхагаре, соб тэ на рицарэл холи пэ лэн, колэсти со лэнгири пхув парварэласпэ тхагарехкиря пхуятар. 21 Дэ екх диво, саво вов вытидэня, Иродо урявда тхагаримахкири 'да, бэшля пэ сундисарехкоро тхан и ачиля тэ дэдумэ манушэндэ. 22 Мануша затиписиле: — Када 'ласо дэвликуно, а на манушыкано! 23 Нэ дэ кодья ж вряма ангело Раехкоро малавда Иродо, колэсти со вов на ваздэня лашаримо Дэвлэсти, тай цэрмэ захале лэ, и вов муля. 24 Лав Дэвлэхкоро роздьяласпэ дурэдэр тай дурэдэр. 25 Варнава ж тай Савло стердэ пэхкоро рындо тай рисиле дэ Ерусалимо. Пэ'га вонэ лиле Иоанно, савэ инте акхарэнас Марко.

13 Дэ антиохийско кхандири сле ангунаря тай сикляримаря: Варнава, Симеон, савэ инте акхарэнас «Нигеро», киренеянино Луции, Манаино, саво бариля 'тханэ тетрархо'га Иродо'га, тай Савло. 2 Екхвар, кала вонэ тэлёнас Раести и рицарэнас посто, Свэнто Фано пхэнда: — Оттховэн Манди Варнава тай Савло важ рындо, ды савэ Мэ лэн прыакхардом. 3 Тай вонэ, кала проджиле посто и мангимо, тховдэ пэ лэн васта и отмукле лэн. 4 Кадэла дуй, савэ сле бичалдэ Свэнтонэ Фано'га, джиля дэ Селевкия, а котарь лагле пав пане пэ Кипро. 5 Вонэ авиле дэ Саламино и котэ пхэнэнас Дэвлэхкоро лав дэ иудеенгерэ синагоги. Иоанно сля лэнца тай дэлас лэнди зор. 6 Вонэ облагле всаворо острова тай авиле дэ Пафосо. Котэ вонэ удыхкле екхэ иудее, пав лавэ Вар-Исусо, саво сля джянимари тай хохавно ангунари. 7 Вов сля пашэ римско проконсуло пав лавэ Сергии Павло, манушэ баря годя'га. Проконсуло камля тэ пошунэ Дэвлэхкоро лав тай акхарда пэстэ Варнава и Савло. 8 Нэ кадэва Вар-Исусо, савэ инте акхарэнас Элима, (пав аврэ «джянимари»), камля тэ терэ лэнди бибахт тай тэ отмарэ пхурэдэрэ патявимастар. 9 Тунчи Савло, вов же Павло, пхэрдилэ Свэнтонэ Фано'га, вхалэпэ дэ Элима яххэнца 10 тай пхэнда: — Чяво барэ бэнгэхкоро, врыжымашо всавэрэ чячимасте, пхэрдо хохавима'га тай хрантима'га! Кала ту пэрэаче'га тэ выбандярэ чячиюно Раехкоро дром? 11 Акэ, екхатар васт Раехкоро ваздэняпэ пэ тут! Ту авэ'га коро и савись вряма на дыхкэ'га душлимо кхамэхкоро! Тунчи сджиле пэр лэстэ рят тай калимо, тай вов ачиля тэ чувэпэ дэ всавэрэн ригэн и тэ родэ кодэлэ, ко лиджяла лэ пала васт. 12 Кала проконсуло удыххля, со тердапэ, вов патиня, колэсти со дэняпэ дыво сикляримасте пала Дэвлэ. 13 Павло и кодэла, ко сле лэ'га, оджиле пав пане Пафосостар тай авиле дэ Перга, сави сля дэ Памфилия. Котэ Иоанно ачявда лэн и рисилэ дэ Ерусалимо. 14 Пергатар вонэ лагле дурэдэр дэ писидийско Антиохия. Дэ суббота вонэ авиле дэ синагога тай бэшле котэ. 15 Пала колэ, сар продиндэ Упхэнимастар и Ангунарендар, пхурэдэра дэ синагога пхэндэ лэнди: — Пхралалэ, сар исин тумэндэ лав, соб тэ подрицарэ манушэн, тунчи дэдумэн. 16 Павло вщиля, подлиля васт и пхэнда: — Мурша израильтянурия и всавэрэ, ко даран Дэвлэстар, шунэн ман! 17 Дэвэл Израилэхкэрэн манушэн вытидэня дэдэн амарэн. Вов ваздэня манушэн, кала вонэ сле дэ Египто, и зоралэ

вастэга вылиджалда лэн котарь. 18 Саранда бэрш Вов прыдыкхэлас пала лэн дэ шуки пхув. 19 Вов прэдэня мэримаста дэ Ханаано эфта манушэнгэрэн родонэн и отдэня лэнгири пхув амарэ дадэнди. 20 Кади проджила пашэ штар шэла пандэша бэрш. Ды колэ, сар авиля ангунари Самуило, Дэвэл дэлас лэнди сундисарен. 21 Тунчи мануша помангле тхагаре, тай Дэвэл дэня лэнди Сауло, Кишоохкэрэ чявэ, Вениаминохорэ родостар. Сауло сля тхагарега саранда бэрш. 22 Тунчи Дэвэл залила тхагаримо Саулостар тай терда тхагарега Давидо. Вов допхэнэлас пала лэ: «Мэ араклём Давидо, Иессеехкэрэ чявэ, кадэва мануш Манди пав ілэ, вов терэла вса, со Мэ камав». 23 Давидохкэрэ родостар Дэвэл дэня Израилёхкэрэ Фирисаре — Иусо, сар и дэлас лав пала кода. 24 Англа колэ, сар авиля Иусо, Иоанно пхэнэлас всавэрэ Израилёхкэрэ манушэнди, со трэбуни тэ ачявэ бэзимо тай тэ болдэпэ. 25 Кала ж Иоаннохири бути проджялас, вов пхэнэлас: «Пала ка тумэ ман прылэн? Мэ на Вов. Нэ пала ман джял Кодэва, Касти мэ на ачяв тэ розпхэндэ доря пэ цыруля». 26 Пхралал! Чяворэ Авраамохкэрэ и кодэла тумэндар, савэ даран Дэвлэстар! Кадэва лав фирисаримахкоро сля бичалдо амэндэ! 27 Кодэла, савэ джювэн дэ Ерусалимо тай лэнгэрэ пхурэдэра на уджянгле Фирисаре. Вонэ сундисардэ Лэ и кади тердэ пав ангунаренгэрэн лавэн, савэ динэн кожно суббота. 28 Вонэ на арахкле дэ Лэ нисави дош, пала со Лэ трэбуни сля тэ умарэ, нэ умангле Пилато, соб тэ прэдэ Лэ мэримасти. 29 Кала вонэ стердэ вса, со сля пала Лэ искрисардо, вонэ слиле Лэ каштунэ трушулэстар тай тховдэ дэ склепо. 30 Нэ Дэвэл отджювдярда Лэ мулэндар, 31 и бут дивэн кодэла, савэ авиле Лэга Галилеятар дэ Ерусалимо, дыкхэнас Лэ. Тай екхатар вонэ Лэхкэрэ допхэнимаря англа манушэн. 32 И амэ кади ж дэдумак кадэва Бахтало Лав: кода, пала со Дэвэл пхэнэлас амарэ дадэнди, 33 Вов терда важ амэн, лэнгэрэ чяворэн, кала отджювдярда Иусо. Дэ авэр псалмо искрисардо: «Ту — Чяво Муро, авдивэ Мэ ачилём Тирэ Дадэга». 34 Тай пала кода, со Дэвэл отджювдярда Лэ мулэндар, кади, со трупо Лэхкоро на прахола, Вов пхэнди: «Мэ дава тумэнди свэнто Давидохкоро бахталимо, саво на парувэлапэ». 35 Тай дэ авэр тхан Вов дэдумэл: «Ту на дэга, соб Свэнто Тиро тэ лэлпэ прахога». 36 Давидо дэ пэхкири вряма терэлас бути пав воля Дэвлэхкири. Тунчи вов муля, лэ прахосардэ лэхкэрэ дадэнца, тай трупо лэхкоро лиляпэ прахога. 37 Нэ Кодэва,

Ка Дэвэл отджювдярда, прахога на лиляпэ. 38 Калэсти, пхралалэ, джянэн: чэрээ Лэстэ Дэвэл отмукул тумэнди бэзимо. 39 И сар тумэндэ на сля зор тэ ачявэ бэзимо пав Моисеехкэрэ Упхэнима, кожно ко патяла дэ Лэстэ, ачявэла пэхкоро бэзимо. 40 Дыкхэн, соб тумэнца тэ на терэлпэ кода, пала со дэдумэнас ангунаря: 41 «Подыкхэн, асамаря, дэнпэ дывости и хасявэн! Мэ терава дэ тумарэн дивэн кацаво рындо, со тумэ никала б на патине, кала б тумэнди розпхэндэ пала кода». 42 Кала Павло тай Варнава джянас котарь, лэн помангле тэ дэдумэ пала кода дэ авэр суббота. 43 Мануша розджилепэ, нэ бут иудея тай пативалэ, савэ прылиле иудеенгоро сикляримо, джиле пала Павло тай Варнава. Вонэ дэдумане лэнца тай умангэнас лэн тэ джювэ пав Дэвлэхкоро мищимо. 44 Дэ авэр суббота гроза манушэн кодэлэ форостар стидэняпэ, соб тэ шунэ лав Раехкоро. 45 Кала иудея удыхкле скацик манушэн, вонэ мижыле тай ачиле намишто тэ дэдумэ пала Павлохкэрэн лавэн тай тэ кошэ Павло. 46 Тунчи Павло тай Варнава пхэндэ лэнди ворта: — Лав Дэвлэхкоро трэбуни сля анггал всавэрэстар тэ дэдумэ тумэнди. Нэ кала тумэ отпхэнэнпэ лэстар, тай на бинэн, со вечно джювимо исин важ тумэн, амэ джях наиудеенгэрэ манушэндэ, (aiōnios g166) 47 сар и прыпхэнди амэнди Рай: «Мэ тердом Тут душлимага важ всаворо манушыкано родо, тэ авэн фирисардэ Тутар пав всавири люмля». 48 Кала наиудея шундэ када, вонэ сле лошалэ тай лашарэнас Рае пала Лэхкэрэ лавэ. Тай патине всавэрэ, савэ сле вытидэне вечно джювимасти. (aiōnios g166) 49 Раехкоро лав розджилепэ пав всавири кодыя пхув. 50 Иудея ж подмардэ пативалэн джювлен барвалэ ірендар тай форохкэрэн пхурэдэрэн. Тай всавэрэ вонэ ачиле тэ традэ Павло и Варнава и вытрадэне лэн пэхкиря пхуятар. 51 Тунчи вонэ обмардэ прахо пэхкэрэ пурэндар тай джиле дэ Иконии. 52 А сиклярнэ пхэрдэнас лошага тай Свэнтонэ Фанога.

14 Дэ Иконии Павло тай Варнава іханэ заджиле дэ иудеенгири синагога тай дэдумане кади, со патине фартэ бут иудеен тай греконэн. 2 Ай иудея, савэ отпхэндэпэ лэнди тэ патя, ваздэне тай мижардэ пэ пхралэн наиудеен. 3 Нэ вса ж Павло тай Варнава сле котэ бут вряма. Вонэ бидаракоро дэдумане пала Рае, Саво допхэнэлас лав пала Лэхкоро мищимо и дэлас лэнди зор тэ терэ допхэнимо тай дыбура. 4 Кодэла, ко джювэнас дэ форо, розмардэпэ по епаш. Екх мануша подрицарэнас иудеен, ай авэр — апостолонэн.

5 Нэ кала наиудея тай иудея їтханэ пэхкэрэ пхурэдэрэнца закамле тэ прытховэ зор тай тэ помарэ лэн барэнца, 6 вонэ уджянгле пала кода, нашле тай проджиле пхув Ликаония, форуля Листра тай Дервия и пхуя, савэ сле пашэ лэн, 7 тев дурэдэр розпхэнэнас Бахтало Лав. 8 Дэ Листра джювда бизоракоро мануш, саво пэхкэрэ бэнимастар на пхирэлас пурэнца. Екхвар, кала вов бэшэлас, 9 вов шунда Павлохоро лав. Павло же подыкхля пэр лэстэ тай полиля, со лэстэ исин патьявимо, соб тэ састярэнэ. 10 — Вщи пэ тирэ пурэ тай пхир! — зоралэ їласога пхэнда Павло. Кодэва всхукля тай ачиль тэ пхирэ. 11 Мануша удыкхле, со терда Павло тай типисиле пав ликаонско чиб: — Амэндэ сджиле дэвэла, поджилэ пэ манушэн! 12 Вонэ пхэнэнас пэ Варнава «Зевсо», а пэ Павло — «Гермесо», колэсти со вов будэр дэдумэлас. 13 Англа форо сля храмо, тев тэлэнас Зевсости, тай лэхкоро рашай анда форохкэрэ вударэндэ гурувэн тай винци, колэсти со камля їтханэ манушэнца тэ анэ лэнди жэртва. 14 Кала апостолурия Павло тай Варнава ушундэ пала кода, вонэ розчиндэ пэхкири їда, чутэпэ машкар манушэн тай ачиле тэ типисяз: 15 — Муршалэ, со тумэ терэн? Амэ — кацавэ ж мануша, сар и тумэ! Амэ андэ тумэнди Бахтало Лав тай камах, соб тумэ тэ отпхэнэнпэ хохавнэ дэвлэндар и обрисиле джювдэ Дэвлэстэ, Саво стерда болыбэн, пхув, море и вса, со дэ лэн исин. 16 Дэ думутни вряма Вов помукэлас всавэрэ манушэнгэрэ родонэнди тэ пхирэ лэнгэрэ дромэнца, 17 нэ на пэрэачелас тэ допхэнэ пала Пэ, кала терэлас мицимо тай бичалэлас тумэнди брышынд болыбнастар и вряма тэ стидэ плодуря, кала дэлас тумэнди хамо тай пхэрдярэлас тумарэ їлэ лошага. 18 Тай кацик кадэлэ лавэнца вонэ допхэндэ манушэнди, соб важ лэн тэ на анэн жэртва. 19 Иудея, савэ авиле Антиохиятар тай Икониестар, пэрэцырдэне гроза манушэн пэ пэхкири риг. Павло помардэ барэнца тай выцырдэне пала форо. Вонэ думисардэ, со вов муля. 20 Нэ кала сиклярнэ стидэнepэ паша лэ, вов ущиля тай упалэ джиля дэ форо. Пэ авэр диво вов тай Варнава джиле дэ Дервия. 21 Вонэ дэдумане Бахтало Лав дэ кадэва форо тай тердэ сиклярнэнца бут манушэн. Тунчи вонэ упалэ проджиле Листра, Икони тай Антиохия. 22 Котэ вонэ подрицарэнас сиклярнэнгоро фано тай прыакарэнас, соб кодэла тэ аченпэ дэ патьявима. — Англа колэ, сар тэ заджя дэ Дэвлэхкоро Тхагаримо, амэнди трэбуни тэ прылэ бут грыжа, — пхэнэнас вонэ. 23 Павло тай Варнава дэ кожно кхандири възтховэнас васта

пэ манушэн тай терэнас лэндар пхурэдэрэн. Тунчи лиле посто тай поманглепэ, и пэрэдэне лэн Раести, дэ Савэ вонэ упатине. 24 Тунчи вонэ проджиле Писидия тай авиле дэ Памфилия. 25 Кала ж вонэ пхэндэ лав дэ Перга, котарь авиле дэ Атталия. 26 Котарь вонэ лагле пав пане дэ Антиохия, тев, пав Дэвлэхкоро мицимо, лэн майанглал вытидэне пэ бути, сави вонэ и тердэ. 27 А кала вонэ авиле дэ Антиохия, тунчи стидэне кхандири тай розпхэндэ пала вса, со Дэвлэ терда лэнгэрэ вастэнца, и сар Вов оттерда вудара патьявимастэ наиудеенди. 28 Тай бут вряма просле котэ їтханэ сиклярнэнца.

15 Иудеятар дэ Антиохия авиле мануша, савэ ачиле тэ сиклярэ пхралэн: — Кала тумэ на авэна тэ обчинэпэ пав прыпхэнима Моисеехкэрэ, тумэ на фирисарэнапэ. 2 Павло и Варнава бут молы допхэнэнас лэнди тай вджянас дэ бари дума. Тунчи Павлости и Варнаvasti прыпхэндэ тэ джя дэ Ерусалимо їтханэ койсавэ авэр патьякунэ манушэнца тай тэ обдэдумэ кадэва рындо апостолонэнца и пхурэдэрэнца. 3 Кхандири пролиджялда лэн, тай вонэ джиле пав Финикия и Самария тай розпхэнэнас котэ, сар наиудея обрисиле Дэвлэстэ. Кадэлэсти фартэ лошыле всавэрэ патьякунэ мануша. 4 Дэ Ерусалимо лэн прылиле кхандири, апостолурия тай пхэрэдэра, а вонэ розпхэнда пала вса, со Дэвлэ терда лэнгэрэ вастэнца. 5 Нэ патьякунэ, савэ сле фарисеенгэрэ стидэмастар, пхэнэнас, со наиудеен трэбуни тэ обчинэ тай тэ прыпхэнэ лэнди, соб тэ джювэн вонэ пав Моисеехкэрэ Упхэнима. 6 Апостолурия тай пхурэдэра стидэнepэ, соб тэ мишто роздыкхэ кадья дума. 7 Вонэ лунго вряма дэдумэнас пала кода, тунчи Пётро вщиля тай подэня лэхкоро їласо: — Пхралалэ, сар тумэ джяэнэ, проджиля бут вряма кодэлэ дивэстар, кала Дэвлэ вытидэня всавэрэндар амэндар ман, соб тэ розпхэнав Бахтало Лав наиудеенди, и соб вонэ тэ патын. 8 Дэвлэ джяналэ їлэ манушэнгэрэ, тай Вов дэня допхэнима, со прылэлэ и наиудеен, кала бичалда лэнди Свэнтэ Фано кади ж, сар и амэнди. 9 Вов на думисарэл, со амэ фэдэр лэндар, колэсти со патьявимага жужарда лэнгэрэ їлэ! 10 Сости ж тумэ зумавэн Дэвлэ и тховэн пэ кор сиклярнэнди їамо, тэ лиджя саво на сля зора и амарэ дадэндэ и амэндэ? 11 Амэ патых дэ колэ, со прылах фирисаримо пав мицимо Рае Исусохкоро, кади ж, сар и вонэ. 12 Тунчи всавэрэ прыачиле мулком тай ачиле тэ шунэ, сар Варнава и Павло розпхэнэн пала допхэнима тай дывуря, савэ Дэвлэ терэлас лэнгэрэ

вастенца машкар наиудеен. 13 Кала вонэ вса розпхэндэ, Иаково пхэнда: — Пхралалэ, пошунэн ман! 14 Симоно екхатар розпхэнда амэнди, сар Дэвэл перво моло авиля наиудеендэ, соб тэ вытидэ лэндар кодэлэн, ко лашарэла Лэхкоро лав. 15 И кадэлэстэ подлиджьнас ангунаря, кала пхэнэнас: 16 «Тунчи Мэ рисявава тай подваздава катуна Давидохкири, сави тэлэдэня. Вса стерава упалэ, со розпхаглыпэ, вортасавава ла, 17 соб авэр мануша тай всавэрэ манушэнгэрэ родуля, савэ акхарэнаспэ Мурэ Лавэга, ачиле тэ родэ Рае. Кади пхэнэл Рай, Саво терэл вса откада. 18 со джянал англунимастар». (a10n g165) 19 Колэсти мэ думисарав, со амэнди на трэбуни тэ тховэ пхаримо пэ наиудеен, савэ обрисьявэн Дэвлэстэ. 20 Нэ трэбуни тэ искриисарэ лэнди лил, соб вонэ на тэ магрисарэнпэ стердэ дэвлорэндар, тэ на терэн биладжывимо їрестар, тэ на хан мас затасавдэ хулаимастар тай тэ на пэн рат. 21 Колэсти со Упхэнимо Моисеяхкоро англунэ родостар розпхэнэн тай динэн кожно суббота дэ всавэрэ синагоги пав всавэрэн форонэн. 22 Тунчи апостолуря тай пхурэдэра їтханэ всавиря кхандиряга прылиле дэ гындо тэ вытидэ манушэн, тай тэ бичалэ лэн дэ Антиохия Павлога и Варнавага. Вонэ вытидэне Иуда, савэ инте акхарэнас Вар-Савва, тай Сила. Кадэла сле пхурэдэра машкар пхралэн. 23 Лэнца пэрэдэне кацаво лил: «Пхрала апостолуря тай пхурэдэра, пхралэнди наиудеендар, савэ джювэн дэ Антиохия, Сирия тай Киликия. Тэ авэн бахталэ! 24 Сар доджия амэндэ дума, со койсавэ амэндар змардэ тумэн годятар пэхкэрэ лавэнца и тховдэ калимо дэ тумарэн їлэн, нэ амэ на пхэнагаэс лэнди тэ терэ кади. 25 Колэсти амэ прылиле дэ гындо тэ вытидэ койсавэн мушэн тай бичалдэ лэн тумэндэ їтханэ амарэ пативалэнца Варнавага тай Павлога, 26 савэ отдэн пэхкоро джювимо важ Лав амарэ Рае Исусо Христо. 27 Амэ бичалах тумэнди кади ж Иуда тай Сила, соб вонэ розпхэндэ тумэнди кода, со амэ искриисарах. 28 Свэнто Фано тай амэ прылиле дэ гындо, соб тэ на тховах пэ тумэн нисаво пхаримо, кацки откада, со трэбуни: 29 Тэ на хан кода, со андэ дэ жэртва стердэ дэвлорэнди и мас затасавдэ хулаимастар, тэ на пэн рат, тэ на терэн биладжывимо їрестар. Сар авэна када тэ терэ, терэна мишто. Тэ авэн састэ!» 30 Бичалдэ джиле дэ Антиохия. Котэ вонэ стидэне кхандири тай пэрэдэне лил. 31 Мануша динэнас лэ тай лашавэнас подрицаримасти. 32 Иуда тай Сила, савэ сле ангунаря, кади ж подрицарэнас пхралэн

пэхкэрэ лавэнца дэ патявима. 33 Вонэ сле котэ койсави вряма тай пхрала бахтага отмукле лэн кодэлэндэ, ко лэн бичалда. 35 Павло тай Варнава ачилепэ дэ Антиохия, тев вонэ аврэ бутэ пхралэнца сиклярэнас Раехкэрэ лавэсти тай розпхэнэнас Бахтало Лав. 36 Проджиля набут вряма, тай Павло пхэнда Варнавасти: — Заджяга пхралэндэ дэ всавэрэн форонэн, тев амэ дэдумане Раехкоро лав, тай подыхкага, сар вонэ джювэн. 37 Варнава камля тэ лэ пэга Иоанно, савэ инте акхарэнас Марко. 38 Нэ Павло прылиля дэ гындо, со на трэбуни тэ лэ кодэлэ, ко ачявда лэн дэ Памфилия тай на терэлэс лэнца буті. 39 Вонэ нисар на допхэндэлэ машкар пэстэ, колэсти розджиленэ. Варнава лиля Марко и вонэ лагле пав пане пэ Кипро. 40 Ай Павло вытидэня Сила, и, кала пхрала прэдэне лэн Раехкэрэ мицимасти, джиля дэ дром. 41 Тунчи вов проджялас Сирия тай Киликия, тев подрицарэлэс кхандиря дэ патявима.

16 Тунчи Павло авиля дэ Листра тай дэ Дервия. Котэ джювда сиклярно, савэ акхарэнас Тимофеи. Лэхкири дэй сля патякуни иудеянка, ай дад сля греко. 2 Пала Тимофее мишто дэдумане пхрала дэ Листра тай дэ Иконии. 3 Павло закамля тэ лэ Тимофее дэ пэхкоро дром. Тай важ иудеен, савэ джювдэ дэ кодэлэн тханэн, обчинда лэ. Важ кода, со всавэрэ джянгле: Тимофеехкоро дад исин греко. 4 Кала Павло тай мануша, савэ сле лэга, пэрэджьнас форо форостар, вонэ прыакхарэнас патякунэн тэ терэ кади, сар пэрэдэне апостолуря тай пхурэдэра Ерусалимостар. 5 Кхандиря састэнас дэ патявима, тай патякунэн диво дивэстар ачелас будэр. 6 Вонэ проджянас пав Фригия тай Галатиякири пхув, нэ Свэнто Фано на домукля лэн тэ пхэнэ лав дэ Цыкни Азия. 7 Вонэ поджиле Мисиятэ и камле тэ джя дэ Вифиния, нэ Исусохкоро Фано на домукля лэн. 8 Тай вонэ проджиле Мисия и авиле дэ Троада. 9 Рятяга Павлости сля дыкхлимо: лэсти сикавдапэ мануш Македониятар. Вов ачелас тай мангэлэс Павло: — Ав дэ Македония тай дэ амэнди зор! 10 Пала кодэлэ дыкхлима амэ полиле, со Дэвэл прыакхарэл амэн тэ пхэнэ котэ Бахтало Лав. Тай екхатар лагле дэ Македония. 11 Троадатар амэ лагле пав пане дэ Самофракия тай котарь пэ авр диво лагле дэ Неаполи. 12 Котарь амэ лагле дэ Филиппы. Када сля Римохкири колония и баро форо дэ Македония. Дэ кадэва форо амэ сле набут вряма. 13 Дэ суббота амэ выджиле пала форохкэрэн ударэн лэнятэ. Котэ, сар амэ думисардэ, сля

тхан важ мангима. Амэ бэшле и ачиле тэ дэдүмэ джювлена, савэ котэ стидэнепэ. 14 Машкар лэн сля екх, савя акхарэнас Лидия. Вой тэлэлас Дэвлэсти, сля форостар Фиатира тай битинэлас кучутнэ шукар похтана. Лидия шунда Павло, и Рай оттерда лакоро йло тэ прылэ лэхкэрэ лава. 15 Тунчи, кала вой тай лакэрэ цэрүнэ болдэнепэ, вой акхарда амэн пэстэ. — Сар түмэ динэн, со патяв Раести, тунчи джян и поавэн мандэ цэрэ, — фартэ акхарэлас вой амэн, тай амэ джиле. 16 Екхвар, кала амэ джиле дэ тхан важ мангима, пав дром амэ удыхкле екха бутярня. Дэ латэ бэшэлэс нажужо фано врэжакоро. Вой врысарэлас и кадэлэга затерэлас барэ ловэ пэхкэрэ хулаенди. 17 Бутярни джялас пала Павло тай пала амэн тай типисявэлэс: — Кадэла мануша — копыла Дэвлэ Барэдэрэхкэрэ! Вонэ розпхэнэн түмэнди пала дром фирисаримастэ! 18 Вой терэлас када диво дивэстар. И кала Павлости са откада вурыцыла, вов обрисила тай пхэнда фаности: — Важ Лав Иусо Христохкоро мэ прыпхэнав тути: выджя латар! Дэ кодья ж вряма фано ачявда ла. 19 Кала хулая полиле, со лэндэ хасила затиримо, вонэ схутилдэ Павло тай Сила тай цырэдэне пэ бари гаса форохкэрэ раендэ. 20 Вонэ андэ лэн пхурэдэрэндэ тай пхэндэ: — Кадэла мануша — иудея. Вонэ подваздэн амаро форо. 21 Вонэ влиджен дэ амаро джювимо кода, со амэнди, римсконэ манушэнди, нащи ни тэ прылэ, ни тэ терэ. 22 Гроза манушэн кади ж ачиля тэ вуджилисарэ Павло тай Сила. Тунчи пхурэдэра прыпхэндэ тэ злэ лэндар йда тай тэ марэ лэн дэстэнца. 23 Лэн фартэ помардэ тай чутэ дэ барунэ. А барунэхкэрэ бутярнэсти прыпхэндэ мишто тэ дыкхэ пала лэн. 24 Кала вов шунда кадэва прыпхэнимо, вов затерда лэн дэ андралатуни цэра дэ барунэ и замарда лэнгэрэ пурэ дэ лэпунза. 25 Пашэ епашрят Павло тай Сила мангленэ тай дилена лашарэнас Дэвлэ. И авэр мануша, савэ котэ бэшле, шундэ лэн. 26 Екхатар пхув тинисила баря зорага, кади, со тинисиле и ванты дэ барунэ. Дэ кодья ж вряма всавэрэ удара оттердэлэ, и всавэрэ барунарендэ ланчугурия тэлэдене пурэндар. 27 Кала барунэхкоро бутярно проджюнгавадалэ тай удыххля, со всавэрэ удара дэ барунэ оттердэ, вов думисарда, со всавэрэ барунаря унашле. Колэсти хутилда чюри тай камля тэ зачинэпэ. 28 Нэ Павло затиписила лэсти: — На тер нисо пэсти! Амэ всавэрэ катэ! 29 Бутярно прыпхэнда, соб тэ анэн яг, запрастэня дэ цэр, затинисила даратар тай тэлэдэня англа Павло и Сила. 30 Тунчи вылидджялда лэн барунэстар

тай пхучля: — Рая мурэ! Со манди тэ терэ, соб тэ фирисаравпэ? 31 — Патя дэ Рае Иусо, — пхэндэ вонэ, — и фирисарэгалэ ту тай всаворо тиро цэр. 32 Вонэ розпхэндэ лав Раехкоро лэсти тай всавэрэнди, ко сля лэстэ дэ цэр. 33 Дэ кодья ж рятуни вряма барунэхкоро бутярно халавда лэнгэрэ дукхавдэ тхана, а тунчи болдэняпэ вов и всавэрэ, ко сля лэстэ дэ цэр. 34 Вов анда Павло тай Сила пэстэ цэрэ и тховда важ лэн скаминд. Всавэрэнца, ко сля лэстэ дэ цэр, вов лошавэлэс, со ачиля тэ патя Дэвлэсти. 35 Авиля диво, тай форохкэрэ пхурэдэра бичалдэ пэхкэрэн дэстарен дэ барунэ тай прыпхэндэ лэнди: — Отмукэн пэ воля кадэлэн манушэн! 36 Барунэхкоро бутярно пхэнда Павлости: — Пхурэдэра прыпхэндэ тэ дэ түмэнди воля! Джян бахтага! 37 Нэ Павло пхэнда лэнди: — Амэ — римска мануша, ай вонэ бисындохкоро помардэ амэн англа всавэрэн тай чутэ дэ барунэ. Акана камэн чёраханэ амэн тэ вытрадэ? Нат! Мэк вонэ еджинэ авэна тай вылидженя амэн. 38 Бутярнэ розпхэндэ када форохкэрэ пхурэдэрэнди. Кала кодэла шундэ, со Павло тай Сила — римска мануша, тунчи пэрэдаравадэпэ. 39 Вонэ авиле, помангле лэндар патив, вылиджендэ лэн барунэстар и помангле, соб кодэла ачявдэ форо. 40 Кала Павло тай Сила выджиле барунэстар, вонэ джиле Лидиятэ. Котэ вонэ удыххлепэ пхралэнца тай подрицардэ лэн. Тунчи вонэ джиле.

17 Кала вонэ проджиле Амфиполи тай Аполлония, тунчи авиле дэ Фессалоника, тев сля иудеенгири синагога. 2 Павло, сар лэстэ сля прылыто, джиля дэ синагога и котэ трин субботы дэдүмэлэс иудеенца пала Лила. 3 Вов оттерэлэс тай допхэнэлэс лэнди, со Христости трэбуни сля тэ прылэ грыжа тай тэ отджювдэ мулэндар. — Иусо, пала Савэ мэ түмэнди розпхэнав, исин Христосо, — пхэнэлэс Павло. 4 Лэнди патине койсавэ иудея, бут пативалэн греконэн и бут джювлэн барэ родостар. И всавэрэ вонэ прыачиле Павлостэ тай Силастэ. 5 Авэр иудея холиле пала кода. Вонэ лиле пэга налачен манушэн, савэн арахкле пэ форо, стидэне инте гроза манушэн и ачиле бутэн тэ подваздэ. Тунчи джиле Иасонохкэрэ цэрэстэ, родэнас Павло тай Сила, соб тэ вылидженэ лэн манушэндэ. 6 Ай кала на арахкле лэн котэ, цырэдэне Иасоно тай аврэн пхралэн форохкэрэ пхурэдэрэндэ. — Кадэла мануша терэн бибахталимо пав всавири люмля, тай екхатар авиле амэндэ, — типисиле вонэ. 7 — Тай Иасоно прылиля лэн дэ пэхкоро цэр. Вонэ на

прылэн императорхоро упхэнимо, тай дэдүмэн, со исин авэр тхагари, Савэ ахарэн Иусо. 8 Гроза манушэн и форохкэрэ пхурэдэра ушундэ када тай пэрэдаравдэпэ. 9 Тунчи Иасоно тай авэр потиндэ пала пэ, тай лэн отмукле. 10 Сар кацик авиля рят, пхрала отбичалдэ Павло и Сила дэ Верия. Кала вонэ авиле пордэ, тунчи заджиле дэ иудеенгири синагога. 11 Вериниянуря сле мануша оттердэ 'лэга, а на кади, сар дэ Фессалоника. Вонэ прылиле Павлохкири дума всавэрэ 'лэга и кожно диво розлэнас Лила, соб тэ продыхкэ, чячимо када чи нат. 12 Бут лэндар патине. Патине кади ж греконэнгэрэ пативалэ джювя тай бут греконэн. 13 Нэ кала иудея дэ Фессалоника уджянгле, со Павло пхэнэл Дэвлэхкоро Лав дэ Верия, вонэ авиле пордэ и ачиле тэ подмарэ и тэ подваздэ манушэн. 14 Пхрала сиво отбичалдэ Павло морестэ, а Сила тай Тимофеи ачилепэ дэ форо. 15 Кодэла, савэ отлджалдэ Павло, авиле лэга дэ Афины, а тунчи рисиле павпалэ. Павло прыпхэнда лэнди тэ пэрэдэ, соб Сила тай Тимофеи сигэдэр тэ авэн лэстэ. 16 Кала Павло дожутярэлэс лэн, вов пхирэлэс пав Афины и лэсти сля пхаро тэ дыкхэ, сар бут дэвлорэн исин дэ кадэва форо. 17 Вов пхэнэлэс дэ синагога иудеенца тай кодэлэнца, савэ тэлэнас Дэвлэсти. И кожно диво дэдүмэлэс кодэлэнца, ка'га дыкхэлэспэ пэ форо. 18 Лэга дэдүмане койсавэ ирвалэ мануша — эпикурейцуря тай стоикуря. Екх мануша пхученас: — Со кадэва башлимури камэл тэ пхэнэ? Авэр пхэнэнас: — Амэнди сикавэлпэ, со вов дэдүмэл пала аврэпхуякэрэн дэвлэн, — колэсти со Павло дэдүманя Бахтало Лав пала Иусо тай Отджюндивимо. 19 Павло андэ пэ форохкоро стидэмо, Ареопаго, тай помангле: — Розпхэн амэнди, со када за нэво сикляrimo, пала савэ ту дэдүмэх? 20 Ту пхэнэх пала кода, со на полах. И амэ камах тэ уджянэ, со када исин. 21 Афинянуря ж и мануша авря пхуятар, савэ котэ джювэнас, фартэ камэнас тэ залэпэ кодэлэга, соб тэ дэдүмэ чи тэ шунэ сось нэво. 22 Тунчи Павло вщиля машкар Ареопаго тай пхэнда: — Афинянуря! Мэ дыкхав, со тумэ будэр аврэн манушэндэр тэлэн дэвлэнди. 23 Кала мэ пхиравас и роздыкхавас тумэрэ свэнтыи тхана, мэ дыкхлём, со пэ екх жэртвеннико сля искриисардо: «Наджянглэ Дэвлэсти». Пала Кадэлэ Дэвлэ, Ка тумэ на джянэн, нэ Касти тэлён, мэ тумэнди и розпхэнав. 24 Дэвэл, саво стерда люмля и вса, со дэ латэ исин, Вов исин Рай болыбнасти тай пхуяти. Вов на джювэл дэ храмонэн, савэ тердэ манушэнгэрэ васта. 25 Тай на мангэл, соб мануша

тэ терэн бути Лэсти пэхкэрэ вастэнца, сар бы Лэсти сось на хутилэл. Вов Еджино дэл манушэнди, соб вонэ тэ джювэн и тэ пхурдэн, и вса авэр. 26 Екхэ манушэстар Вов стерда всавэрэ манушэнгэрэ родуря, соб мануша тэ джювэн пав всавири люмля, тай майанглал вытидэня вряма и пхуя лэнгэрэ джювимасти. 27 Вса откада Дэвэл терда, соб мануша тэ родэн Лэ, тэ полэн, тев Вов исин, тай тэ арахэн Лэ, нэ пав чячима Вов исин надур амэндэр. 28 Дэ Лэстэ амэ джювах, пхирах тай исин дэ люмля. Сар пхэнэнас пала кода и койсавэ тумэрэ поэтуря: «Амэ исин Лэхкоро родо». 29 И кала амэ Дэвлэхкоро родо, амэнди нащи тэ думисарэ, со Дэвэл поджило пэ кода, со тердо сомнакастар, рупатар чи барэстар пав манушэхкири годи. 30 Англэ Дэвэл промукэлэс вряма, кала мануша на джянгле пала Лэ, нэ екхатар прыпхэнэл всавэрэ манушэнди пав всавири люмля тэ ачявэ бэзимо. 31 Вов екхатар вытидэня диво, кала сундисарэла люмля пав чячима, тай кади ж вытидэня Манушэ, Саво авэла сундисарэга. Дэвэл допхэнда када англа всавэрэн, кала отджювдярда Лэ мулэндэр. 32 Кала вонэ ушундэ пала отджюндивимо мулэндэр, койсавэ лэндэр ачиле тэ асапэ, ай авэр пхэндэ: — Пала кода амэ пошуна'га тут дэ авэр моло. 33 Кадэлэга Павло и ачявда лэнгоро стидэмо. 34 Нэ набут манушэн прыачиле Павлостэ тай патине. Машкар лэн сле Дионисии, саво вджялас дэ Ареопаго, джювли, савя ахарэнас Дамарь, тай авэр мануша.

18 Тунчи Павло ачявда Афины и лагля дэ Коринфо. 2 Котэ вов дыкхля иудее пав лавэ Акила, саво бэняпэ дэ Понто. Кодэва надумут авиля Италиятар пэхкиря ромня'га, савя ахарэнас Прискилла, колэсти со императоро Клавдии прыпхэнда всавэрэ иудеенди тэ ачявэн Риме. Павло авиля тэ дыкхэлэ лэнца. 3 Вонэ терэнас кодыя ж бути, со и Павло: терэнас катуны. Колэсти Павло ачиляпэ лэндэ тэ терэлас лэнца бути. 4 Кожно суббота вов дэдүмэлэс дэ синагога иудеенца тай греконэнца и камля тэ пэрэцырдэ лэн пэ пэхкири риг. 5 Кала Македониятар авиле Сила тай Тимофеи, тунчи Павло всавири пэхкири вряма отдэня колэсти, соб тэ пхэнэ лав. Тай допхэнэлэс иудеенди, со Иусо исин Христосо. 6 Кала вонэ ачиле тэ пэрэмарэ тай тэ кошэ лэ, вов обмарда прахо пэхкиря 'датар тай пхэнда лэнди: — Тумэ еджинэ дошалэ дэ пэхкэрэ хасявима! Мэ жужо и кана джяв наиудеендэ! 7 Павло выджиля котарь тай джиля дэ цэр, саво ачелас пашэ

синагога. Котэ джювэлэс Титий Иусто, мануш, саво тэлэлэс Дэвлэсти. 8 Пхурэдэр дэ синагога Криспо и всавэрэ лэхкэрэ цэрүнэ патине Раести. Тай бут коринфянуря, савэ шунэнас Павло, патине и сле болдэ. 9 Екхвар рятяга Рай пхэнда Павлости дэ дыкхлима: — На дара! Дэдүмэ тай на пэрэач! 10 Мэ туга, тай нико на терэла тут бибахт. Дэ кадэва форо исин бут Мурэн манушэн. 11 Павло сля котэ бэрш епашэга тай сиклярда лэн Дэвлэхкэрэ Лавэсти. 12 Дэ кодья вряма, кала Галлионо сля проконсуло дэ Ахаяя, иудея стидэнепэ, схутилдэ Павло тай андэ лэ пэ сындэ. 13 Вонэ ачиле тэ дошарэ лэ: — Кадэва мануш сиклярэл тэ полэ Дэвлэ на кади, сар сиклярэл амаро Упхэнимо. 14 Павло инте нисо на пхэнда, кала Галлионо ачиля тэ дэдүмэ кодэлэнди, ко дошарэнас лэ: — Иудея, тэ авэл бы када начячимо чи мижо рындэ, мэ бы шунаvas тумэн. 15 Нэ сар тумэ ханпэ пала сиклярима, лава тай тумаро Упхэнимо, тунчи розлэнпэ еджинэ. Мэ на камав тэ авэ сундисарега дэ кодэлэ. 16 Тай вов вытрадэня лэн сундисарехкэрэ тханэстар. 17 Тунчи всавэрэ схутилдэ пхурэдэрэ дэ синагога, савэ акхарэнас Оссофено, тай помардэ лэ англа сундисарехкоро тхан. Нэ Галлионо пэ када нисо на терда. 18 Павло просля инте бут дивэн дэ Коринфо. Тунчи вов розачиляпэ пхралэнца тай Прискиллага и Акилага лагля пав пане дэ Сирия. Англа колэ, сар лэнди тэ ладэ, Павло обчинда бала дэ Кенхрей, колэсти со калась дэня солах Дэвлэсти. 19 Вонэ авиле дэ Эфесо. Котэ Павло ачявда Прискилла тай Акилла, а еджино джиля дэ синагога тай дэдүмэлэс иудеенца. 20 Вонэ мангле, соб вов тэ ачелпэ лэндэ пэ савись вряма, нэ вов отпхэндалэ. 21 — Мэ рисявава, сар авэла пэ када Дэвлэхкири воля, — пхэнда Павло, кала розачеласпэ лэнца, тай лагля пав пане Эфесостар. 22 Вов лагля дэ Кесария, авиля дэ Ерусалимо, дыкхляпэ котэ кхандиряга тай джиля дэ Антиохия. 23 Павло просля котэ савись вряма, тунчи джиля котарь тай проджялас галатиякири пхув и Фригия, а пав дром подрицарэлэс сиклярнэн. 24 Дэ кодья вряма дэ Эфесо авиля иудеи, савэ акхарэнас Аполлосо. Вов шукар дэдүмэлэс, бэняпэ тай бариля дэ Александрия и мишто джянэлэс Лила. 25 Вов сля сиклярдо Раехкэрэ Дромэсти тай всавэрэ водега розпхэнэлэс пала Исусо чячимага, нэ еджино джянэлэс кацик Иоаннохкоро болдимо. 26 Аполлосо ачиля бидаракоро тэ дэдүмэ дэ синагога, и кала Прискилла тай Акила ушундэ лэ, вонэ акхардэ лэ пэстэ тай сар исин фэдэр розпхэндэ пала Дэвлэхкоро Дром. 27 Аполлосо камля тэ

джя дэ Ахаяя, тай пхрала, соб тэ подрицарэ лэ, искриисардэ лил сиклярнэнди, савэ котэ джювдэ. Дэ лил вонэ мангле тэ прылэ Аполлосо. Кала вов авиля пордэ, тунчи дэня бари зор кодэлэнди, ко пав Дэвлэхкоро мишимо ачиля тэ патя. 28 Аполлосо пхабардэс сикавэлэс иудеенгоро начячимо тай англэ манушэн допхэнэлэс Лилэндар, со Христосо исин Исусо.

19 Дэ кодья вряма, кала Аполлосо сля дэ Коринфо, Павло проджиля пав плаехкэрэ тхана тай авиля дэ Эфесо. Котэ вов дыкхляпэ койсавэ сиклярнэнца. 2 — Прылиле тумэ Свэнто Фано, кала патине? — пхучля вов. — Амэ и на шундэ пала кода, со исин Свэнто Фано, — пхэндэ кодэла. 3 Тунчи Павло пхучля: — Сар жэ тумэ сле болдэ? — Кади, сар сиклярда Иоанно, — пхэндэ вонэ. 4 Павло пхэнда: — Иоанно болдэлэс, кала мануш прыджянэлэс пэхкоро бэзимо. Вов прыакхарэлэс манушэн тэ патя дэ Кодэлэ, Касти трэбуни тэ авэ пала лэ, дэ Исусо. 5 Кала вонэ ушундэ пала када, тунчи болдэнепэ важ Рае Исусохкоро Лав. 6 И кала Павло тховда пэ лэн васта, пэ лэндэ сджиля Свэнто Фано. Тунчи вонэ ачиле тэ дэдүмэ авэр чибэнца и тэ пхэнэ Дэвлэстар. 7 Всавэрэн лэн сля паша дэшуудуй манушэн. 8 Павло трин чёна бидаракоро пхэнэлэс дэ синагога. Вов дэдүмэня манушэнца пала Дэвлэхкоро Тхагаримо тай допхэнэлэс лэнди. 9 Нэ койсавэ лэндар мижонас и отпхэнэнаспэ тэ патя, тай дэдүмэнас англа всавэрэн, со Дром Раехкоро на исин чячюно. Тунчи Павло ачявда лэн. Вов вытидэня сиклярнэн и кожно диво дэдүмэня лэнца дэ Тираннохири школа. 10 Кади процырэдэняпэ дуй бэрша, и всавэрэ иудея тай грекуря, савэ джювдэ дэ Цыкни Азия, шундэ Раехкоро Лав. 11 Дэвэл терэлэс Павлохкэрэ вастэнца фартэ барэ дывурия. 12 Насвалэ лэнаспэ кхоснэндэ тай кущикэндэ, савэн майанглал лэлэспэ Павло, тай высастёнас всавэрэ дукхэндар, тай мижэ фанурия выджянас лэндар. 13 Койсавэ иудеенгэрэ джянимаря, савэ пхирэнас пав дромэн, кала вытрадэнас мижо фано манушэндар, прыакхарэнас Лав Рае Исусохкоро. Вонэ пхэнэнас: — Прыпхэнав тумэнди важ Исусо, пала Савэ розпхэнэл Павло. 14 Када терэнас и эфта Skeвахкэрэ чявэ. А Skeва сля иудеенгоро англунэ рашай. 15 Нэ мижо фано пхэнда лэнди: — Джянав Исусо, тай Павло джянав. А ко тумэ кацавэ? 16 Тай мануш, дэ саво сля мижо фано, чутапэ пэ лэн кацава зорага, со домарда лэн всавэрэн и вонэ вынашле цэрэстар нангэ тай зранглэ. 17

Кала пала када уджянгле иудея тай грекуря, савэ джювдэ дэ Эфесо, лэн всавэрэн обхутилда дар, тай вонэ ачиле тэ отлиджяпэ Рае Исусохкэрэ Лавэстэ баря пативага. 18 Бут савэ лэндар патине, авэнас тай оттердо прыдьянэнаспэ дэ пэхкэрэн рындонэн. 19 Бут мануша, савэ майанглал залэнас врэжага, анэнас пэхкэрэ джянимахкэрэ лила и англал всавэрэн спхабарэнас лэн. Кала биндэ, сави цимин сля всавэрэ спхабардэ лилэндэ, тунчи выджия пандэша пхангя रुपь. 20 Кади Дэвлэхкоро лав роздьяласпэ тай лэлас зор. 21 Пала кадэлэ всавэрэ Павло прылилия дэ гындо тэ задья пав Македония тай Ахаия, ай тунчи тэ ладэ дэ Ерусалимо. — Сар мэ авава дэ Ерусалимо, манди трэбуни тэ попэрав и дэ Римо, — пхэнда вов. 22 Вов бичалда дэ Македония дон пэхкэрэн амалэн, Тимофее тай Эрасто, а еджино пэ койсави вряма ачиляпэ дэ Цыкни Азия. 23 Тунчи сля баро ваздимо важ Раехкэрэ Дромэ. 24 Мануш, савэ акхарэнас Димитрии и саво залэласпэ рупунэ рындонэнца, терэлас рупастар храмуря, кацавэ, сар храмо, тев тэлэнас дэвляти пав лавэ Артемида. И кадэлэга вов дэлэс тэ затерэ и авэр пэхкэрэ амалэнди. 25 Вов акхарда лэн и аврэн кацавэн бутярнэн дэ кадэва рындо тай пхэнда: — Тумэ джянэн, со кадыя бути дэл амэнди лачэ затиримо. 26 Нэ тумэ дыкхэн и шунэн, со кадэва Павло пэрэцэрдэня пэ пэхкири риг тай слидждялда годятар бүтэн манушэн, савэ джювэн на какиц дэ Эфесо, нэ пав всавири Цыкни Азия. Вов пхэнэл, со дэвэла, савэ стердэ вастэнца, — на дэвэла. 27 Када лиджял колэстэ, со на какиц амари бути на авэла дэ патива, нэ и храмо, тев тэлэн баря дэвляти Артемидати, нисо на ачела. Тай еджины дэвли, савяти тэлэн всавири Цыкни Азия и всавири люмля, хацарэла пэхкири патив. 28 Кала вонэ ушундэ када, тунчи мижыле тай ачиле тэ типисьявэ: — Бари исин Артемида Эфесохири! 29 Тунчи всаворо форо подваздэняпэ. Мануша схутилдэ кодэлэн, ко авиля Павлога (када сле македонянуря Гайи тай Аристархо), и всавэрэ, сар екх, прастэне дэ театро. 30 Павло камля тэ выдья манушэндэ, нэ сиклярнэ на дэне лэсти. 31 И койсавэ Азиякэрэ пхурэдэра, амала Павлохкэрэ, пэрэдэне лэсти, соб тэ на авэл дэ театро. 32 Мануша, савэ стидэнепэ, выдьянас годятар, колэсти со екх лэндар типисьявэнас пала екхэ, ай авэр — пала аврэ. Бут манушэн на полэнас, и сости вонэ пордэ авиле. 33 Лэнгэрэ стидэмастар выцырдэне пэ англал Александро — када тердэ иудеи. Александро сикавда манушэнди вастэга, соб вонэ тэ заачен мулком, и камля тэ

отрисарэ пэстар лэнгэрэ лава. 34 Нэ кала всавэрэ уджянгле, со вов исин иудеи, упалэ ачиле фартэ тэ типисьявэ: — Бари исин Артемида Эфесохири! И типисьявэнас паша дуй чясуря. 35 Тунчи екх форохкэрэ пхурэдэрэндар ачиля тэ улэ лэн тай пхэнда: — Эфесянуря, чи на джянэл всавири люмля, со дэ форо Эфесо прыдыкхэн пала храмо, тев тэлэн баря Артемидати тай свэнтонэ барэсти, саво тэлэдэня болыбнастар? 36 Калэсти нико на запхэнэла. Важ кода тумэнди трэбуни тэ улэлэ тай тэ на терэ бибахт. 37 Тумэ андэ кордэ манушэн, нэ ни екх лэндар на обчёрда храмо тай на пхэнда бибахтало лав пэ амаря дэвля. 38 А сар исин Димитриестэ и аврэ бутярнэндэ пав кадэва рындо, дэ со лэн тэ дошарэ, тунчи амэндэ исин сындурия тай проконсулы. Котэ пхэнэн, со исин тумэндэ екх пэ екхэ. 39 Кала исин тумэндэ, со тэ пхуче, мэк роздыкхэн када дэ упхэнимахкоро стидэмо. 40 Тэ на дошарэн амэн авдивэ, со терах ваздимо, и амэнди на авэла, со тэ пхэнах. 41 Кадэла лавэнца вов розмукля лэнгоро стидэмо.

20 Кала ваздимо пэрэачиля, Павло акхарда сиклярнэн, подрицарда лэн, тунчи розачиляпэ лэнца тай джия дэ Македония. 2 Кала Павло проджялас авэр пхуя, вов бүтэ лавэнца подрицарэлэс патякунэн. Тунчи вов авиля дэ Греция 3 тай просля котэ трин чёна. Кала вов стидэняпэ тэ ладэ пав пане дэ Сирия, иудея камле тэ умарэ лэ. Нэ вов уджянгле пала када тай прылилия дэ гындо тэ рисьявэ пав Македония. 4 Лэга сле Сопатро, Пиррохкоро чяво, Вериятар, фессалоникийцуря Аристархо тай Секундо, Гайи Дервиятар тай Тимофеи, Тихико тай Трофимо Цыкня Азиятар. 5 Вонэ джиле англал и дожутярэнас амэн дэ Трояда. 6 Кала проджия сырботори, саво акхарэлпэ Биквасно мандро, амэ сле дэ Филиппы. Тунчи лагле котарь пав пане. Проджия панч дивэ тай амэ дыкхлепэ лэнца дэ Трояда. Котэ амэ просле эфта дивэ. 7 Дэ перво куркэхкоро диво амэ стидэнепэ ітханэ, соб тэ пхагэ мандро. Павло дэдумэлэс лэнца. И кади сар вов камля пэ авэр диво тэ джя дэ дром, лэхкири дума зацырдэняпэ ды епашрят. 8 Дэ упралуни цэра, тев амэ стидэнепэ, пхабонас бут лампы. 9 Пэ фэлястра бэшла тэрно мануш пав лавэ Евтихо. Нэ сар Павло бут вряма дэдумэлэс, Евтихо засута тай тэлэдэня пэ пхув барэ вучимастар. Кала лэ подлиле, вов сля муло. 10 Павло змукляпэ тэлэ, пэля упрал пэ тэрнэ манушэ и обилия лэ. — На пэрэджювэн! — пхэнда Павло. — Вов джювдо! 11

Тунчи подваздэняпэ упрал, пхаглы мандро и ачиля тэ ха. Вов дэдүмэлэс ды дэнзор, ай тунчи джиля дэ дром. 12 Тэрнэ ж манушэ отлиджялдэ цэрэ джювдэ'а, и всавэрэ фартэ лошавэнас кадэлэсти. 13 Амэ бэшле пэ корабли тай лагле дэ Ассо, камле котарь тэ залэ Павло. Вов еджино кади прыпхэнда, колэсти со камля тэ джя пэза. 14 Дэ Ассо вов дыкхляпэ амэнца, амэ лиле лэ пэ корабли тай джиле дэ Митилина. 15 Кала амэ оджиле котарь, тунчи пэ авэр диво авиле дэ Хиосо. Проджиля инте екх диво тай авиле дэ Самосо, инте екхэ дивэсти — дэ Милето. 16 Павло прылиля дэ гындо тэ обджя Эфесо, соб тэ на пролидджя бут вряма дэ Цыкни Азия, колэсти со камля сизгэдэр тэ авэ дэ Ерусалимо пэ Пандэшахкоро диво. 17 Милетостар Павло бичалда дэ Эфесо. Вов манглы пхурэдэрэн кхандирятар тэ авэн лэстэ. 18 Кала вонэ авиле, вов пхэнда лэнди: — Тумэ джянэн, сар мэ джювдом катэ тумэндэ всавири вряма англунэ дивэстар, кала авилём дэ Азия. 19 Мэ на слём пхутярдо и ясвэнца теравас бути Раести и на дыкхавас ни пэ всавири грыжа, сави родэнас важ ман иудея. 20 Мэ на умукавас нисо кодэлэстар, со б тэ авэл мишто важ тумэн, пхэнавас Лав тай сикляравас тумэн пэ гаса англа всавэрэн и пав цэрэн. 21 Мэ допхэнавас иудеенди тай греконэнди, со лэнди трэбуни тэ прыдджянэ пэхкоро бэзимо англа Дэвлэ и тэ патя дэ амарэ Рае Исусо. 22 Екхатар лиджял ман Фано, тэ джяв дэ Ерусалимо, нэ на джянав, со котэ манца авэла. 23 Джянав кацик, со дэ кожно форо Свэнто Фано допхэнэл манди, со дожутярэн котэ баруно тай бари грыжа. 24 Нэ мэ на тховав цимин пэхкэрэ джювимасти, кацик манди тэ проджя муро дром тай тэ стерэ бути, сави дэня Рай Исусо, тэ розпхэнэ Бахтало Лав пала мищимо Дэвлэхкоро. 25 И екхатар мэ джянав, со всавэрэ тумэ, ка'а мэ дыкхаваспэ тай розпхэнавас пала Тхагаримо, никала будэр ман на удыххэна. 26 Колэсти пхэнав тумэнди авдивэ: кала кось тумэндэр мэ на авава вуджило дэ кодэлэ, 27 колэсти со мэ на гаравдом ни екх лав пала всавири Дэвлэхкири воля. 28 Дыххэн пала пэстэ и пала всавири кхандири, дэ савя Свэнто Фано тховда тумэн тэ чяравэн отара Дэвлэхкири, сави Вов тинда Пэсти Пэххэрэ ратэ'а тай тэ дыкхэн пала ла. 29 Мэ джянав, со кала уджява, тумэндэ авэна мижэ рува, савэнди на дор отара. 30 И машкар тумэн авэна мануша, савэ чячимо пэрэболдэна дэ хохавимо, соб тэ улиджя сиклярнэн пала пэ. 31 Колэсти на совэн! Репирэн, со мэ трин бэрша ясвэнца, диво тай рят на пэрэачявас тэ дэ годи кожнөнэсти тумэндэр.

32 Екхатар мэ отдав тумэн Дэвлэсти тай Лэхкэрэ мицимахкэрэ Лавэсти. И Дэвлэ барярэла тумаро патявимо сиклярэла тумэн и дэла тумэнди котор машкар всавэрэн Лэххэрэн свэнтонэн манушэн. 33 Мэ никастар на камлём тэ лэ ни рупь, ни совнак, ни їда. 34 Тумэ еджинэ джянэн, со мэ пэхкэрэ вастэнца затеравас пэ котор мандро и пэсти и кодэлэнди, ко манца сля. 35 Дэ всавэрэ мэ сикававас, со кади и тумэнди трэбуни тэ терэ бути и тэ дэ зор бизорахкэрэ манушэнди тай тэ рапирэ Раехкоро Исусохкоро Лав: «Бахтало мануш, саво прылэл, нэ бахталэдэр кодэва мануш, саво дэл». 36 Кала Павло пхэнда када, вов тэлиля всавэрэнца пэ чянга тай поманглияпэ. 37 Всавэрэ ровэнас, облэнас Павло тай чюминдэнас лэ. 38 Лэнди сля бибахт лэхкэрэ лавэндэр, со на дыкхэна лэ будэр. Тунчи вонэ пролидджялдэ Павло пэ корабли.

21 Кала амэ розачилепэ лэнца, тунчи выджиле дэ море. И лагле ворта пэ острова Косо. Пэ авэр диво амэ авиле дэ Родосо тай котарь лагле дэ Потара. 2 Котэ амэ аракхле корабли, саво ладэлэс дэ Финикия, бэшле пэ лэстэ и лагле дурэдэр. 3 Амэ облагле Кипро, ачявдэ лэ зэрвонэ ригатар тай лагле дэ Сирия. Амэ прыачиле берегостэ дэ Тиро, колэсти со котэ амарэ кораблести трэбуни сля тэ ачявэ савэсь бужэ. 4 Дэ Тиро амэ аракхле сиклярнэн и просле котэ эфта дивэ. Вонэ дэдүмане Павлости Фаностар, соб вов тэ на джял дэ Ерусалимо. 5 Нэ кала авиля вряма, амэ лагле дурэдэр. Всавэрэ сиклярнэ, лэнгэрэ ромня тай чяворэ вылидджялдэ амэн форостар. Тай пэ берега амэ чутэ чянга и мангленэ. 6 Тунчи амэ розджилепэ лэнца тай бэшле пэ корабли, а вонэ рисиле цэрэ. 7 Амэ дурэдэр лагле пав пане тай Тиростар авиле дэ Птолемаида. Котэ амэ наисардэпэ пхралэнца и просле лэнца екх диво. 8 Пэ авэр диво амэ упалэ лагле дэ дром, авиле дэ Кесария тай заджиле дэ цэр Филиппостэ. Вов пхэнэлэс Бахтало Лав и сля екхэ'а эфта манушэндэр. 9 Лэстэ сля шар чэя. Вонэ сле напаларом тай сле англунарьки. 10 Амэ просле котэ бут дивэ. Тунчи Иудеятар авиля англунари пав лавэ Агаво. 11 Вов поджиля амэндэ, лиля Павлохкоро кущик, пханглы пэсти васта и пурэ, тай пхэнда: — Свэнто Фано пхэнэл: «Кади иудея дэ Ерусалимо спхандэна и одэна дэ вастэн наиудеенди кодэлэ, кэхкоро исин кадэва кущик». 12 Кала амэ ушундэ када, тунчи и амэ, и катутнэ мануша ачиле тэ мангэ Павло тэ на джял дэ Ерусалимо. 13 Нэ Павло пхэнда пэ кода: — Пэ со

тумэ ровэн и розчинэн муро їло? Мэ лошало на кацик тэ авав спхангло, нэ и тэ мэрав дэ Ерусалимо пала Лав Рае Иусохкоро. 14 Кала амэ полиле, со нисо лэсти на допхэнага, заачиле мулком тай пхэндэ: — Мэк стерэлапэ воля Раехкири. 15 Тунчи амэ стидэнепэ тай лагле дэ Ерусалимо. 16 Амэнца джиле койсавэ сиклярнэ Кесариятар. Вонэ андэ амэн дэ цэр, тев джовда кипреянино Мнасоно, саво думут сля сиклярнэга. Лэстэ амэ и ачилепэ. 17 Кала амэ авиле дэ Ерусалимо, пхрала прылиле амэн лошага. 18 Пэ авэр диво Павло їтахэн амэнца джиля Иаковостэ. Котэ сле всавэрэ пхурэдэра. 19 Павло наисардапэ лэнца и розпхэндэ вса пала кода, со терда Дэвэл машкар наиудеен лэхкэрэ вастэнца. 20 Вонэ шундэ лэ тай лашардэ Дэвлэ. Тунчи пхэндэ Павлости: — Пхрал, ту дыкхэх скацик пхангя иудеен патине? Тай всавэрэ вонэ фартэ прыицарэнпэ Упхэнимастэ. 21 И пала тут вонэ шундэ, со ту сиклярэх иудеен, савэ машкар наиудеендэ джовэн, тэ отджян Моисеяхкэрэ Упхэнимастар. И со ту пхэнэх, тэ на обчинэн вонэ пэхкэрэн чяворэн тай тэ на джовэн кади, сар амэндэ прылило. 22 Со ж тэ терэ? Вонэ шунэна пала кода, со ту авилян. 23 Колэсти тер кода, со амэ пхэнага. Машкар амэн исин штар мануша, савэ дэне солах. 24 Лэ кадэлэн, жужарпэ лэнца и потин пала кода, соб лэнди тэ обчинэн бала пэ шэро. Тунчи всавэрэ полэна, со пала тут пхэнэн начячимо и со ту джовэх пав Упхэнима. 25 А наиудеенди, савэ патине, амэ искриисардэ кади: лэнди нащи тэ ха кода, со андэ дэ жертва дэвлорэндэ, тай мас затасавдэ хулаимастар, тэ пэ рат и тэ терэ биладжявимо їрестар. 26 Пэ авэр диво Павло лиля пэга кадэлэн манушэн, соб тэ жужарпэ лэнца. Тунчи вов заджиля дэ храмо тай пхэндэ, дэ сави вряма вонэ пэрэачена тэ жужарпэ, и кала пала кожнонэ лэндар анэна жертва. 27 Кала проджянас эфта дивэ, койсавэ иудея Цыкня Азиятар удыкхле Павло дэ храмо, подваздэне гроза манушэн тай схутилдэ лэ. 28 Тай типисывэнас: — Израильтянуря! Дэн амэнди зор! Кадэва мануш пав всавири люмля сиклярэл всавэрэн, соб вонэ тэ на прылэн амаро народо, амаро Упхэнимо и амаро храмо. Екхатар вов анда дэ храмо греконэн, сога маїрисарда кадэва свэнто тхан. 29 Ды колэ вонэ дыкхле дэ форо Павло тай ефесянино Трофимо и думисардэ, со Павло анда лэ дэ храмо. 30 Тунчи всаворо форо подваздэняпэ и спрастэнепэ мануша. Павло схутилдэ тай выцырдэне храмостар, и храмохкэрэ вудара екхатар затердэ. 31 Вонэ камле тэ умарэ Павло, нэ дума пала кода, со всаворо

Ерусалимо подваздэняпэ, доджиля пхангякэрэ пхурэдэрэстэ дэ римско халавдэнгоро стидэмо. 32 Вов лиля халавдэн тай шэлякэрэ пхурэдэрэн и чутапэ манушэндэ. Кала иудея дыкхле пхангякэрэ пхурэдэрэ и халавдэн, вонэ пэрэачиле тэ марэ Павло. 33 Пхурэдэр поджиля, прыпхэндэ тэ схутилэ Павло тай тэ спхандэ лэ донца ланчугонэнца. Вов пхучля манушэндэ, ко исин кадэва мануш и со вов терда. 34 Нэ мануша типисывэнас кожно пэхкоро, и пхурэдэр нисо на полэлас. Важ кода прыпхэндэ тэ отлиджда Павло дэ халавдэнгоро цэр. 35 Кала вонэ подлэнаспэ пав лестница, мануша ачиле тэ стасавэ лэн кади, со халавдэ лиджялдэ Павло пэ вастэн. 36 Гроза манушэн джялас пала лэн тай типисывэлас: — Мэк вов мэрил! 37 Паша халавдэнгоро цэр Павло пхэндэ пхангякэрэ пхурэдэрэсти: — Ту дэга манди тэ пхэнэ тути лав? — Ту джянэх греческо чиб? — пхучля пхурэдэр. 38 Выджял — ту на кодэва египтянино, саво надумут подваздэня манушэн тай улиджялда пала пэ дэ шуки пхув штар пхангя прахарен? 39 Павло пхэндэ: — Мэ иудеи Тарсостар, саво дэ Киликия, мануш барэ форостар. Мангав тут, дэ манди тэ дэдумэ манушэндэ. 40 Пхурэдэр домукля кода. Тунчи Павло вщиля пэ лестница и сикавда вастэга, соб вонэ тэ ачен мулком. Кала вонэ пэрэачиле тэ типисывэ, Павло дэдуманя пав еврейско чиб.

22 — Пхралалэ тай дада! Дэн манди тэ пхэнэ, со мэ надошало. 2 Кала вонэ ушундэ, со вов дэдумэл пав еврейско чиб, тунчи заачиле мулком. Тай вов пхэндэ: 3 — Мэ иудеи, саво бэняпэ дэ Тарсо дэ Киликия, выбарярдэ дэ кадэва форо паша пурэн Гамалиилостэ и сиклярдо пав чячима Упхэнимасты амарэ дэдэнгоро. Мэ отдэнём еджино пэ Дэвлэхкэрэ рындости, сар и кожно тумэндар авдивэ. 4 Мэ традавас ды мэрима кодэлэн, ко джянас Иусохкэрэ Дромэга, пхандавас мушэн тай джювлен и чувавас лэн дэ барунэ. 5 Допхэнимаря кадэлэсти — ангуно рашай тай всавэрэ пхурэдэра. Мэ лилём лэндар лила пхралэндэ дэ Дамаско тай лаглём пордэ, соб тэ пхандэ кодэлэн, ко котэ сля, тай тэ анэ лэн дэ Ерусалимо и тэ мулярэ. 6 Пав дром, кала мэ слём пашэ Дамаско, дэ елашдиво, болыбнастар паша ман запхабиляпэ душлимо, пэ саво нащи сля тэ дыкхэ. 7 Мэ тэлэдэнём пэ пхув тай ушундом їласо, саво дэдумэлас манди: «Савло, Савло! Сости ту традэх Ман?» 8 Мэ пхучлём: «Ко Ту, Рае?» Вов пхэндэ: «Мэ Иусо Назаретостар, Савэ ту традэх». 9 Кодэла, ко сле манца, дыкхле

душлимо, нэ ҕласо, саво манца дэдуманя, вонэ на шундэ. 10 Мэ пхучлём: «Рае, со манди тэ терэ?» Рай пхэнда: «Вци тай джя дэ Дамаско. Котэ тути пхэнэна вса, со тути трэбуни тэ терэ». 11 Кодэла, ко сле манца, пала васт андэ ман дэ Дамаско, колэсти со мэ корылём душлимахкэрэ пхабаримастар. 12 Котэ мандэ авиля мануш пав лавэ Анания, саво джювда пав Упхэнима и сля дэ патива всавэрэ катутнэ иудеендэ. 13 Вов поджиля мандэ, ачиля пашэ тай пхэнда: «Пхрал Савло! Мэк оттерэнпэ тирэ яха!» Дэ кодья вряма мэ ачилём тэ дыкхэ и удыхклём кадэлэ манушэ. 14 Вов пхэнда: «Дэвэл амарэ дадэнгоро вытидэня тут, соб ту тэ уджянэх Лэхкири воля, тэ удыхкэх Чячюнэ и тэ шунэх лава Лэхкэрэ уштэндэр. 15 Ту авэҕа важ всавэрэн манушэн допхэнимари пала кода, со дыкхлян и шундан. 16 Со ту цырэдэх вряма? Вци, прыакхар Лэхкоро Лав, болдэпэ и схалав пэхкоро бэзимо». 17 Тунчи мэ рисилём дэ Ерусалимо. И кала мэ манглёмпэ дэ храмо, манди сля дыкхлимо. 18 Мэ удыхклём Рае, Саво пхэнда манди: «Сиго выджя Ерусалимостар, колэсти со катэ на прылэна тиро допхэнимо пала Ман». 19 Мэ пхэндом: «Рае! Кадэла мануша джянэн, со мэ чувавас дэ барунэ и мараваас дэ синагоги кодэлэн, ко патян дэ Тут. 20 Кала чуолиля рат Стефаностар, саво сля Тиро допхэнимари, мэ ачявас котэ и подавас ҕласо пала кодэлэн, ко умарэнас лэ, и дыкхлём пала лэнгири їда». 21 Тунчи Рай пхэнда манди: «Джя! Мэ бичалав тут народонэндэ, савэ джювэн дурал». 22 Ды кадэлэн лавэн мануша шунэнас Павло, нэ катэ ачиле тэ типисьявэ: — Мэк вов мэрэл! Лэсти нащи тэ джювэ! 23 Вонэ типисиле тай розчинэнас пэхкири їда и чувэнас прахо пхуякоро упрал. 24 Тунчи пхангьякоро пхурэдэр прыпхэнда тэ улиджя Павло дэ халавдэнгоро цэр. Вов прыпхэнда тэ марэ лэ чукненца тай тэ допхуче, соб тэ уджянэ, сости мануша кади мижон пэ лэстэ. 25 Нэ кала Павло прыпхангле, соб тэ марэ, вов пхэнда шэлякэрэ пхурэдэрэсти, саво ачелас пашэ: — Чи мишто авэла тэ марэ римсконэ манушэ, ай тэ на пролиджя пав лэ сындо? 26 Кала шэлякоро пхурэдэр шунда када, вов джиля тай пхэнда пхангьякэрэ пхурэдэрэсти: — Со ту терэх? Када римско мануш! 27 Пхангьякоро пхурэдэр выджиля Павлостэ тай пхучля: — Ту римско мануш? — Нэ, — пхэнда кодэва. 28 Тунчи пхурэдэр пхэнда: — Мэ потиндом бут ловэ пала кода, соб тэ аче римсконэ манушэҕа. — Ай мэ бэнимастар римско мануш, — пхэнда Павло. 29 Кодэла, савэ камле тэ допхуче лэ, екхатар отджиле лэстар.

Кала пхурэдэр уджянгле, со пхангле ланчукоҕа римсконэ манушэ, вов фартэ пэрэдаравдапэ. 30 Пэ авэр диво пхурэдэр закамля тэ уджянэ ды лавэ, дэ со иудея дошарэн Павло. Тунчи розпхангле лэ и прыпхэнда, соб тэ стидэнпэ англунэ рашая и всаворо Синедрионо. Тунчи анда Павло и тховда англа лэн.

23 Павло вхаляпэ якхэнца пэ кодэлэн, ко сля дэ Синедрионо, тай пхэнда: — Пхралалэ! Ды авдивутно диво мэ всавэрэ їлэҕа теравас бути Дэвлэсти. 2 Катэ англуно рашай Анания прыпхэнда кодэлэнди, ко ачелас пашэ, тэ марэ Павло пав уштэн. 3 Тунчи Павло пхэнда: — Дэвэл тут марэла, мануш домуюнгоро! Ту бэшэх катэ, соб тэ сундисарэ ман пав Упхэнима. А еджино пэрэхукэх Упхэнимо, кала прыпхэнэх ман тэ марэ! 4 Кодэла, савэ аченас паша Павло, пхэнда лэсти: — Сости ту кошэх англунэ рашае? 5 Павло пхэнда: — Пхралалэ, мэ на джянаvas, со вов англуно рашай. Колэсти со искриисардо: «На дэдумэ бибакт пала пхурэдэрэ тирэ народостар». 6 Павло джянгле, со дэ Синедрионо екх лэндэр сле саддукея, ай авэр — фарисея. Колэсти вов зоралэ ҕласоҕа пхэнда: — Пхралалэ, мэ фарисеи, чяво фарисеяхкоро. Ман сундисарэн пала кода, со мандэ исин надия пэ отджюндивимо мулэндэр. 7 Кала вов када пхэнда, машкар фарисея тай саддукея ваздэняпэ баро гвалто, тай всавэрэ розджилепэ дэ дума. 8 Саддукея пхэнэн, со нэнай ни отджюндивимо, ни ангелонэн, ни фано, нэ фарисея патян, со када вса исин. 9 Ваздэняпэ баро типимо, койсавэ сиклималя пав Упхэнима фарисеендар вщиле тай пхэнда: — Амэ на аракхах дэ кадэлэ манушэ нисави дош. Со, кала лэсти дэдумэлас фано чи ангело? 10 Гвалто фартэ розпхабияпэ, и пхангьякоро пхурэдэр пэрэдаравдапэ, со Павло розчинэна поепаш. Вов прыпхэнда халавдэнди тэ залэ лэ котарь зораҕа тай тэ отлиджя дэ халавдэнгоро цэр. 11 Пэ авэр рят англа Павло ачиля Рай тай пхэнда: — На дара! Сар ту допхэнэҕас пала Ман дэ Ерусалимо, кади авэҕа тэ допхэнэ дэ Римо. 12 Дэнзор койсавэ иудея стидэнпэ тай лиле солах нисо тэ на хан и тэ на пэн ды колэ, сар умарэна Павло. 13 Кади здэдуманепэ пашэ саранда манушэн. 14 Вонэ джиле англунэ рашаендэ тай пхурэдэрэндэ и пхэнда: — Амэ солахане нисо тэ на ха и тэ на пэ ды колэ, сар умараҕа Павло. 15 Кана тумэ тай Синедрионо помангэн пхангьякэрэ пхурэдэрэ тэ анэ лэ тумэндэ, соб пашэ тэ роздыкхэ кадэва рындо. Ай амэ стидаҕапэ тай умараҕа лэ инте ды колэ, сар

вов доджяла кадэлэ тханэстэ. 16 Пала лэнгири дума уджянгля Павлохкиря пхэнжакоро чяво. Вов джия дэ халавдэнгоро цэр тай розпхэнда када Павлости. 17 Тунчи Павло акхарда екхэ шэлякэрэ пхурэдэрэндар и пхэнда лэсти: — Отлиджян кадэлэ чявэ пханглярэ пхурэдэрэстэ, лэстэ исин койсо тэ пхэнэ. 18 Шэлякоро пхурэдэр отлиджялда чявэ пханглярэ пхурэдэрэстэ тай пхэнда: — Павло, савэ амэ схутилдэ, акхарда ман тай помангя тэ анэ тутэ кадэлэ чявэ. Лэстэ исин койсо тутэ пхэнэ. 19 Пханглярэ пхурэдэр лиля чявэ пала вастэ, отлиджялда дэ рига тай пхучя: — Со ту камэх манди тэ розпхэнэ? 20 Чяво пхэнда: — Иудея прылиле дэ гындо тэ мангэ тут, соб ту тэ анэх атася Павло дэ Синедрионо. Вонэ пхэнэн, со камэн будэр тэ уджянэ пала лэхкоро рындо. 21 Нэ ту на патя кадэлэсти, колэсти со пэ дром чёрыл дожутярэн лэ саранда манушэн. Вонэ солахане тэ на ха тай тэ на пэ ды колэ, сар умарэна Павло. Важ када лэндэ вса исин. Вонэ дожутярэн кацик лав тутар. 22 Пханглярэ пхурэдэр отмуля чявэ тай прыпхэнда лэсти: — Никасти на розпхэн пала кода, со ту пхэндан манди. 23 Тунчи пханглярэ пхурэдэр акхарда дон шэлякэрэн пхурэдэрэн и прыпхэнда лэнди: — Стидэн дуй шэла халавдэн, эфтадэша анклистарен тай дуй шэла аврэн халавдэн, соб вонэ тэ джян дэ Кесария, сар авэла еня чясо рятяга. 24 Дэн Павлости гратэ тай дыкхэн, соб лэга тэ на авэл бибахт. И отлиджян лэ барэдэрэстэ Феликостэ. 25 Тунчи вов искриисарда кацаво лил: 26 «Клавдии Лисии Пативалэ барэдэрэсти Феликостэ: Тэ авэх бахтало! 27 Кадэлэ манушэ схутилдэ иудея тай камле тэ умарэ. Нэ мэ поджилём халавдэнца и выхутилом лэ лэнгэрэ вастэндар, сар уджянглём, со вов римско мануш. 28 Мэ закамлём тэ уджянэ, дэ со вонэ дошарэн лэ, тай андом лэ дэ лэнгоро Синедрионо. 29 Мэ полилём, со вонэ дошарэн лэ важ лэнгоро Упхэнимо. И со лэ ни пала со тэ мулярэ чи тэ чувэ дэ барунэ. 30 Мэ уджянглём, со лэ камэн чёрыл тэ умарэ, и екхатар отбичалдом лэ тутэ. И прыпхэндом, соб лэ тэ дошарэн англа тут». 31 Халавдэ тердэ, сар вов прыпхэнда, лиле Павло тай лиджялдэ рятяга дэ Антипатрисо. 32 Пэ авэр диво анклистаря лагле Павлога дурэдэр, ай кодэла, ко джянас пэза, рисиле дэ Ерусалимо. 33 Кала анклистаря авиле дэ Кесария, вонэ отдэне барэдэрэсти лил тай пэрэдэне лэсти Павло. 34 Барэдэр продинда лил тай пхучя Павло, савя вов пхуятар. Кала вов уджянгля, со Павло Киликиятар, 35 тунчи пхэнда: — Мэ вышунава тут, кала авэна

кодэла, ко дошарэнас тут, — тай прыпхэнда, соб халавдэ тэ араххэн тхан Павлости дэ райкано цэр, саво терда тхагари Иродо, тай тэ рицарэн лэ котэ.

24 Проджиля панч дивэ, и англуно рашай Анания койсавэ пхурэдэрэнца тай манушэга пав лавэ Тертулло, саво розлэлэспэ дэ римско упхэнима, авиля дэ Кесария, соб тэ дошарэ Павло англа барэдэрэ. 2 Кала Павло андэ, Тертулло ачиля тэ дошарэ лэ. 3 — Пативало Феликсо! Наис тути пала пачя, сави ту дэх амэнди и пала кода, со тердан важ амарэн манушэн пэхкиря баря годяга. 4 Соб бут тэ на зарицарах тут, мэ мангав тэ дэх амэнди набут вряма и тэ вышунэх амэн пав тирэ мищима. 5 Амэ бинах кадэлэ мануш бидага дэ амари пачя. Вов подваздэл иудеен пав всавири люмля тай исин пхурэдэр дэ назариенгоро стидэмо. 6 Вов камля тэ магрисарэ храмо, нэ амэ схутилдэ лэ. 8 Кала ту допхучега лэ, ту еджино уджянэга пала вса, дэ со амэ лэ дошарах. 9 Иудея ж подрицардэ лэ тай пхэндэ, со лэхкэрэ лава исин чячимо. 10 Барэдэр сикавда Павлости, соб вов тэ пхэнэл. И Павло пхэнда: — Мэ джянав, со ту бут бэрша сундисарэх амаро народо. Колэсти лошало тэ пхэнэ лав англа тут, соб тэ сикавэ пэхкоро чячимо. 11 Тути напхаро авэла тэ уджянэ, со пашэ дэшудуй дивэ павпалэ мэ авилём тэ тэлэ дэ Ерусалимо. 12 Кодэла, савэ дошарэн ман, на дыкхле, соб мэ хаваспэ кагаьс дэ храмо чи подваздавас манушэн дэ синагоги чи дэ форо. 13 Лэндэ на выджяла тэ допхэнэ кода, пала со вонэ дошарэн ман. 14 Мэ прыдджянав, со джяв чячюнэ Дромэга, саво вонэ акхарэн хохавимага. Мэ тэлюав Дэвлэсти амарэ дадэнгоро и патяв всавэрэсти, со искриисардо дэ Упхэнима тай дэ Англунарен. 15 Мандэ кади ж исин надия пэ Дэвлэ, сар и кадэлэ манушэндэ. Надия пэ кода, со отджювдэна мулэндар сар патякунэ, кади ж напатякунэ. 16 Колэсти прытховав всавири зор, соб муро їло всавири вряма тэ авэл жужо англа Дэвлэ и англа манушэн. 17 Набут бэршэн мэ на слём дэ Ерусалимо, ай тунчи авилём пордэ, соб тэ пэрэдэ мурэ народости даро важ чёrorэн и тэ анэ жэртвы. 18 Вонэ арахкле ман дэ храмо, кала мэ жужараваспэ. Нэ котэ на сля нисави гроза манушэн тай нисаво гвалто. 19 Тунчи авиле койсавэ иудея Цыкня Азиятар. Акэ лэнди трэбуни сля тэ авэ катэ, соб тэ дошарэ ман, кала лэндэ соь исин пэ ман. 20 Чи мэк кодэла, ко исин катэ, пхэнэна, сави дош вонэ арахкле дэ ман, кала ман допхучелас Синедрионо. 21 Чи мэ дошало дэ кодэлэ, со типисилём: «Ман сундисарэн пала кода, со мэ

патьяв дэ оджюндивимо мулэндар»? 22 Феликсо, саво мишто джянэлас пала Дром, отховда кадэва рындо. — Мэ пхэнава лав пав тумаро рындо, кала авэла пхангякоро пхурэдэр Лисии, — дэдуманя вов. 23 Вов прыпхэнда шэлякэрэ пхурэдэрэсти, соб халавдэ тэ дыкхэн пала Павло, нэ и тэ дэн лэсти набут воля и тэ на запхэнэн лэхкэрэ амалэнди тэ лашарэ лэхкэрэ рындуря. 24 Проджиля набут дивэ, тай Феликсо авиля пэхкиря ромняга, сави сля иудеянка пав лавэ Друзилла, и бичалда пала Павло, соб тэ пошунэ пала лэхкоро патявимо дэ Исусо Христо. 25 Кала Павло ачиля тэ дэдумэ пала джювимо пав чячима, пала кода, со трэбуни мишто тэ дыкхэ пала пэ и пала сындо, саво авэла, Феликсо пэрэдаравдапэ тай пхэнда: — Хутилэла пэ авдивэ, джя! Сар трэбуни авэла, мэ тут акхарава. 26 Лэстэ кади ж сля надия, со Павло дэла лэсти ловэ. Колэсти бут вов молы прыпхэнэлэс тэ анэ Павло тай дэдумэлэс лэга. 27 Проджиля дуй бэрша, тай пэ Феликсохкоро тхан ачиля Порции Фесто. Нэ Феликсо ачявда Павло дэ барунэ, соб тэ терэ мишто иудеенди.

25 И кади, трин дивэнди Фесто авиля дэ кодья пхув. Тунчи лиля дром Кесариятар дэ Ерусалимо, 2 тев англунэ рашая тай иудеенгэрэ пхурэдэра сикавдэ дош пэ Павло. 3 Вонэ фартэ мангле Фесто, соб вов тэ тховэл пэ лэн патив тай тэ пэрэлиджял Павло дэ Ерусалимо. Еджинэ вонэ камле тэ стидэлэ тай тэ умарэ Павло пав дром. 4 Фесто пхэнда: — Пала Павло дыкхэн халавдэ дэ Кесария. И мэ сиво котэ авава. 5 Мэк тумарэ пхурэдэра джяна манца и сикавэна дош пэ лэстэ, кала вов терда сось налачэ. 6 Фесто сля лэнца пашэ охто чи дэш дивэ, ай тунчи рисиля дэ Кесария. Пэ авэр диво вов бэшля пэ сундисарехкоро тхан тай прыпхэнда тэ анэн Павло. 7 Кала Павло авиля, иудея, савэ авиле Ерусалимостар, ачиле тэ дошарэ лэ дэ бутэн пхарэн рындонэн, нэ тэ допхэнэ када лэндэ на выджялас. 8 Павло ж камля тэ сикавэ пэхкоро чячимо тай пхэнда: — Мэ на пэрэхуклём иудеенгоро Упхэнимо, и нисо на тердом ни храмошти, ни императости. 9 Фесто камля тэ дэ патив иудеенди, колэсти пхучля Павлостар: — Камэх тэ джя дэ Ерусалимо, соб котэ тут тэ сундисарэн пры ман? 10 Павло пхэнда: — Мэ ачяв англа сындо императохкоро, и лэга трэбуни тэ авав сундисардо. Мэ на тердом иудеенди нисо налачэ, сар ту еджино джянэх. 11 Кала мэ прахари и затердом мэримо, мэк авэл кади. Нэ кала иудея дошарэн ман ивья, никастэ

нэнай зор тэ выдэ ман лэнди. Мэк ман сундисарэл императоро! 12 Фесто дэдуманя пэхкэрэ стидэмага тай пхэнда: — Кала мангэх сындо императохкоро, джяга императостэ. 13 Проджиля набут дивэ, тай дэ Кесария тэ ваздэ патив Фестости авиле тхагари Агриппа тай лэхкири ромни Берника. 14 Вонэ сле котэ койсавэ дивэ, тай Фесто дэдумэлэс тхагарега пала Павлохкоро рындо. — Катэ исин екх мануш, савэ Феликсо ачявда дэ барунэ. 15 Кала мэ слём дэ Ерусалимо, иудеенгэрэ рашая тай пхурэдэра сикавдэ пэ лэстэ дош. Вонэ мангле тэ сундисарэ лэ. 16 Мэ пхэндом лэнди, со римсконэ манушэндэ на прылисто тэ отдэ манушэ дэ вастэн кодэлэнди, ко лэ дошарэн, кала вов майанглал на дыкхэлэпэ лэнца тай на допхэнэла, со вов надошало. 17 Вонэ авиле манца кордэ, и мэ пэ авэр диво бэшлём пэ сундисарехкоро тхан тай прыпхэндом тэ анэн кордэ кадэлэ манушэ. 18 Вонэ ачиле паша лэ, нэ нисо на тердэ, соб тэ долиджя лэхкири дош хотэ дэ екх налачэ рындо, пала саво мэ думисаравас. 19 Нэ машкар лэн сля гвалто пала кода, сар трэбуни тэ тэлэ Дэвлэсти, тай пала Исусо, Саво муля, нэ пала Савэ Павло пхэнда, со Вов джювдо. 20 Мэ на джянглём, сар манди тэ роздыкхэ кадэва рындо. Тай пхучлём Павлостар, чи камэл вов тэ джя дэ Ерусалимо тай тэ прылэ котэ сындо. 21 Павло закамля, соб лэхкоро рындо тэ роздыкхэл императоро. И мэ прыпхэндом тэ рицарэ лэ дэ барунэ ды колэ, сар отбичалава лэ императостэ. 22 Агриппа пхэнда Фестости: — И мэ камав тэ пошунэ кадэлэ манушэ. — Атася шунэга, — пхэнда Фесто. 23 Пэ авэр диво Агриппа тай Берника барэ пхутимага заджиле дэ цэра сындохкири. Лэнца сле пхангякэрэ пхурэдэра тай пативалэ мануша кодэлэ форостар. Фесто прыпхэнда, соб тэ анэн Павло. 24 Тунчи Фесто пхэнда: — Тхагари Агриппа и всавэрэ, ко катэ исин! Тумэ дыкхэн манушэ, пала савэ гроза иудеен анэнас дош манди дэ Ерусалимо тай катэ дэ Кесария и типисиле, со лэсти нащи тэ джювэ. 25 Мэ ж на арахав дэ лэ нисави дош, пала сави лэ трэбуни тэ умарэ. Нэ сар вов мангя императохкоро сындо, мэ тховдом дэ гындо тэ отбичалэ лэ дэ Римо. 26 Нэ мандэ нэнай нисо пэ кадэлэ манушэ, соб тэ искриисарав раести. Колэсти мэ вылиджялдом лэ тумэндэ, и англал всавэрэстар тутэ, тхагари Агриппа, соб ту тэ допхучех лэ тай мэ тэ джянав, со манди тэ искриисарэ. 27 Мэ думисарав, со на пав чячима тэ бичалэ барунаре и тэ на пхэнэ, дэ со исин лэхкири дош.

26 Агриппа пхэнда Павлости: — Мишто, дэдүмэ пала пэ. Павло подлила васт и ачила тэ дэдүмэ: **2** — Тхагари Агриппа! Мэ бахтало тэ допхэнэ англа тут пэхкоро чячимо, кала ман дошарэн иудея. **3** Ту ж мишто джянэх, со прылито иудеендэ тай кода, пала со вонэ ханпэ екх екхэга. Колэсти фартэ мангав тут, соб ту тэ на холявэх, нэ тэ шунэх ман. **4** Иудея мишто джянэн, сар мэ джювдом машкар мурэн манушэн дэ Ерусалимо тэрнэ бэршэндэр. **5** Вонэ дэмут джянэн ман. И кала закамэна, допхэнэна, со мэ джювдом сар фарисеи тай слём стидэмастар, тев всавири зор прытховэнас, соб тэ терэ пав Упхэнима. **6** Авдивэ мэ ачяв англа сындо пала надия пэ Дэвлэхкоро Лав, саво Дэвэл дэня амарэ дадэнди. **7** Дэшудуй чянга амарэ народостар диво тай рят терэн бути Дэвлэсти тай дожутярэн, кала заджяла дэ зор кадэва Лав. Пала кадья надия, тхагари, ман дошарэн иудея. **8** Сости тумэ на патян, со Дэвэл отджювдярэл мулэн? **9** Мэ кади ж на прылаvas Лав Исуохкоро Назаретостар тай мараваспэ кадэлэ сикляримага. **10** Када мэ тераvas дэ Ерусалимо, кала манди дэне лачимо англунэ рашая. Мэ бичалаvas дэ барунэ бутэн свэнтонэн и, кала лэн умарэнас, подаvas пала кода пэхкоро гласо. **11** Мэ бут мараvas лэн дэ всавэрэ синагоги, соб вонэ тэ отпхэнэнпэ пэхкэрэ патявимастар. И кади мижылём пэ лэн, со традаvas лэн и дэ авэр форурия. **12** Екхвар мэ ладаvas дэ Дамаско пав кадэва рындэ зорага тай прыпхэнимага англунэ рашаендар. **13** Тай пав дром пордэ, тхагари, мэ удыхклём дэ епашдиво душлимо болыбнастар, саво пхаболас зоралэдэр кхамэстар. И дэ кодэва душлимо попэлём и мэ, и кодэла мануша, савэ сле манца. **14** Амэ всавэрэ тэлэдэне пэ пхув, тай мэ ушундом гласо, саво дэдүмэлэс манди пав еврейско чиб: «Савло, Савло, сости ту традэх Ман? Пхаро тут пэ Ман тэ выджа». **15** Мэ пхучлём: «Ко Ту, Рае?» — «Мэ Иусо, Савэ ту традэх, — пхэнда Рай. — **16** Ваздэпэ, вщи пэ пурэн тирэн. Мэ авилём, соб тэ терэ тут Мурэ бутярнэга и допхэнимарега пала кода, со ту дыкхлян и со Мэ терава англа тирэ якха. **17** Мэ фирисарава тут тирэ манушэндэр тай наиудеендар, савэндэ Мэ тут бичалав, **18** соб тэ оттерэ лэнди якха и тэ рисарэ лэн калимастар душлимастэ, и сатанастар тай лэхкиря зоратар тэ рисарэ лэн Дэвлэстэ. Соб лэнгоро бэзимо тэ авэл отмукло и соб вонэ кади ж тэ авэн машкар кодэлэн, ка Мэ свэнтисардом патявимага дэ Ман». **19** Тхагари Агриппа, манди нащи сля тэ на кандэ болыбнахкэрэ дыкхлима.

20 Мэ пхэнаvas лав майанглал кодэлэнди, ко сля дэ Дамаско, тунчи дэ Ерусалимо тай пав всавири Иудея. Ай тунчи наиудеенди, тэ ачявэн вонэ бэзимо тай тэ обрисывэн Дэвлэстэ, тэ допхэнэн пэхкэрэ рындонэнца, со чячимага ачявдэ бэзимо. **21** Пала када иудея схутилдэ ман дэ храмо и камле тэ умарэ. **22** Нэ Дэвэл ды авдивэ дэл зор манди. Тай акэ, мэ ачявэ катэ тай допхэнав цыкнэнди и барэнди. Мэ на прытховав нисо кодэлэстэ, со пхэндэ Моисеи тай англунаря. **23** Нэ пхэнав, со Христости сля трэбуни тэ пэрэлиджя кадья грыва, пэрвонэсти тэ отджювдэ мулэндэр и тэ пхэнэ пала душлимо и амарэ манушэнди, и наиудеенди. **24** Кала вов кади допхэнэлэс пала пэ, Фесто обчинда лэхкоро лав. — Ту на дэ пэхкиря годя, Павло, — затиписила вов, — баро їрвалимо терэл тут динилэга! **25** Павло пхэнда: — Пативало Фесто, мэ на динило. И кода, со мэ пхэнав, исин чячимо тай годявэримо. **26** Тхагари, англа савэ мэ пхэнав бидаракоро, джянэл пала када. Нисо кадэлэстар на гаравдо важ лэ, колэсти со терэлэспэ всавэрэндэ пэ якхэн. **27** Тхагари Агриппа, ту патях англунаренди? Мэ джянав, со патях. **28** — Ту думисарэх пала кадья скурто вряма тэ терэ кади, соб мэ тэ авав христианино? — пхэнда Агриппа. **29** Павло дэдүмэня: — Сави б кадья вряма тэ на авэл, скурто чи лунго, мэ мангавпэ Дэвлэсти, соб на какич ту, нэ и всавэрэ, ко шунэл ман авдивэ, тэ авэн кацавэ, сар мэ, кици тэ на прылэн кадэла ланчугурия. **30** Тхагари вщиля тай лэга вщице барэдэр, Берника тай кодэла, савэ бэшэнас лэнца. **31** Вонэ выджиле тай дэдүмэнас екх екхэсти: — Кадэва мануш на терда нисо, соб тэ умарэ лэ чи тэ чувэ дэ барунэ. **32** — Лэ б фэдэр тэ отмуке пэ воля, нэ вов помангя сындэ императохкоро, — пхэнда Агриппа Фестости.


27 Кала сля пхэндо, со амэ ладах дэ Италия, Павло и аврэн барунарен пэрэдэне шэлякэрэ пхурэдэрэсти пав лавэ Юлии, императохкэрэ халавдэнгэрэ стидэмастар. **2** Амэ бэшле пэ адрамитско корабли, савэсти трэбуни сля тэ заджя дэ портурия пав Цыкни Азия, тай лагле. Амэнца сля македонянино Аристархо, саво бариля дэ Фессалоника. **3** Пэ авэр диво амэ авиле дэ Сидоно. Юлии сикавда дорымо Павлостэ тай отмукия лэ, соб вов тэ спхирэл пэхкэрэ амалэндэ и соб вонэ тэ лашарэн лэхкэрэ рындурия. **4** Тунчи амэ упалэ выджиле дэ море тай проджиле Кипро кодэла ригатар, тев на пхурдэлэс балвал. А кала на кади, балвал бы пхурдэлэс ворта пэ амэн.

5 Амэ пэрэлагле море паша пхувен дэ Киликия тай Памфилия и ачиле дэ форо Мира, саво дэ Ликия. 6 Котэ шэлякоро пхурэдэр арахла корабли Александриятар, саво дхялас дэ Италия, тай тховда амэн пэ лэстэ. 7 Бут дивэн амэ полохкэ ладагас англал. Сля фартэ пхаро тэ ладэ, нэ амэ авиле дэ Книдо. Важ кода со балвал на дэлас амэнди тэ ладэ, амэ подлагле Критостэ кодэла ригатар, тев на пхурдэлас балвал, пашэ Салмони. 8 Амэнди сля фартэ пхаро тэ ладэ паша берего, нэ амэ авиле дэ тхан, саво акхарэлпэ Лаче Пристани, надур форостар Ласея. 9 Амэ хасардэ бут вряма и нащи сля тэ ладэ пав пане дурэдэр, соб тэ на хасявэ, колэсти со проджила иудеенгоро посто. Тунчи Павло подпхэнда: 10 — Мэ дыкхав, со тэ ладэ дурэдэр авэла фартэ пхаро. И на кицик мищимо пэ корабли хасявэла, нэ хасявага и амэ. 11 Нэ шэлякоро пхурэдэр на кандэня Павло, ай кандэня кодэлэ, ко лиджялас корабли тай кораблехкэрэ хулае. 12 Ай сар дэ кодэва форо нащи сля тэ пэрэмарэ ївэнд, бут манушэн прылиле дэ гындо, со трэбуни тэ ладэ котарь и тэ авэ дэ Финиксо, тхан пэ Крито, тев заджянас бут корабли, и саво сля оттердо пэ юго тай северо-западо, соб тэ ачелэ котэ. 13 Пхурдэня южно балвал тай бутярнэ кораблестар прылиле дэ гындо, со када лэнди трэбуни. Тунчи ваздэне якори тай лагле паша Критохкоро берего. 14 Проджила набут вряма тай пхурдэня бари северно-восточно балвал, сави акхарэлпэ Эвракилоно. 15 Амэндэ на сля зора тэ ладэ дэ кодыя риг, тев пхурдэлас балвал, колэсти балвал порисарда корабли тай ачиля тэ традэ лэ. Тунчи амэ отдэнэлэ кодэлэсти, со авэла, тай балвал традэня корабли пав пане. 16 Амэ подлагле островостэ, саво акхардапэ Кавда. Котэ амэндэ баря зорага выджия тэ фирисарэ лодка. 17 Кала ла подлиле пэ корабли, бутярнэ змукле доря кораблестар тай обпхангле лэ. Вонэ дарэне тэ заджя дэ Сирто, тев набут пани, колэсти обмукле парусо тай балвал дурэдэр лиджялас амэн пав пане. 18 Бари балвал кади чувэлас корабли дэ рига, со пэ авэр диво вонэ ачиле тэ вычувэс бужэ кораблестар. 19 Пэ трито диво вонэ пэхкэрэ вастэнца вычутэ дэ пани и вса авэр, со ачиляпэ пэ корабли. 20 Койсавэ дивэ на душолас ни кхам, ни чергэня, тай зорали балвал пхурдэлас. Амэ хацардэ надия, со фирисагапэ. 21 Мануша бут вряма нисо на хале. Тунчи Павло вщиля машкар лэн тай пхэнда: — Тумэнди трэбуни сля тэ кандэ ман тай тэ на выладэ Критостар. Тунчи б тумэ на прылиле кадья грыжа и на хацардэ б амарэ бужэ. 22 Нэ кана пхэнав тумэнди, соб тумэ тэ лошавэн. Нико тумэндар на хасявэла, кицик корабли розмарэлапэ. 23 Кодэла рятяга мандэ авиля ангело Дэвлэстар, Кахкоро мэ исин и Касти терав бути. 24 Вов пхэнда манди: «Павло, на дара! Тути трэбуни тэ аче англа императоро. Акэ, Дэвэл отдэня тути всавэрэн, ко ладэл туга». 25 Колэсти лошавэн! Мэ патяв Дэвлэсти. Вса авэла кади, сар манди пхэндо. 26 Корабли вычувэла пэ савось острово. 27 Пэ дэшуштарто диво, кала амэн инте чувэлас пав Адриатическо море, дэ епашрят бутярнэ кораблестар полиле, со амэ поджях пхуятэ. 28 Вонэ продыкхле панехкоро лунгимо тай выджия, со лунгимо сля пашэ трянда шов метруря. Ай кала подыкхле инте екх моло, лунгимо сля пашэ бишта эфта метруря. 29 Бутярнэ даранас, со амэн розмарэла пав барэн, и змукле палал кораблестар штар якоря, тай еджинэ манглэпэ, соб сигэдэр тэ авэл диво. 30 Вонэ камле тэ нашэ кораблестар тай ачиле тэ змукэ лодка, соб тэ фирисарэпэ, ай сикавэнас, со камэн тэ змукэ якори кади ж и англал кораблестар. 31 Павло пхэнда шэлякэрэ пхурэдэрэсти тай халавдэнди: — Кала кадэла мануша на аченапэ пэ корабли, тумэ хасявэна. 32 Тунчи халавдэ пэрэчиндэ доря, савэ рицарэнас лодка, и вой тэлэдэня дэ море. 33 Дэнзор Павло мангя манушэн, соб вонэ тэ хан. — Дуй куркэ, сар тумэ бэшэн дэ грыжа, аченпэ бокхалэ и нисо на хан, — пхэнда вов. — 34 Мэ мангав тумэн тэ хан, тай када дэла зор тумэнди тэ фирисарэпэ. Никастэ тумэндар ни екх бал на тэлэдэла шэрэстар. 35 Кала Павло пхэнда, вов лиля мандро, наисарда Дэвлэ англа всавэрэн, пхагя и ачиля тэ ха. 36 Мануша лошыле, и всавэрэ хале. 37 Всавэрэн сля пэ корабли дуй шэла эфтадэша шов манушэн. 38 Кала мануша чялиле, вонэ ачиле тэ терэ корабли локхэга тай тэ чувэ ворзо дэ море. 39 Дэнзор вонэ на уджянгле пхув, сави сикавдапэ, нэ удыкхле кацик тишаехкоро берего, тев и камле тэ выцырдэ корабли. 40 Бутярнэ обчиндэ якоря тай ачявдэ лэн дэ море, тунчи розпхангле кораблехкири рули, подлиле цыкно парусо тай бичялдэ корабли берегостэ. 41 Нэ котэ сля набут пани тай корабли заджиля дэ тишай. Епаш корабли сля пэ тишай, а епаш розмарэлас пани. 42 Халавдэ ж камле тэ умарэ всавэрэн барунарен, соб вонэ тэ на нашэн, кала выджяна панестар. 43 Нэ пхангьякоро пхурэдэр камля тэ фирисарэ Павло тай на домукля лэн тэ терэ кади. Вов прыпхэнда манушэнди, савэ джянэнас, сар пэ тэ лиджя дэ пани, тэ хукэ дэ море

англал всавэрэндар и тэ авэ пэ берего. 44 Ай савэ ачилепэ, лэнди трэбуни сля тэ доджя берегостэ пэ сандя кораблестар тай пэ котора сандендар. Кади всавэрэ фирисардэпэ тай выджиле пэ пхув.

28 Кала амэ фирисардэпэ, тунчи уджянгле, со кодэва острово акхарэлпэ Мальта. 2 Мануша, савэ котэ джювдэ, тердэ важ амэн бари патив. Вонэ тховдэ яг тай акхардэ амэн пэстэ, колэсти со сля шылало тай джялас брышынд. 3 Кала Павло стидэня кашта и ачиля тэ чувэ дэ яг, лэсти дэ вастэ вхалэпэ сап, саво выгульда каштэндар, кала фирисарэласпэ ягатар. 4 Кала катутнэ мануша удыхкле, со Павлоствэ пэ вастэ амгладёл сап, вонэ ачиле тэ дэдүмэ екх аврэсти: — Душол, со кадэва умарэлас манушэн. Вов фирисардапэ панестар, нэ чячихахири дэвли отлэл лэхкоро джювимо. 5 Нэ Павло счута сапэ дэ яг, и вов на терда лэсти нисаво бибахталимо. 6 Мануша жэ дожутярэнас, со вов ачела тэ шулёл чи сиво мэрэла. Вонэ дожутярдэ бут вряма и кала удыхкле, со лэга нисо на терэлпэ, тунчи парувдэ пэххири дума тай ачиле тэ пхэнэ, со када савось дэвэл. 7 Надур ачелас грэда, тев джювда пхурэдэр пав острово, савэ акхарэнас Публии. Вов пативалэ прылиля амэн, тай амэ сле лэстэ трин дивэ. 8 Лэхкоро дад сля насвало тай пашлёлас пэ пато. Лэстэ сля пхабаримо тай фартэ дукхалас води. Павло авиля лэстэ, помангялэпэ, тховда пэ лэстэ васта тай састярда лэ. 9 Тунчи и авэр насвалэ островостар ачиле тэ авэ лэстэ тай высастярэнаспэ. 10 Вонэ дэне амэнди бари патив, и кала амэ лагле, стидэне амэнди вса, со трэбуни важ дром. 11 Проджиля трин чёна, и амэ выджиле дэ море пэ корабли Александриятар, саво пролидджялас ївэнд пэ кодэва острово и акхарэласпэ «Дуй пхрала». 12 Амэ авиле дэ Сиракузы и просле котэ трин дивэ. 13 Котарь амэ ваздэнепэ тай авиле дэ Ригии. Пэ авэр диво пхурдэня южно балвал, тай дивэга амэ авиле дэ Путолы. 14 Котэ амэ араккле пхралэн, тай вонэ мангле амэн тэ пролидджя лэнца састо курко. Тай акэ, амэ авиле дэ Римо. 15 Пхрала дэ Римо ушундэ, со амэ авиле, тай джиле тэ удыхкэ амэн ды Аппиэхкоро форо тай ды тханэ, саво акхарэлпэ «Трин гостиницы». Кала Павло удыхкля лэн, вов наисарда Дэвлэ тай прылиля зор. 16 Амэ авиле дэ Римо, тай Павлости дэне воля тэ джювэ екхэсти. Паша лэ джювда кацик халавдо, саво дыкхэлас пала лэ. 17 Проджиля трин дивэ, тай Павло акхарда пативалэн иудеен. Кала вонэ авиле, вов пхэнда лэнди: — Пхралалэ,

ман спхангле дэ Ерусалимо тай отдэне дэ вастэн римлянонэнди. Нэ мэ на теравас нисо амарэ народости и на отпхэнаваспэ кодэлэстар, со сля прылито амарэ дадэндэ. 18 Римлянуря роздыкхле муро рындо тай камле тэ отмукэ ман, колэсти со дэ ман нэнай дош, пала савя трэбуни тэ умарэ. 19 Нэ сар иудея на сле пала ман, мэ манглём сындо императорхкоро. Мэ тердом кади на важ кода, соб тэ дошарэ муро народо. 20 Колэсти мэ акхардом тумэн авдивэ, соб тэ дыкхэпэ тай тэ подэдүмэ тумэнца. Пала надия Израилеххири ман спхангле кадэлэ ланчугонэнца. 21 Кодэла пхэндэ: — Амэнди нико на искирисарда пала тут Иудеятар. Тай котарь нико пхралэндар амэндэ на авэлас и на дэдүмэлас пала тут намишто. 22 Нэ амэ камле тэ пошунэ, со ту думисарэх. Амэ кицик джянах, со мануша пав всавэрэн тханэн осундисарэн кадэва сикляримо. 23 Вонэ допхэндэпэ Павлогэ тай дэ диво, саво вонэ вытидэне, лэстэ цэрэ авиля бут манушэн. Павло дэнзор и ды бельвеля пхэнэлас лэнди пала Дэвлэхкоро Тхагаримо тай допхэнэлас пала Иусо Моисеехкэрэ Упхэнимастар и англунарендар. 24 Екх лэндар патине, ай авэр — нат. 25 Вонэ ачиле тэ халэ машкар пэстэ, и кала вонэ уджянас, Павло дэдүмэня кацавэ лава: — Мишто пхэнда Свэнто Фано тумарэ дадэнди уштэнца англунарехкэрэ Исаияхкэрэ: 26 «Джэ кадэлэ народостэ тай пхэн: "Авэна тэ шунэ, нэ на полэна, авэна тэ дыкхэ, нэ на дыкхэна. 27 Ыло кадэлэ манушэнгоро забария чеченэга, вонэ на шунэн канэнца тай затердэ якха, соб тэ на дыкхэн якхэнца, тэ на шунэн канэнца, тэ на полэн їлэга и тэ на обрисявэн, соб Мэ састярдом лэн"». 28 Нэ джянэн кана, со фирисаримо Дэвлэхкоро бичалдо наиудеенди: вонэ и ушунэна кадэва Лав. 30 Павло инте дуй бэрша джювда дэ Римо, тев намисарэлас цэр тай прылэлас всавэрэн, ко авэлас лэстэ. 31 Вов нисостар на даралас тай на сля ника, соб тэ запхэнэл лэсти тэ розпхэнэ пала Дэвлэхкоро Тхагаримо и тэ сиклярэ пала Рае Иусо Христо.



The New Jerusalem

"I saw the holy city, New Jerusalem, coming down out of heaven from God, prepared like a bride adorned for her husband. I heard a loud voice out of heaven saying, 'Behold, God's dwelling is with people, and he will dwell with them, and they will be his people, and God himself will be with them as their God.'"

Revelation 21:2-3

Reader's Guide

Servi Romani at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Servi Romani at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Romani-Vlax---Servi-Bible/Noted

Aionian Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words but may wrongly imply *eternal* or *Hell*. Note placement is skipped or adjusted for verses with non-standard numbering.

Abyssos

Лукастар 8:31
Romans 10:7
Revelation 9:1
Revelation 9:2
Revelation 9:11
Revelation 11:7
Revelation 17:8
Revelation 20:1
Revelation 20:3

aidios

Romans 1:20
Jude 1:6

aiōn

Matthew 12:32
Matthew 13:22
Matthew 13:39
Matthew 13:40
Matthew 13:49
Matthew 21:19
Matthew 24:3
Matthew 28:20
Mark 3:29
Mark 4:19
Mark 10:30
Mark 11:14
Лукастар 1:33
Лукастар 1:55
Лукастар 1:70
Лукастар 16:8
Лукастар 18:30
Лукастар 20:34
Лукастар 20:35
John 4:14
John 6:51
John 6:58
John 8:35
John 8:51
John 8:52
John 9:32
John 10:28
John 11:26
John 12:34
John 13:8
John 14:16

Рындоря 3:21
Рындоря 15:18
Romans 1:25
Romans 9:5
Romans 11:36
Romans 12:2
Romans 16:27
1 Corinthians 1:20
1 Corinthians 2:6
1 Corinthians 2:7
1 Corinthians 2:8
1 Corinthians 3:18
1 Corinthians 8:13
1 Corinthians 10:11
2 Corinthians 4:4
2 Corinthians 9:9
2 Corinthians 11:31
Galatians 1:4
Galatians 1:5
Ephesians 1:21
Ephesians 2:2
Ephesians 2:7
Ephesians 3:9
Ephesians 3:11
Ephesians 3:21
Ephesians 6:12
Philippians 4:20
Colossians 1:26
1 Timothy 1:17
1 Timothy 6:17
2 Timothy 4:10
2 Timothy 4:18
Titus 2:12
Hebrews 1:2
Hebrews 1:8
Hebrews 5:6
Hebrews 6:5
Hebrews 6:20
Hebrews 7:17
Hebrews 7:21
Hebrews 7:24
Hebrews 7:28
Hebrews 9:26
Hebrews 11:3
Hebrews 13:8
Hebrews 13:21
1 Peter 1:23

1 Peter 1:25
1 Peter 4:11
1 Peter 5:11
2 Peter 3:18
1 John 2:17
2 John 1:2
Jude 1:13
Jude 1:25
Revelation 1:6
Revelation 1:18
Revelation 4:9
Revelation 4:10
Revelation 5:13
Revelation 7:12
Revelation 10:6
Revelation 11:15
Revelation 14:11
Revelation 15:7
Revelation 19:3
Revelation 20:10
Revelation 22:5

aiōnios

Matthew 18:8
Matthew 19:16
Matthew 19:29
Matthew 25:41
Matthew 25:46
Mark 3:29
Mark 10:17
Mark 10:30
Лукастар 10:25
Лукастар 16:9
Лукастар 18:18
Лукастар 18:30
John 3:15
John 3:16
John 3:36
John 4:14
John 4:36
John 5:24
John 5:39
John 6:27
John 6:40
John 6:47
John 6:54
John 6:68

John 10:28
John 12:25
John 12:50
John 17:2
John 17:3
Рындоря 13:46
Рындоря 13:48
Romans 2:7
Romans 5:21
Romans 6:22
Romans 6:23
Romans 16:25
Romans 16:26
2 Corinthians 4:17
2 Corinthians 4:18
2 Corinthians 5:1
Galatians 6:8
2 Thessalonians 1:9
2 Thessalonians 2:16
1 Timothy 1:16
1 Timothy 6:12
1 Timothy 6:16
2 Timothy 1:9
2 Timothy 2:10
Titus 1:2
Titus 3:7
Philemon 1:15
Hebrews 5:9
Hebrews 6:2
Hebrews 9:12
Hebrews 9:14
Hebrews 9:15
Hebrews 13:20
1 Peter 5:10
2 Peter 1:11
1 John 1:2
1 John 2:25
1 John 3:15
1 John 5:11
1 John 5:13
1 John 5:20
Jude 1:7
Jude 1:21
Revelation 14:6

eleēse

Romans 11:32

Geenna

Matthew 5:22
Matthew 5:29
Matthew 5:30
Matthew 10:28
Matthew 18:9
Matthew 23:15
Matthew 23:33
Mark 9:43

Mark 9:45
Mark 9:47
Лукастар 12:5
James 3:6
Hadēs
Matthew 11:23
Matthew 16:18
Лукастар 10:15
Лукастар 16:23
Рындоря 2:27
Рындоря 2:31
1 Corinthians 15:55
Revelation 1:18
Revelation 6:8
Revelation 20:13
Revelation 20:14

Limnē Pyr

Revelation 19:20
Revelation 20:10
Revelation 20:14
Revelation 20:15
Revelation 21:8

Sheol

Англунимо 37:35
Англунимо 42:38
Англунимо 44:29
Англунимо 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6

Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Иона 2:2
Habakkuk 2:5

Tartaroō

2 Peter 2:4

Questioned


None yet noted




Abraham's Journey

"By faith, Abraham, when he was called, obeyed to go out to the place which he was to receive for an inheritance. He went out, not knowing where he went"

Hebrews 11:8




"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



"For the Son of Man also came not to be served, but to serve, and to give his life as a ransom for many"
Mark 10:45

Jesus' Journeys



"Paul, a servant of Jesus Christ, called to be an apostle, set apart for the Good News of God"
Romans 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Usher)

Jesus Christ born 4 B.C.



New Heavens and Earth



- Christ returns for his people**
- 1956** Jim Elliot martyrd in Ecuador
- 1830** John Williams reaches Polynesia
- 1731** Zinzendorf leads Moravian mission
- 1614** Japanese kill 40,000 Christians
- 1572** Jesuits reach Mexico
- 1517** Martin Luther leads Reformation
- 1455** Gutenberg prints first Bible
- 1323** Franciscans reach Sumatra
- 1276** Ramon Llull trains missionaries
- 1100** Crusades tarnish the church
- 1054** The Great Schism
- 997** Adalbert martyrd in Prussia
- 864** Bulgarian Prince Boris converts
- 716** Boniface reaches Germany
- 635** Alopen reaches China
- 569** Longinus reaches Alodia / Sudan
- 432** Saint Patrick reaches Ireland
- 397** Carthage ratifies Bible Canon
- 341** Ulfilas reaches Goth / Romania
- 325** Niceae proclaims God is Trinity
- 250** Denis reaches Paris, France
- 197** Tertullian writes Christian literature
- 70** Titus destroys the Jewish Temple
- 61** Paul imprisoned in Rome, Italy
- 52** Thomas reaches Malabar, India
- 39** Peter reaches Gentile Cornelius
- 33** Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we?			▶		Genesis 1:26 - 2:3	
How are we sinful?			▶		Romans 5:12-19	
Where are we?			▶			
					Innocence	
			Eternity Past	Creation 4004 B.C.		
▶ Who are we?	God	Father	John 10:30	God's perfect fellowship	Genesis 1:31 God's perfect fellowship with Adam in The Garden of Eden	
		Son				
		Holy Spirit				
	Mankind	Living		Genesis 1:1 No Creation No people		
		Deceased believing				
		Deceased unbelieving				
	Angels	Holy			Genesis 1:31 No Fall No unholy Angels	
		Imprisoned				
		Fugitive				
		First Beast				
		False Prophet				
		Satan				
	Why are we?			▶		Romans 11:25-36, Ephesian 2:7

Mankind is created in God’s image, male and female He created us

Sin entered the world through Adam and then death through sin

When are we?				
Fallen				Glory
Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth
1 Timothy 6:16 Living in unapproachable light				Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City
John 8:58 Pre-incarnate		John 1:14 Incarnate	Luke 23:43 Paradise	
Psalm 139:7 Everywhere		John 14:17 Living in believers		
Ephesians 2:1-5 Serving the Savior or Satan on Earth				
Luke 16:22 Blessed in Paradise				
Luke 16:23, Revelation 20:5,13 Punished in Hades until the final judgment				
Hebrews 1:14 Serving mankind at God's command				
2 Peter 2:4, Jude 6 Imprisoned in Tartarus				Matthew 25:41 Revelation 20:10 Lake of Fire prepared for the Devil and his Angels
			Revelation 20:13 Thalaasa	
1 Peter 5:8, Revelation 12:10 Rebelling against Christ Accusing mankind			Revelation 19:20 Lake of Fire	
			Revelation 20:2 Abyss	

For God has bound all over to disobedience in order to show mercy to all

Destiny

Servi Romani at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. *"If the first fruit is holy, so is the whole,"* Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



"Go and make disciples of all nations, baptizing them in the name of the Father and of the Son and of the Holy Spirit"
Matthew 28:19

